

17196/B/2


A xvii a

Dup.

Dukem
120 fr. fr.
Jan. 29

ms. # 178

A. CORN. CELSI
DE
M E D I C I N A
LIBRI OCTO
AD OPTIMAS EDITIONES
COLLATI
PRÆMITTITUR NOTITIA LITERARIA
STUDIIS SOCIETATIS BIPONTINÆ



EDITIO ACCURATA

BIPONTI
EX TYPOGRAPHIA SOCIETATIS
CICIDCCLXXXVI

A. CORN. CELSI

DE

MEDICINA

LIBRI VIII.



Digitized by the Internet Archive
in 2016 with funding from
Wellcome Library

<https://archive.org/details/b28757804>

A. C O R N. C E L S I

V I T A.

A JOANNE RHODIO CONSCRIPTA.

CORNELII Celsi laudabilem in Re Medica operam annis jam mille sexcentis, & quod superat, experientia, veritatis prima parens, feliciter probavit. Nec melioris animi quisquam ita ab omni humanitate remotus fuit, cui non venerandum tam illustre nomen. At ingenio magis, quam origine notum, quam, relicta soli animo gloria, temporis diuturnitas posteritatis memoriæ exemit. Quamvis enim Romæ vixisse Celsum, ipsius, sive ut aliis visum, Scribonii Largi ad J. Calistum Epistola indicio sit: non desunt tamen causæ, cur addubitem, patria, an jure civitatis, ipsum Romanis accenseam. Maximeque, cum præter hunc quidam Julius Celsus, Hadriano Imperatori a consiliis, vel ex aliorum sententia, Alexandri Severi temporibus, Juris scientia perhibeatur claruisse. Vid. Spartianum in Hadr. 30, & Pompon. IC. l. 2 in fin. de Orig. Jur. & Politianum lib. 5 Epist. ad Jac. Modestum. Equidem Celsum patrem ac filium Jureconsultis annumerat Hotomannus in Descriptione Jurisconsultorum, & Juventium Celsum patrem ad Vespasiani Imperatoris tempora refert Jacob. Gothofred. Histor. Jur. Civil. cap. 7 de Jurisconsultorum successione. Idem Celsum patrem & filium sub Trajano, Hadriano, Antonino Pio vixisse censet. Verum & Apulejus Celsus.

sus, Valentis ac Scribonii Largi in Medicis magister, occurrit apud Scribonium Largum de Compos. Med. cap. 94 & 171. Cujus præter Agricola Woverius in Apuleji vita mentionem iniecit. Nisi forte cum Cornario in Marc. Empirici Præfat. interposito inciso, Apulejo, Celso, distincte legendum fuerit. Ita in præfat. Marcell. & Apulejus & Celsus occurrunt. Volaterranus etiam meminit in Anthropologia lib. 14, Celsi cujusdam, qui philosophiæ Stoicæ sectator, Origenis erat adversarius, magiæ scientia notus, cui Lucianus Pseudo-Mantem inscripsit. Ejusdem quoque nominis ibidem, imperante Nerone, e Galliis puer novennis martyrio nobilitatus. Nummo etiam innotuit apud Augustin. Dialogo 5 de Num. Celsus quidam Illvir. Noster autem Augusti ævo floruit, ex quorundam sententia, inter quos Jo. Britannic. in Juvenal. Sat. 6 & 7, Ovidii auctoritate, vel ut Jo. Cajo placuit, Cl. Tiberii, A. C. 29; aut certe Caji Imp. conjectura Sambuci, viri antiquitatis notitia clarissimi. Major tamen eruditorum pars sub Tiberio vixisse, vel forte ipso imperante natum, usque ad Trajani tempora vitam produxisse censet; quamvis & sub Nerone vixisse putet Thom. Fienus: ut uno seculo vetustior Galeno videatur. Ceterum non levem hic de patria ejus dubitandi occasionem præbet Cæl. Rhodiginus, qui Antiqu. Lect. Lib. 14 cap. 5, Veronenses, ait, cum Macrobio, Vitruvio, & Plinio, Celsum quoque suum ortu civem agnoscere. Librorum inscriptionibus hujusmodi divinationes stabiliri assolent: sed exigui momenti munimento. Notius enim est, quam ut pluribus confirmetur, librorum titulos literatoribus & librariis arbitrarios fuisse, vixque veterum quempiam ulli suorum Commentariorum quidquam prænotasse, referente de semet id ipsum Galeno lib. 7 Method. Med. cap. 1, qui id officii ab amicis habuit: haud dubie istius ævi modestia,

quod ingenia admiratione superiora protulit. Sed enim, ut mala exempla ex bonis initiis orta : ita ex æmula, in conquirendis magnorum ingeniorum monumentis, Principum munificentia, accrescente paulatim librariorum avaritia, omnes prope optimorum etiam auctorum præscriptiones impune, ad lucrosam cujusque libidinem, immutatae, ne dicam adulteratae.

Atque ut ad Celsum redeam ; quot ejus hodie editiones, tot ferme inscriptiones diversae. Cæsarii habet, Aurelii Cornelii Celsi de Re Medica VIII Libri eruditissimi. *Vulgatae Lugdunenses omnes, & Leidensis modestius sine phalerato encomio A. C. C. D. M. L. VIII.* Horum priorem Cajus sic mutavit : Aurelii Cornelii Celsi Romani de Re Medica Libb. VIII pereruditi. *H. Stephanus in suo exemplari ceteris Medicinæ principibus adjecto receptæ lectioni subdidit : Operis ab eo scripti Pars Sexta ; vet. Codicum MS. auctoritatem secutus, quibus communis hæc inscriptio : A Cornelii Celsi Artium Liber VI. Nihil tamen hic præter consilium & rem ab illo temere factum. Patriam enim sive auctor ipse, sive alius quispiam addiderit, id certe non caret vetustatis exemplo, potissimum apud Græcos, quos inter Celsus sibi Hippocratem Communi inprimis imitandum proposuit, cujus etiam pleraque non infeliciter Latino sermone reddidit, suam ipse testatus in Epist. ad Pullium Natalem in hoc studiorum genere diligentiam, longe accuratiorē, quam Largii Designatiani, qui Epistola ad filios se fuisse liberiores fatetur, quemadmodum notante Cornario in Dedicat. Marcelli, in plerisque Hippocratem expressit, ut integras sententiarum periodos ex ipso descriptas subinde in eo videas ; immo tota capita nihil aliud quam Hippocratis sententias ad verbum reddunt. Hinc non immerito Hippocratis Simiam dixit Nic. Manardus, de V. S. in Pleurit. f. 8. Etsi vero Latini scriptores præ-*

triam haud usque jaclabant : neutiquam tamen diffidendum, antiquitus Romanæ civitatis jus gloriosum fuisse. Quo forte venditores auctorem nostrum commendare satagebant ; sive is meritis & gratia civium numero adscriptus esset ; sive Roma oriundus. Posterius tamēn ut credam, suadet præter apertum auctoris lib. 5 cap. 21 textum, Epistola ejusdem ad Callistum, & persuadet ad Pullium Natalem altera ; in quibus imprimis viri boni genius conspicitur. Immo Marcellus in Præf. operis Cornelium Celsum inter viros illustres & cives enumerat, quidquid ei imposuerit Verderius Cens. p. 144. Ejus Columella, Claudii tempore clarus, ut æqualis aut certe paulo superioris, Rei Rust. lib. 1 cap. 1 sic meminit : Nostrorum temporum Cornelius Celsus, totum corpus disciplinæ quinque libris complexus est. Quem Rusticam intellexisse, vero proximum est. Quintilianiani sententia Inst. Orat. lib. 10 cap. 1. Vir eruditus, inter eos philosophos Latinos, quos eloquentes literæ Romanæ tulerunt, qui scripsit non parum multa, scepticos sequutus, non sine cultu & nitore. Ideoque ob nimiam novitatis cupiditatem, ejusdem censura notatur. Scripta ejus sigillatim prodidit Volaterranus Anthropol. l. d. Cornelius Celsus, mediocri vir ingenio, non solum artem Rhetoricam, sed de re Militari, & de Rusticana, deque Medicina libros composuit. Quæ omnia J. Doussa, æternum gentis & generis sui decus, in Silva Extemporal. hoc Epigrammate venustissime complexus :

Facta urbana tuo res Rustica munere, scriptis
Nec minus illustris est Medicina tuis.

Hinc quoque Militiæ tractasti commoda Rhetor.

Hoc Martem Musis jungere, Celse, fuit.

Subjungit Polyhistor Italus : Ad nos tantum ejus Medicina pervenit, oratorio more conscripta. Sed

& quædam Rhetorica ejus nostra ætate Sixti Popmæ studio feruntur emissa. Veterinariam quoque conscripisse auctor est Mercurialis lib. 4 cap. 2, & Phil. Ingrass. Quæst. de Veterinar. cap. 9. Herbarium vero ei adscriptum, Apuleji potius credit in vita Apuleji Elmenhorstius. Julium quidem Celsum inter rei militaris scriptores enumerat Rob. Valtur: quemadmodum huic a nonnullis adscripta sunt Julii Cæsaris Commentaria. De quibus tamen nihil vere constat. Varia sane ejus eruditio aliud prodere non potest, quam virum ingenue natum, magna seculi felicitate, quod bonarum literarum erat feracissimum. Excepit nempe coluitque ea ætas viros scientia, prudentia, ac eloquentia summos, Tullium, Sallustium, Catullum, Virgilium, Propertium, Horatium, Tibullum, Manilium, Vitruvium, Antonium Musam, Ovidium, Livium, Scribonium Largum, Valerium Maximum, Vellejum Paterculum: atque si se in Claudii imperium ipsius extenderit vita, Quintum Curtium, Persium, Senecam, Silium Italicum, Plinium, viros omnes consummatissimos, in quibus tamen postremum nonnulli Celso juniorem censent. Opinionem meam firmat laudabilis veterum consuetudo, qua tria nomina Nobiliorum, Celso etiam Plinii auctoritate rata; Libertis raro, nec ferme sine gravi causa unquam concessa scimus, quibus tamen semper servile nomen remansit. Nec moror, quod Celsi Epistolæ apud Marcellum in limine operis prænomen desit, quo soli Romani insigniebantur. Nomen enim apud bonos auctores sæpe prænomen & cognomen includit: Hinc Martialis:

Ut jugulem curas, nomen utrumque bibam.

Salutaribus itaque disciplinis Græcisque literis, non levi nobilitatis indicio, recte institutus, facile potuit seculo tam augusto ac beato, nihil non (ut ipse in Epi-

stola ad Natalem refert) dignum sublimi Romanorum majestate de bono Medicinæ artis splendidissime scribere, idque perennitati & literis mandare, utilitatis magis quam delectationis causa.

Scio equidem, non deesse multæ auctoritatis viros; qui ex modo adducta Celsi Epistola opinantur, ipsum animo in diversa studia diviso, Græca dumtaxat medicinalia in Latinum convertisse, aut Empedoclis & Democriti exemplo non ut merus atque ad quæstum Medicus, sed ut sapientem, atque ut Columellæ verbis utar, universæ naturæ prudentem, Medicinam veluti philosophiæ partem cum sapientiæ studio conjunxisse. Ideoque nec factam ejus ab Aureliano mentionem, Barthio Advers. lib. 38 cap. 3 censente. Nec denique unquam Medicinæ operatum. Credat, qui volet. Nec eam litem meam facio. Medicum certe agnovit magnus Scaliger de Re Num. 36. Remedia quidem, Hippocratis & Galeni exemplo, aliunde congesta digessisse, ultro largior: ipsam vero morborum τέχνην & θεωρίαν proprio ingenii ductu contextam pro me res ipsa loquitur. Quin ipsum pharmaca præbuisse, non mediocri gloria, ex ipsius ad Julium Callistum Epistola satis liquet. Quorum artificiosam mixtionem se accurate intellexisse, prodit ipse lib. 7 cap. 26. Unde Cornarius fortassis inter Pharmaceuticos reposuit. Immo dedita opera ab aliis prætermissa proferre ac illustrare voluisse, censuit Minadous, variæ eruditionis Medicus, de Ext. Affect. lib. 2 cap. 3. Maximeque Medicum ejus Chirurgica probant, quæ, Gesneri in Catalogo Chirurgorum sententia, veterum solus Latine scripsit, ut vere ipsum inter Chirurgos reponat doctissimus Septalius Animadv. lib. 8. Caut. 1 & 40. Tanta vero id fide peregit, ut Hieronymus ab Aquapendente, Medicus & Chirurgus usu vel annis nemini secundus, in Operat. Chirurg. cap. de Chir. Dent. his verbis sese in ipsius laudes diffunde-

rit : Mirabilis Celsus in omnibus : quem nocturna versare manu, versare diurna, consulo. *Nec mirum : cum Celsus eruditissimo Manardo Epist. Medic. lib. 9 Epist. 1, bonus & fidelis Hippocratis interpret, licet in aliquo verbo quandoque lapsus videatur. Quod viro in omni literarum genere exercitato vel ipsa πολυγραφία libenter profecto condonari jubet, quamvis non diffiteatur ipse, non pauca se ex aliena quandoque sententia posuisse. Horatio pariter Augenio de Miss. Sanguin. lib. 8 cap. 1, Lomnio, Ronssseo Epist. Medic. lib. 8 sect. 3 cap. 7, Schenckio, Jo. Heurnio, Bened. Matamoros, Rod. a Castro, innumerisque præclari judicii Medicis, propter singularem & succinctam cum elegantia doctrinam, Latinus Hippocrates appellatur, in quo Pantini judicio Comment. ad Celsi lib. 1 cap. 1 optimæ methodi ac viæ rationisque docendi discendique, & in summa brevitate mira artis & sapientiæ observatio plerumque animadvertatur. Recte igitur Agricola de Pond. Rom. lib. 4, Celsi, inquit, auctoritas Medicis nota est, aut saltem esse debet. Quam elegantissimis verbis Cælius Rhodiginus Antiq. Lect. lib. 26 cap. 3 insinuavit : A Cornelio Celso versuram faciunt multi. Verum citra illius sententiam nihil ferme promunt ; perinde ac verba sint veterum sacrorum, quæ demutasse piaculare flagitium plane censeri debeat, quodque hostiis majoribus procures. Inde Fernelio, Franciæ Hippocrati, referente Plantio in vita Fernelii, cum ob orationis puritatem, tum ob sententiarum pondus, quam carissimus fuit. Jurisconsultis procul dubio iisdem nominibus usque adeo venerabilis, ut Pandectas suas hujus viri auctoritate muniri voluerint. Verum, ne nimis laudibus verius is oneretur, quam ornetur, quem mortalium nemo recte vituperavit : unicum Heurnii judicium, inter cetera gravissimum, huic virtutum coronæ lemnisci loco satis*

erit. Ita ille Meth. Stud. Med. cap. 5: Latinos inter Medicos primus est Cornelius Celsus: sed prudenter legendus. Nam in multis Asclepiadem Methodicum sectatur, ut fatetur ipse. Hujus cote stilum subigemus, & pluris Latinitatem ejus quam Medicinam faciemus. Unicus itaque Celsus, ut scite idem in Epist. ad Ronss. Celso præfixa, Medicis Latinis præferatur: qui pomæria Romanæ eloquentiæ eo protulit, ut Medicina suavissimo ore eloquentiæ jam sese cultioribus ingeniis merito commendet.

His quotquot naturæ associavit benignitas, æquos afferte animos, eleganti favete linguæ. Ita vobis, & verum animi sermonisque cultum, & firma valetudinis præsidia parabit. Tantum est.

Optandum est, ut sit mens sana in corpore sano!

NOTITIA LITERARIA

D E

A. CORNELIO CELSO

E X

Jo. Alb. Fabricii bibliotheca Latina a Jo. Aug.
Ernesti auctius edita Tom. II, cap. IV.

Celsi nomen & ætas.

A. CORNELIUS CELSUS ¹, Romanus, vir doctissimus, nec ipse medicus aut Medicinam exer-

¹ Fuere & alii *Celsi*, ut ille, ad quem Horatius lib. I. Epist. 8. item, cujus mortem luget Ovid. Pont. I, 8. tum alter Epicureus, contra quem scripsit Origenes, & cui Lucianus suum inscripsit Pseudomantem. Hunc Celsum cum nostro male confundit Jo. Jacobus a Ryffel in continuatione Vossii de Philosophor. sectis pag. 158. Alius quoque *Cornelius Celsus* imperator, de quo Trebellius Pollio: *Julius Celsus*, scriptorum Julii Cæsaris *Στοπθωτής* *Juventius Celsus* Ictus: alius denique *Aruntius Celsus* Grammaticus, de quibus infra libro IV. Fuit etiam *Ju-*

ventius Celsus Medicus, pater & filius cognominis, & *M. Livius Celsus* tabularius scholæ Medicorum in Inscriptione vetere Romæ reperta apud Hieron. Mercurialem IV, 1. Var. lect. His adde *Apulejum Celsum*, Scribonii Largi præceptorem, Centuripis ortum, de quo infra in Apulejo: tum discipulum Libanii *Celsum Cilicem*, de quo Valesius ad Ammian. XXII, 9. *Celsum* alium genere, eruditione, voluntate laudabilem, quem a Theodosio Imp. cum prærogativa consulari nobilibus adjudicari optat Symmachus X, 25. Epist. *Celsum*, eloquentiæ studio-

cendo quæstum faciens, sed qui putaret, accuratam ejus artis cognitionem ad virum universæ¹ naturæ prudentem pertinere. Vixit, ut major pars eruditorum existimat, sub Tiberio Imp. Prænomen vulgo *Aurelius*, sive duplex nomen gentile faciunt. Sed recte *Aldus*, & qui eum sequuntur, *Aulum* Corn. Celsum appellant: ut & in MSS. antiquis reperitur.

*Ejus scripta deperdita, & libri de re Medica,
qui exstant.*

E variis scriptis, quibus & jus civile & philosophiam illustravit monumentis, teste Quintiliano,

sum, ad quem Libanii lib. 1. Epist. 41. & cujus Epist. 87 & alibi meminit. *Celsum* puerum, in quem S. Paulini Nolani panegyricus, carm. 15. *Celsum* Mediolanensem, ad quem Ennodii Epistola IX, 10. S. *Celsum*, Archiepiscopum Armachanum, defunctum a. 1128. de quo Bernardus Clarævallensis in vita S. Malachiæ cap. 10. & Papbrochius in Actis Sanctor. 6. April. T. 1. p. 619. seq. De nostro, opinor, Celso Sidorius carm. 23.

*Quid Celsos, Senecas, lo-
quar, vel illum*

*Quem dat Bilbilis alta Mar-
tialem.*

Ad Celsi nostri vero patriam quod attinet, sequimur communem sententiam, licet Coelius Rhodiginus XIV, 5. Antiqu. lect. refert, Veronenses sibi civem vindicare Celsum, perinde ut Ma-

crobium, Vitruvium, Pliniumque. vid. Jo. Rhodius in Vita Celsi.

¹ Hoc encomio Celsus matatur a Columella lib. 2. de re rustica p. 185. edit. Commelin. Idem lib. 1. cap. 1. *Nostrorum temporum Cornelius Celsus totum corpus disciplinæ (rusticæ) quinque libris complexus est.* Quintilianus XII, 11. *Cornelius Celsus mediocri vir ingenio, non solum de his omnibus conscripsit artibus (philosophia & eloquentia) sed amplius etiam rei militaris & medicinæ præcepta reliquit: dignus vel ipso proposito, ut cum scisse omnia illa credamus.* Græcinum Celsi transcriptorem memorat Plinius XIV, 2. Hinc Julii Attici discipulum vocat Columella lib. 1. cap. 1. illius inquam Attici, de quo idem lib. 3. c. 17. *Julius Atticus & Corn. Celsus celeberrimi ætatis nostræ auctores.*

reique militaris & rusticæ quoque & medicinæ præcepta reliquit, soli ad nos pervenerunt ejus *de re medica libri VIII*, operis, ab eo scripti *de artibus*, pars sexta¹, ut in codice suo Henr. Stephanus reperit, sive potius *liber sextus*, *septimus* &c. post quinque libros de agricultura, artium vero non pars sexta, sed secunda: nam in Codice Alexandri Patavini, teste Jo. Baptista Morgagno p. 40. Epist. ad calcem libri quarti legitur: *Artium Aurelii Celsi liber IX. idem Medicinæ liber IV explicet feliciter*. Atque in aliis MSS. ut Gudiano, ante librum primum: *Artium liber sextus, idemque Medicinæ primus*. Porro libros, qui hosce de re Medica proxime antecessere, præcepta de re rustica continuisse, ex primis verbis Celsi recte colligas. Illa porro præcepta de re rustica, memorata etiam Quinctiliano, quinque constitisse libris, diserte testatur Columella libro & capite primo, qui plura ex illis loca retulit. His de Medicina autem, cum sint puro facilique sermone nitide contexti, meruit auctor, ut *Medicorum Cicero*, vel *Latinus Hippocrates* diceretur, etsi Nicol. Leonicens, Jo. Heurnius, alique professi sunt, pluris se ejus dictionem, quam Medicinam, facere, cum tamen sit plerumque in Medicis etiam, ac præcipue Chirurgicis, optimos auctores² secutus, adeoque minime contemnen-

¹ De hoc nostro videtur accipiendum, quod S. Augustinus præfat. libri de hæreticis, ait, opiniones omnium philosophorum, qui varias sectas condiderunt usque ad tempora sua, sex non parvis voluminibus Celsum quendam absolvisse.

² Salmasius ad Hippocra-

tis Aphorism. LXXIX, pag. 43. Quia ab antiquioribus sumfit, quæ habet, omnia Celsus, & ab Hippocrate pleraque, non est minimi faciendus. Idem p. 65. Crede saltem Celso, qui hoc non divinavit, sed ex auctoribus præstantissimis, qui & medicinam olim exercuerunt, id mutuatus est.

dus. Nec omittendum, quod in MS. ante memorato Alexandri Patavini membranaceo Forolivienſi et Veneto altero Clericorum regularium Tolentinorum chartaceo lib. IV. capite 20. (pag. 134. edit. Almelveenianæ) poſt verba *ſubjicienda ſunt*, notatur lacuna eſſe duorum foliorum: docuitque Morgagnus l. c. p. 42 & 48. ex promiſſio indice capitum, deeſſe capita quatuor hæc, CX. (102.) *Vulva exulcerata eſt*. CXI. (103.) *de veſica*. CXII. (104.) *de calculis in veſica*. & CXIII. (105.) *in omni dolore veſicæ*. Ceterum de Celſo videndus Jo. Rhodius in Celſi vita, quæ iteratæ editioni diſſertationis ejus de acia, Hafniæ a. 1672, 4. & Lundini Scanorum 1691, 4. a Thoma Bartholino annexa, atque exinde etiam aliis Celſi editionibus præmiſſa legitur: & Daniel Clericus in Hiſtoria Medicinæ, edita Gallice Amſtelod. 1702, 4. part. 2. p. 217 ſeq. Præcipuos auctores Celſus Hippocratem & Aſclepiadem Methodicum ſecutus eſt; Methodicæ ſectæ tamen non per omnia fuiſſe addiſtum, uti nec dogmaticæ, docet Jo. Conr. Bar-chuſen in Hiſtoria Medicinæ, Amſt. 1710, 8. p. 265. Ex eo autem, quod *Cornelium Medicum* appellat Galenus 9, 5. κατὰ τόπους, non ſequitur, *Medicam artem* exercuiſſe, ſed ita vocare potuit, quod *Medicam artem* ſcripſit, ſicut *artem Ruſticam* & *Militarem*, quam præter Quinſtilianum & Vegetium lib. 1. c. 8. memorat Jo. Sarisberienſis VI, 19. Policrat. vel *Rhetoricam*, in qua sæpe citatur ab eodem Quinſtiliano, aliisque: ſed tamen rhetoricus libellus ille, qui eſt a Popma vulgatus ſub *Celſi* nomine, rectius *Julio Severiano* tribuitur in Rhetoribus *Franciſci Pithæi*, in quibus p. 302-312. etiam integrior legitur. *Libros ad Herennium* Celſo tribuendos non eſſe, jam alio loco annotatum eſt.

Libri alii, Celso tributi.

Fuerunt, qui *Celsi Veterinariam* commemorarent, apud H. Mercurialem Var. Lect. IV, 2. Sed videtur id pertinere ad ea, quæ in libris de re rustica de eo argumento scripserat; quo pertinentia etiam sunt apud Columellam, qui propterea commemoratur in Vegetii de mulomedicina libello. *Epistola ad Cajum Julium Callistum*, quæ sub Cornelii Celsi nomine præfigitur Marcelli Empirici libro de Medicamentis, Scribonium Largum habet auctorem, qui scriptum suum de compositione medicamentorum hac ipsa Epistola Callisto dicavit. Apud eundem Marcellum etiam alia brevior *Epistola ad Pullium Natalem* Celso tributa legitur, in qua se ait illius rogatu duos compositionum libros de græco in latinum sermonem convertisse. Sed & hanc Largo potius adscripserim, qui in prioribus literis promittit, se plures compositiones collecturum. Utraque Epistola exstat in calce editionis Celsi Plantinianæ a. 1592, 4. & in Medicis antiquis Aldi & H. Stephani. *Librum de herbis* constat non esse hujus Celsi, ut infra in Apulejo dicemus.

I N D E X

E D I T I O N U M

AULI CORNELII CELSI

KRAUSIO-ERNESTIANO AUCTIONE
ET IN ÆTATES IV DIGESTUS.

Æ T A S I N A T A L I S 1478 — 1524

- cujus princeps est *Florentina* Barth. *Fontii*; cujus filiae habentur Mediolanensis 1481 & Venetae quinque, 1493 1496, 1497, & post Lugdunensem (1516) duae aliae eodem anno, altera ab *Aldo* ad curam Jo. Bapt. *Egnatii* exacta, altera ab Luca Ant. *Junta* expressa.
- 1478 *Editio princeps Florentina*. fol. Cornelius Celsus de Medicina: a *Nicolao* impressus Florentiae. cf. Maittaire Ann. typ. T. I, f. IV, p. 386, & Hamberger zuverlässige Nachrichten &c. T. II, p. 9. In hac ed. verba graeca latinis literis expressa sunt. Ei autem praefuit Barthol. *Fontius*, Florentinus. Usus est ea *Almeloveenius*, qui nonnullas ejus lectiones revocavit, & *Krausius*, qui eam ceteris praetulit.
- 1481 *Mediolani*, fol. Cornelii Celsi de Medicina liber. Impressum Mediolani per Leonardum *Pachel* & Ulde-ricum *Sinczenzeler* diligentissime emendatum. Anno salutis CIOCCCCCLXXXI. Et hanc contulit Almeloveenius.
- 1493 *Veneta* I, fol. Aurelius Corn. Celsus de Medicina. Impressor Joannes *Rubeus* Vercellensis fuit die VIII mensis Julii MCCCCXCIII Venetiis. Lindenius ea usus est.
- 1496 *Veneta* II, ap. eundem. fol. Memoratur Maittairio de Orig. Artis typogr. p. 337.
- 1497 *Veneta* III, fol. apud Philippum *Pinxi*. Adhibuit

eam Balduinus *Ronssseus* in edit. Plantin. 1592 & *Lindenius*.

1516 *Lugdunensis* I, 4. ap. Simonem *Bevilaqua*.

1524 *Veneta* IV, fol. ex officina Aldina I, a Jo. Bapt. *Egnatio* emendatus.

——— *Veneta* V, fol. ap. Luc. Ant. *Juntam*.

ÆTAS II ALDINO CÆSARINA

1528 — 1639.

Jo. Bapt. *Egnatius* denuo *Aldinam* cum codice castigato contulit, & sic emendatiorem edidit 1528; eodemque anno Jo. *Cæsarius* Celsum a se castigatum publicavit Hagenoæ. Secuti sunt hos principes alii, qui notas scripsere, vel etiam textum emendarunt, Jerem. *Thriverius* in Antverpiensi 1539, Jo. *Morifortus* in Basil. 1547, Nic. *Nancelius* in Aldinis Medicorum principum 1547 & 1549, Guil. *Pantinus*, Cæsarii afflecla & Basiliensis II f. Oporinianæ curator; Ant. *Molinus*, Lugdun. Tornesianæ II curator; Rob. *Constantinus*, qui Lugdunensem 1566 illustravit. Superavit tandem Venetas etiam Aldi, Parisinas Wecheli, Basilienses Oporini, Lugdunenses Gryphianam & Tornæstianam & Rovillianam, ceteraque omnes Plantiniana Raphelengii cum Jerem. *Thriverii* Brachelii Comm. & enarr. Balduini *Ronsssei*, qui Venetam Pincii 1497 & Hagenoensem Cæsarii 1528 denuo contulit; ex qua profecit Tornæstiana V, 1608 additis variis lectt. cum annott. Cæsarii & Constantini. Accessit 1614 novus interpres Hieron. *Rubeus* in Veneta X, & Jo. *Rhodius* scriptor vitæ Celsi & Diss. de *Acia* Celsi in Patavina II, 1639. Ceterum Q. *Sereni*; Q. *Rhemnii Fannii Palæmonis* & *Vindiciani* opuscula pluribus harum edd. addita leguntur.

1528 *Veneta* VI, *Aldina* II, 4. Aurelii Cornelii Celsi *Medicinæ libri VIII. quam emendatissimi, Græcis etiam omnibus dictionibus restitutis. Quinti Sereni liber de Medicinâ & ipse castigatiss. Accedit Index in Celsum, & Serenum sane quam copiosus. In fine: Venetiis in ædibus Aldi & Andreæ Asulani soceri, mense Martio*

Corn. Celsus,

b

c1515xxviii. Cf. Hamberger l. c. p. 9 sq. Huic Aldinæ præfuit idem Jo. *Egnatius*, qui priorem anni 1524 curaverat. Is vero in præfatione sua profitetur, se monitum ab Hercule Gonzaga, Cardinale, Celsum edidisse, eoque libentius, quod ab eo inprimis Codicem sane castigatum statim acceperit. *Id operis*, (ait) *ut scilicet Celsus quam emendatissimus publicum acciperet — suscepi non invitus, idque, uti spero, non atris avibus præstitisse me confido. — Addidimus Q. Sereni poema non inutile — hoc ipsum cum legi vix posset, legent hodie, ni fallor, docti homines & perlibenter, & jucunde.* Cl. Ernestius in Bibl. Lat. T. II, p. 39 annotat, hujus ed. exemplum fuisse in Baluziano Catal. p. 393, cum notis & emendationibus MSS. Jo. Jac. *Mentelii*, qui Celsum & Serenum Sammonicum contulerat cum Codd. *Fernelii* & *Capellani*, restituitque multis in locis.

———— *Hagenoæ*, 8. ap. Jo. *Soterem*: Aurelii Cornelii Celsi de re Medica VIII libri eruditissimi, cum castigationibus Joannis *Cæsarii*.

1529 *Parifina* I, fol. ap. *Christi. Wechelum*.

1533 *Parifina* II, 8.

1538 *Saligniacy*, 8. ap. Jo. *Soterem*. Repetita ex ed. *Hagenoensi* an. 1528.

1539 *Antwerpiæ*, 8. apud *Matthæum Ceromnium*, cum notis *Jerem. Thriverii*.

1540 *Tiguri*, 8.

1542 *Lugdunensis* II, 8. apud *Sebast. Gryphium*.

1547 *Basiliensis* I, 8. apud Jo. *Oporin*. Joannis *Morisoti* annotationes in Corn. Celsum.

———— *Veneta* VII, *Aldina* III, fol. inter Medicos antiquos, ex Aldi nepotis officina editos, quos cum aliis Codd. contulit & suis conjecturis emendavit *Nic. Nancelius*.

1549 *Lugdunensis* III, 12. ap. Jo. *Tornæsium* I.

———— *Veneta* VIII, fol. inter Medicos antiquos ex off. *Aldi*.

1552 *Basiliensis* II, fol. ap. Jo. *Oporinum*. Corn. Celsi de arte medica libri VIII, multis in locis jam emendatiores longe quam unquam antea editi. *Guilielmi Pantini Tiletani* in duos quidem priores libros commentarii, & in reliquos annotationes breviores, sed quæ justi commentarii vicem, sicubi rei diffi-

cultas requirebat, explere posse videantur. Accessit Index. — Pantinus duabus tantum editionibus usus est in textu constituendo, Veneta vetere, & Saligniacensi Cæsarii 1538. In commentario Celsum præcipue contulit cum Hippocrate & Galeno.

1554 *Lugdun.* IV, *Tornæsii* II, 12. ap. Jo. *Tornæsium* & Guil. *Gazejum*. Corn. *Celsi* de re medica libri VIII. Item Qu. *Sereni* liber de Medicina. (Antonii *Molinii* *Matisconensis* opera diligenter emaculata) Qu. *Rhemnii* *Fannii* *Palæmonis* de pond. & mensuris liber. Omnia ex diversorum codicum diligentissima collatione castigata.

1558 *Lovanii*, 8. apud Ant. Mariam *Bergagne*. Jod. *Lomnii* *Commentarii* de sanitate tuenda in primum librum de Re medica *Aurelii* *Cornelii* *Celsi*, medicorum Rom. longe principis.

1563 *Patavina* I, 8. apud Marc. Ant. de *Galassis*. una cum *Sereno* & *Rhemnio*.

1566 *Lugdun.* V, 8. apud Guilielm. *Rovillium*, cum *Sereno* & *Rhemnio*, annotationibusque & emendationibus *Rob. Constantini*.

— *Veneta* IX, 8. ap. Hieron. *Scotum*.

1567 *Parifina* III, fol. inter Medicos principes ab *Henr. Stephano* editos, T. III. post *Hippocr.* & *Galenum*.

1587 *Lugdun.* VI, 12. *Tornæsii* III. Repetita ex *Lugdun.* 1554.

1592 *ibid.* 16. *Lugdun.* VII. *Tornæsii* IV.

— *Lugduni* *Bat.* 4. ex off. *Plantin.* ap. Franc. *Raphelengium*. Corn. *Celsi* de re medica libri VIII. Accessere in primum ejusdem *Hieremiæ Thriverii Brachelii* commentarii doctissimi: in reliquos vero septem *Balduini Ronsssei* enarrationes. — *Ronssseus* in commentario scribendo *Pantinum* imitatus est. Editiones adhibuit non nisi *Venetam* 1497, & *Hagenoenfem* 1528.

1608 *Lugdun.* VIII, Jo. *Tornæsii* V: Corn. *Celsi* de re medica libri VIII. Item Q. *Sereni* liber de medicina. Q. *Rhemnii* *Fannii* *Palaemonis* de ponderibus & mensuris liber. *Vindiciani* carmen. Omnia ex diversorum Codicum diligentissima collatione castigata, additis ad marginem variis lectionibus. — Præter lectionis varietatem in margine hujus editionis le-

guntur etiam annotationes quædam *Cæsarii & Constantini*.

- 1614 *Venetæ* X, 4. ex typogr. Franc. *Rampazeti*. Hieronymi *Rubei* annotationes in libros VIII A. C. Celsi de Re medica, quibus omnia, quæ ad universam Medicinam spectant, dilucide & compendiose explicantur.
- 1616 *Lugd. Bat.* 4. apud Jodoc. a *Colster*. Liber VIII, cujus quatuor priora capita commentariis illustravit Petr. *Pau*, Amstelædamensis; addiditque suo succenturiato Anatomico, s. commentario in Hippocratem de capitis vulneribus.
- 1625 *Genevæ*, 12. *Tornæsiana* VI, apud Joan. de *Tournes*.
- 1626 *ibid.* 12. *Tornæsiana* VII, cum Sereni. Rhemnii & Vindiciani carmine, teste Fabricio in *Bibl. Lat.*
- 1639 *Patavina* II, 4. apud Paul. *Frambottum*. Jo. *Rhodii* dissertatio de *Acia* ad Corn. Celsi mentem.

ÆTAS III LINDENIO ALMELOVEENIANA

1657 — 1687 — 1750

cujus princeps est Jo. Antonides *Lindenius* s. *Lindanus*, qui quamvis audacior habeatur in emendando Celfo, pæne sequacem tamen post XXX annos habuit Theod. Jans. ab *Almeloveen*, qui in ed. sua 1687, dein 1713, 1730, 1746 & Basileæ 1748 repetita, & locos Hippocratis aliorumque veterum, unde Celsus profecit, cum nonnullis lectt. varr. ed. Aldinæ & Stephanianæ aliarumque subjecit textui, breviora autem *Cæsarii*, *Constantini*, & *Casauboni* scholia addidit; textum passim ex edd. primis revocavit. *Almeloveenianam* lectionem in Germania secutus est Georg. *Wolfg. Wedelius* 1713, *Lindenianam* retinuit Jo. Bapt. *Vulpius* basin *Patavinæ* 1722; sed in altera sua ed. 1750 secutus est exemplum *Almeloveenianum*.

- 1657 *Lugd. Bat. Lindenii* I, 12. apud Jo. *Elsevirium*. Corn. Celsi de Medicina libri VIII, ex recognitione Jo. Antonidæ *van der Linden*. — *Lindenium* in Celfo castigando, uti in Hippocrate, audacius versatum esse judicat Thom. Bartholinus *diff. IV de legendis li-*

bris p. 118, & Jo. Henr. Schulze in diff. de offi-
bus conferventibus, Altdorf. 1727, 4. vid. & ejus
Epist. ad Fabric. ubi idem de Almeloveeniana & re-
centt. omnibus judicat. Ad adornandam hanc edi-
tionem Lindenius plura subsidia habuit a Patino,
varias nimirum Celsi editiones, emendatas manu
Fernelii, Capellani, Carpentarii, Scaligeri, & Nan-
celii. Ceterum fallitur Fabricius, qui Serenum,
Rhemnium Fannium, & Vindicianum adjunctos
edd. Lindenii scribit, qui sane desiderantur in iis.

1665 *Lugd. Bat.* 12. *Lindenii* II. ap. Salom. *Wagenaar*.
Corn. Celsi de Medicina libri VIII, ex recogn. Jo.
Antonid. *van der Linden*.

1672 *Hafnia*, 4. Sumtibus Petr. *Hauboldi*. Jo. *Rhodii* dis-
sertatio de Acia ad Corn. Celsi mentem, secundis
curis auctior. Accedit de ponderibus & mensuris
vett. Medicorum, imprimis Corn. Celsi, ejusdem
Rhodii dissertatio, & vita Celsi.

1687 *Amstelædami*, 12 mai. apud Jo. *Wolters*. Aur. Corn.
Celsi de Medicina libri octo, brevioribus Rob. Con-
stantini, Is. Casauboni aliorumque scholiis ac locis
parallelis illustrati. Cura & studio Theod. Jansonii
ab *Ameloveen* M. D. — In ea passim indicati sunt loci
Hippocratis & aliorum veterum, unde Celsus pro-
fecit, subjectæque notæ Cæsarii, Rob. Constantini,
itemque scholia Casauboni inedita, & aliæ aliorum
adnotationes, addito etiam Indice. Sed in cetero
libri nitore parum diligentiae animadverterunt viri
docti.

1713 *ibid.* apud eundem. 12. editio secunda emendatior.
— *Jenæ*, 8. Celsi de Medicina libri VIII, c. præf. Geo.
Wolfg. Wedelii.

1722 *Patavina* III, *Vulpii* I, 8. apud Jos. *Cominum*, cura
Jo. Bapt. *Vulpii*, una cum Sereno Sammoniaci. —
Basis huius ed. est *Lindeniana*: unde textus qualis
sit, intelligitur. Exstant etiam ad Vulpium Epistolæ
plenæ eruditæ observationibus Jo. Bapt. *Morga-
gni* de Celsi editionibus atque interpretibus, vete-
rumque de eo elogiis, Hagæ Comit. 1723, 4. In
his p. 11. vir doctus ait, Hippocratem publice in-
terpretatum se ostendisse, ex Celsi illius Codices
emendandos potius, quam Celsi versionem repre-

hendendam. Pag. 13. docet, Celsum plura monuisse satis perspicue, quæ veluti nova inventa nuperæ ætatis multi celebrant. Deinde non pauca Celsi loca ex sua conjectura & duobus MSS. Codicibus, nec non ex lauditissimi viri Jac. Facciolati observationibus castigat illustratque.

- 1730 *Lugduni Bat.* 8. apud Jo. Arnold. *Langerak.* Ex ed. Almeloveeniana 1687 recusa.
- 1746 *Lugduni Bat.* 8. apud Jo. Arnold. *Langerak.* Corn. Celsi de Medicina libri VIII, cum notis integris Jo. Cæsarii, Rob. Constantini, Jos. Scaligeri, If. Casauboni, Jo. Bapt. Morgagni, ac locis parallelis. Cura & studio Theod. Jans. ab *Almeloveen.* Accedunt Jo. Rhodii vita Corn. Celsi, variæ lectiones ex tribus antiquis edd. itemque loci aliquot Hippocratis & Celsi ab H. Stephano *παράλληλως* concinnati. — Hæc ed. haud multum differt a superioribus Almeloveenii, nisi quod Cæsarii Constantinique notas integras exhibeat, & notæ Scaligeri in ea primum compareant. Morgagni notæ ex eius Epistolis excerptæ sunt. Quas vero titulus indicat tres editiones antiquas, ex sunt Florentina, Mediolanensis, & Parisiensis. cf. Hamberger l. c. p. 12.
- 1748 *Basileæ*, 8. cum Q. Sereno apud Jo. Rudolph. *Turneisen.* Repetitio ed. 1746.
- 1750 *Patavinæ* IV, *Vulpii* II. 8, II vol. apud Jos. *Cominum.* A. Corn. Celsus & Q. Serenus Sammonicus de Medicina, alter, ut ab Almeloveenio editus est a. 1713. alter, ut a Constantino a. 1566. Editio novissima, in qua ad cetera omnia, quæ in priore nostra, Epistolæ sex accedunt cel. Jo. Bapt. Morgagni, nunquam antea vulgatæ. — Nihil habet præcipui, nisi Epistolas Morgagni, & Vincentii Beninii Colonienfis in Corn. Celsum observationes. Desiderantur vero in ea variæ lectiones ed. Amstelædamensis, notæque Jos. Scaligeri.

ÆTAS IV KRAUSIO - TARGANA

1754 — 1765 — 1769 — 1785

cui proluserat Ant. *Cocchi*, editis 1754 variis lectt. MS. Flor. e Libro VIII. Sed an. 1765 Car. Christ. Krau-

se nova recensione Celsi lectionem ab aliis, maxime a Lindenio, contaminatam reddidit integriorem ex fide priscarum edd. maxime principis, & probatissimorum editorum animadvers. & an. 1769 Leonardus *Targa* Italus denuo ad Codd. MSS. lectionem exegit, quam novissime repetiit bibliopola Lugdunensis Bat. Luchtmanns in ed. ampliori cum notis varr. & Lexico Celsiano Georg. *Matthiæ*, Prof. Gotting. Præter hosce duos editores primarios tertius Jo. *Vallart*, in Gallia exstitit, qui Celsum audacius tractaret in ed. 1772, alias nitida.

1754 *Florentiæ*. — Ant. *Cocchii* variæ lectt. MS. Flor. e L. VIII excerptæ. — Eas quidem editor sequens in suæ ed. usum adhibuit, sed haud adeo magni momenti esse confirmat, & pæne inferiores ed. principis lectt.

1765 *Lipsiæ*, 8 mai. sumtibus Caspari *Fritsch*. A. Corn. Celsi de Medicina libri octo, ex fide vetustissimorum librorum recensuit, innumeris depravationibus, partim aliunde, partim a Lindenio invec̃tis, liberavit, lectiones variantes & animadversiones tum aliorum probatissimorum auctorum, Cæsarii, Constantini, Jos. Scaligeri, Casauboni, Almeloveenii, Morgagni, Trilleri, tum suas, nec non Indices copiosos aliaque adiecit Car. Christian. *Krause*. — Is textum ad libros veteres, editos quidem, quorum magnam copiam ei bibliothecæ publicæ Lipsienses suppeditarunt, recensuit, usus etiam variis lectt. MS. Flor. e L. VIII, a Cocchio excerptis, atque ita Celsum, a Lindenio aliisque depravatum, propius ad integritatem adduxit. Non est dubium, pergit Ernestius in B. L. T. II, pag. 42. quin superiores V. D. longe superarit. Vellemus curasset vir doctissimus, ut MS. Florent. totius excerpta nancisceretur; quod difficile futurum non erat: atque illam præclaram *Cocchii* observationem in libro, qui ipsi in manibus fuit, *Excerptorum Chirurgicorum* e veteribus med. per *Nicetam* servatorum, non prætermisisset: omnia, quæ nunc exstant alia Celsi exempla scripta ex uno libro, qui lib. IV, cap. 20. lacunam haberet, fluxisse, Florentinum autem primum, (sunt enim VII exempla scripta Flo-

rentiæ) unde edit. Florent. ducta est, ex meliori, in quo illa lacuna major esset: atque duo adeo esse genera scriptorum & editorum; quod & colligitur e titulorum diversitate. Nam ii, qui sunt in libro Florent. & pauciores sunt & diversi a titulis ceterorum librorum scriptorum & editorum: qui & ipsi inter se variant. *Fontius* quidem, cui editio Florentina debetur, eos titulos plane omisit. Hinc fieri videtur, ut varietates librorum, qui a Florentino diversi sunt, variæ lectiones sint illius exempli, e quo omnes fluxere. Sed de illo Codice, & ceteris Florentinis, legatur *Cocchi* loc. cit. p. 52.

- 1769 *Patavina* V, *Targæ*. 4 mai. e recens. *Leonardi Targæ* ad Codd. MSS. & cum ejusd. notis. Jungitur literarum commercium cum *Cartano Cagnolati*, *Josepho Torelli*, *Jac. Facciolati* & *Morgagni* ad *Celsum* spectans. Itaque *Targa* explevit, quæ in ed. *Krausiana* desiderabatur, collationem Codd. MSS.
- 1772 *Parisiis*, 8. cura *Jo. Vallart*, nitide excusa.
- 1779 *Romæ*, 8. Lettere sopra A. Corn. Celso. auctore *Jo. Lud. Bianconi*, Archiatro quondam Regis Pol. Princ. El. Saxoniae, dein Comite, in Italiam reduce & *Perugiæ* Kal. Jan. 1781. mortuo. Quæ germ. versæ prodire cura *Car. Christ. Krause*.
- 1785 *Lugduni Bat.* 4 mai. A. Corn. Celsi Medicinæ libri octo, ex recensione *Leonardi Targæ*. Accedunt notæ variorum, item quæ nunc primum prodeunt *J. L. Bianconi* dissertatio de Celsi ætate, & *Georg. Matthiæ* Lexicon Celsianum.

V E R S I O N E S.

Celsus Germanice versus prodiit *Vormatiæ* 1539 fol. auctore *D. Jo. Kißner*. Novissime *Luneburgi* 1768, 8. *Versuch einer kritischen Uebersetzung von des Celsus acht Büchern der Arzneykunst.* von *Lange*.

Sunt & qui *Celsum Græce* versum commemorent a *Benedicto Averano* Florentino, qui a. 1707 diem obiit.

A. CORN. CELSI
DE MEDICINA
LIBRI OCTO:

1895-1896

AVICOLA

1895-1896

INDEX CAPITUM CELSI MEDICINÆ.

LIBER I.

Præfatio.

- I. Quemadmodum sanos agere conveniat.
- II. Quæ imbecillis servanda sint.
- III. Observationes quædam, prout res novæ incidunt, & corporum genera, & sexus, & ætates, & tempora anni sunt.
- IV. De his, quibus caput infirmum est.
- V. De his, qui lippitudine, gravedine, destillatione tonsillarique laborant.
- VI. Ad solutam alvum remedia.
- VII. Remedia ad coli dolorem.
- VIII. Quæ agenda sunt stomacho laborantibus.
- IX. Quid observandum sit dolore nervorum laborantibus.
- X. Observatio in pestilentia.

LIBER II.

Præfatio.

- I. Quæ anni tempora, quæ tempestatum genera, quæ partes ætatis, qualia corpora, vel tuta, vel morbis opportuna sint, & quod valetudinis genus in quoque timeri possit.
- II. De signis adversæ valetudinis futuræ.
- III. Quæ bona in ægrotantibus signa sint,
- IV. Mala signa ægrotantium.
- V. De signis longæ valetudinis.
- VI. De indiciis mortis.
- VII. De notis, quas aliquis in singulis morborum generibus habere possit.

- VIII. Quæ notæ in quoque morbi genere vel speciem vel pericula ostendant.
- IX. De morborum curationibus.
- X. De sanguinis detractiōe per venas.
- XI. De sanguinis detractiōe per cucurbitulas.
- XII. De dejectione.
- XIII. De vomitu.
- XIV. De frictione.
- XV. De gestatione.
- XVI. De abstinētia.
- XVII. De sudore.
- XVIII. Qui cibi potionesque, aut valentis aut mediæ aut imbecillæ materiæ sint.
- XIX. Quæ natura ac proprietas cujusque rei sit, qua vescimur.
- XX. De his, quæ boni succi sunt.
- XXI. mali
- XXII. Quæ res lenes, quæve acres sint.
- XXIII. De his, quæ crassiores, quæve tenuiores pituitas faciunt.
- XXIV. De his, quæ stomacho idonea sunt.
- XXV. Quæ res alienæ stomacho sint.
- XXVI. De his, quæ inflant.
- XXVII. De his, quæ calefaciunt, aut refrigerant.
- XXVIII. De his, quæ intus facile corrumpuntur.
- XXIX. De his, quæ alvum movent.
- XXX. De his, quæ alvum adstringunt.
- XXXI. De his, quæ urinam movent.
- XXXII. De his, quæ ad somnum apta sunt.
- XXXIII. De his, quæ materiam evocant.

LIBER III.

- I. De morborum generibus.
- II. Quomodo morbi cognoscantur, & an crescant, an minuantur, & qua ratione ab initio, qui languere incipit, curari debeat.

- III. De febrium generibus.
- IV. De curationum diversis generibus.
- V. De febrium speciebus, & singularum curationibus: & primo, quando cibus febricitantibus dandus sit.
- VI. Quando potiones febricitantibus dari expediat.
- VII. Quomodo pestilentes febres curari debeant.
- VIII. Curatio semitertianæ febris, quæ ἡμιτρίταϊος dicitur.
- IX. Curatio lentarum febrium.
- X. Remedia in febribus ad capitis dolorem, & præcordiorum inflammationem, & ariditatem, & scabritiem linguæ.
- XI. Remedia contra frigus, quod febrem præcedit.
- XII. Curatio horroris in febribus.
- XIII. quotidianæ febris.
- XIV. tertianæ febris.
- XV. quartanæ febris.
- XVI. duarum quartanarum.
- XVII. quotidianæ febris, quæ ex quartana facta sit.
- XVIII. De tribus insanix generibus: & primo de ejus curatione, quæ a Græcis φρενίτις dicitur.
- XIX. De cardiacis.
- XX. De lethargicis.
- XXI. De hydropicis.
- XXII. De tabe, & ejus speciebus.
- XXIII. De comitiali morbo.
- XXIV. De regio morbo.
- XXV. De elephantia.
- XXVI. De attonitis.
- XXVII. De resolutione nervorum.

L I B E R I V.

- I. De humani corporis interioribus sedibus.
- II. De curationibus morborum, qui nascuntur a capite.
- III. De cervicis morbis.
- IV. De faucium morbis: & primum de angina.

- V. De stomachi morbis.
- VI. De laterum doloribus.
- VII. De viscerum morbis : & primo , de pulmone.
- VIII. De hepaticis.
- IX. De lienosis.
- X. De renum morbis.
- XI. De intestinorum morbis : & primo de cholera.
- XII. De cœliaco, ventriculi morbo.
- XIII. De tenuioris intestini morbo.
- XIV. De morbo intestini plenioris.
- XV. De torminibus.
- XVI. De lævitate intestinorum.
- XVII. De lumbricis alvum occupantibus.
- XVIII. De tenesmo.
- XIX. De ventris fluxu.
- XX. De vulvæ morbo.
- XXI. De feminis nimia ex naturalibus profusione.
- XXII. De coxarum morbis.
- XXIII. De genuum dolore.
- XXIV. De manuum & pedum articulorumque vitiis.
- XXV. De refectione convalescentium a morbo.

L I B E R V.

Præfatio.

- I. De simplicibus facultatibus quarumcunque rerum , ex quibus medicamenta sunt : & primo de his , quæ sanguinem supprimunt.
- II. Quæ vulnus glutinent.
- III. Quæ concoquant , & moveant pus.
- IV. Quæ aperiant vulnera.
- V. Quæ purgent.
- VI. Quæ rodant.
- VII. Quæ exedant corpus.
- VIII. Quæ adurant.
- IX. Quæ crustas ulceribus inducant.
- X. Quæ crustas ulceribus resolvant.

- XI. Quæ discutiant ea, quæ in aliqua parte corporis coierunt.
- XII. Quæ evocent, & educant.
- XIII. Quæ exasperata lævent.
- XIV. Quæ carnem nutrant, & ulcus impleant.
- XV. Quæ molliant.
- XVI. Quæ cutem purgent.
- XVII. De mixturis simplicium rerum; & de ratione ponderum.
- XVIII. De malagmatis.
- XIX. De emplastris.
- XX. De pastillis.
- XXI. De pessis.
- XXII. De medicamentis, quibus aridis utimur.
- XXIII. De antidotis, & quibus malis opitulentur.
- XXIV. De acopis.
- XXV. De catapotiiis.
- XXVI. De quinque generibus noxarum corporis.
- XXVII. De vulneribus, quæ per morsus inferuntur, eorumque curationibus.
- XXVIII. De interioribus ulceribus, quæ, aliqua corporum parte corrupta, nascuntur.

L I B E R VI.

- I. De vitiis singularum corporis partium.
- II. De porrigine.
- III. De fycosi.
- IV. De areis.
- V. De varis, & lenticulis & ephelide.
- VI. De oculorum morbis : & primo de his, qui lenibus medicamentis curantur.
- VII. De aurium morbis.
- VIII. De narium morbis.
- IX. De dentium dolore.
- X. De tonsillis.

- XI. De oris ulceribus.
- XII. De linguæ ulceribus.
- XIII. De parulidibus & ulceribus gingivarum.
- XIV. De uvæ morbo.
- XV. De cancro oris.
- XVI. De parotidibus.
- XVII. De umbilico promittente.
- XVIII. De obscœnarum partium vitiis.
- XIX. De digitorum ulceribus.

LIBER VII.

Præfatio.

- I. De Chirurgica, & qui in ea claruerint, & qualis esse Chirurgus debeat, & quid hoc in libro describatur.
- II. De his, quæ per se intumescunt, quomodo incidenda & curanda sint.
- III. De bonis, malisve signis suppurationum.
- IV. De fistulis.
- V. De telis e corpore extrahendis.
- VI. De gangliis, & meliceride, & atheromate, & steatomate, capitis tuberculis.
- VII. De oculorum vitiis, quæ scalpello & manu curantur.
- VIII. De aurium morbis, qui manu & scalpello curantur.
- IX. Curta in auribus, labrisque ac naribus, quomodo farciri & curari possint.
- X. De polypo.
- XI. De ozæna.
- XII. De oris vitiis, quæ manu & ferro curantur.
- XIII. De cervicis vitio.
- XIV. De umbilici vitiis.
- XV. Quomodo aqua hydropicis emittatur.
- XVI. De ventre ictu perforato & intestinis vulneratis.
- XVII. De interiore membrana abdominis rupta.
- XVIII. De testiculorum natura, & morbis.
- XIX. De testiculorum curationibus communibus: & primo incisione & curatione inguinis, vel scroti.

- XX. De intestini in scrotum deroluti curatione.
- XXI. De omenti in scrotum prolapsi curatione.
- XXII. De ramicis curatione.
- XXIII. De carne, quæ inter tunicas testiculorum concretum, & de nervo indurato.
- XXIV. De ramice inguinis.
- XXV. Ad tegendam glandem colis, si nuda est.
- XXVI. De urinæ reddendæ difficultate & curatione.
- XXVII. De cancro, qui excisa vesica nascitur.
- XXVIII. Si naturalia feminarum non admittunt concubium, quomodo curari conveniat.
- XXIX. Qua ratione partus emortuus ex utero excutitur.
- XXX. De ani vitiis.
- XXXI. De varicibus.
- XXXII. De digitis cohærentibus, & curvatis.
- XXXIII. De gangræna.

L I B E R V I I I.

- I. De positu & figura ossium totius humani corporis.
- II. Ossa vitiata & corrupta, quibus signis cognoscantur, & qua ratione curentur.
- III. Quomodo os excidatur; & de modiolis, & terebris, ferramentis ad id paratis.
- IV. De calvaria fracta.
- V. De naso fracto.
- VI. De auribus fractis.
- VII. De maxilla fracta, & quibusdam ad omnia ossa pertinentibus.
- VIII. De jugulo fracto.
- IX. De costis fractis.
- X. De humerorum, brachiorum, femorum, crurum, digitorum fractorum, vel evulforum, communibus curationibus.
- XI. De ossibus luxatis.
- XII. De maxilla luxata.

- XIII. De capite luxato.
XIV. De spina luxata.
XV. De humero luxato.
XVI. De cubito luxato.
XVII. De manu luxata.
XVIII. De palma luxata.
XIX. De digitis luxatis.
XX. De femore luxato.
XXI. De genu luxato.
XXII. De talo luxato.
XXIII. De planta luxata.
XXIV. De digitis luxatis.
XXV. De his, quæ cum vulnere loco moventur.
-

A. CORN. CELSI
 M E D I C I N Æ
 LIBER PRIMUS.

P R Æ F A T I O.

UT alimenta fanis corporibus Agricultura, sic sanitatem ægris Medicina promittit. Hæc nusquam quidem non est. Siquidem etiam imperitissimæ gentes herbas aliaque prompta in auxilium vulnorum morborumque noverunt. Verumtamen apud Græcos aliquanto magis, quam in ceteris nationibus, exulta est: ac ne apud hos quidem a prima origine, sed paucis ante nos seculis; utpote cum vetustissimus auctor Æsculapius celebretur. Qui, quoniam adhuc rudem & vulgarem hanc scientiam paulo subtilius excoluit, in Deorum numerum receptus est. Hujus deinde duo filii, Podalirius & Machaon, bello Trojano ducem Agamemnonem secuti, non mediocrem opem commilitonibus suis attulerunt. Quos tamen Homerus non in pestilentia, neque in variis generibus morborum aliquid attulisse auxilii, sed vulneribus tantummodo ferro

& medicamentis mederi solitos esse proposuit. Ex quo apparet, has partes medicinæ solas ab his esse tentatas, easque esse vetustissimas. Eodemque auctore disci potest, morbos tum ad iram Deorum immortalium relatos esse, & ab iisdem opem pōsci solitam. Verique simile est, inter non multa auxilia adversæ valetudinis, plerumque tamen eam bonam contigisse ob bonos mōres, quos neque desidia, neque luxuria vitiant. Siquidem hæc duo, corpora, prius in Græcia, deinde apud nos affligerunt. Ideoque multiplex ista medicina, neque olim, neque apud alias gentes necessaria, vix aliquot ex nobis ad senectutis principia perducit. Ergo etiam post eos, de quibus retuli, nulli clarī viri medicinam exercuerunt; donec majore studio literarum disciplina agitari cōepit, quæ ut animo præcipue omnium necessaria, sic corpori inimica est. Primoque medendi scientia, sapientiæ pars habebatur, ut & morborum curatio, & rerum naturæ contemplatio sub iisdem auctoribus nata sit: scilicet his hanc maxime requirentibus, qui corporum suorum robora inquieta cogitatione, nocturnaue vigilia minuerant. Ideoque multos ex sapientiæ professoribus peritos ejus fuisse accepimus: clarissimos vero ex his Pythagoram, & Empedoclem, & Democritum. Hujus autem (ut quidam crediderunt) discipulus Hippocrates Cous, primus quidem ex omnibus memoria dignis, ab studio sapientiæ disciplinam hanc separavit, vir & arte & facundia insignis. Post quem Diocles Carystius, deinde Praxagoras & Chrysippus, tum

Herophilus & Erasistratus sic artem hanc exercuerunt, ut etiam in diversas curandi vias processerint.

Isdemque temporibus in tres partes medicina diducta est, ut una esset, quæ victu; altera, quæ medicamentis; tertia, quæ manu mederetur. Primam *διαιτητικὴν*, secundam *φαρμακευτικὴν*, tertiam *χειρουργικὴν* Græci nominaverunt. Ejus autem, quæ victu morbos curat, longe clarissimi auctores etiam altius quædam agitare conati, rerum quoque naturæ sibi cognitionem vindicaverunt, tanquam sine ea, trunca & debilis medicina esset. Post quos Serapion, primus omnium, nihil hanc rationalem disciplinam pertinere ad medicinam, professus, in usu tantum & experimentis eam posuit. Quem Apollonius, & Glaucias, & aliquanto post Heraclides Tarentinus, & alii quoque non mediocres viri secuti, ex ipsa professione se *ἐμπειρικὸς* appellaverunt. Sic in duas partes ea quoque, quæ victu curat, medicina divisa est, aliis rationalem artem, aliis usum tantum sibi vindicantibus: nullo vero quidquam post eos, qui supra comprehensi sunt, agitante, nisi quod acceperat: donec Asclepiades medendi rationem magna ex parte mutavit. Ex cujus successoribus Themison nuper ipse quoque quædam in senectute deflexit. Et per hos quidem maxime viros salutaris ista nobis professio increvit.

Quoniam autem ex tribus medicinæ partibus, ut difficillima, sic etiam clarissima est ea, quæ morbis medetur, ante omnia de hac dicendum

est. Et, quia prima in eo dissensio est, quod alii sibi experimentorum tantummodo notitiam necessariam esse contendunt: alii, nisi corporum rerumque naturalium ratione comperta, non satis potentem usum esse proponunt: indicandum est, quæ maxime ex utraque parte dicantur, quo facilius nostra quoque opinio interponi possit.

Igitur hi, qui rationalem medicinam profitentur, hæc necessaria esse proponunt. Abditarum & morbos continentium causarum notitiam, deinde evidentium, post hæc etiam naturalium actionum, novissime partium interiorum. Abditas causas vocant, in quibus requiritur, ex quibus principiis nostra corpora sint, quid secundam, quid adversam valetudinem faciat. Neque enim credunt, posse eum scire, quomodo morbos curare conveniat, qui, unde hi sint, ignoret. Neque esse dubium, quin alia curatione opus sit, si ex quatuor principiis vel superans aliquid vel deficiens adversam valetudinem creat; ut quidam ex sapientiæ professoribus dixerunt: alia, si in humidis omne vitium est; ut Herophilo visum est: alia, si in spiritu; ut Hippocrati: alia, si sanguis in eas venas, quæ spiritui accommodatæ sunt, transfunditur, & inflammationem, quam Græci φλεγμονήν nominant, excitat; eaque inflammatio talem motum efficit, qualis in febre est; ut Erasistrato placuit: alia, si manantia corpuscula per invisibilia foramina subsistendo iter claudunt; ut Asclepiades contendit. Eum vero recte curaturum, quem prima origo causæ non fefellerit. Neque vero infitiantur, experimenta quo-

que esse necessaria ; sed , ne ad hæc quidem aditum fieri potuisse , nisi ab aliqua ratione , contendunt. Non enim quidlibet antiquiores viros ægris inculcasse ; sed cogitasse , quid maxime conveniret ; & id usu explorasse , quod ante conjectura aliqua duxissent. Neque interesse , an nunc jam pleraque explorata sint , si a consilio tamen coeperunt. Et id quidem in multis ita se habere. Sæpe vero etiam nova incidere genera morborum , in quibus nihil adhuc usus ostenderit , ut ideo necessarium sit animadvertere , unde ea coeperint ; sine quo nemo mortalium reperire possit , cur hoc , quam illo , potius utatur. Et ob hæc quidem in obscuro positas causas persequuntur. Evidentes vero has appellant , in quibus quærunt , initium morbi calor attulerit , an frigus ; fames , an satietas ; & quæ similia sunt. Occursurum enim vitio dicunt eum , qui originem non ignorarit. Naturales vero corporis actiones appellant , per quas spiritum trahimus & emittimus , cibum potionemque & assumimus & concoquimus : itemque , per quas eadem hæc in omnes membrorum partes digeruntur. Tum requirunt etiam , quare venæ nostræ modo submittant se , modo attollant : quæ ratio somni , quæ vigiliæ sit. Sine quorum notitia , neminem putant vel occurrere , vel mederi morbis , inter hæc nascentibus , posse. Ex quibus quia quam maxime pertinere ad rem concoctio videtur ; huic potissimum insistant ; & , duce , alii , Erasistrato , atteri cibum in ventre contendunt : alii , Plistonico Praxagoræ discipulo , putrescere : alii credunt Hippo-

crati, per calorem cibos concoqui. Acceduntque Asclepiadis æmuli, qui, omnia ista vana & super-
vacua esse, proponunt. Nihil enim concoqui, sed
crudam materiam, sicut assumpta est, in corpus
omne diduci. Et hæc quidem inter eos parum con-
stant. Illud vero convenit, alium dandum cibum
laborantibus, si hoc, alium, si illud verum est.
Nam si teritur intus, eum quærendum esse, quã
facillime teri possit. Si putrescit, eum, in quo hoc
expeditissimum est. Si calor concoquit, eum, quã
maxime calorem moveat. At nihil ex his esse quæ-
rendum, si nihil concoquitur: ea vero sumenda,
quæ maxime manent, qualia assumpta sunt. Eadem-
que ratione, cum spiritus gravis est, cum somnus
aut vigilia urget, eum mederi posse arbitrantur,
qui prius illa ipsa, qualiter eveniant, perceperit.
Præter hæc, cum in interioribus partibus & do-
lores & morborum varia genera nascantur, nemi-
nem putant his adhibere posse remedia, quæ ipse
ignoret. Necessarium ergo esse, incidere corpora
mortuorum, eorumque viscera atque intestina scru-
tari. Longeque optime fecisse Herophilum & Era-
sistratum, qui nocentes homines, a regibus ex car-
cere acceptos, vivos inciderint, considerarintque
etiam spiritu remanente, ea, quæ natura ante clau-
sisset, eorumque posituram, colorem, figuram,
magnitudinem, ordinem, duritiem, mollitiem, læ-
vorem, contractum: processus deinde singulorum
& recessus, sive quid inferitur alteri, sive quid
partem alterius in se recipit. Neque enim cum do-
lor intus incidit, scire, quid doleat, eum, qui qua

parte quodque viscus intestinumve sit, non cognoverit. Neque curari id, quod ægrum est, posse ab eo, qui, quid sit, ignoret. Et cum per vulnus alicujus viscera patefacta sunt, eum, qui sanæ cuiusquam colorem partis ignoret, nescire, quid integrum, quid corruptum sit; ita ne succurrere quidem posse corruptis: aptiusque extrinsecus imponi remedia, compertis interiorum & sedibus & figuris, cognitaque eorum magnitudine: similesque omnia, quæ posita sunt, rationes habere. Neque esse crudele, sicut plerique proponunt, hominum nocentium, & horum quoque paucorum, suppliciis remedia populis innocentibus seculorum omnium quæri.

Contra hi, qui se ἐμπειρικούς ab experientia nominant, evidentes quidem causas, ut necessarias, amplectuntur: obscurarum vero causarum & naturalium actionum quæstionem ideo supervacuum esse contendunt, quoniam incomprehensibilis natura sit. Non posse vero comprehendere, patere ex eorum, qui de his disputarunt, discordia: cum de ista re, neque inter sapientiæ professores, neque inter ipsos medicos conveniat. Cur enim potius aliquis Hippocrati credat, quam Herophilo? cur huic potius, quam Asclepiadi? Si rationes sequi velit, omnium posse videri non improbables: si curationes, ab omnibus his ægros perductos esse ad sanitatem. Ita neque disputationi, neque auctoritati cuiusquam fidem derogari oportuisse. Etiam sapientiæ studiosos maximos medicos esse, si ratiocinatio hos faceret: nunc illis verba superesse,

deesse medendi scientiam. Differre quoque pro natura locorum, genera medicinæ; & aliud opus esse Romæ, aliud in Ægypto, aliud in Gallia. Quod si morbos eæ causæ facerent, quæ ubique eadem essent, remedia quoque ubique eadem esse debuissent. Sæpe etiam causas apparere, ut puta lippitudinis, vulneris; neque ex his patere medicinam. Quod si scientiam hanc non subiciat evidens causa, multo minus eam posse subicere, quæ in dubio est. Cum igitur illa incerta incomprehensibilisque sit, a certis potius & exploratis petendum esse præsidium, id est, his, quæ experientia in ipsis curationibus docuerit, sicut in ceteris omnibus artibus. Nam ne agricolam quidem aut gubernatorem disputatione, sed usu fieri. Ac, nihil istas cogitationes ad medicinam pertinere, eo quoque disci, quod, quæ diversa de his senserint, ad eandem tamen sanitatem homines perduxerint. Id enim fecisse, quia non ab obscuris causis, neque a naturalibus actionibus, quæ apud eos diversæ erant, sed ab experimentis, prout cuique responderant, medendi vias traxerint. Ne inter initia quidem ab istis quæstionibus deductam esse medicinam, sed ab experimentis. Ægrorum enim, qui sine medicis erant, alios propter aviditatem primis diebus protinus cibum assumisse, alios propter fastidium abstinuisse, levatumque magis eorum morbum esse, qui abstinerant. Itemque alios in ipsa febre aliquid edisse, alios paulo ante eam, alios post remissionem ejus. Optime deinde his cessisse, qui post finem febris id fecerant. Eademque ratione alios inter principia

protinus usos esse cibo pleniore, alios exiguo; gravioresque eos factos, qui se impleverant. Hæc similiaque cum quotidie inciderent, diligentes homines notasse, quæ plerumque melius responderent: deinde ægrotantibus ea præcipere coepisse. Sic medicinam ortam, subinde aliorum salute, aliorum interitu, perniciofa discernentem a salutaribus. Repertis deinde jam medicinæ remediis, homines de rationibus eorum differere coepisse: nec post rationem, medicinam esse inventam; sed post inventam medicinam, rationem esse quæsitam. Requiere etiam, ratio idem doceat, quod experientia, an aliud. Si idem, supervacuam esse: si aliud, etiam contrariam. Primo tamen remedia exploranda summa cura fuisse, nunc vero jam explorata esse: neque ulla aut nova genera morborum reperiri, aut novam desiderari medicinam. Quod si jam incidat mali genus aliquod ignotum, non ideo tamen fore medico de rebus cogitandum obscuris: sed eum protinus visurum, cui morbo id proximum sit; tentaturumque remedia similia illis, quæ vicino malo sæpe succurrerint, & per ejus similitudinem opem reperturum. Neque enim se dicere, consilio medicum non egere, & irrationale animal hanc artem posse præstare; sed has latentium rerum conjecturas ad rem non pertinere, quia non interfit, quid morbum faciat, sed quid tollat. Neque ad rem pertinere, quomodo, sed quid optime digeratur: sive hac de causa concoctio incidat, sive de illa; & sive concoctio sit illa, sive tantum digestio. Neque quærendum esse, quomodo spiret.

mus, sed, quid gravem tardumque spiritum expediat: neque, quid venas moveat; sed, quid quæque motus genera significant. Hæc autem cognosci experimentis. Et in omnibus ejusmodi cogitationibus in utramque partem differi posse. Itaque ingenium & facundiam vincere: morbos autem, non eloquentia, sed remediis, curari. Quæ si quis elinguis usu discreta bene norit, hunc aliquanto majorem medicum futurum, quam si sine usu linguam suam excoluerit. Atque ea quidem, de quibus est dictum, supervacua esse tantummodo. Id vero, quod restat, etiam crudele: vivorum hominum alvum atque præcordia incidi, & salutis humanæ præsidem artem, non solum pestem alicui, sed hanc etiam atrocissimam inferre; cum præsertim ex his, quæ tanta violentia quærantur, alia non possint omnino cognosci, alia possint etiam sine scelere. Nam colorem, lævorem, molliem, duritiem, similiaque omnia, non esse talia, inciso corpore, qualia integro fuerint; quia, cum corporibus inviolatis, hæc tamen metu, dolore, inedia, cruditate, lassitudine, mille aliis mediocribus affectibus sæpe mutantur, multo magis verisimile est, interiora, quibus major mollietates & lux ipsa nova sit, sub gravissimis vulneribus & ipsa trucidatione mutari. Neque quidquam esse stultius, quam quale quid vivo homine est, tale existimare esse moriente, immo jam mortuo. Nam utrum quidem, qui minus ad rem pertineat, spirante homine posse diduci: simulatque vero ferrum ad præcordia accessit, & discissum transver-

sum septum est, quod membrana quadam superiores partes ab inferioribus diducit (*διάσπασμα* Græci vocant) hominem protinus animam amittere: ita demum mortui præcordia & viscus omne in conspectum latrocinantis medici dari; quod necesse sit tale esse, quale mortui sit, non quale vivus fuit. Itaque consequi medicum, ut hominem crudeliter jugulet; non ut sciat, qualia vivi viscera habeamus. Si quid tamen sit, quod adhuc spirante homine conspectui subjiciatur, id sæpe casum offerre curantibus. Interdum enim gladiatorem in arena, vel militem in acie, vel viatorem a latronibus exceptum sic vulnerari, ut ejus interior aliqua pars aperiatur, & in alio alia; ita sedem, positum, ordinem, figuram, similiaque cognoscere prudentem medicum, non cædem, sed sanitatem molientem; idque per misericordiam discere, quod alii dira crudelitate cognoverint. Ob hoc, ne mortuorum quidem lacerationem necessariam esse; quæ, etsi non crudelis, tamen foeda sit, cum aliter pleraque in mortuis se habeant: quantum vero in vivis cognosci potest, ipsa curatio ostendat.

Cum hæc per multa volumina, perque magnæ contentionis disputationes a medicis sæpe tractata sint atque tractentur; subjiciendum est, quæ proxima vero videri possint. Ea neque addicta alterutri opinioni sunt, neque ab utraque nimium abhorrentia, sed media quodammodo inter diversas sententias. Quod in plurimis contentionibus deprehendere licet, sine ambitione verum scrutantibus, ut in hac ipsa re. Nam quæ demum cau-

sæ, vel secundam valetudinem præstent, vel morbos excitent, quomodo spiritus, aut cibus, vel detrahatur, vel digeratur, ne sapientiæ quidem professores scientia comprehendunt, sed conjectura persequuntur. Cujus autem rei non est certa notitia, ejus opinio certum reperire remedium non potest. Verumque est, ad ipsam curandi rationem nihil plus conferre, quam experientiam. Quamquam igitur multa sint, ad ipsas artes proprie non pertinentia, tamen eas adjuvant, excitando artificis ingenium. Itaque ista quoque naturæ rerum contemplatio, quamvis non faciat medicum, aptiorem tamen medicinæ reddit profectum. Verique simile est, & Hippocratem, & Erasistratum, & quicumque alii, non contenti febres & ulcera agitare, rerum quoque naturam ex aliqua parte scrutati sunt, non ideo quidem medicos fuisse, verum ideo quoque majores medicos exstitisse. Ratione vero opus est ipsi medicinæ, etsi non inter obscuras causas, neque inter naturales actiones, tamen sæpe. Est enim hæc ars conjecturalis, neque respondet ei plerumque non solum conjectura, sed etiam experientia. Et interdum non febris, non cibus, non somnus subsequitur, sicut assuevit. Rarius, sed aliquando morbus quoque ipse novus est: quem non incidere, manifeste falsum est, cum ætate nostra quædam, ex naturalibus partibus carne prolapsa & arente, intra paucas horas exspiraverit, sic ut nobilissimi medici neque genus mali, neque remedium invenerint. Quos ego nihil tentasse judico, quia nemo in splendida persona pe-

riclitari conjectura sua voluerit : ne occidisse , nisi servasset , videretur. Veri tamen simile est , potuisse aliquid cogitare , detracta tali verecundia , & fortasse responsum fuisse id , quod aliquis esset expertus. Ad quod medicinæ genus , neque semper similitudo aliquid confert ; & si quando confert ; tamen id ipsum rationale est , inter multa similia genera , & morborum & remediorum , cogitare , quo potissimum medicamento sit utendum. Cum igitur talis res incidit , medicus aliquid oportet inveniat , quod non utique fortasse , sed sæpius tamen etiam respondeat. Petet autem novum quoque consilium , non ab rebus latentibus (istæ enim dubiæ & incertæ sunt) sed ab his , quæ explorari possunt , id est , evidentibus causis. Interest enim , fatigatio morbum , an sitis ; an frigus , an calor ; an vigilia , an fames fecerit ; an cibi vinique abundantia , an intemperantia libidinis. Neque ignorare hunc oportet , quæ sit ægri natura : humidum magis , an magis siccum corpus ejus sit : validi nervi , an infirmi : frequens adversa valetudo , an rara : eaque , cum est , vehemens esse soleat , an levis ; brevis , an longa : quod is vitæ genus sit secutus ; laboriosum , an quietum ; cum luxu , an cum frugalitate. Ex his enim , similibusque , sæpe curandi nova ratio ducenda est. Quamvis ne hæc quidem sic præteriri debent , quasi nullam controversiam recipiant. Nam & Erasistratus non ex his fieri morbos dixit : quoniam & alii , & iidem alias post ista non febricitarent.

Et quidam Medici seculi nostri , sub auctore (ut

ipsi videri volunt). Themifone contendunt, nullius causæ notitiam quidquam ad curationes pertinere: satisque esse, quædam communia morborum intueri. Et quidem horum tria genera esse; unum adstrictum, alterum fluens, tertium mixtum. Nam modo parum excernere ægros, modo nimium: modo alia parte parum, alia nimium. Hæc autem genera morborum, modo acuta esse, modo longa; & modo increfcere, modo confistere, modo minui consueviffe. Cognito igitur eo, quod ex his est, si corpus adstrictum est, digerendum esse: si profluvio laborat, continendum; si mixtum vitium habet, occurrendum subinde vehementiori malo. Et aliter acutis morbis medendum, aliter vetustis: aliter increfcantibus, aliter subsistentibus, aliter jam ad sanitatem inclinantibus. Horum observationem medicinam esse, quam ita finiunt, ut quasi viam quandam, quam μέθοδος Græci nominant, eorumque, quæ in morbis communia sunt, contemplatricem esse contendant. Ac neque rationalibus se, neque experimenta tantum spectantibus annumerari volunt: cum ab illis eo nomine dissentiant, quod in conjectura rerum latentium nolunt esse medicinam; ab his eo, quod parum artis esse in observatione experimentorum credunt. Quod ad Erasistratum pertinet, primum, ipsa evidentia ejus opinioni repugnat; quia raro, nisi post horum aliquid, morbus venit. Deinde non sequitur, ut, quod alium non afficit, aut eundem alias, id ne alteri quidem, aut eidem tempore alio noceat. Possunt enim quædam subesse corpori, vel

ex infirmitate ejus, vel ex aliquo affectu, quæ vel in alio non sunt, vel in hoc alias non fuerunt, eaque per se non tanta, ut concitent morbum; tamen obnoxium magis aliis injuriis corpus efficiant. Quod si contemplationem rerum naturæ (quam temere Medici sibi vindicant) satis comprehendisset, etiam illud scisset, nihil omnino ob unam causam fieri, sed id pro causa apprehendi, quod contulisse plurimum videtur. Potest autem id, dum solum est, non movere, quod junctum aliis maxime movet. Accedit ad hæc, quod ne ipse quidem Erasistratus, qui transfuso in arterias sanguine febrem fieri dicit, idque nimis repleto corpore incidere, reperit, cur ex duobus æque repletis, alter in morbum inciderit, alter omni periculo vacarit; quod quotidie fieri apparet. Ex quo disci potest, ut vera sit illa transfusio, tamen illam non per se, cum plenum corpus est, fieri; sed cum horum aliquid accesserit.

Themisonis vero æmuli, si perpetua, quæ promittunt, habent, magis etiam, quam ulli, rationales sunt. Neque enim, si quis non omnia tenet, quæ rationalis alius probat, protinus alio novo nomine artis indiget; si modo, quod primum est, non memoriæ soli, sed rationi quoque insistit. Sin, quod vero propius est, vix ulla perpetua præcepta medicinalis ars recipit, idem sunt, quod ii, quos experimenta sola sustinent: eo magis, quoniam, si compresserit aliquem morbus, an fuderit, quilibet etiam imperitissimus videt. Quid autem compressum corpus resolvat, quid solutum teneat, si

a ratione tractum est, Rationalis est medicus: si, ut ei, qui se rationalem negat, confiteri necesse est, ab experientia, Empiricus est. Ita apud eum morbi cognitio extra artem, medicina intra usum est. Neque adjectum quidquam Empiricorum professioni, sed dentum est; quoniam illi multa circumspiciunt, hi tantum facillima, & non plus, quam vulgaria. Nam & hi, qui pecoribus ac jumentis medentur, cum propria cujusque ex mutis animalibus nosse non possint, communibus tantummodo insistant. Et exteræ gentes, cum subtilem medicinæ rationem non noverint, communia tantum vident. Et qui ample valetudinarios nutriunt, quia singulis summa cura consulere non sustinent, ad communia ista confugiunt. Neque, hercules, istud antiqui medici nescierunt, sed his contenti non fuerunt. Ergo etiam vetustissimus auctor Hippocrates dixit, mederi oportere, & communia, & propria intuentem. Ac ne isti quidem ipsi intra suam professionem consistere ullo modo possunt. Siquidem & compressorum & fluentium morborum genera diversa sunt; faciliusque id in his, quæ fluunt, inspicere potest. Aliud est enim sanguinem, aliud bilem, aliud cibum, vomere: aliud dejectionibus, aliud torminibus laborare: aliud sudore digeri, aliud tabe consumi. Atque in partes quoque humor erumpit, ut in oculos, auresque, quo periculo nullum humanum membrum vacat. Nihil autem horum sic, ut aliud, curatur. Ita protinus in his a communi fluentis morbi contemplatione ad propriam medicinam descendit. Atque in

hac quoque rursus alia proprietatis notitia sæpe necessaria est; quia non eadem omnibus, etiam in similibus casibus, opitulantur. Siquidem certæ quædam res sunt, quæ in pluribus ventrem aut adstringunt, aut resolvunt. Inveniuntur tamen, in quibus aliter, atque in ceteris, idem eveniat. In his ergo communium inspectio contraria est, propriorum tantum salutaris. Et causæ quoque æstimatio sæpe morbum solvit. Ergo etiam ingeniosissimus seculi nostri medicus, quem nuper vidimus, Cassius, febricitanti cuidam & magna siti affecto, cum post ebrietatem eum premi cœpisse cognosceret, aquam frigidam ingessit. Qua ille epota, cum vini vim miscendo fregisset, protinus febrem somno & sudore discussit. Quod auxilium medicus opportune providit, non ex eo, quod aut adstrictum corpus erat, aut fluebat; sed ex causa, quæ ante præcesserat. Estque etiam proprium aliquid & loci & temporis, istis quoque auctoribus. Qui, cum disputant, quemadmodum sanis hominibus agendum sit, præcipiunt, ut gravibus aut locis aut temporibus magis vitetur frigus, æstus, satietas, labor, libido; magisque ut conquiescat iisdem aut locis aut temporibus, si quis gravitatem corporis sentit; ac neque vomitu stomachum, neque purgatione alvum sollicitet. Quæ vera quidem sunt; a communibus tamen ad quædam propria descendunt; nisi persuadere nobis volunt, sanis quidem considerandum esse, quod coelum, quod tempus anni sit: ægris vero non esse; quibus tanto magis omnis

observatio necessaria est, quanto magis obnoxia
offensis infirmitas est. Quin etiam morborum in
iisdem hominibus aliæ atque aliæ proprietates sunt:
&, qui secundis aliquando frustra curatus est,
contrariis sæpe restituitur. Plurimaque in dando
cibo discrimina reperiuntur: ex quibus contentus
uno ero. Nam famem facilius fert adolescens, quam
puer; facilius in denso coelo, quam in tenui; fa-
cilius hieme, quam æstate; facilius uno cibo, quam
prandio quoque assuetus; facilius inexercitatus,
quam exercitatus homo sustinet. Sæpe autem in eo
magis necessaria cibi festinatio est, qui minus ine-
diam tolerat. Ob quæ competit, eum, qui propria
non novit, communia tantum intueri debere:
eumque, qui nosse propria potest, illa quidem non
oportere negligere, sed his quoque insistere. Ideo-
que, cum par scientia sit, utiliorem tamen medi-
cum esse amicum, quam extraneum. Igitur, ut ad
propositum meum redeam, rationalem quidem
puto medicinam esse debere; instrui vero ab evi-
dentibus causis, obscuris omnibus, non a cogita-
tione artificis, sed ab ipsa arte rejectis. Incidere
autem vivorum corpora, & crudele, & superva-
cuum est; mortuorum corpora, discentibus neces-
sarium. Nam positum & ordinem nosse debent.
Quæ cadavera melius, quam vivus & vulneratus
homo, repræsentant. Sed & cetera, quæ modo in
vivis cognosci possunt, in ipsis curationibus vul-
neratorum paulo tardius, sed aliquanto mitius usus
ipse monstrabit. His propositis, primum dicam,

quemadmodum sanos agere conveniat : tum ad ea transibo , quæ ad morbos curationesque eorum pertinebunt.

CAPUT I.

Quemadmodum sanos agere conveniat.

SANUS homo, qui & bene valet, & suæ spontis est, nullis obligare se legibus debet; ac neque medico, neque jatrალიpta egere. Hunc oportet varium habere vitæ genus: modo ruri esse, modo in urbe, sæpiusque in ægro: navigare, venari, quiescere interdum, sed frequentius se exercere. Siquidem ignavia corpus hebetat, labor firmat. Illa maturam senectutem, hic longam adolescentiam reddit. Prodest etiam interdum balneo, interdum aquis frigidis uti: modo ungi, modo id ipsum negligere: nullum cibi genus fugere, quo populus utatur: interdum in convivio esse, interdum ab eo se retrahere: modo plus justo, modo non amplius assumere: bis die potius, quam semel cibum capere: & semper quam plurimum, dummodo hunc concoquat. Sed ut hujus generis exercitationes cibique necessarii sunt, sic athletici supervacui. Nam & intermissus propter aliquas civiles necessitates ordo exercitationis corpus affligit: & ea corpora, quæ more eorum repleta sunt, celerrime & senescunt, & ægrotant.

De concubitu.

Concubitus vero neque nimis concupiscendus, neque nimis pertimescendus est. Rarus corpus excitat; frequens solvit. Cum autem frequens non numero sit, sed natura, ratione ætatis & corporis, scire licet, eum non inutilem esse, quem corporis neque languor neque dolor sequitur. Idem interdum peior est, tutior noctu: ita tamen, si neque illum cibus, neque hunc cum vigilia labor statim sequitur. Hæc firmis servanda sunt: cavendumque, ne in secunda valetudine adversæ præsidia consumantur.

CAPUT II.

Quæ imbecillis servanda sint.

AT imbecillis, quo in numero magna pars urbanorum, omnesque pæne cupidi literarum sunt, observatio major necessaria est: ut, quod vel corporis, vel loci, vel studii ratio detrahit, cura restituat. Ex his igitur, qui bene concoxit, mane tuto surget: qui parum, quiescere debet; &, si mane surgendi necessitas fuerit, redormire. Qui non concoxit, ex toto conquiescere, ac neque labori se, neque exercitationi, neque negotio credere. Qui crudum sine præcordiorum dolore ructat, is ex intervallo aquam frigidam bibere, & se nihilominus continere. Habitare vero ædificio

lucido, perflatum æstivum, hibernum solem habente: cavere meridianum solem, matutinum & vespertinum frigus; itemque auras fluminum atque stagnorum; minimeque, nubilo cœlo, soli aperiendi se committere, ne modo frigus, modo calor moveat: quæ res maxime gravedines destillationesque concitat. Magis vero gravibus locis ista servanda sunt, in quibus etiam pestilentiam faciunt. Scire autem licet, integrum corpus esse, cum quotidie mane urina alba, dein rufa est. Illud concoquere, hoc concoxisse significat. Ubi expectatus est aliquis, paulum intermittere: deinde, nisi hiems est, fovere os multa aqua frigida debet. Longis diebus meridiari potius ante cibum; sin minus, post eum. Per hiemem potissimum totis noctibus conquiescere. Sin lucubrandum est, non post cibum id facere, sed post concoctionem. Quem interdum vel domestica, vel civilia officia tenuerunt, huic tempus aliquod servandum curationi corporis sui est. Prima autem ejus curatio, exercitatio est, quæ semper antecedere cibum debet: in eo, qui minus laboravit, & bene concoxit, amplior: in eo, qui fatigatus est, & minus concoxit, remissior. Commode vero exercent, clara lectio, arma, pila, cursus, ambulatio. atque hæc non utique plana, commodior est: siquidem melius ascensus quoque & descensus, cum quadam varietate corpus moveat; nisi tamen id perquam imbecillum est. Melior autem est sub divo, quam in porticu: melior, si caput patitur, in sole, quam in umbra: melior in umbra, quam parietes aut

viridaria efficiunt, quam quæ tecto subest: melior recta, quam flexuosa. Exercitationis autem plerumque finis esse debet sudor, aut certe lassitudo, quæ citra fatigationem sit: idque ipsum, modo minus, modo magis faciendum est. Ac ne his quidem, athletarum exemplo, vel certa esse lex, vel immodicus esse labor debet. Exercitationem recte sequitur, modo unctio, vel in sole, vel ad ignem, modo balneum, sed in conclavi quam maxime & alto, & lucido, & spatioso. Ex his vero neutrum semper fieri oportet; sed sæpius alterutrum, pro corporis natura. Post hæc paulum conquiescere opus est. Ubi ad cibum ventum est, nunquam utilis est nimia satietas: sæpe inutilis nimia abstinentia: sæpe, si qua intemperantia subest, tutior est in potione, quam in esca. Cibus a fassamentis, oleribus, similibusque rebus melius incipit. Tum caro assumenda est, quæ assa optima, aut elixa est. Condita omnia duabus de causis inutilia sunt, quoniam & plus propter dulcedinem assumitur, & quod modo par est, tamen ægrius concoquitur. Secunda mensa bono stomacho nihil nocet, in imbecillo coacescit. Si quis itaque hoc parum valet, palmulas, pomaque, & similia melius primo cibo assumit. Post multas potiones, quæ aliquantum sitim exceßerunt, nihil edendum est: post satietatem, nihil agendum. Ubi expletus est aliquis, facilius concoquit, si, quidquid assumsit, potione aquæ frigidæ includit, tum paulisper invigilat, deinde bene dormit. Si quis interdium se implevit, post cibum neque frigori, neque æstui, neque la-

bori se debet committere. Neque enim tam facile hæc inani corpore, quam repleto nocent. Si quibus de causis futura inedia est, labor omnis vitandus est.

CAPUT III.

Observationes quædam, prout res novæ accidunt, & corporum genera, & sexus, & ætates, & tempora anni sunt.

ATQUE hæc quidem pæne perpetua sunt: quasdam tamen observationes desiderant & novæ res, & corporum genera, & sexus, & ætates, & tempora anni. Nam neque ex salubri loco in gravem, neque ex gravi in salubrem transitus satis tutus est. Ex salubri in gravem, prima hieme; ex gravi in eum, qui salubris est, prima æstate transire melius est. Neque vero ex multa fame nimia satietas: neque ex nimia satietate fames idonea est. Periclitaturque & qui semel, & qui bis die cibum incontinenter, contra consuetudinem, assumit. Item, neque ex nimio labore subitum otium, neque ex nimio otio subitus labor, sine gravi noxa est. Ergo, cum quis mutare aliquid volet, paulatim debet assuescere. Omnem etiam laborem facilius vel puer vel senex, quam infuetus homo sustinet. Atque ideo quoque nimis otiosa vita utilis non est; quia potest incidere laboris necessitas. Si quando tamen infuetus aliquis laboravit, aut multo plus, quam solet, etiam is, qui assuevit, huic jejuno dor-

miendum est: multo magis, si etiam os amarum est, vel oculi caligant, aut venter perturbatur. Tum enim non dormiendum tantummodo jejuno est, sed etiam in posterum diem permanendum, nisi cito id quies sustulit. Quod si factum est, surgere oportet, & lente paululum ambulare. At si somni necessitas non fuit, quia modice magis aliquis laboravit, tamen ingredi aliquantum eodem modo debet.

Communia deinde omnibus sunt post fatigationem cibum sumturis, ubi paulum ambulaverunt, si balneum non est, calido loco, vel in sole, vel ad ignem ungi, atque sudare: si est, ante omnia in tepidario residere: deinde, ubi paulum conquieverunt, intrare, & descendere in solium; tum multo oleo ungi, leniterque perfricari; iterum in solium descendere: post hæc, os aqua calida fovere, deinde frigida. Balneum his fervens idoneum non est. Ergo si nimium alicui fatigato pæne febris est, huic abunde est, loco tepido demittere se inguinibus tenus in aquam calidam, cui paulum olei sit adjectum: deinde totum quidem corpus, maxime tamen eas partes, quæ in aqua fuerunt, leniter perfricare ex oleo, cui vinum & paulum contriti salis sit adjectum. Post hæc, omnibus fatigatis aptum est, cibum sumere, eoque humido uti; aqua, vel certe diluta potione esse contentos; maximeque ea, quæ moveat urinam. Illud quoque nosse oportet, quod ex labore sudanti frigida potio perniciosissima est: atque etiam, cum sudor se remisit, itinere fatigatis inutilis. A balneo quo-

que venientibus Asclepiades inutilem eam iudicavit. Quod in his verum est, quibus alvus facile, nec tuto, resolvitur, quique facile inhorrescunt: perpetuum in omnibus non est, cum potius naturale sit, potione æstuantem stomachum refrigerari, frigentem calefieri. Quod ita præcipio, ut tamen fatear, ne ex hac quidem causa sudanti adhuc frigidum bibendum esse. Solet etiam prodesse, post varium cibum, frequentesque dilutas potiones, vomitus, & postero die longa quies, deinde modica exercitatio. Si assidua fatigatio urget, invicem modo aqua, modo vinum bibendum est, raroque balneo utendum. Levatque lassitudinem etiam laboris mutatio: eumque, quem novum genus cuiusdam laboris preffit, id, quod in consuetudine est, reficit. Fatigato quotidianum cubile tutissimum est: insolitum contra, lassat. Quod enim contra consuetudinem est, nocet, seu molle, seu durum est.

Proprie quædam ad eum pertinent, qui ambulando fatigatur. Hunc reficit in ipso quoque itinere frequens frictio: post iter, primum sedile, deinde unctio; tum calida aqua in balneo magis inferiores partes, quam superiores, foveat. Si quis vero exustus in sole est, huic in balneum protinus eundum est, perfundendumque oleo corpus & caput: deinde in folium bene calidum descendendum est, tum multa aqua per caput infundenda, prius calida, deinde frigida. At ei, qui perfrixit, opus est in laconico primum involuto sedere, donec insudet; tum ungi; deinde lavari: ci-

hum modicum, deinde potiones meracas assumere.

Is vero, qui navigavit, & nausea pressus est, si multam bilem evomuit, vel abstinere cibo debet, vel paulum aliquid assumere. Si pituitam acidam effudit, utique sumere cibum, sed assueto levio-rem: si sine vomitu nausea fuit, vel abstinere, vel post cibum vomere. Qui vero toto die, vel in vehiculo, vel in spectaculis fedit, huic nihil currendum, sed lente ambulandum est. Lenta quoque in balneo mora, dein coena exigua prodesse consueverunt. Si quis in balneo æstuat, reficit hunc ore exceptum, & in eo retentum acetum: si id non est, eodem modo frigida aqua assumta. Ante omnia autem norit quisque naturam sui corporis: quoniam alii graciles, alii obesi sunt; alii calidi, alii frigidiores; alii humidi, alii sicci: alios adstricta, alios resoluta alvus exercet. Raro quisquam non aliquam partem corporis imbecillam habet. Tenuis vero homo implere se debet, plenus extenuare, calidus refrigerare, frigidus calefacere, madens siccare, ficcus madefacere, itemque alvum firmare is, cui fusa, solvere is, cui adstricta est. Succurrendumque semper parti maxime laboranti est.

De causis, quæ implent corpus.

Implet autem corpus modica exercitatio, frequentior quies, unctio, &, si post prandium est, balneum, contracta alvus, modicum frigus hieme, somnus & plenus, & non nimis longus, molle cubile, animi securitas, assumta per cibos & potio-

nes maxime dulcia & pingua, cibus & frequentior, & quantus plenissimus potest concoqui.

De his, quæ extenuant corpus;

Extenuat corpus aqua calida, si quis in eam descendit, magisque si salsa est: in jejuniis balneum, inurens sol, & omnis calor, cura, vigilia, somnus nimium vel brevis, vel longus: lectus, per æstatem, terra; hieme, durum cubile: cursus, multa ambulatio, omnisque vehemens exercitatio, vomitus, dejectio, acidæ res & austeræ, & semel die assumptæ epulæ, & vini non perfrigidi potio jejuno in consuetudinem adducta.

Cum vero inter extenuantia posuerim vomitum & dejectionem, de his quoque proprie quædam dicenda sunt. Ejectum esse ab Asclepiade vomitum in eò volumine, quod de tuenda sanitate composuit, video: neque reprehendo, si offensus eorum est consuetudine, qui quotidie ejiciendo vorandi facultatem moliuntur. Paulo etiam longius processit. Idem purgationes quoque eodem volumine expulit: Et sunt hæc perniciosæ, si nimis valentibus medicamentis fiunt. Sed hæc tamen submovenda esse, non est perpetuum: quia corporum temporumque ratio potest ea facere necessaria, dum & modo, & non nisi cum opus est, adhibeantur. Ergo ille quoque ipse, si quid jam corruptum esset, expelli debere confessus est. Ita non ex toto res condemnanda est: sed esse ejus etiam plures

causæ possunt : estque in ea quædam paulo subtilior observatio adhibenda.

De vomitu.

Vomitus utilior est hieme, quam æstate, nam tum & pituitæ plus, & capitis gravitas major subest. Inutilis est gracilibus, & imbecillum stomachum habentibus; utilis est plenis & biliosis omnibus, si vel nimium se replerunt, vel parum concoxerunt. Nam, si plus est, quam quod concoqui possit, periclitari, ne corrumpatur, non oportet: si jam corruptum est, nihil commodius est, quam id, qua via primum expelli potest, ejicere. Itaque, ubi amari ructus cum dolore & gravitate præcordiorum sunt, ad hunc protinus confugiendum est. Idem prodest ei, cui pectus æstuat, & frequens saliva, vel nausea est; aut cui sonant aures, aut madent oculi, aut os amarum est. Similiterque ei, qui vel cælum, vel locum mutat; hisque, quibus, si per plures dies non vomuerunt, dolor præcordia infestat. Neque ignoro, inter hæc præcipi quietem, quæ non semper contingere potest agendi necessitatem habentibus: nec in omnibus idem facit. Itaque istud luxuriæ causa fieri non oportere confiteor: interdum valetudinis causa recte fieri, experimentis credo. Commoneo tamen, ne quis, qui valere & senescere volet, hoc quotidianum habeat. Qui vomere post cibum volet, si ex facili facit, aquam tantum tepidam ante debet assumere; si difficilius, aquæ vel salis, vel mellis

paulum adjicere. At, qui mane vomiturus est, ante bibere mulsum, vel hyssopum esse, aut radiculam debet; deinde aquam tepidam, ut supra scriptum est, bibere. Cetera, quæ antiqui medici præceperunt, stomachum omnia infestant. Post vomitum, si stomachus infirmus est, paulum cibi, sed hujus idonei, gustandum; & aquæ frigidaë cyathi tres bibendi sunt. Si autem vomitus fauces exasperavit, qui vomuit, si mane id fecit, ambulare debet, tum ungi, deinde coenare: si post coenam, postero die lavari, & in balneo sudare. Huic proximus cibus mediocris utilior est: isque esse debet cum pane hesterno, vino austero meraco, & carne assa, cibisque omnibus quam ficcissimis. Qui vomere his in mense vult, melius consulet, si biduo continuarit, quam si post quintum decimum diem vomuerit, nisi hæc mora gravitatem pectori faciet.

De dejectionibus.

Dejectio autem medicamento quoque petenda est, ubi venter suppressus parum reddit, ex eoque inflammationes, caligines, capitis dolores, aliaque superioris partis mala crescunt. Quid enim inter hæc adjuvare possunt quies & inedia, per quæ illa maxime eveniunt? Qui deicere volet, primum cibis vinisque utatur his, quæ hoc præstent. Deinde hinc, si parum illa proficiant, aloem sumat. Sed purgationes quoque, ut interdum necessariae sunt, sic, ubi frequentes sunt, periculum afferunt. Assuescit enim non ali corpus; & ob hoc infirmum

erit; cum omnibus morbis obnoxia maxime infirmitas sit.

De his, quæ calefaciunt, & refrigerant corpus.

Calefacit autem unctio, aqua falsa, magisque si calida est; omnia falsa, amara, carnosæ, si post cibum est, balneum, vinum austerum. Refrigerat in jejuniis balneum, & somnus, nisi nimis longus est; & omnia acida; aqua quam frigidissima; oleum, si qua misceatur.

De his, quæ humidum reddunt, & siccant corpus.

Humidum autem corpus efficit labor minor, quam ex consuetudine, frequens balneum, cibus plenior, multa potio; post hæc ambulatio, & vigilia. Per se quoque ambulatio multa & vehemens, & matutina exercitatio, & non protinus cibus adjectus; ea genera escæ, quæ veniunt ex locis frigidis, & pluviis, & irriguis. Contra siccant immodica exercitatio, fames, unctio sine aqua, calor, sol immodicus, frigida aqua, cibus exercitationi statim subjectus, & is ipse ex siccis & æstuosissimis locis veniens.

De his, quæ alvum adstringunt & solvunt.

Alvum adstringit labor, sedile, creta figularis corpori illita, cibus imminutus, & is ipse semel die assumptus ab eo, qui bis solet: exigua potio, neque adhibita, nisi cum cibi quis, quantum assum-

rurus est, cepit: post cibum quies. Contra solvit aucta ambulatio atque esca, motus qui post cibum est, subinde potiones cibo immixtæ. Illud quoque scire oportet, quod ventrem vomitus solum comprimit, compressum solvit. Itemque comprimit is vomitus, qui statim post cibum est: solvit is, qui tarde supervenit.

De ætatum varietate.

Quod ad ætates vero pertinet, inediam facillime sustinent mediæ ætates, minus juvenes, minime pueri & senectute confecti. Quo minus fert facile quisque, eo sæpius debet cibum assumere; maximeque eo eget, qui increscit. Calida lavatio, & pueris & senibus apta est. Vinum dilutius pueris, senibus meracius, neutri ætati, quæ inflationes movent. Juvenum minus, quæ assumant, & quomodo curentur, interest. Quibus juvenibus fluxit alvus, plerumque in senectute contrahitur. Quibus in adolescentia fuit adstricta, sæpe in senectute solvitur. Melior est autem in juvene fusior, in senectute adstrictior.

De varietate temporum.

Tempus quoque anni considerare oportet. Hieme plus esse convenit; minus, sed meracius bibere; multo pane uti, carne potius elixa, modice oleribus; semel die cibum capere, nisi si nimis venter adstrictus est. Si prandet aliquis, utilius est

exiguum aliquid, & ipsum ficcum sine carne, sine potione fumere. Eo tempore anni calidis omnibus potius utendum est, vel calorem moventibus. Venus tum non æque perniciofa est. At vere paulum cibo demendum, adjiciendumque potioni, sed dilutius tamen bibendum est: magis carne utendum, magis oleribus, transeundum paulatim ad assa ab elixis. Venus eo tempore anni tutissima est.

De diætâ ciborum potionumque.

Æstate vero & potione & cibo corpus sæpius eget: ideo prandere quoque commodum est. Eo tempore aptissima sunt & caro & olus: potio quam dilutissima, ut & sitim tollat, nec corpus incendat: frigida lavatio, caro assa, frigidi cibi, vel qui refrigerent. Ut sæpius autem cibo utendum, sic exiguo est.

Autumnalis diætâ.

Per autumnum propter cœli varietatem, periculum maximum est. Itaque neque sine veste, neque sine calciamentis prodire oportet, præcipueque diebus frigidioribus, neque sub dio nocte dormire, aut certe bene operiri. Cibo vero jam paulo pleniore uti licet; minus, sed meracius bibere. Poma nocere quidam putant, quæ immodice toto die plerumque sic assumuntur, ut ne quid ex densiore cibo remittatur. Ita non hæc, sed consummatio omnium nocet. Ex quibus in nullo tamen minus, quam in his noxæ est. Sed his uti non sæ-

pius, quam alio cibo convenit. Denique aliquid densiori cibo, cum hic accedit, necessarium est demi. Neque æstate vero, neque autumno utilis venus est. Tolerabilior tamen per autumnum: æstate in totum, si fieri potest, abstinendum.

CAPUT IV.

De his, qui aliqua parte corporis laborant, & primum de his, quibus caput infirmum est.

PROXIMUM est, ut de his dicam, qui partes aliquas corporis imbecillas habent. Cui caput infirmum est, is, si bene concoxerit, leniter perfricare id mane manibus suis debet; nunquam id, si fieri potest, veste velare, aut ad cutem tondere: uti-
leque lunam vitare, maximeque ante ipsum lunæ solisque concursum: sed nusquam post cibum progredi. Si cui capilli sunt, eos quotidie pectere: multum ambulare; sed, si licet, neque sub tecto, neque in sole: ubique autem vitare solis ardorem, maximeque post cibum & vinum: potius ungi, quam lavari; nunquam ad flammam ungi, interdum ad prunam. Si in balneum venit, sub veste primum paulum in tepidario insudare, ibi ungi, tum transire in calidarium, ubi sudabit; in solium non descendere, sed multa calida aqua per caput se totum perfundere; tum tepida, dein frigida; diutiusque ea caput, quam ceteras partes perfundere; deinde id aliquamdiu perfricare; novissime

detergere & ungere. Capiti nihil æque prodest atque aqua frigida. Itaque is, cui hoc infirmum est, per æstatem id bene largo canali quotidie debet aliquamdiu subjicere. Semper autem, etiamsi sine balneo unctus est, neque totum corpus refrigerare sustinet, caput tamen aqua frigida perfundere. Sed cum ceteras partes attingi nolit, demittere id, ne ad cervices aqua descendat; eamque, ne quid oculis, aliisve partibus noceat, defluentem subinde manibus ad hoc regerere. Huic modicus cibus necessarius est, quem facile concoquat: isque, si jejuno caput læditur, assumendus etiam medio die est: si non læditur, semel potius. Bibere huic assidue vinum dilutum lene, quam aquam, magis expedit; ut, cum caput gravius esse coeperit, sit, quo confugiat: eique ex toto neque vinum, neque aqua semper, utilia sunt: medicamentum utrumque est, cum invicem assumitur. Scribere, legere, voce contendere, huic opus non est, utique post coenam: post quam nec cogitatio quidem ei satis tuta est; maxime tamen vomitus alienus est.

C A P U T V.

De his, qui lippitudine, gravedine, destillatione; tonsillisque laborant.

NEQVE vero his solis, quos capitis imbecillitas torquet, usus aquæ frigidæ prodest; sed iis etiam, quos assiduæ lippitudines, gravedines, destillatio-

nes, tonsillæque male habent. His autem non caput tantum quotidie perfundendum, sed os quoque multa frigida aqua fovendum est: præcipueque omnibus, quibus hoc utile auxilium est, eo utendum est, ubi gravius coelum Austri reddiderunt. Cumque omnibus inutilis sit post cibum aut contentio, aut cogitatio animi; tum his præcipue, qui vel capitis, vel arteriæ dolores habere consueverunt, vel quoslibet alios oris affectus. Vitari etiam gravedines, destillationesque possunt, si quam minime is, qui his opportunus est, aerem vel loca aquasque mutat; si caput in sole protegit, ne incendatur, neve subitum ex repentino nubilo frigus id moveat: si post concoctionem jejunos caput radit: si post cibum neque legit, neque scribit.

CAPUT VI.

Ad solutam alvum remedia.

QUEM vero frequenter cita alvus exercet, huic opus est pila similibusque superiores partes exercere; dum jejunos est, ambulare; vitare solis nimium ardorem, continua balnea; ungi citra sudorem; non uti cibis variis, minimeque jurulentis aut leguminibus, oleribusve his, quæ celeriter descendunt; omnia denique sumere, quæ tarde concoquuntur. Venatio, durique pisces, & ex domesticis animalibus assa caro maxime juvant. Nunquam vinum falsum bibere expedit, ne tenue qui-

dem, aut dulce; sed austerum, & plenius, neque id ipsum pervetus. Si mulso uti volet, id ex decocto melle faciendum est. Si frigidaë potiones ventrem ejus non turbant, his utendum potissimum est. Si quid offensæ in cœna sensit, vomere debet; idque postero quoque die facere: tertio, modici ponderis panem ex vino esse, adjecta uva aut olea, vel ex defruto, similibusque aliis: deinde ad consuetudinem redire. Semper autem post cibum conquiescere, ac neque intendere animum, neque ambulatione quamvis leni dimoveri.

C A P U T VII.

Remedia ad coli dolorem.

AT si laxius intestinum dolere consuevit, quod *κόλον* nominant, cum id nihil nisi genus inflationis sit, id agendum est, ut concoquat aliquis; ut lectione, & aliis generibus exerceatur; utatur balneo calido, cibis quoque & potionibus calidis; denique omnimodo frigus evitet, item dulcia omnia, leguminaque, & quidquid inflare consuevit.

C A P U T VIII.

Quæ agenda sint stomacho laborantibus.

SI quis vero stomacho laborat, legere clare debet; post lectionem ambulare; tum pila, vel armis,

aliove quo genere, quo superior pars movetur, exerceri. Non aquam, sed vinum calidum bibere jejunos. Cibus his die assumere; sic tamen, ut facile concoquat. Uti vino tenui & austero; & post cibum, frigidis potionibus potius. Stomachum autem infirmum indicant pallor, macies, præcordiorum dolor, nausea, & nolentium vomitus, in jejuno dolor capitis. Quæ in quo non sunt, is firmi stomachi est. Neque credendum utique nostris est, qui, cum in adversa valetudine vinum aut frigidam aquam concupierunt, deliciarum patrocinium in accusationem non merentis stomachi habent. At, qui tarde concoquunt, & quorum ideo præcordia inflantur, quive propter ardorem aliquem noctu sitire consueverunt, ante quam conquiescant, duos tresve cyathos per tenuem fistulam bibant. Prodest etiam adversus tardam concoctionem clare legere, deinde ambulare, tum vel ungi vel lavari; assidue vinum frigidum bibere; & post cibum, magnam potionem, sed, ut supra dixi, per siphonem: deinde omnes potiones aqua frigida includere. Cui vero cibus acefcit, is ante eum bibere aquam egelidam debet, & vomere. At is, cui ex hoc frequens dejectio incidit, quoties alvus ei constiterit, frigida portione potissimum utatur.

CAPUT IX.

Quid observandum sit dolore nervorum laborantibus.

SI cui vero dolere nervi solent, quod in podagra chiragrave esse consuevit, huic, quantum fieri potest, exercendum id est, quod affectum est, obijciendumque labori & frigori; nisi cum dolor increvit; sub quo quies optima est. Venus semper inimica est. Concoctio, sicut in omnibus corporis affectibus, necessaria est. Cruditas enim id maxime lædit, & quoties offensus corpus est, vitiosa pars maxime sentit. Ut concoctio autem omnibus vitiis occurrit, sic rursus aliis frigus, aliis calor. Quæ sequi quisque pro habitu corporis sui debet. Frigus inimicum est seni, tenui, vulneri, præcordiis, intestinis, vesicæ, auribus, coxis, scapulis, naturalibus, ossibus, dentibus, nervis, vulvæ, cerebro. Idem summam cutem facit pallidam, aridam, duram, nigram. Ex hoc horrores tremoresque nascuntur. At prodest juvenibus, & omnibus plenis. Erectiorque mens est, & melius concoquitur, ubi frigus quidem est, sed cavetur. Aqua vero frigida infusa, præterquam capiti, etiam stomacho prodest. Item articulis doloribusque, qui sunt sine ulceribus. Item rubicundis nimis hominibus, si dolore vacant. Calor autem adjuvat omnia, quæ frigus infestat: item lippientes, si nec dolor, nec lacrimæ sunt: nervos quoque, qui contrahuntur;

præcipueque ea ulcera, quæ ex frigore sunt. Idem corporis colorem bonum facit: urinam movet. Si nimius est, corpus effeminat, nervos emollit, stomachum solvit. Minime vero aut frigus aut calor tuta sunt, ubi subita insuetis sunt. Nam frigus, lateris dolores, aliaque vitia; frigida aqua, strumas excitat. Calor concoctionem prohibet, somnum aufert, sudore digerit, obnoxium morbis pestilentibus corpus efficit.

CAPUT X.

Observatio in pestilentia.

EST etiam observatio necessaria, qua quis in pestilentia utatur adhuc integer, cum tamen securus esse non possit. Tum igitur oportet peregrinari, navigare. Ubi id non licet, gestari, ambulare sub dio, ante æstum, leniter; eodemque modo ungi: & ut supra comprehensum est, vitare fatigationem, cruditatem, frigus, calorem, libidinem; multoque magis se continere, si qua gravitas in corpore est; tum neque mane surgendum, neque pedibus nudis ambulandum est, minimeque post cibum, aut balneum: neque jejuno, neque coenato vomendum est: neque movenda alvus; atque etiam, si per se mota est, comprimenda est. Abstinendum potius, si plenius corpus est. Itemque vitandum balneum, sudor, meridianus somnus, utique si cibus quoque antecessit; qui tamen semel die tunc commodius assumitur; insuper etiam mo-

dicus, ne cruditatem moveat. Alternis diebus invicem, modo aqua, modo vinum bibendum est. Quibus servatis, ex reliqua victus consuetudine quam minimum mutari debet. Cum vero hæc in omni pestilentia facienda sint, tum in ea maxime, quam Austri excitant. Atque etiam peregrinantibus eadem necessaria sunt, ubi gravi tempore anni discesserunt ex suis sedibus, vel ubi in graves regiones venerunt. Ac si cetera res aliqua prohibebit, utique abstinere debet: atque ita a vino ad aquam, ab hac ad vinum, eo, qui supra positus est, modo, transitus ei esse.

A. CORN. CELSI
M E D I C I N Æ
LIBER SECUNDUS.

P R Æ F A T I O.

INSTANTIS autem adversæ valetudinis signa complura sunt. In quibus explicandis non dubitabo auctoritate antiquorum virorum uti, maximeque Hippocratis; cum recentiores quoque medici, quamvis quædam in curationibus mutarint, tamen hæc illum optime prælagisse fateantur. Sed antequam dico, quibus præcedentibus morborum timor subfit; non alienum videtur exponere, quæ tempora anni, quæ tempestatum genera, quæ partēs ætatis, qualia corpora maxime tutā vel periculis opportuna sint; quod genus adversæ valetudinis in quoque timeri maxime possit. Non quod non omni tempore, in omni tempestatum genere, omnis ætatis, omnis habitus homines per omnia genera morborum & ægrotent, & moriantur; sed quod frequentius tamen quædam eveniant. Ideoque utile est scire unumquemque, quid, & quando maxime caveat.

CAPUT I.

Quæ anni tempora , quæ tempestatum genera , quæ partes ætatis , qualia corpora vel tuta , vel morbis opportuna sint , & quod valetudinis genus in quoque timeri possit.

IGITUR saluberrimum ver est : proxima deinde ab hoc , hiems : periculosior æstas : autumnus longe periculosissimus. Ex tempestatibus vero optimæ æquales sunt , sive frigidæ , sive calidæ : pessimæ , quæ variant maxime. Quo fit , ut autumnus plurimos opprimat. Nam fere meridianis temporibus calor ; nocturnis atque matutinis , simulque etiam vespertinis , frigus est. Corpus ergo , & æstate , & subinde meridianis caloribus relaxatum , subito frigore excipitur. Sed ut eo tempore id maxime fit , sic , quodocunque evenit , noxium est. Ubi æqualitas autem est , tamen saluberrimi sunt sereni dies ; meliores pluvii , quam tantum nebulosi aut nubili ; optimique hieme , qui omni vento vacant ; æstate , quibus Favonii perflant. Si genus aliud ventorum est , salubriores Septemtrionales , quam Subsolani , vel Austri sunt. Sic tamen , ut hæc interdum regionum forte mutantur. Nam fere ventus ubique a mediterraneis regionibus veniens , salubris ; a mari , gravis est. Neque solum in bono tempestatum habitu certior valetudo est ; sed priores morbi quoque , si qui inciderunt , leviores sunt , & promptius finiuntur. Pessimum ægro est cœlum ; quod

ægrum fecit, adeo ut in id quoque genus, quod natura pejus est, in hoc statu salubris mutatio sit. Ætas media tutissima est: quæ neque juventæ calore, neque senectutis frigore infestatur. Longis morbis senectus, acutis adolescentia magis patet. Corpus autem habilissimum quadratum est, neque gracile, neque obesum. Nam longa statura, ut in juventa decora est, sic matura senectute conficitur. Gracile corpus infirmum: obesum hebes est. Vere tamen maxime, quæcunque humoris motu novantur, in metu esse consueverunt. Ergo tum lipituidines, pustulæ, profusio sanguinis, abscessus corporis, quæ ἀποστήματα Græci nominant, bilis atra, quam μελαγχολίαν appellant, infania, morbus comitialis, angina, gravedines, destillationes oriri solent. Hi quoque morbi, qui in articulis nervisque modo urgent, modo quiescunt, tum maxime & inchoantur, & repetunt. At æstas non quidem vacat plerisque ab his morbis; sed adjicit febres, vel continuas, vel ardentes, vel tertianas, vomitus, alvi dejectiones, auricularum dolores, ulcera oris, cancos, & in ceteris quidem partibus, sed maxime obscœnis; & quidquid sudore hominem resolvit. Vix quidquam ex his in autumnum non incidit: sed oriuntur eo quoque tempore febres incertæ, lienis dolor, aqua inter cutem, tabes, quam Græci φθίσιν nominant, urinæ difficultas, quam στραγγουρίαν appellant, tenuioris intestini morbus, quem σίλεον nominant. Fit item lævitas intestinorum, quæ λειψτερίω vocatur, coxæ dolores, morbi comitiales. Idemque tempus & diutinis malis fa-

rigatos, & ab æstate tantum pressos interimit, & alios novis morbis conficit, & quosdam longissimis implicat, maximeque quartanis, quæ per hiemem quoque exerceant. Neque aliud magis tempus pestilentia patet, cujuscunque ea generis est; quamvis variis rationibus nocet. Hiems autem capitis dolores, tussim, & quidquid in faucibus, in lateribus, in visceribus mali contrahitur, irritat.

Ex tempestatibus, Aquilo tussim movet, fauces exasperat, ventrem adstringit, urinam supprimit, horrores excitat, item dolores lateris & pectoris. Sanum tamen corpus spissat, & mobilius atque expeditius reddit. Auster aures hebetat, sensus tardat, capitis dolores movet, alvum solvit, totum corpus efficit hebes, humidum, languidum. Ceteri venti, quo vel huic vel illi propiores sunt, eo magis vicinos his, illisve affectus faciunt. Denique omnis calor, & jecur & lienem inflamat, mentem hebetat, & ut anima deficiat, ut sanguis prorumpat, efficit. Frigus modo nervorum distentionem, modo rigorem infert; illud *σπασμὸς*, hoc *τέτανος* Græce nominatur: nigritiem in ulceribus, & horrorem in febribus excitat. In siccitatibus, acutæ febres, lippitudines, tormina, urinæ difficultas, articulorum dolores oriuntur. Per imbres, longæ febres, alvi dejectiones, angina, canceri, morbi comitiales, resolutio nervorum, quam *παράλυσιν* Græci nominant. Neque solum interest, quales dies sint, sed etiam quales ante præcesserint. Si hiems sicca Septemtrionales ventos habuit, ver autem Austros & pluvias exhibet, fere sub-

eunt lippitudines, tormina, febres, maximeque in mollioribus corporibus, ideoque præcipue in muliebribus. Si vero Austri pluviaeque hiemem occuparunt, ver autem frigidum & siccum est, gravidæ quidem feminæ, quibus dum adest partus, abortu periclitantur: hæ vero, quæ gignunt, imbecillos, vixque vitales edunt. Ceteros lippitudo arida, & si seniores sunt, gravedines atque destillationes male habent. At si a prima hieme Austri ad ultimum ver continuarunt, laterum dolores, & insania febricitantium, quam *φρενίτις* appellant, quam celerrime rapiunt. Ubi vero calor a primo vere orsus, æstatem quoque similem exhibet, necesse est multum sudorem in febribus subsequi. At si sicca æstas Aquilones habuit, autumnus vero imbres Austrique sunt, tota hieme, quæ proxima est, tussis, destillatio, raucitas, in quibusdam etiam tabes oriuntur. Sin autem autumnus quoque æque siccus iisdem Aquilonibus perflatur, omnibus quidem mollioribus corporibus, inter quæ muliebria esse proposui, secunda valetudo contingit: durioribus vero instare possunt & aridæ lippitudines, & febres partim acutæ, partim longæ, & hi morbi, qui ex atra bile nascuntur.

Quod ad ætates vero pertinet, pueri proximique his vere optime valent, & æstate prima tutissimi sunt: senes æstate & autumnus prima parte: juvenes hieme, quique inter juventam senectutemque sunt. Inimicior senibus hiems, æstas adolescentibus est. Tum si qua imbecillitas oritur, proximum est, ut infantes, tenerosque adhuc pueros.

serpentia ulcera oris, quæ ἀφθας Græci nominant, vomitus, nocturnæ vigiliæ, aurium humor, circa umbilicum inflammationes exerceant; proprie etiam dentientium gingivarum exulcerationes; distentiones nervorum, febriculæ, alvi dejectiones, maximeque caninis dentibus orientibus, male habent. Quæ pericula plenissimi cujusque sunt, & cui maxime venter adstrictus est. At ubi ætas paulum processit, glandulæ, & vertebrarum, quæ in spina sunt, aliquæ inclinationes, strumæ, verrucarum quædam genera dolentia, ἀποχρόδονας Græci appellant, & plura alia tubercula oriuntur. Incipiente vero jam pube, ex iisdem multa, & longæ febres, & sanguinis ex naribus cursus. Maximeque omnis pueritia, primum circa quadragesimum diem, deinde septimo mense, tum septimo anno, postea circa pubertatem periclitatur. Si quæ etiam genera morborum in infantem inciderunt, ac neque pubertate, neque primis coitibus, neque in femina primis menstruis finita sunt, fere longa sunt: sæpius tamen his morbi pueriles, qui diutius manserunt, terminantur. Adolescentia morbis acutis, item comitialibus, tabique maxime objecta est: fereque juvenes sunt, qui sanguinem exspuunt. Post hanc ætatem laterum & pulmonis dolores, lethargus, cholera, insania, sanguinis per quædam etiam velut ora venarum, αἱμορροΐδας Græci appellant, profusio. In senectute, spiritus & urinæ difficultas, gravedo, articulorum & renum dolores, nervorum resolutiones, malus corporis habitus, καχεξία Græci appellant, nocturnæ vigiliæ, vitia

longiora aurium, oculorum, etiam narium, præcipueque soluta alvus, &, quæ sequuntur hanc, tormina, vel lævitas intestinorum, ceteraque fusi ventris mala. Præter hæc graciles, tabes, dejectiones, destillationes, item viscerum & laterum dolores fatigant. Obesi plerumque acutis morbis, & difficultate spirandi strangulantur, subitoque sæpe moriuntur; quod in corpore tenuiore vix evenit.

CAPUT II.

De signis adversæ valetudinis futuræ.

ANTE adversam autem valetudinem, ut supra dixi, quædam notæ oriuntur: quarum omnium commune est, aliter se corpus habere, atque consuevit, neque in pejus tantum, sed etiam in melius. Ergo si plenior aliquis, & speciosior, & coloratior factus est, suspecta habere bona sua debet. Quæ quia neque in eodem habitu subsistere, neque ultra progredi possunt, fere retro, quasi ruina quadam, revolvuntur. Pejus tamen signum est, ubi aliquis contra consuetudinem emacuit, ubi colorem decoremque amisit: quoniam in his, quæ superant, est, quod morbus demat; in his, quæ defunt, non est, quod ipsum morbum ferat. Præter hæc, protinus timeri debet, si graviora membra sunt; si crebra ulcera oriuntur; si corpus supra consuetudinem incaluit; si gravior somnus pressit; si tumultuosa somnia fuerunt; si sæpius expergiscitur aliquis, quam assuevit, deinde ite-

rum soporatur; si corpus dormientis circa partes aliquas contra consuetudinem insudat, maximeque circa pectus, aut cervicēs, aut crura, vel genua, vel coxas. Item, si marcet animus; si loqui & moveri piget; si corpus torpet; si dolor præcordiorum est, aut totius pectoris, aut, qui in plurimis evenit, capitis; si salivæ plenum est os; si oculi cum dolore vertuntur; si tempora adstricta sunt; si membra inhorrescunt; si spiritus gravior est; si circa frontem intentæ venæ moventur; si frequentes oscitationes; si genua quasi fatigata sunt, totumve corpus lassitudinem sentit. Ex quibus sæpe plura, nunquam non aliqua febrem antecedunt. In primis tamen illud considerandum est, num cui sæpius horum aliquid eveniat, neque ideo corporis ulla difficultas subsequatur. Sunt enim quædam proprietates hominum, sine quarum notitia non facile quidquam in futurum præsagiri potest. Facile itaque securus est in his aliquis, quæ sæpe sine periculo evasit. Ille sollicitari debet, cui hæc nova sunt; aut qui ista nunquam sine custodia sui tuta habuit.

C A P U T III.

Quæ bona in ægrotantibus signa sint.

UBI vero febris aliquem occupat, scire licet, non periclitari, si in latus aut dextrum aut sinistrum, ut ipsi visum est, cubat, cruribus paulum reductis; qui fere sani quoque jacentis habitus

est: si facile convertitur; si noctu dormit, si interdiu vigilat; si ex facili spirat; si non conflictatur; si circa umbilicum & pubem cutis plana est; si præcordia ejus sine ullo sensu doloris æqualiter mollia in utraque parte sunt: quod si paulo tumidiora sunt, tamen digitis cedunt, & non dolent. Hæc valetudo, ut spatium aliquod habebit, sic tuta erit. Corpus quoque, quod æqualiter molle & calidum est, quodque æqualiter totum insudat, & cujus febricula eo sudore finitur, securitatem pollicetur. Quando jam ad sanitatem venit corpus, sternutamentum etiam inter bona indicia est, & cupiditas cibi vel a primo servata, vel etiam post fastidium orta. Neque terrere debet ea febris, quæ eodem die finita est: ac ne ea quidem, quæ, quamvis longiore tempore tenuit, tamen ante alteram accessionem ex toto quievit, sic, ut corpus integrum, quod *εὐκρινὲς* Græci vocant, fieret. Si quis autem incidit vomitus, mixtus esse ex bile & pituita debet; & in urina subsidere album, læve, æquale; sic ut etiam, si quæ quasi nubeculæ innatarint, in imum deferantur. Ac venter ei, qui a periculo tutus est, reddit mollia, figurata, atque eodem fere tempore, quo secunda valetudine affuevit, modoque convenientia his, quæ assumentur. Pejor cita alvus est. sed ne hæc quidem terrere protinus debet, si matutinis temporibus coacta magis est, aut si procedente tempore paulatim contrahitur, & rufa est, neque foeditate odoris similem alvum sani hominis excedit. Ac lumbricos quoque aliquos sub fine morbi descen-

disse, nihil nocet. Si inflammatio in superioribus partibus dolorem tumoremque fecit, bonum signum est sonitus ventris inde ad inferiores partes devolutus; magisque etiam, si sine difficultate cum stercore excessit.

C A P U T IV.

Mala signa ægrotantium.

CONTRA gravis morbi periculum est, ubi supinus æger jacet, porrectis manibus & cruribus: ubi residere vult in ipso acuti morbi impetu, præcipueque pulmonibus laborantibus: ubi nocturna vigilia premitur, etiamsi interdiu somnus accedit; ex quo tamen peior est, qui inter quartam horam & noctem, quam qui a matutino tempore ad quartam. Pessimum tamen est, si somnus neque noctu, neque interdiu accedit: id enim fere sine continuo dolore esse non potest. Æque vero signum malum est, etiam somno ultra debitum urgeri: peiusque, quo magis sopor interdiu noctuque continuat. Mali etiam morbi testimonium est, vehementer & crebro spirare; a sexto die coepisse inhorrescere; pus exspuere; vix excreare; dolorem habere continuum; difficulter ferre morbum; jactare brachia & crura; sine voluntate lacrimare; habere humorem glutinosum dentibus inhærentem, cutem circa umbilicum & pubem macram, præcordia inflammata, dolentia, dura, tumida, intenta; magisque, si hæc dextra parte, quam sinistra, sunt: pe-

riculosissimum tamen est, si venæ quoque ibi vehementer agitantur. Mali etiam morbi signum est, nimis celeriter emacrescere: caput & pedes manusque calidas habere, ventre & lateribus frigentibus; aut frigidas extremas partes acuto morbo urgente; aut post sudorem inhorrescere; aut post vomitum singultum esse, vel rubere oculos; aut post cupiditatem cibi, postve longas febres hunc fastidire; aut multum sudare, maximeque frigido sudore; aut habere sudores non per totum corpus æquales, quique febrem non finiant. Malæ etiam febres, quæ quotidie tempore eodem revertantur; quæve semper pares accessiones habeant, neque tertio quoque diē levantur; quæve sic continuent, ut per accessiones increcant, per decessiones tantum molliantur, nec unquam integrum corpus dimittant. Pessimum est, si ne levatur quidem febris, sed æque concitata continuat. Periculosum est etiam, post arquatum morbum febrem oriri; utique si præcordia dextra parte dura manserunt, aut dolentibus his læva. Nulla acuta febris leviter terrere nos debet. Neque unquam in acuta febre, aut a somno non est terribilis nervorum distentio. Timere etiam ex somno, mali morbi est. Itemque in prima febre protinus mentem esse turbatam, membrumve aliquod esse resolutum. Ex quo casu quamvis vita redditur, tamen id fere membrum debilitatur. Vomitus etiam periculosus est sinceræ pituitæ, vel bilis; pejorque, si viridis, aut niger est. At mala urina est, in qua subsidunt subrubra aut livida: deterior, in qua quasi fila quædam te-

nuia atque alba : pessima ex his , si tanquam ex furfuribus factas nubeculas repræsentat. Diluta quoque , atque alba , vitiosa est , sed in phreneticis maxime. Alvus autem mala est , ex toto suppressa. Periculosa etiam , quæ inter febres fluens conquiescere hominem in cubili non patitur ; utique , si quod descendit , est perliquidum , aut albidum , aut pallidum , aut spumians. Præter hæc periculum ostendit id , quod excernitur , si est exiguum , glutinosum , læve , album , idemque subpallidum ; vel si est aut lividum , aut biliosum , aut cruentum , aut peioris odoris , quam ex consuetudine. Malum est etiam , quod post febres longas sincerum est.

C A P U T V.

De signis longæ valetudinis.

POST hæc indicia , notum est , longum morbum fieri ; sic enim necesse est , nisi occidit. Neque vitæ alia spes in malis magnis est , quam ut impetum morbi trahendo aliquis effugiat , porrigaturque in id tempus , quod curationi locum præstet. Protinus tamen signa quædam sunt , ex quibus colligere possumus , morbum , etsi non interemerit , longius tamen tempus habiturum. Ubi frigidus sudor inter febres non acutas circa caput tantum , & cervices oritur ; aut ubi , febre non quiescente , corpus insudat ; aut ubi corpus modo frigidum , modo calidum est , & color alius ex alio fit ; aut ubi , quod inter febres aliqua parte abiecit , ad sanitatem non

pervenit; aut ubi æger pro spatio parum emacrescit. Item, si urina modo liquida & pura est, modo habet quædam subsidentia; si lævia atque alba rubrae sunt, quæ in ea subsidunt; aut si quasdam quasi miculas repræsentat; aut si bullulas excitat.

CAPUT VI.

De indiciis mortis.

SED inter hæc quidem, proposito metu, spes tamen superest. Ad ultima vero jam ventum esse testantur, nares acutæ, collapsa tempora, oculi concavi, frigida languidaque aures & imis partibus leniter versæ, cutis circa frontem dura & intenta, color aut niger aut perpallidus; multoque magis, si ita hæc sunt, ut neque vigilia præcefferit, neque ventris resolutio, neque inedia. Ex quibus causis interdum hæc species oritur, sed uno die finitur. Itaque diutius durans, mortis index est. Si vero in morbo vetere jam triduo talis est, in propinquo mors est: magisque, si præter hæc oculi quoque lumen refugiunt, & illacrimant; quæque in iis alba esse debent, rubescunt; atque in iisdem venulae pallent; pituitaque in iis innatans, novissime angulis inhærescit; alterque ex his minor est; illic aut vehementer subsederunt, aut facti tumidiores sunt; perque somnum palpebrae non committuntur, sed inter has ex albo oculorum aliquid apparet; neque id fluens alvus expressit: eademque palpebrae pallent, & idem pallor labra & nares decolorat: ea-

demque labra, & nares, oculique, & palpebræ, & supercilia, aliquave ex his pervertuntur; isque propter imbecillitatem jam non audit, aut non videt.

Eadem mors denuntiatur, ubi æger supinus cubat, eique genua contracta sunt: ubi deorsum ad pedes subinde delabitur: ubi brachia & crura nudat, & inæquabiliter dispergit, neque iis calor subest: ubi hiat: ubi assidue dormit: ubi is, qui mentis suæ non est, neque id facere sanus solet, dentibus stridet: ubi ulcus, quod aut ante, aut in ipso morbo natum est, aridum, & aut pallidum, aut lividum factum est. Illa quoque mortis indicia sunt, ungues, digitique pallidi; frigidus spiritus: aut si manibus quis in febre, & acuto morbo, vel infania, pulmonisve dolore, vel capitis, in veste floccos legit, fimbriasve diducit, vel in adjuncto pariete, si qua minuta eminent, carpit. Dolores etiam circa coxas & inferiores partes orti, si ad viscera transierunt, subitoque defierunt, mortem subesse testantur; magisque, si alia quoque signa accesserunt. Neque is servari potest, qui sine ullo tumore febricitans, subito strangulatur, aut devorare salivam suam non potest: cuive in eodem febris corporisque habitu cervix convertitur, sic ut devorare æque nihil possit: aut cui simul & continua febris & ultima corporis infirmitas est: aut cui, febre non quiescente, exterior pars friget, interior sic calet, ut etiam sitim faciat: aut qui, febre æque non quiescente, simul & delirio & spirandi difficultate vexatur. Aut qui, epoto vera-

tro, exceptus distentione nervorum est: aut qui ebrius obmutuit; is enim fere adjecta nervorum distentione consumitur, nisi aut febris accessit, aut eo tempore, quo ebrietas solvi debet, loqui coepit. Mulier quoque gravida acuto morbo facile consumitur: & is, cui somnus dolorem augeat: & cui protinus, in recenti morbo, bilis atra vel infra vel supra se ostendit: cuive alterutro modo se promittit, cum jam longo morbo corpus ejus esset extenuatum & affectum. Sputum etiam biliosum, & purulentum, sive separatim ista, sive mixta proveniunt, interitus periculum ostendunt. Ac, si circa septimum diem tale esse coepit, proximum est, ut is circa quartum decimum diem decedat, nisi alia signa meliora pejorave accesserint: quæ quo leviora graviorave subsequuta sunt, eo vel ferio rem mortem, vel maturiorem denuntiant. Sudor quoque frigidus in acuta febre pestiferus est: atque in omni morbo vomitus, qui varius, & multorum colorum est; præcipueque, si malus in hoc odor est. Ac sanguinem quoque in febre vomuisse, pestiferum est. Urina vero rubra & tenuis in magna cruditate esse consuevit; & sæpe, antequam spatio maturescat, hominem rapit. Itaque si talis diutius permanet, periculum mortis ostendit. Pessima tamen est, præcipueque mortifera, nigra, crassa, mali odoris. Atque in viris quidem & mulieribus talis deterrima est. In pueris vero, quæ tenuis & diluta est. Alvus quoque varia, pestifera est; quæ strigmentum, sanguinem, bilem, viride aliquid, modo diversis

temporibus, modo simul & in mixtura quadam, discreta tamen, repræsentat. Sed hæc quidem potest paulo diutius trahere. In præcipiti vero jam esse denuntiat, quæ liquida, eademque vel nigra, vel pallida, vel pinguis est; utique si magna foeditas odoris accessit.

Illud interrogari me posse ab aliquo scio: si certa futuræ mortis indicia sunt, quomodo interdum deserti a medicis convalescant, quosdamque fama prodiderit in ipsis funeribus revixisse? Quin etiam vir jure magni nominis Democritus, ne finitæ quidem vitæ fatis certas notas esse, proposuit, quibus medici credidissent: adeo illud non reliquit, ut certa aliqua signa futuræ mortis essent. Adversus quos ne illud quidem dicam, quod in vicino sæpe quædam notæ positæ, non bonos, sed imperitos medicos decipiunt, quod Asclepiades funeri obvius intellexit, eum vivere, qui efferebatur: ne protinus crimen artis esset, si quod professoris sit. Illa tamen moderatius subjiciam, Conjecturalem artem esse medicinam, rationemque conjecturæ talem esse, ut cum sæpius aliquando responderit, interdum tamen fallat nos. Si quid itaque vix in millesimo corpore aliquando decipit, id notam non habet, cum per innumerabiles homines respondeat. Idque non in his tantum, quæ pestifera sunt, dico: sed in his quoque, quæ salutaria. Siquidem etiam spes interdum frustratur, & moritur aliquis, de quo medicus securus primo fuit. Quæque medendi causa reperta sunt, nonnunquam in pejus aliquid convertunt. Neque id

evitare humana imbecillitas in tanta varietate corporum potest. Sed est tamen medicinæ fides, quæ multo sæpius, perque multo plures ægros prodest. Neque tamen ignorare oportet, in acutis morbis fallaces magis notas esse & salutis, & mortis.

CAPUT VII.

De notis, quas aliquis in singulis morborum generibus habere possit.

SED cum proposuerim signa, quæ in omni ad-versa valetudine communia esse consueverunt; ad ea quoque transibo, ut, quas aliquis in singulis morborum generibus habere possit notas, indicem. Quædam autem sunt, quæ ante febres, quædam, quæ inter eas, quid aut intus sit, aut venturum sit, ostendunt. Ante febres, si caput grave est, aut ex somno oculi caligant, aut frequentia sternutamenta sunt, circa caput aliquis pituitæ impetus timeri potest. Si sanguis, aut calor abundat, proximum est, ut aliqua parte profluvium sanguinis fiat. Si sine causa quis emacrescit, ne in malum habitum corpus ejus recidat, metus est. Si præcordia dolent, aut inflatio gravis est, aut toto die non concocta fertur urina, cruditatem esse manifestum est. Quibus diu color sine morbo regio malus est, hi vel capitis doloribus conflictantur, vel terram edunt. Qui diu habent faciem pallidam & tumidam, aut capite, aut visceribus, aut alvo laborant. Si in continua febre puero venter nihil reddit, mu-

taturque ei color, nec somnus accedit, ploratque is assidue, metuenda nervorum distentio est. Frequens autem destillatio in corpore tenui longoque, tabem timendam esse testatur. Ubi pluribus diebus non descendit alvus, docet, aut subitam dejectionem, aut febriculam instare. Ubi pedesurgent, longæ dejectiones sunt, ubi dolor in imo ventre & coxis est, aqua inter cutem instat: sed hoc morbi genus ab ilibus oriri solet. Idem propositum periculum est his, quibus voluntas defendendi est, venter nihil reddit, nisi & ægre & durum; tumor in pedibus est, idemque modo dextra, modo sinistra parte ventris, invicem oritur atque finitur: sed a jecinore id malum proficisci videtur. Ejusdem morbi nota est, ubi circa umbilicum intestina torquentur (*σπρόγον* Græci nominant) coxæque dolores manent, qui neque tempore, neque remediis solvuntur. Dolor autem articulorum, prout in pedibus, manibusve, aut alia qualibet parte sic est, ut eo loco nervi contrahantur; aut si id membrum, ex levi causa fatigatum, æque frigido, calidoque offenditur, *ποδάγρην* *χειρὰ γρην*ve, vel ejus articuli, in quo id sentitur, morbum futurum esse denuntiat. Quibus in pueritia sanguis ex naribus fluxit, dein fluere desiit, hi vel capitis doloribus conflictentur necesse est, vel in articulis aliquas exulcerationes graves habeant, vel aliquo morbo etiam debilitentur. Quibus feminis menstrua non proveniunt, necesse est capitis acerbissimi dolores sint, vel quælibet alia pars morbo infestetur. Eademque his pericula sunt, qui:

bus articulorum vitia, ut dolores, tumoresque, sine podagra similibusque morbis, oriuntur, & desinunt. Utique, si sæpe tempora iisdem dolent, noctuque corpora insudant, frons prurit, lippitudinis metus est. Si mulier a partu vehementes dolores habet, neque alia præterea signa mala sunt, circa vigesimum diem aut sanguis per nares erumpet, aut in inferioribus partibus aliquid abscedet. Quicumque etiam dolorem ingentem circa tempora & frontem habebit, is alterutra ratione eum finiet: magisque, si juvenis erit, per sanguinis profusionem; si senior, per suppurationem. Febris autem, quæ subito sine ratione, sine bonis signis finita est, fere revertitur. Cui fauces sanguine & interdium & noctu replentur, sic, ut neque capitis dolores, neque præcordiorum, neque tussis, neque vomitus, neque febricula præcesserit, hujus aut in naribus, aut in faucibus ulcus reperietur. Si mulieri ex inguine febricula orta est, neque causa apparet, ulcus in vulva est. Urina autem crassa, ex qua quod desidit, album est, significat, circa articulos aut circa viscera dolorem, metumque morbi esse. Eadem viridis, aut viscerum dolorem, tumoremque cum aliquo periculo subesse, aut corpus certe integrum non esse, testatur. At si sanguis aut pus in urina est, vel vesica, vel renes exulcerati sunt. Si hæc crassa, carunculas quasdam exiguas aut quasi capillos habet, aut si bullat, & male olet, & interdum quasi arenam, interdum quasi sanguinem trahit, dolent autem coxæ, quæque inter has superque pubem sunt, & accedunt frequen-

tes ructus, interdum vomitus biliosus, extremæque partes frigescunt, urinæ crebra cupiditas, sed magna difficultas est, & quod inde excretum est, aquæ simile, vel rufum, vel pallidum est, paulum tamen in eo levamenti est, alvus vero cum multo spiritu redditur, utique in renibus vitium est. At si paulatim destillat, vel si sanguis per hanc editur, & in eo quædam cruenta concreta sunt, idque ipsum cum difficultate redditur, & circa pubem inferiores partes dolent, in eadem vesica vitium est. Calculosi vero his indiciis cognoscuntur. Difficiliter urina redditur; paulatimque, interdum etiam sine voluntate, destillat. Eadem arenosa est: nonnunquam aut sanguis, aut cruentum, aut purulentum aliquid cum ea excernitur. Eamque quidam promptius recti, quidam resupinati, maximeque hi, qui grandes calculos habent, quidam etiam inclinati reddunt, colemque extendendo, dolorem levant. Gravitatis quoque cujusdam in ea parte sensus est. Atque ea cursu, omnique motu augentur. Quidam etiam, cum torquentur, pedes inter se, subinde mutatis vicibus, implicant. Feminae vero oras naturalium suorum manibus admotis scabere crebro coguntur. Nonnunquam, si digitum admo-verunt, ubi vesicæ cervicem is urget, calculum sentiunt. At, qui spumantem sanguinem exscreant, his in pulmone vitium est. Mulieri gravidæ sine modo fusa alvus elidere partum potest. Eidem si lac ex mammis profluit, imbecillum est, quod intus gerit. Duræ mammæ, sanum illud esse, testantur. Frequens singultus, & præter consuetudinem con-

tinuus, jecur inflammatum esse, significat. Si tumores super ulcera subito esse desierunt, idque a tergo incidit, vel distentio nervorum, vel rigor timeri potest: at, si a priore parte id evenit, vel lateris acutus dolor, vel infania expectanda est. Interdum etiam hujusmodi casum, quæ tutissima inter hæc est, profusio alvi sequitur. Si ora venarum, sanguinem solita fundere, subito suppressa sunt, aut aqua inter cutem, aut tabes sequitur. Eadem tabes subit, si in lateris dolore orta suppuratione intra quadraginta dies purgari non potuit. At, si longa tristitia cum longo timore & vigilia est, atræ bilis morbus subest. Quibus sæpe ex naribus fluit sanguis, his aut lienis tumet, aut capitis dolores sunt: quos sequitur, ut quædam ante oculos tanquam imagines obversentur. At, quibus magni lienes sunt, his gingivæ malæ sunt, & os olet, aut sanguis aliqua parte prorumpit. Quorum si nihil evenit, necesse est in cruribus mala ulcera, & ex his nigræ cicatrices fiant. Quibus causa doloris, neque sensus ejus est, his mens labat. Si in ventrem sanguis confluit, ibi in pus vertitur. Si a coxis, & ab inferioribus partibus dolor in pectus transit, neque ullum signum malum accessit, suppurationis eo loco periculum est. Quibus sine febre, aliqua parte dolor, aut prurigo, cum rubore aut calore est, ibi aliquid suppurat. Urina quoque, quæ in homine parum sano liquida est, circa aures futuram aliquam suppurationem esse denuntiat.

Hæc vero, cum sine febre quoque vel laten-

tium, vel futurarum rerum notas habeant, multo certiora sunt, ubi febris accessit; atque etiam aliorum morborum tum signa nascuntur. Ergo protinus insania timenda est, ubi expeditior alicujus, quam fani fuit, sermo est, subitaque loquacitas orta est, & hæc ipsa solito audacior: aut ubi raro quis & vehementer spirat, venasque concitatas habet, præcordiis duris & tumentibus. Oculorum quoque frequens motus, & in capitis dolore offusæ oculis tenebræ; vel, nullo dolore substante, somnus ereptus, continuataque nocte & die vigilia; vel prostratum contra consuetudinem corpus in ventrem, sic, ut ipsius alvi dolor id non coegerit; item, robusto adhuc corpore, insolitus dentium stridor, insanix signa sunt. Si quid etiam abscessit, &, antequam suppuraret, manente adhuc corpore in solita febre, subsedit, periculum affert primum furoris, deinde interitus. Auris quoque dolor acutus, cum febre continua vehementique, sæpe mentem turbat: & ex eo casu juniores interdum intra septimum diem moriuntur; seniores tardius: quoniam neque æque magnas febres experiuntur, neque æque insaniunt. ita sustinent, dum is affectus in pus vertatur. Suffusæ quoque sanguine mulieris mammæ, furorem venturum esse, testantur. Quibus autem longæ febres sunt, his aut abscessus aliqui, aut articulorum dolores erunt. Quorum faucibus in febre illiditur spiritus, instat his nervorum distentio. Si angina subito finita est, in pulmonem id malum transit; idque sæpe intra septimum diem occidit: quod nisi incidat, sequi-

tur, ut aliqua parte suppuret. Denique, post alvi longam resolutionem tormina: post hæc, intestinorum levitas oritur. Post nimias destillationes, tabes. Post lateris dolorem, vitia pulmonum: post hæc, infania. Post magnos fervores corporis, nervorum rigor, aut distentio. Ubi caput vulneratum est, delirium: ubi vigilia torfit, nervorum distentio: ubi vehementer venæ super ulcera moventur, sanguinis profluvium erit.

Suppuratio vero pluribus morbis excitatur. Nam si longæ febres sine dolore, sine manifesta causa remanent, in aliquam partem id malum incumbit, sed in junioribus tantum: nam in senioribus ex ejusmodi morbo quartana fere nascitur. Eadem suppuratio fit, si præcordia dura, dolentia ante diem vigesimum hominem non sustulerunt, neque sanguis ex naribus fluxit, maximeque in adolescentibus; utique, si inter principia aut oculorum caligo, aut capitis dolores fuerunt: sed tum in inferioribus partibus aliquid abscedit. Aut si præcordia tumorem mollem habent, neque habere intra sexaginta dies desinunt, hæretque per omne id tempus febris; sed tum in superioribus partibus fit abscessus: ac, si inter ipsa ulcera non fuit, circa aures erumpit. Cumque omnis longus tumor ad suppurationem fere spectet, magis eo tendit is, qui in præcordiis, quam is, qui in ventre est: & is, qui supra umbilicum, quam is, qui infra est. Si lassitudinis etiam sensus in febre est, vel in maxillis, vel in articulis aliquid abscedit. Interdum quoque urina tenuis & cruda sic diu fertur, ut alia fa-

lutaria signa sint, exque eo casu plerumque infra transversum septum (quod διάφραγμα Græci vocant) fit abscessus. Dolor autem pulmonis, si neque per sputa, neque per cucurbitulas, neque per sanguinis detractionem, neque per victus rationem finitus est, vomicas aliquas interdum excitat, aut circa vigesimum diem, aut circa trigesimum, aut circa quadragesimum, nonnunquam etiam circa sexagesimum. Numerabimus autem ab eo die, quo primum febricitavit aliquis, aut inhorruit, aut gravitatem ejus partis sensit. Sed hæ vomicæ modo a pulmone, modo a costarum parte nascuntur. Quod suppurat, ab ea parte, quam afficit, dolorem inflammationemque concitat, ipsum calidius est: &, si in partem sanam aliquis decubuit, onerare eam ex pondere aliquo videtur. Omnis etiam suppuratio, quæ nondum oculis patet, sic apprehendi potest: si febris non dimittit, eaque interdum levior est, noctu increscit; multus sudor oritur; cupiditas tussendi est, & pæne nihil in tussi excreatur; oculi cavi sunt; malæ rubent; venæ sub lingua inalbescunt; in manibus fiunt adunci ungues; digiti, maximeque summi, pallent; in pedibus tumores sunt; spiritus difficiliter trahitur; cibi fastidium est; pustulæ toto corpore oriuntur. Quod si protinus initio dolor & tussis fuit, & spiritus difficultas, vomica vel ante vel circa vigesimum diem erumpet. Si serius ista cœperint, necesse est quidem increcant; sed quo minus cito affecerint, eo tardius solventur. Solent etiam in gravi morbo pedes cum digitis unguibusque nigrescere: quod si

non est mors confecta, & reliquum corpus invaluit, pedes tamen decidunt.

CAPUT VIII.

Quæ notæ in quoque morbi genere vel spem, vel pericula, ostendant.

SEQUITUR, ut in quoque morbi genere proprias notas explicem, quæ vel spem, vel periculum ostendant. Ex vesica dolenti, si purulenta urina processit, inque ea læve & album subsedit, metum detrahit. In pulmonis morbo, si sputo ipse levatur dolor, quamvis id purulentum est, tamen, si æger facile spirat, facile exscreat, morbum ipsum non difficulter fert, potest ei secunda valetudo contingere. Neque inter initia terreri convenit, si protinus sputum mixtum est rufo quodam & sanguine, dummodo statim edatur. Laterum dolores, suppuratione facta, deinde intra quadragesimum diem purgata, finiuntur. Si in jecinore vomica est, & ex ea fertur pus purum & album, salus ei facilis. Id enim malum in tunica est. Ex suppurationibus vero hæ tolerabiles sunt, quæ in exteriorem partem feruntur, & acuuntur. At ex his, quæ intus procedunt, hæ leviores, quæ contra se cutem non afficiunt, eamque & sine dolore & ejusdem coloris, cujus reliquæ partes sunt, sinunt esse. Pus quoque, quacunque parte erumpit, si est læve, album & unius coloris, sine ullo metu est; & quo effuso, febris protinus conquievit, desierunt-

que urgere cibi fastidium & potionis desiderium; Si quando etiam suppuratio descendit in crura, sputumque ejusdem factum pro rufo purulentum est, periculi minus est. At in tabe ejus, qui salvus futurus est, sputum esse debet album, æquale totum; ejusdemque coloris, sine pituita: eique etiam simile esse oportet, si quid in nares a capite destillet. Longe optimum est, febrem omnino non esse: secundum est, tantillam esse, ut neque cibum impediāt, neque crebram sitim faciat. Alvus in hac valetudine ea tuta est, quæ quotidie coacta, eaque convenientia his, quæ assumuntur, reddit. Corpus id, quod minime tenue, maximeque lati pectoris atque setosi est, cujusque cartilago exigua, & carnosæ est. Super tabem si mulieri quoque suppressa menstrua fuerunt, & circa pectus atque scapulas dolor mansit, subitoque sanguis erupit, leværi morbus solet: nam & tussis minuitur, & sitis atque febriculæ desinunt. Sed iisdem fere, nisi redit sanguis, vomica erumpit: quæ quo cruentior, eo melior est. Aqua autem inter cutem minimè terribilis est, quæ nullo antecedente morbo cœpit: deinde, quæ longo morbo supervenit; utique, si firma viscera sunt, si spiritus facilis, si nullus dolor, si sine calore corpus est, æqualiterque in extremis partibus macrum est, si venter mollis, si nulla tussis, nulla sitis, si lingua, ne per somnum quidem, inarescit, si cibi cupiditas est, si venter medicamentis movetur, si per se excernit mollia & figurata, si non extenuatur, si urina, & vini mutatione, & epotis aliquibus medicamentis mutatur, si

corpus sine lassitudine est, & motum facile sustinet: siquidem in quo omnia hæc sunt, is ex toto tutus est; in quo plura ex his sunt, is in bona spe est. Articulorum vero vitia, ut podagræ chiragræque, si juvenes tentarunt, neque callum induxerunt, solvi possunt: maximeque torminibus leniuntur, & si quocunque modo venter fluit. Item morbus comitialis, ante pubertatem ortus, non ægre finitur. Et, in quo ab una parte corporis venientis accessionis sensus incipit, optimum est a manibus pedibusve initium fieri: deinde, a lateribus: pessimum inter hæc, a capite. Atque in his quoque ea maxime profunt, quæ per dejectiones excernuntur. Ipsa autem dejectio sine ulla noxa est, quæ sine febre est; si celeriter definit; si contrectato ventre nullus motus ejus sentitur; si extremam alvum spiritus sequitur. Ac ne tormina quidem periculosa sunt, si sanguis & strigmenta descendunt, dum febris ceteræque accessiones hujus morbi absint: adeo ut etiam gravida mulier, non solum reservari possit, sed etiam partum reservare. Prodestque in hoc morbo, si jam ætate aliquis processit. Contra, intestinorum lævitas facilius a teneris ætatibus depellitur, utique, si ferri urina, & ali cibo corpus incipit. Eadem ætas prodest & in coxæ dolore, & humerorum, & in omni resolutione nervorum. Ex quibus coxa, si sine torpore est, si leviter friget, quamvis magnos dolores habet, tamen & facile & mature sanatur: resolutumque membrum, si nihilo minus alitur, fieri sanum potest. Oris resolutio etiam, alvo cita finitur. Omnis-

que dejectio lippienti prodest. At varix ortus, vel per ora venarum subita profusio sanguinis, vel tormina, insaniam tollunt. Humerorum dolores, qui ad scapulas vel manus tendunt, vomitu atræ bilis solvuntur. Et quisquis dolor deorsum tendit, sanabilior est. Singultus sternutamento finitur. Longas dejectiones supprimit vomitus. Mulier sanguinem vomens, profusis menstruis, liberatur. Quæ menstruis non purgatur, si sanguinem ex naribus fudit, omni periculo vacat. Quæ locis laborat, aut difficulter partum edit, sternutamento levatur. Cui calor & tremor est, salutis delirium est. Lienosis bono tormina sunt. Denique, ipsa febris, quod maxime mirum videri potest, sæpe præsidio est. Nam & præcordiorum dolores, si sine inflammatione sunt, finit; & in jocinoris dolore succurrit; & nervorum distentionem rigoremque, si postea coepit, ex toto tollit, & ex difficultate urinæ morbum tenuioris intestini ortum, si urinam per calorem movet, levat. At dolores capitis, quibus oculorum caligo, & rubor cum quadam frontis prurigne accedunt, sanguinis profusione, vel fortuita, vel etiam petita, submoventur. Si capitis ac frontis dolores ex vento, vel frigore aut æstu sunt, gravedine & sternutamentis finiuntur. Febrem autem ardentem, quam Græci καυσώδη vocant, subitus horror exsolvit. Si in febre aures obtusæ sunt, si sanguis e naribus fluxit, aut venter resolutus est, illud malum desinit ex toto. Nihil plus adversus surditatem, quam biliosa alvus potest. Quibus in fistula urinæ minuti abscessus, quos

σύνεστα Græci vocant, esse cœperunt; iis, ubi pus ea parte profluxit, sanitas redditur. Ex quibus cum pleraque per se proveniant, scire licet, inter ea quoque, quæ ars adhibet, naturam plurimum posse. Contra, si caput in febre continenti dolet, neque quidquam remittit, malum atque mortiferum est: maximeque id periculum est pueris, a septimo anno ad quartum decimum. In pulmonis morbo, si sputum primis diebus non fuit, deinde a septimo die cœpit, & ultra septimum mansit, periculosum est: quantoque magis mixtos, neque inter se ductos colores habet, tanto deterius. Et tamen nihil pejus est, quam sincerum id edi, sive rufum est, sive cruentum, sive album, sive glutinosum, sive pallidum, sive spumans: nigrum tamen pessimum est. In eodem morbo periculosa sunt, tussis, destillatio; etiam, quod alias salutare habetur, sternutamentum. Periculosissimumque est, si hæc secuta subita dejectio est. Fere vero, quæ in pulmonis, eadem in lateris doloribus, & mitiora signa, & asperiora esse consueverunt. Ex jecinore si pus cruentum exit, mortiferum est. At ex suppurationibus hæc pessimæ sunt, quæ intus tendunt, sic ut exteriorem quoque cutem decolorent: ex his deinde, quæ in exteriorem partem prorumpunt, quæ maximæ, quæque planissimæ sunt. Quod si, ne rupta quidem vomica, vel pure extrinsecus emisso, febris quievit, aut quamvis quieverit, tamen repetit, item, si sitis est, si cibi fastidium, si venter liquidus, si pus est lividum & pallidum, si nihil æger excreat, nisi pituitam spumantem, per-

riculum certum est. Atque ex his quidem suppurationibus, quas pulmonum morbi concitarunt, fere senes moriuntur: ex ceteris juniores. At in tabe sputum mixtum purulentum, febris assidua, quæ & cibi tempora eripit, & siti affligit, in corpore tenui periculum subesse testatur. Si quis etiam in eo morbo diutius traxit, ubi capilli fluunt; ubi urina quædam araneis similia subsidentia ostendit; atque in sputis odor foedus est; maximeque, ubi post hæc orta dejectio est, protinus moritur: utique, si tempus autumnus est: quo fere, qui cetera parte anni traxerunt, resolvuntur. Item, pus exspuisse in hoc morbo, deinde ex toto spueri desisse, mortiferum est. Solent etiam in adolescentibus ex eo morbo vomicæ, fistulæve oriri, quæ non facile sanescunt, nisi si multa signa bonæ valetudinis subsequuta sunt. Ex reliquis vero minime facile sanantur virgines, aut et mulieres, quibus super tabem menstrua suppressa sunt. Cui vero sano subitus dolor capitis est, dein somnus oppressit, sic ut stertat, neque expergiscatur, intra septimum diem pereundum est, magis si, cum alvus citâ non antecefferit, palpebræ dormientis non coeunt, sed album oculorum apparet. Quos tamen ita mors sequitur, si id malum non est febre discussum. At aqua inter cutem, si ex acuto morbo coepit, ad sanitatem raro perducitur: utique, si contraria his, quæ supra posita sunt, subsequuntur. Æque in eâ quoque tussis spem tollit: item, si sanguis sursum deorsumve erupit, & aqua medium corpus implevit. Quibusdam etiam in hoc morbo tumores oriun-

tur, deinde desinunt, deinde rursus assurgunt. Hi quidem tutiores sunt, quam qui supra comprehensi sunt, si attenduntur: sed fere fiducia secundæ valetudinis opprimuntur. Illud jure aliquis mirabitur, quomodo quædam simul & affligant nostra corpora, & parte aliqua tueantur. Nam, siue aqua inter cutem quem implevit, siue in magno abscessu multum puris coit, simul id omne effudisse, æque mortiferum est, ac si quis sani corporis vulnere factus exsanguis est. Articuli vero, qui sic dolent, ut super eos ex callo quædam tubercula innata sint, nunquam liberantur: quæque eorum vitia vel in senectute cœperunt, vel in senectutem ab adolescentia pervenerunt, ut aliquando leniri possunt, sic nunquam ex toto finiuntur. Morbus quoque comitalis post annum quintum & vigesimum ortus ægre curatur: multoque ægrius is, qui post quadragesimum annum cœpit; adeo ut in ea ætate aliquid in natura spei, vix quidquam in medicina sit. In eodem morbo, si simul totum corpus afficitur, neque ante in partibus aliquis venientis mali sensus est, sed homo ex improvviso concidit, cujuscunque is ætatis est, vix sanescit: si vero aut mens læsa est, aut nervorum facta resolutio, medicinæ locus non est. Dejectionibus quoque si febris accessit; si inflammatio jecinoris, aut præcordiorum, aut ventris; si immodica fitis; si longius tempus; si alvus varia; si cum dolore est, etiam mortis periculum subest: maximeque, si inter hæc tormina vetera esse cœperunt. Isque morbus maxime pueros absorbit usque ad annum de-

cimum : ceteræ ætates facilius sustinent. Mulier quoque gravida ejusmodi casu rapi potest : atque , etiam si ipsa convaluit , partum tamen perdit. Quin etiam tormina ab atra bile orsa mortifera sunt : aut si sub his , extenuato jam corpore , subito nigra alvus profluxit. At intestinorum lævitas periculiosior est , si frequens dejectio est ; si venter omnibus horis & cum sono , & sine hoc , profluit ; si similiter noctu & interdiu ; si , quod excernitur , aut crudum est , aut nigrum , & , præter id , etiam læve , & mali odoris ; si sitis urget ; si post potionem urina non redditur , (quod evenit , quia tunc liquor omnis non in vesicam , sed in intestina descendit ;) si os exulceratur ; si rubet facies , & quasi maculis quibusdam colorum omnium distinguitur ; si venter est quasi fermentatus , pinguis atque rugosus ; si & cibi cupiditas non est. Inter quæ cum evidens mors sit , multo evidentior est , si jam longum quoque id vitium est : maxime etiam , si in corpore senili est. Si vero in tenuiore intestino morbus est , vomitus , singultus , nervorum distentio , delirium , mala sunt. At in morbo arquato , durum fieri jecur , perniciosissimum est. Quos lienis male habet , si tormina prehenderunt , deinde conversa sunt vel in aquam inter cutem , vel in intestinorum lævitatem , vix ulla medicina periculo subtrahit. Morbus intestini tenuioris , nisi resolutus est intra septimum diem , occidit. Mulier ex partu , si cum febre vehementibus etiam & assiduus capitis doloribus premitur , in periculo mortis est. Si dolor atque inflammatio est in his partibus ,

quibus viscera continentur, frequenter spirare, signum malum est. Si sine causa longus dolor capitis est, & in cervices ac scapulas transit, rursusque in caput revertitur, aut a capite ad cervices scapulasque pervenit, perniciosus est: nisi vomitam aliquam excitavit, sic, ut pus extussiretur; aut nisi sanguis ex aliqua parte prorupit; aut nisi in capite multa porrigo, totove corpore pustulæ ortæ sunt. Æque magnum malum est, ubi torpor atque prurigo pervagantur, modo per totum caput, modo in parte; aut sensus alicujus ibi quasi frigoris est, eaque ad summam quoque linguam perveniunt. Et, cum in iisdem ex abscessibus auxilium sit, difficilior sanitas est, quo minus sæpe sub his malis illi subsequuntur. In coxæ vero doloribus, si vehemens torpor est, frigescitque crus & coxa, alvusque nisi coacta non reddit, idque, quod excernitur, mucosum est, jamque ætas ejus hominis quadragesimum annum excessit, is morbus erit longissimus, minimeque annuus; neque finiri poterit, nisi aut vere, aut autumnus. Difficilis æque curatio est, in eadem ætate, ubi humerorum dolor vel ad manus pervenit, vel ad scapulas tendit, torporemque & dolorem creat, neque bilis vomitu levatur. Quacunque vero parte corporis membrum aliquod resolutum est, si neque movetur, & emacrescit, in pristinum habitum non revertitur; eoque minus, quo vetustius id vitium est, & quo magis in corpore senili est. Omnique resolutioni nervorum ad medicinam non idonea tempora sunt hiems & autumnus: aliquid sperari potest vere &

æstate. Isque morbus mediocris vix sanatur, vehemens sanari non potest. Omnis etiam dolor minus medicinæ paret, qui sursum procedit. Mulieri gravidæ si subito mammæ emacuerunt, abortus periculum est. Quæ neque peperit, neque gravida est, si lac habet, a menstruis defecta est. Quartana æstiva, brevis: autumnalis fere longa est; maximeque, quæ cœpit hieme appropinquante. Si sanguis profluxit, deinde secuta est dementia cum distentione nervorum, periculum mortis est. Itemque, si medicamentis purgatum, & adhuc inanem, nervorum distentio oppressit: aut si in magno dolore, extremæ partes frigent. Neque is ad vitam redit, qui ex suspendio, spumante ore, detractus est. Alvus nigra, sanguini atro similis, repentina, sive cum febre, sive etiam sine hac est, perniciofa est.

C A P U T IX.

De morborum curationibus.

COGNITIS indiciis, quæ nos vel spe consolentur, vel metu terreant, ad curationes morborum transeundum est. Ex his quædam communes sunt, quædam propriæ. Communes, quæ pluribus morbis opitulantur. Propriæ, quæ singulis. Ante de communibus dicam. Ex quibus tamen quædam non ægros solum, sed sanos quoque sustinent, quædam in adversa tantum valetudine adhibentur.

Omne vero auxilium corporis, aut demit aliquam materiam, aut adjicit, aut evocat, aut repri-

mit, aut refrigerat, aut calefacit, simulque aut durat, aut molliat. Quædam non uno modo tantum, sed etiam duobus inter se non contrariis adjuvant. Demitur materia, sanguinis detractio, cucurbitula, dejectione, vomitu, frictione, gestatione, omnique exercitatione corporis, abstinentia, sudore. De quibus protinus dicam.

C A P U T X.

De sanguinis detractioe per venas.

SANGUINEM, incisa vena, mitti, novum non est: sed nullum pæne morbum esse, in quo non mittatur, novum est. Item, mitti junioribus, & feminis uterum non gerentibus, vetus est. In pueris vero idem experiri, & in senioribus, & in gravidis quoque mulieribus, vetus non est. Siquidem antiqui, primam ultimamque ætatem sustinere non posse hoc auxilii genus, judicabant; persuaserantque sibi, mulierem gravidam, quæ ita curata esset, abortum esse facturam. Postea vero usus ostendit, nihil ex his esse perpetuum, aliasque potiores observationes adhibendas esse, ad quas dirigi curantis consilium debeat. Interest enim, non quæ ætas sit, neque quid in corpore intus geratur, sed quæ vires sint. Ergo, si juvenis imbecillus est, aut si mulier, quæ gravis non est, parum valet, male sanguis mittitur. emoritur enim vis, si, quæ his supererat, hoc modo erepta est. At firmus puer, & robustus senex, & gravis mulier valens, tuto sic curantur.

Maxime tamen in his medicus imperitus falli potest: quia fere minus roboris illis ætätibus subest. Mulierique prægnanti post curationem quoque viribus opus est, non tantum ad se, sed etiam ad partum sustinendum. Non, quidquid aut intentionem animi, aut prudentiam exigit, protinus ejiciendum est; cum præcipua in hoc ars sit, quæ non annos numeret, neque conceptionem solam videat, sed vires æstimet, & ex eo colligat, possit necne superesse, quod vel puerum, vel senem, vel in una muliere duo corpora simul sustineat. Interest etiam inter valens corpus, & obesum; inter tenue, & infirmum. Tenuioribus magis sanguis, plenioribus magis caro abundat. Facilius itaque illi detractionem ejusmodi sustinent: celeriusque ea, si nimium est pinguis aliquis, affligitur. Ideoque vis corporis melius ex venis, quam ex ipsa specie æstimatur.

Neque solum hæc consideranda sunt, sed etiam morbi genus quod sit: utrum superans, an deficiens materia læserit: corruptum corpus sit, an integrum. Nam si materia vel deest, vel integra est, istud alienum est. At si vel copia sui male habet; vel corrupta est, nullo modo melius succurritur. Ergo vehemens febris, ubi rubet corpus, plenæque venæ tument, sanguinis detractionem requirit: item viscerum morbi, nervorumque resolutio, & rigor, & distentio: quidquid denique fauces difficultate spiritus strangulat; quidquid subito suppressit vocem; quisquis intolerabilis dolor est; & quacunque de causa ruptum aliquid intus atque

collisum est : item malus corporis habitus ; omnesque acuti morbi , qui modo , ut supra dixi , non infirmitate , sed onere nocent.

Fieri tamen potest , ut morbus quidem id desideret , corpus autem vix pati posse videatur : sed , si nullum tamen appareat aliud auxilium , periturusque sit , qui laborat , nisi temeraria quoque via fuerit adjutus , in hoc statu boni medici est ostendere , quam nulla spes sine sanguinis detractioe sit ; faterique , quantus in hac ipsa re metus sit : & tum demum , si exigatur , sanguinem mittere. De quo dubitari in ejusmodi re non oportet : satius est enim anceps auxilium experiri , quam nullum. Idque maxime fieri debet , ubi nervi resoluti sunt ; ubi subito aliquis obmutuit ; ubi angina strangulatur ; ubi prioris febris accessio pæne confecit , paremque subsequi verisimile est , neque eandem videntur sustinere ægri vires posse.

Cum sit autem minime crudo sanguis mittendus , tamen ne id quidem perpetuum est : neque enim semper concoctionem res expectat. Ergo , si ex superiore parte aliquis decedit , si contusus est , si ex aliquo subito casu sanguinem vomit , quamvis paulo ante sumsit cibum , tamen protinus ei demenda materia est , ne , si subsederit , corpus affligat. Idemque etiam in aliis casibus repentinis , qui strangulabunt , dictum erit. At , si morbi ratio patietur , tum demum , nulla cruditatis suspicione remanente , id fiet. Ideoque ei rei videtur aptissimus adversæ valetudinis dies secundus , aut tertius. Sed ut aliquando etiam primo die sanguinem mittere :

neceſſe eſt, ſic nunquam utile poſt diem quartum eſt, cum jam ſpatio ipſo materia & exhausta eſt, & corpus corrumpit; ut detractio imbecillum id facere poſſit, non poſſit integrum. Quod ſi vehemens febris urget, in ipſo impetu ejus ſanguinem mittere, hominem jugulare eſt. Exſpectanda ergo remiſſio eſt. Si non decreſcit, ſed creſcere deſiit, ſi neque remiſſio ſperatur, tunc quoque, quamvis pejor, ſola tamen occaſio non omittenda eſt.

Fere etiam iſta medicina, ubi neceſſaria eſt, in biduum dividenda eſt. Satiuſ eſt enim, primum levare ægrum, deinde perpurgare, quam ſimul omni vi effuſa fortasſe præcipitare. Quod ſi in cura quoque aquæ, quæ inter cutem eſt, ita reſpondet; quanto magis neceſſe eſt in ſanguine reſpondeat?

Mitti vero iſ debet, ſi totius corporis cauſa fit, ex brachio: ſi partis alicujus, ex ea ipſa parte, aut certe quam proxima: quia non ubique mitti pot-eſt, ſed in temporibus, in brachiis, juxta talos. Neque ignoro, quosdam dicere, quam longiſſime ſanguinem inde, ubi lædit, eſſe mittendum; ſic enim averti materiæ curſum; at illo modo in id ipſum, quod gravatur, evocari. Sed id ipſum falſum eſt. proximum enim locum primo exhaurit: ex ulterioribus autem eatenus ſanguis ſequitur, quatenus emittitur: ubi iſ ſuppreſſus eſt, quia non trahitur, ne venit quidem. Videtur tamen uſus ipſe docuiſſe, ſi caput fractum eſt, ex brachio potius ſanguinem mittendum eſſe: ſi quod in humero vitium eſt, ex altero brachio. credo, quia, ſi quid parum ceſſerit, opportunioreſ hæ partes injuriæ

sunt, quæ jam male habent. Avertitur quoque interdum sanguis, ubi alia parte prorumpens, alia emittitur. definit enim fluere, qua nolumus, inde objectis quæ prohibeant, alio dato itinere.

Mittere autem sanguinem cum sit expeditissimum, usum habenti; tamen ignaro difficillimum est. Juncta enim est vena arteriis, his nervi. Ita, si nervum scalpellus attigit, sequitur nervorum distentio, eaque hominem crudeliter consumit. At arteria incisa neque coit, neque sanescit: interdum etiam, ut sanguis vehementer erumpat, efficit. Ipsius quoque venæ, si forte præcisa est, capita comprimuntur, neque sanguinem emittunt. At si timide scalpellus demittitur, summam cutem lacerat, neque venam incidit. Nonnunquam etiam ea latet, neque facile reperitur. ita multæ res id difficile incipio faciunt, quod perito facillimum est.

Incidenda ad medium vena est. Ex qua cum sanguis erumpit, colorem ejus habitumque oportet attendere. Nam si is crassus & niger est, vitiosus est; ideoque utiliter effunditur: si rubet & pellucet, integer est; eaque missio sanguinis adeo non prodest, ut etiam noceat, protinusque is supprimendus est. Sed id evenire non potest sub eo medico, qui scit, ex quali corpore sanguis mittendus sit. Illud magis fieri solet, ut æque niger assidue ac primo die profluat. quod quamvis ita est, tamen si jam satis fluxit, supprimendus est: semperque ante finis faciendus est, quam anima deficiat.

Deligandumque brachium superimposito expresso ex aqua frigida penicillo; & postero die ad-

verso medio digito vena ferienda, ut recens coïtus ejus resolvatur, iterumque sanguinem fundat. Sive autem primo, sive secundo die sanguis, qui crassus & niger initio fluxerat, & rubere, & pellucere cœpit, satis materiæ detractum est, atque quod superest, sincerum est: ideoque protinus brachium deligandum, habendumque ita est, donec valens cicatricula sit; quæ celerrime in vena confirmatur.

C A P U T XI.

De sanguinis detractiōe per cucurbitulas.

CUCURBITULARUM vero duo genera sunt: æneum, & corneum. Ænea, altera parte patet; altera, clausa est. Cornea, altera parte æque patens, altera foramen habet exiguum. In æneam linamentum ardens conjicitur, ac sic os ejus corpori aptatur, imprimiturque, donec inhæreat. Cornea, per se corpori imponitur; deinde, ubi ea parte, qua exiguum foramen est, ore spiritus adductus est, superque cera cavum id clausum est, æque inhærescit. Utraque non ex his tantum materiæ generibus, sed etiam ex quolibet alio recte fit. Ac si cetera defecerunt, caliculus quoque aut pultarius, oris compressioris, ei rei commode aptatur. Ubi inhæsit, si concisa ante scalpello cutis est, sanguinem extrahit: si integra est, spiritum. Ergo ubi materia, quæ intus est, lædit, illo modo: ubi inflatio, hoc imponi solet.

Ufus autem cucurbitulæ præcipuus est, ubi non in toto corpore, sed in parte aliqua vitium est, quam exhauriri ad confirmandam valetudinem satis est. Idque ipsum testimonium est, etiam scalpello sanguinem, ubi membro succurritur, ab ea potissimum parte, quæ jam læsa est, esse mittendum: quod nemo concurbitulam diversæ parti imponit, nisi cum profusionem sanguinis eo avertit; sed ei ipsi, quæ dolet, quæque liberanda est.

Opus etiam esse cucurbitula potest in morbis longis (quamvis & iis jam spatium aliquod accessit) sive corrupta materia, sive spiritu male habente. In acutis quoque quibusdam, si levare corpus debet, & ex vena sanguinem mitti, vires non patiuntur. Idque auxilium ut minus vehemens, ita magis tutum; neque unquam periculofum est, etiam si in medio febris impetu, etiam si in cruditate adhibetur. Ideoque ubi sanguinem mitti opus est, si incisa vena præceps periculum est, aut si in parte corporis etiam vitium est, huc potius confugiendum est, cum eo tamen, ut sciamus hic, ut nullum periculum, ita levius præsidium esse; nec posse vehementi malo, nisi æque vehemens auxilium succurrere.

C A P U T XII.

De dejectione.

DEJECTIONEM autem antiqui variis medicamentis, crebraque alvi ductione in omnibus fere

morbis moliebantur: dabantque aut nigrum veratrum, aut filiculam, aut squamam æris, quam *λεπίδα χαλκοῦ* Græci vocant; aut lactucæ marinæ lac, cujus gutta pani adjecta abunde purgat; aut lac vel asininum, vel bubulum, vel caprinum, ei-que salis paulum adjiciebant, decoquebantque id, & sublati his, quæ coierant, quod quasi ferum supererat, bibere cgebant.

Sed medicamenta stomachum fere lædunt. Ideoque omnibus catharticis aloë miscenda est. Alvus si vehementius fluit, aut sæpius ducitur, hominem infirmat. Ergo nunquam in adversa valetudine medicamentum ejus rei causa recte datur, nisi ubi is morbus sine febre est. Ut cum veratrum nigrum, aut atra bile vexatis, aut cum tristitia insanientibus, aut iis, quorum nervi parte aliqua resoluti sunt, datur. At, ubi febres sunt, satius est ejus rei causa cibos potionesque assumere, qui simul & alant, & ventrem molliant. Suntque valetudinis genera, quibus ex lacte purgatio convenit.

De alvi ductione.

Plerumque vero alvus potius ducenda est. quod, ab Asclepiade quoque sic temperatum, ut tamen servatum sit, video plerumque seculo nostro præteriri. Est autem ea moderatio, quam is secutus videtur, aptissima, ut neque sæpe ea medicina tentetur, & tamen semel, vel summum bis, non omitatur, si caput grave est; si oculi caligant; si morbus majoris intestini est, quod Græci *κῶλον* nominant; si in imo ventre, aut in coxa dolores sunt;

si in stomachum quædam biliosa concurrunt, vel etiam pituita eo se, humorve aliquis aquæ similis confert; si spiritus difficilius redditur; si nihil per se venter excernit; utique, si juxta quoque stercus est, & intus remanet; aut si stercoris odorem nihil dejiciens æger ex spiritu suo sentit; aut si corruptum est, quod excernitur; aut si prima inedia febrem non sustulit; aut si sanguinem mitti, cum opus sit, vires non patiuntur, tempusve ejus rei præteriit; aut si multum ante morbum aliquis potavit; aut si is, qui sæpe, vel sponte, vel casu purgatus est, subito habet alvum suppressam. Servanda vero illa sunt, ne ante diem tertium ducatur; ne ulla cruditate substante; ne in corpore infirmo, diuque in adversa valetudine exhausto; neve in eo, cui satis alvus reddit quotidie, quive eam liquidam habebit; ne in ipso accessionis impetu, quia, quod tum infusum est, alvo continetur, regestumque in caput, multo gravius periculum efficit. Pridie vero abstinere debet æger, ut aptus tali curationi sit. Eodem die ante aliquot horas aquam calidam bibere, ut superiores ejus partes madescant: tum injicienda alvus est, si levi medicina contenti sumus, pura aqua; si paulo valentiori, mulsa; si leni, ex aqua, in qua fœnum græcum, vel ptisana, vel malva decocta sit: si reprimendi causa, ex verbenis. Acris autem est marina aqua, vel alia sale adjecto: atque utraque decocta commodior est. Acrior fit, adjecto vel oleo, vel nitro, vel melle quoque. Si acrior est, eo plus extrahit, sed minus facile sustinetur. Id quod in-

funditur, neque frigidum esse oportet, neque calidum; ne alterutro modo lædat. Cum infusum est, quantum fieri potest, continere se in lectulo debet ager, nec primæ cupiditati dejectionis protinus cedere; ubi necesse est, tum demum desidere. Frequenter eo modo demta materia, superioribus partibus levatis, morbum ipsum mollit. Cum vero, quoties res coegit, desidendo aliquis se exhaust, paulisper debet conquiescere; &, ne vires deficiant, utique eo die cibum assumere. qui plenior, an exiguus sit dandus, ex ratione ejus accessionis, quæ expectabitur, aut in metu non erit, æstimari oportebit.

C A P U T XIII.

De vomitu.

AT vomitus, ut in secunda quoque valetudine sæpe necessarius biliosis est; sic etiam in his morbis, quos bilis concitavit. Ergo omnibus, qui ante febres horrore & tremore vexantur; omnibus, qui cholera laborant; omnibus etiam cum quadam hilaritate insanientibus, & comitiali quoque morbo oppressis, necessarius est. Sed, si acutus morbus est, sicut in cholera; si febris est, inter horrores, asperioribus medicamentis opus non est; sicut in dejectionibus quoque supra dictum est. Satisque est, ea vomitus causa sumi, quæ sanis quoque sumenda esse proposui. At ubi longi valentesque morbi sine febre sunt, ut comitalis aut insania, veratro

quoque albo utendum est. Id neque hieme, neque æstate recte datur: optime, vere: tolerabiliter, autumnus. Quisquis daturus erit, id agere ante debet, ut accepturi corpus humidius sit. Illud scire oportet, omne ejusmodi medicamentum, quod potui datur, non semper ægris prodesse, semper sanis nocere.

CAPUT XIV.

De frictione.

DE frictione vero & gestatione adeo multa Asclepiades, tanquam inventor ejus, posuit in eo volumine, quod Communium Auxiliorum inscripsit, ut, cum trium tantum faceret mentionem, hujus & vini & gestationis, tamen maximam partem in hoc consumserit. Oportet autem neque recentiores viros in his fraudare, quæ vel repereant, vel recte secuti sunt; & tamen ea, quæ apud antiquiores aliquos posita sunt, auctoribus suis reddere. Neque dubitari potest, quin latius quidem, & dilucidius, ubi & quomodo frictione utendum esset, Asclepiades præceperit; nihil tamen reperit, quod non a vetustissimo auctore Hippocrate paucis verbis comprehensum sit: qui dixit, frictione, si vehemens sit, durari corpus; si lenis, molliri; si multa, minui; si modica, impleri. Sequitur ergo, ut tum utendum sit, cum aut adstringendum corpus sit, quod fluens est; aut molliendum, quod induruit; aut digerendum in eo, quod copia nocet; aut alendum id, quod tenue & infirmum est.

Quas tamen species, si quis curiosius æstimet, quod jam ad medicum non pertinet, facile intelliget, omnes ex una causa pendere, quæ demit. Nam & adstringitur aliquid, eo demto, quod interpositum, ut id laxaretur, effecerat: & mollietur, eo detracto, quod duritiem creabat: & impletur, non ipsa frictione, sed eo cibo, qui postea usque ad cutem, digestionem quadam relaxatam, penetrat. Diversarum vero rerum in modo causa est.

Inter unctionem autem & frictionem multum interest. Ungi enim, leniterque pertractari corpus, etiam in acutis & recentibus morbis oportet; in remissione tamen, & ante cibum. Longa vero frictione uti, neque in acutis morbis, neque incrementibus convenit; præterquam cum phreneticis somnus ea quæritur. Amat autem hoc auxilium valetudo longa, & jam a primo impetu inclinata. Neque ignoro, quosdam dicere, omne auxilium necessarium esse incrementibus morbis, non cum jam per se finiuntur. Quod non ita se habet. Potest enim morbus, etiam qui per se finem habiturus est, citius tamen adhibito auxilio tolli. quod duabus de causis necessarium est: ut & quam primum bona valetudo contingat; & ne morbus, qui remanet, iterum, quamvis levi de causa, exaspereetur. Potest enim morbus minus gravis esse, quam fuerit; neque ideo tamen solvi; sed reliquiis quibusdam inhærere, quas admotum aliquod auxilium discutit.

Sed ut, levata quoque adversa valetudine, recte frictio adhibetur; sic nunquam adhibenda est febre

increfcente : verum , fi fieri poterit , cum ex toto corpus ea vacabit ; fin minus , certe cum ea remiferit . Eadem autem modo in totis corporibus effe debet , ut cum infirmus aliquis implendus eft ; modo in partibus ; aut quia ipfa ejus membri imbecillitas id requirit , aut quia alterius . Nam & capitis longos dolores ipfius frictio levat ; non in impetu tamen doloris : & membrum aliquod refolutum ipfius frictione confirmatur . Longe tamen fæpius aliud perfricandum eft , cum aliud dolet : maximeque cum a fummis , aut a mediis partibus corporis evocare materiam volumus ; ideoque extremas partes perfricamus . Neque audiendi funt , qui numero finiunt , quoties aliquis perfricandus fit . Id enim ex viribus hominis colligendum eft . Ut fi quis perinfirmus eft , poteft fatis effe quinquagies : fi robustior , poteft ducenties effe faciendum : inter utrumque deinde , prout vires funt . Quo fit , ut etiam minus fæpe in muliere , quam in viro ; minus fæpe in puero , vel fene , quam in juvene , manus dimovendæ fint . Denique , fi certa membra perfricantur , multa valentique frictione opus eft . Nam neque totum corpus infirmari cito per partem poteft , & opus eft quam plurimum materiæ digeri , five id ipfum membrum , five per id aliud levamus . At ubi totius corporis imbecillitas hanc curationem per totum id exigit , brevior effe debet & lenior , ut tantummodo summam cutem emolliat , quo facilius capax ex recenti cibo novæ materiæ fiat . In malis jam ægrum effe testatur , ubi exterior pars corporis friget , interior cum fiti ca-

let, ut supra posui. Sed tunc quoque unicum in frictione præsidium est. quæ si calorem in cutem evocavit, potest alicui medicinæ locum facere.

C A P U T XV.

De gestatione.

GESTATIO quoque longis etiam & inclinatis morbis aptissima est. utilisque est & his corporibus, quæ jam ex toto febre carent, sed adhuc exerceri per se non possunt; & his, quibus lentæ morborum reliquiæ remanent, neque aliter eliduntur. Asclepiades etiam in recenti vehementique febre, præcipueque ardente, ad discutiendam eam, gestatione dixit utendum esse. Sed id periculose fit; meliusque quiete ejusmodi impetus sustinetur. Si quis tamen experiri volet, sic experiatur, si lingua non erit aspera, si nullus tumor, nulla durities, nullus dolor visceribus, aut capiti, aut præcordiis suberit. Et ex toto, nunquam gestari corpus dolens debet, siue id in toto, siue in parte est; nisi tamen solis nervis dolentibus: neque unquam increfcente febre, sed in remissione ejus.

Genera autem gestationis plura sunt: quæ adhibenda sunt & pro viribus cujusque, & pro opibus, ne aut imbecillum hominem nimis digerant, aut humili obsint. Gestationum lenissima est navi, vel in portu, vel in flumine; vehementior in alto mari; vel lectica, aut scamno: acrior, vehiculo. Atque hæc ipsa & intendi, & leniri possunt. Si ni-

hil horum est, suspendi lectus debet, & moveri. Si ne id quidem est, at certe uni pedi lecti funiculus subjiciendus est, atque ita lectus huc & illuc manu impellendus. Et levia quidem genera exercitationis infirmis conveniunt: valentiora vero his, qui jam pluribus diebus febre liberati sunt; aut his, qui gravium morborum initia sic sentiunt, ut adhuc febre vacent (quod & in tabe, & in stomachi vitiis, & cum aqua cutem subiit, & interdum in morbo regio fit) aut ubi quidam morbi, qualis comitialis, qualis insania est, sine febre, quamvis diu, manent. In quibus affectibus ea quoque genera exercitationum necessaria sunt, quæ comprehendimus eo loco, quo, quemadmodum sani, neque firmi homines se gererent, præcepimus.

C A P U T XVI.

De abstinentia.

ABSTINENTIÆ vero duo genera sunt. Alterum; ubi nihil assumit ager: alterum, ubi non nisi quod oportet. Initia morborum primum famem sitimque desiderant: ipsi deinde morbi, moderationem, ut neque aliud quam expedit, neque ejus ipsius nimium sumatur. neque enim convenit juxta inediam protinus satietatem esse. Quod si sanis quoque corporibus inutile est, ubi aliqua necessitas famem fecit; quanto inutilius est in corpore etiam ægro? Neque ulla res magis adjuvat laborantem,

quam tempeſtiva abſtinentia. Intemperantes homines apud nos, ſibi cibi tempora, modum curantibus dant. Rurſus alii, tempora medicis pro dono remittunt, ſibi iſſis modum vindicant. Liberaliter agere ſe credunt, qui cetera illorum arbitrio relinquunt, in genere cibi liberi ſunt; quaſi quaeratur, quid medico liceat, non quid ægro ſalutare ſit. Cui vehementer nocet, quoties in ejus, quod aſſumitur, vel tempore, vel modo, vel genere peccatur.

C A P U T XVII.

De ſudore.

SUDOR etiam duobus modis elicitur; aut ſiccocalore, aut balneo. Siccus calor eſt, & arenæ calidæ, & laconici, & clibanii, & quarundam naturalium ſudationum, ubi e terra profuſus calidus vapor ædificio includitur, ſicut ſuper Bajas in myrtetis habemus. Præter hæc, ſole quoque & exercitatione iſ movetur. Utiliaque hæc genera ſunt, quoties humor intus nocet, iſque digerendus eſt. Ac nervorum quoque quædam vitia ſic optime curantur. Sed cetera infirmis poſſunt convenire: ſol, & exercitatio tantum robuſtioribus; qui tamen ſine febre, vel initio morbi, vel etiam non gravibus morbis tenentur. Cavendum autem eſt, ne quid horum vel in febre, vel in cruditate tentetur.

At balnei duplex uſus eſt. Nam modo, diſcuſſis febribus, initium cibi plenioris, viniſque firmioris,

valetudini facit; modo febrem ipsam tollit. Fereque adhibetur, ubi summam cutem relaxari, evocarique corruptum humorem, & habitum corporis mutari expedit. Antiqui timidius eo utebantur: Asclepiades audacius. Neque terrere autem ea res, si tempestiva est, debet: & ante tempus, nocet. Quisquis febre liberatus est, simulatque ea uno die non accessit, eo, qui proximus est, post tempus accessionis, tuto lavari potest. At si circuitum habere ea febris solita est, sic ut tertio, quartove die revertatur, quodocunque non accessit, balneum tutum est. Manentibus vero adhuc febribus, si hæ sunt lentæ, lienesque jamdiu male habent, recte medicina ista tentatur: cum eo tamen, ne præcordia dura sint, neve ea tumeant, neve lingua aspera sit, neve aut in medio corpore, aut in capite dolor ullus sit, neve tum febris increascit. Et in his quidem febribus, quæ certum circuitum habent, duo balnei tempora sunt: alterum, ante horrorem; alterum, febre finita. In his vero, qui lentis febri- culis diu detinentur, cum aut ex toto recessit accessio; aut si id non solet, certe lenita est, jamque corpus tam integrum est, quam maxime esse in eo genere valetudinis solet.

Imbecillus homo, iturus in balneum, vitare debet, ne ante frigus aliquod experiatur: ubi in balneum venit, paulisper residere, experiri que, num tempora adstringantur, & an sudor aliquis oriatur: illud si incidit, hoc non secutum est, inutile eo die balneum est: & perungendus est is leniter, & auferendus, vitandumque omni modo frigus, & ab-

stinencia utendum. At si temporibus integris, primum ibi, deinde alibi sudor incipit, fovendum os aqua calida; tum in folio desidendum est; atque ibi quoque videndum, num sub primo contactu aquæ calidæ summa cutis inhorrescat, quod vix tamen fieri potest, si priora recte accesserunt. certum autem id signum, inutilis balnei est.

Ante vero, quam in aquam calidam se demittat, an postea, aliquis perungi debeat, ex ratione valetudinis suæ cognoscat. Fere tamen (nisi ubi nominatim, ut postea fiat, id præcipietur) moto sudore leniter corpus perungendum; deinde in aquam calidam demittendum est. Atque hic quoque habenda virium ratio est: neque committendum, ut per æstum anima deficiat; sed maturius is auferendus est, curiosæque in vestimentis involvendus est, ut neque ad eum frigus aspiret: & ibi quoque, antequam aliquid assumat, insudet.

Fomenta quoque calida sunt, milium, sal, arena, quodlibet eorum calefactum, & in linteum coniectum. Si minore vi opus est, etiam solum linteum. At si majore, extincti titiones, involutique panniculis, & sic circumdati. Quin etiam calido oleo replentur utriculi: & in vasa fictilia (quas a similitudine lenticulas vocant) aqua conjicitur; & sal sicco linteo excipitur, demittiturque in aquam bene calidam, tum super id membrum, quod fovendum est, collocatur. Juxtaque ignem, ferramenta duo ignita sunt, capitibus paulo latioribus: alterum ex his demittitur in eum salem, & aqua super leviter aspergitur; ubi frigere coepit, ad

ignem refertur : idem & in altero fit ; deinde invicem in utroque : inter quæ descendit falsus & calidus succus , qui contractis aliquo morbo nervis opitulatur. His omnibus commune est , digerere id , quod vel præcordia onerat , vel fauces strangu-
lat, vel in aliquo membro nocet. Quando autem quoque utendum sit, in ipsis morborum generibus dicetur.

C A P U T XVIII.

Qui cibi , potionesve , aut valentis aut mediæ , aut imbecillæ materiæ sint.

CUM de his dictum sit , quæ detrahendo juvant : ad ea veniendum est , quæ nos alunt , id est , cibum & potionem. Hæc autem non omnium tantum morborum , sed etiam secundæ valetudinis communia præsidia sunt. Pertinetque ad rem , omnium proprietates nosse : primum , ut sani sciant , quomodo his utantur : deinde , ut exsequentibus nobis morborum curationes , liceat species rerum , quæ assidue necessariae erunt , subicere : neque necesse sit subinde singulas eas nominare.

Scire igitur oportet , omnia legumina , quæque ex frumentis panificia sunt , generis valentissimi esse. Valentissimum voco , in quo plurimum alimenti est. Item omne animal quadrupes domi natum ; omnem grandem feram , quales sunt caprea , cervus , aper , onager ; omnem grandem avem , quales sunt anser , & pavo , & grus ; omnes bel-

luas marinas, ex quibus cetus est, quæque his pares sunt: item mel, & caseum. Quo minus mirum est, opus pistorium valentissimum esse, quod ex frumento, adipe, melle, caseo constat. In media vero materia numerari ex oleribus debere ea, quorum radices, vel bulbos assumimus: ex quadrupedibus, leporem: aves omnes a minimis ad phœnicopterum: item pisces omnes, qui salem non patiuntur, solidive saliantur. Imbecillissimam vero materiam esse, omne olus, & quidquid in cauliculo nascitur, qualis est cucurbita, & cucumis, & capparitis; omnia poma, oleas, cochleas, itemque conchyliæ.

Sed quamvis hæc ita discreta sunt, tamen etiam, quæ sub eadem specie sunt, magna discrimina recipiunt; aliaque res alia vel valentior est, vel infirmior. Siquidem plus alimenti est in carne, quam in ullo alio. Firmius est triticum, quam milium: id ipsum, quam hordeum: & ex tritico firmissima filigo, deinde simila, deinde cui nihil ademptum est, quod *αὐτόπυρον* Græci vocant: infirmior est, ex polline, infirmissimus, cibarius panis. Ex leguminibus vero valentior faba, vel lenticula, quam pisum. Ex oleribus valentior rapa, napique, & omnes bulbi (in quibus cepam quoque, & allium numero) quam pastinaca, vel quæ specialiter radícula appellatur. Item firmior brassica, & beta, & porrum, quam lactuca, vel cucurbita, vel asparagus. At ex fructibus furculorum valentiores uvæ, ficus, nuces, palmulæ, quam quæ poma proprie nominantur. Atque ex his ipsis firmiora, quæ suc-

cosa, quam quæ fragilia sunt. Item ex his avibus, quæ in media specie sunt, valentior ea, quæ pedibus, quam quæ volatu magis nititur: & ex his, quæ volatu fidunt, firmiores sunt, quæ grandiores aves, quam quæ minutæ sunt, ut ficedula & turdus. Atque eæ quoque, quæ in aqua degunt, leviozem cibum præstant, quam quæ natandi scientiam non habent. Inter domesticas vero quadrupedes, levissima suilla est; gravissima, bubula. Itemque ex feris, quo majus quodque animal, eo robustior ex eo cibus est. Pisciumque eorum, qui ex media materia sunt, quibus maxime utimur, tamen gravissimi sunt, ex quibus salsamenta quoque fieri possunt, qualis lacertus est; deinde hi, qui, quamvis teneriores, tamen duri sunt, ut aurata, corvus, sparus, oculata; tum plani: post quos etiam leviores lupi, mullicque; & post hos, omnes saxatiles.

Neque vero in generibus rerum tantummodo discrimen est, sed etiam in ipsis: quod & ætate fit, & membro, & solo, & coelo, & habitu. Nam quadrupes vel omne animal, si lactens est, minus alimenti præstat: itemque quo tenerior pullus cohortalis est. In piscibus quoque media ætas, quæ nondum summam magnitudinem implevit. Deinde ex eodem sue, ungulæ, rostrum, aures, cerebellum. Ex agno, hœdove, cum petiolis totum caput aliquanto, quam cetera membra, leviora sunt; adeo ut in media materia poni possint. Ex avibus, colla, alæve recte infirmis annumerantur. Quod ad solum vero pertinet, frumentum quoque va-

lentius est collinum, quam campestre. Levior piscis inter saxa editus, quam in arena; levior in arena, quam in limo. Quo fit, ut ex stagno, vel lacu, vel flumine eadem genera graviora sint. Leviorque, qui in alto, quam qui in vado vixit. Omne etiam ferum animal domestico levius; & quodcumque humido cœlo, quam quod sicco natum est. Deinde eadem omnia pingua, quam macra; recentia, quam salsa; nova, quam vetusta, plus alimenti habent. Tum res eadem magis alit jurulenta, quam assa; magis assa, quam elixa. Ovum durum valentissimæ materiæ est; molle, vel forbile, imbecillissimæ. Cumque panificia omnia firmissima sint, elota tamen quædam genera frumenti, ut alica, oryza, ptisana, vel ex iisdem facta sorbitio, vel pulticula, & aqua quoque madens panis, imbecillissimis annumerari potest.

Ex potionibus vero, quæcunque ex frumento facta est, itemque lac, mulsum, defrutum, passum, vinum aut dulce, aut vehemens, aut mustum, aut magnæ vetustatis, valentissimi generis est. At acetum, & id vinum, quod paucorum annorum, vel austerum, vel lene est, in media materia est. ideoque infirmis nunquam generis alterius dari debet. Aqua omnium imbecillissima est. Firmiorque ex frumento potio est, quo firmitus fuit ipsum frumentum: firmior ex eo vino, quod bono solo, quam quod tenui; quodque temperato cœlo, quam quod aut nimis humido, aut nimis sicco, nimiumque aut frigido, aut calido natum est. Mulsum, quo plus mellis habet; defrutum, quo magis in-

coctum; passum, quo ex sicciore uva est, eo valentius est. Aqua levissima pluvialis est; deinde fontana, tum ex flumine, tum ex puteo; post hæc ex nive, aut glacie; gravior his, ex lacu; gravissima, ex palude. Facilis etiam, & necessaria cognitio est naturam ejus requirentibus. Nam levis, pondere apparet; & ex his, quæ pondere pares sunt, eo melior quæque est, quo celerius & calefit & frigescit; quoque celerius ex ea legumina percoquantur.

Fere vero sequitur, ut, quo valentior quæque materia est, eo minus facile concoquatur; sed si concocta est, plus alat. Itaque utendum est materiæ genere pro viribus; modusque omnibus pro genere sumendus. Ergo imbecillis hominibus, rebus infirmis opus est: mediocriter firmos, media materia optime sustinet: & robustis apta validissima est. Plus deinde aliquis assumere ex levioribus potest: in his magis, quæ valentissima sunt, temperare sibi debet.

C A P U T XIX.

*Quæ natura ac proprietas cujusque rei sit, quæ
vescimur.*

NEQVE hæc sola discrimina sunt; sed etiam aliæ res boni succi, aliæ mali sunt, quæ εὔχυμα, & κακὸν χυμα Græci vocant: aliæ lenes, aliæ acres: aliæ crassiorem pituitam in nobis faciunt, aliæ tenuiorem: aliæ idoneæ sunt stomacho, aliæ alienæ

sunt : itemque aliæ inflant, aliæ ab hoc absunt : aliæ calefaciunt, aliæ refrigerant : aliæ facile in stomacho acescunt, aliæ non facile intus corrumpuntur ; aliæ movent alvum, aliæ supprimunt : aliæ citant urinam, aliæ tardant : quædam somnum movent, quædam sensus excitant. Quæ omnia ideo noscenda sunt, quoniam aliud alii, vel corpori, vel valetudini, convenit.

C A P U T XX.

De his, quæ boni succi sunt.

BONI succi sunt, triticum, filigo, alica, oryza, amyllum. Item & lenes sunt & stomacho aptæ & calefaciunt, tragus, ptisana, lac, caseus mollis, omnis venatio, omnes aves, quæ ex media materia sunt : ex majoribus quoque hæ, quas supra nominavimus : medii inter teneros durosque pisces, ut mullus, & lupus verna ; lactuca, urtica, malva, cucumis, cucurbita, ovum forbile, portulaca, cochleæ, palmulæ : ex pomis quodcunque neque acerbum, neque acidum est : vinum dulce, vel lenne, passum, defrutum, oleæ, quæ ex his duobus in alterutro servatæ sunt : vulvæ, rostra, trunculique suum, omnis pinguis caro, omnis glutinosa, omne jecur.

CAPUT XXI.

De his, quæ mali succi sunt.

MALI vero succi sunt, milium, panicum, hordeum, legumina, caro domestica permacra, omnisque caro falsa, omne falsamentum, garum, vetus caseus, cicer, radícula, rapa, napi, bulbi, brassica, magisque etiam cyma ejus, asparagus, beta, cucumis, porrum, eruca, nasturtium, thymum, nepeta, fatureja, hyssopum, ruta, anethum, feniculum, cuminum, anisum, lapathum, sinapi, allium, cepa, lienes, renes, intestina, pomum quodcumque acidum vel acerbum est, acetum, omnia acria, acida, acerba, oleum, pisces quoque saxatiles, omnesque, qui ex tenerrimo genere sunt, aut hi, qui rursus nimium duri virosique sunt, ut fere quos stagna, lacus, limosive rivi ferunt, qui, ve in nimiam magnitudinem excefferunt.

CAPUT XXII.

Quæ res lenes, quæve acres sint.

LENES autem sunt, sorbitio, pulticula, lagnum, amyllum, ptisana, pinguis caro, & quæcumque glutinosa est. quod fere quidem in omni, quæ domestica, fit, præcipue tamen in ungulis, trunculisque suum, in petiolis capitulisque hoëdorum & vitulorum & agnorum, omnibusque cerebellis.

Item hi, qui proprie bulbi nominantur; lac; defrutum, passum; nuclei pinei. Acria sunt, omnia nimis austera, omnia acida, omnia falsa; & mel quidem, quo melius est, eo magis. Item allium, cepa, eruca, ruta, nasturtium, cucumis, beta, brassica, asparagus, sinapi, radicula, intubus, ocimum, lactuca, maximaque olerum pars.

C A P U T XXIII.

De his, quæ crassiores, quæve tenuiores pituitam faciunt.

CRASSIOREM autem pituitam faciunt, ova forbilia, alica, oryza, amyllum, ptisana, lac, bulbi, omniaque fere glutinosa. Extenuant eandem, omnia falsa, atque acria, & acida.

C A P U T XXIV.

De his, quæ stomacho idonea sunt.

STOMACHO autem aptissima sunt, quæcunque austera sunt, etiam quæ acida sunt, quæque contacta sale modico sunt. Item panis sine fermento, & elota alica, vel oryza, vel ptisana; omnis avis, omnis venatio; atque utraque vel assa, vel elixa: ex domesticis animalibus bubula: si quid ex ceteris sumitur, inacrum potius, quam pingue: ex sue, ungulae, rostra, aures, vulvæque steriles: ex oleribus, intubus, lactuca, pastinaca, cucurbita elixa,

fifer : ex pomis, cerasium, morum, forbum, pirum fragile, quale crustuminum vel Nævianum est : item pira, quæ reponuntur, Tarentina, atque Signina ; malum orbiculatum, aut Scandianum, vel Amerinum, vel cotoneum, vel Punicum, uvæ ex olla, molle ovum, palmulæ, nuclei pinei, oleæ albæ ex dura muria, eadem aceto intinctæ, vel nigræ, quæ in arbore bene permaturuerunt, vel quæ in passio, defrutove servatæ sunt : vinum austerum, licet jam asperum sit, item resinatum : duri ex media materia pisces, ostrea, pectines, murices, purpuræ, cochleæ : cibi, potionesque vel frigidæ, vel ferventes, absinthium.

CAPUT XXV.

Quæ res alienæ stomacho sint.

ALIENA vero stomacho sunt, omnia tepida, omnia falsa, omnia jurulenta, omnia prædulcia, omnia pingua, forbitio, panis fermentatus, idemque vel ex milio, vel ex hordeo, oleum, radices olerum, & quodcunque olus ex oleo garove estur, mel, mulsum, defrutum, passum, lac, omnis caseus, uva recens, ficus & viridis & arida, legumina omnia, quæque inflare consueverunt : item thymum, nepeta, satireja, hyssopum, nasturtium, lapathum, lapsana, juglandes. Ex his autem intelligi potest, non, quidquid boni succi est, protinus stomacho convenire, neque quidquid stomacho convenit, protinus boni succi esse.

CAPUT XXVI.

De his, quæ inflant.

INFLANT autem, omnia fere legumina, omnia pingua, omnia dulcia, omnia jurulenta, mustum, atque etiam id vinum, cui nihil adhuc ætatis accessit: ex oleribus, allium, cepa, brassica, omnesque radices, excepto sisere & pastinaca, bulbi, ficus etiam aridæ, sed magis virides, uvæ recentes, nuces omnes, exceptis nucleis pineis, lac, omnisque caseus, quidquid deinde subcrudum aliquis assumsit.

De his, quæ minime inflant.

Minima inflatio fit ex venatione, aucupio, piscibus, pomis, oleis, conchiliis, ovis vel mollibus vel forbilibus, vino vetere. Feniculum vero, & anethum, inflationes etiam levant.

CAPUT XXVII.

De his, quæ calefaciunt, aut refrigerant.

AT calefaciunt, piper, sal, caro omnis jurulenta, allium, cepa, ficus arida, balsamentum, vinum, & quo meracius est, eo magis.

Refrigerant, olerà, quorum crudi caules assuntur, ut intubus, & lactuca; item coriandrum, cucumis, elixa cucurbita, beta, mora, cerastia,

mala austera, pira fragilia, caro elixa, præcipueque acetum, five cibus ex eo, five potio assumitur.

C A P U T XXVIII.

De his, quæ intus facile corrumpuntur.

FACILE autem intus corrumpuntur, panis fermentatus, & quisquis alius quam ex tritico est; lac, mel, ideoque lactaria atque omne pistorium opus; teneri pisces, ostrea, olera, caseus & recens & vetus, crassa vel tenera caro, vinum dulce, mulsum, defrutum, passum; quidquid deinde vel jurulentum est, vel nimis dulce, vel nimis tenue.

De his, quæ intus minime vitiantur.

At minime intus vitiantur, panis sine fermento, aves, & eæ potius duriores; aurati pisces, neque solum aurata pura, aut scarus, sed etiam lolligo, locusta, polypus: item bubula, omnisque dura caro; eademque aptior est, si macra, si falsa est; omniaque salsamenta: cochleæ, murices, purpuræ: vinum austerum, vel resinatum.

C A P U T XXIX.

De his, quæ alvum movent.

AT alvum movent, panis fermentatus, magisque si cibarius vel hordeaceus est; brassica, si subcruda est, lactuca, anethum, nasturtium, oci-

Corn. Celsus.

H

mum, urtica, portulaca, radícula, capparis, alium, cepa, malva, lapathium, beta, asparagus, cucurbita, cerasia, mora, poma omnia mitia, ficus etiam arida, sed magis viridis, uvæ recentes, pingues minutæ aves, cochleæ, garum, falsamenta, ostrea, pelorides, echini, musculi, & omnes fere conchulæ, maximeque jus earum; saxatiles, & omnes teneri pisces, sepiarum atramentum; si qua caro assumitur, pinguis eadem, vel jurulenta, vel elixa; aves, quæ natant; mel crudum, lac, lactaria omnia, mulsum, vinum dulce vel falsum, aqua tenera, omnia tepida, dulcia, pingua, elixa, jurulenta, falsa, diluta.

CAPUT XXX.

De his, quæ alvum adstringunt.

CONTRA adstringunt, panis ex filigine, vel ex simila; magis, si sine fermento est; magis etiam si ustus est; intenditurque vis ejus etiam, si bis coquitur; pulticula vel ex alica, vel ex panico, vel ex milio; itemque ex iisdem sorbitio; & magis, si hæc ante fricta sunt: lenticula, cui vel beta, vel intubus, vel ambubeja, vel plantago adjecta est; magisque etiam, si illa ante fricta est: per se etiam intubus, vel ex plantagine, vel ambubeja fricta; minuta olera, brassica bis decocta; dura ova; magisque, si assa sunt: minutæ aves, merula, palumbes; magisque, si in posca decoctus est: grus, omnesque aves, quæ magis currunt,

quam volant; lepus, caprea; jecur ex his, quæ sebum habent, maximeque bubulum, ac sebum ipsum: caseus, qui vehementior vetustate fit, vel ea mutatione, quam in eo transmarino videmus; aut si recens est, ex melle, mulsove decoctus: item mel coctum, pira immatura, sorba, magisque ea, quæ torminalia vocantur, mala cydonea, & punica, oleæ vel albæ vel præmaturæ, myrta, palmulæ, purpuræ, murices, vinum refinatum vel asperum, item meracum, acetum, mulsum quod inferbuit, asperum item defrutum, passum, aqua vel tepida vel præfrigida, dura, id est, ea quæ tarde putrescit, ideoque pluvia potissimum, omnia dura, macra, austera, aspera, tosta, & in eadem carne, assa potius, quam elixa.

C A P U T X X X I.

De his, quæ urinam movent.

URINAM autem movent, quæcunque in horto nascentia boni odoris sunt, ut apium, ruta, anethum, ocimum, mentha, hyssopum, anisum, coriandrum, nasturtium, eruca, feniculum. præter hæc, asparagus, capparitis, nepeta, thymum, fatu-reja, lapsanum, pastinaca, magisque agrestis, radícula, fiser, cepa. Ex venatione, maxime lepus; vinum tenue, piper & rotundum & longum, sinapi, absinthium, nuclei pinei.

CAPUT XXXII.

De his, quæ ad somnum apta sunt.

SOMNO vero aptum est papaver, lactuca, maximeque æstiva, cujus cauliculus jam lacte repletus est, morum, porrum.

De his, quæ sensum excitant.

Sensus excitant, nepeta, thymum, fatureja, hyssopum, præcipueque pulegium, ruta, & cepa.

CAPUT XXXIII.

De his, quæ materiam evocant.

EVOCARE vero materiam multa admodum possunt. Sed ea, quæ ex peregrinis medicamentis maxime constant, aliisque magis, quam quibus ratione victus succurritur, opitulantur, in præsentia differam: ponam vero ea, quæ prompta, & his morbis, de quibus protinus dicturus sum, apta, corpus erodunt, & sic ex eo, quod mali est, extrahunt. Habent autem hanc facultatem, semina erucæ, nasturtii, radiculae; præcipue tamen omnium sinapi. Salis quoque & fici eadem vis est.

De his, quæ reprimunt.

Leniter vero simul & reprimunt & molliunt, lana succida, ex aceto vel vino, cui oleum adje-

ctum est; contritæ palmulæ, furfures in falsa aqua vel aceto decocti.

At simul reprimunt & refrigerant, herba muralis (παρθέριον vel περδίκιον appellant) serpillum, pulegium, ocimum, herba sanguinalis (quam Græci πολύγονον vocant) portulaca, papaveris folia, capreolique vitium, coriandri folia, hyoscyamum, muscus, fiser, apium, solanum (quam στρύχνη Græci vocant) brassicæ folia, intubus, plantago, feniculi semen, contrita pira vel mala, præcipueque cydonea, lenticula, aqua frigida, maximeque pluvialis, vinum, acetum, & ex horum aliquo magis, madens vel panis, vel farina, vel sponsia, vel cinis, vel lana succida, vel etiam linteolum; creta cimolia, gypsum, melinum, myrteum, rosa, acerbum oleum, verbenarum contusa cum teneris caulibus folia; cujus generis sunt olea, cupressus, myrtus, lentiscus, tamaris, ligustrum, rosa, rubus, laurus, hederæ, punicum malum.

Sine frigore autem reprimunt, cocta mala cydonea, malicorium, aqua calida, in qua verbenæ coctæ sunt, quas supra proposui, pulvis vel ex fece vini, vel ex myrti foliis, amaræ nuces.

De his, quæ calefaciunt.

Calefacit vero, ex qualibet farina cataplasma, sive ex tritici, sive ex farris, sive hordei, sive ervi, vel lolii, vel milii, vel panici, vel lenticulæ, vel fabæ, vel lupini, vel lini, vel foeni græci, ubi ea deferbuit, calidaque imposita est. Valentior tamen ad id omnis farina est ex mulso, quam ex

aqua cocta. Præterea cyprinum, irinum, medulla, adeps ex fele juncta oleo, magisque, si vetus est, sal, nitrum, git, piper, quinquefolium.

De his, quæ durant, aut emolliunt.

Fereque, quæ vehementer & reprimunt & refrigerant, durant: quæ autem calefaciunt & digerunt, ea emolliunt: præcipueque ad emolliendum potest cataplasma ex lini vel fœni græci semine.

His autem omnibus, & simplicibus, & permixtis, varie medici utuntur; ut magis, quid quisque persuaserit sibi, appareat, quam quid evidenter compererit.

A. CORN. CELSI
 M E D I C I N Æ
 LIBER TERTIUS.

C A P U T I.

De morborum generibus.

PROVISIS omnibus, quæ pertinent ad universa genera morborum, ad singulorum curationes veniam. Hos autem in duas species Græci diviserunt; aliosque ex his acutos, alios longos esse dixerunt. Ideoque, quoniam non semper eodem modo respondebant, eosdem alii inter acutos, alii inter longos retulerunt. Ex quo plura eorum genera esse, manifestum est. Quidam enim breves acutique sunt, qui cito vel tollunt hominem, vel ipsi cito finiuntur. Quidam longi, sub quibus neque sanitas in propinquo, neque exitium est. Tertiumque genus eorum est, qui modo acuti, modo longi sunt. idque non in febribus tantummodo, in quibus frequentissimum est; sed in aliis quoque fit. Atque etiam, præter hos, quartum est; quod neque acutum dici potest, quia non perimit; neque utique

longum, quia, si occurritur, facile sanatur. Ego, cum de singulis dicam, cuius quisque generis sit, indicabo.

Dividam autem omnes in eos, qui in totis corporibus consistere videntur, & eos, qui oriuntur in partibus. Incipiam a prioribus, pauca de omnibus præfatus. In nullo quidem morbo minus fortuna sibi vindicare, quam ars, potest: utpote cum, repugnante natura, nihil medicina proficiat. Magis tamen ignoscendum medico est parum proficienti in acutis morbis, quam in longis. Hic enim breve spatium est, intra quod, si quod auxilium non profuit, æger exstinguitur: ibi & deliberationi, & mutationi remediorum tempus patet; adeo ut raro, si inter initia medicus accessit, obsequens æger sine illius vitio pereat. Longus tamen morbus cum penitus insedit, quod ad difficultatem pertinet, acuto par est. Et acutus quidem, quo vetustior est; longus autem, quo recentior, eo facilius curatur.

Alterum illud ignorari non oportet, quod non omnibus ægris eadem auxilia conveniunt. Ex quo incidit, ut alia atque alia summi auctores, quasi sola, venditaverint, prout cuique cesserant. Oportet itaque, ubi aliquid non respondet, non tantum putare auctorem, quanti ægrum, & experiri aliud atque aliud. Sic tamen, ut in acutis morbis cito mutetur, quod nihil prodest: in longis, quos tempus, ut facit, sic etiam solvit, non statim condemnatur, si quid non statim profuit: minus vero removeatur, si quid paulum saltem juvat; quia profectus tempore expletur.

CAPUT II.

Quomodo morbi cognoscantur, & an increſcant, an conſiſtant, an minuantur; & qua ratione ab initio, qui languere incipit, curari debeat.

PROTINUS autem inter initia ſcire facile eſt, quis acutus morbus, quis longus ſit: non in his ſolis, in quibus ſemper ita ſe habet; ſed in his quoque, in quibus variat. Nam ubi ſine intermiſſionibus acceſſiones & dolores graves urgent, acutus morbus eſt. Ubi lenti dolores, lentæve febres ſunt, & ſpatia inter acceſſiones porriguntur, acceduntque ea ſigna, quæ in priore volumine expoſita ſunt, longum hunc futurum eſſe, manifeſtum eſt.

Videndum etiam eſt, morbus an increſcat, an conſiſtat, an minuatur: quia quædam remedia increſcentibus morbis, plura inclinantibus conveniunt. Eaque, quæ creſcentibus apta ſunt, ubi acutus increſcens urget, in remiſſionibus potius experienda ſunt. Increſcit autem morbus, dum graviores dolores, acceſſionesque veniunt; hæque & ante, quam proximæ, revertuntur, & poſtea deſiſcunt. Atque in longis quoque morbis, etiam tales notas non habentibus, ſcire licet, increſcere, ſi ſomnus incertus eſt, ſi deterior concoctio, ſi foedioreſ dejectiones, ſi tardior ſenſus, ſi pigrior mens, ſi percurrit corpus frigus aut calor, ſi id magis pallet. Ea vero, quæ contraria hiſ ſunt, decedentis ejus notæ ſunt.

Præter hæc, in acutis morbis ferius æger alendus est, nec nisi jam inclinatis; ut primo demta materia impetum frangat. In longis maturius, ut sustinere spatium affecturi mali possit. Ac, si quando is non in toto corpore, sed in parte est; magis tamen ad rem pertinet, vim totius corporis moliri, quam proprie partes ægræ sanentur. Multum etiam interest, ab initio quis recte curatus sit, an perperam: quia curatio minus his prodest, in quibus assidue frustra fuit. Si quis temere habitus, adhuc integris viribus vivit, admota curatione momento restituitur.

Sed cum ab his coeperim, quæ notas quasdam futuræ adversæ valetudinis exhibent, curationum quoque principium ab animadversione ejusdem temporis faciam. Igitur, si quid ex his, quæ proposita sunt, incidit, omnium optima sunt, quies & abstinentia: si quid bibendum, aqua; idque interdum uno die fieri satis est; interdum, si terrentia manent, biduo: proximeque abstinentiam sumendus est cibus exiguus, bibenda aqua, postero die etiam vinum, deinde invicem alternis diebus, modo aqua, modo vinum, donec omnis causa metus finiatur. per hæc enim sæpe instans gravis morbus discutitur. Plurimique falluntur, dum se primo die protinus sublaturus languorem, aut exercitatione, aut balneo, aut coacta dejectione, aut vomitu, aut sudationibus, aut vino sperant. non quo non interdum id incidat, aut non decipiat, sed quo sæpius fallat; solaque abstinentia sine ullo periculo medeatur. Cum præsertim etiam pro modo terroris.

moderari liceat : & , si leviora indicia fuerunt , fatis fit a vino tantum abstinere , quod subtractum plus , quam si cibo aliquid dematur , adjuvat : si paulo graviora , fatis fit , non aquam tantum bibere , sed etiam cibo carnem subtrahere : interdum panis quoque minus , quam pro consuetudine assumere , humidoque cibo esse contentum , & olere potissimum. Satisque fit , tum ex toto a cibo , a vino , ab omni motu corporis abstinere , cum vehementes notæ terruerunt. Neque dubium est , quin vix quisquam , qui non dissimulavit , sed per hæc mature morbo occurrit , ægrotet.

CAPUT III.

De febrium generibus.

ATQUE hæc quidem sanis facienda sunt , tantum causam metuentibus. sequitur vero curatio febrium , quod & in toto corpore , & vulgare maxime morbi genus est. Ex his una quotidiana , altera tertiana , altera quartana est. Interdum etiam longiore circuitu quædam redeunt , sed id raro evenit. In prioribus , & morbi sunt , & medicina.

Ac quartanæ quidem simpliciores sunt. Incipiunt fere ab horrore : deinde calor erumpit ; finitaque febre biduum integrum est. ita quarto die revertitur.

Tertianarum vero duo genera sunt. Alterum eodem modo , quo quartana , & incipiens , & desinens ; illo tantum interposito discrimine , quod unum diem præstat integrum , tertio redit. Alterum

longe perniciosius, quod tertio quidem die revertitur, ex octo autem & quadraginta horis fere sex & triginta per accessionem occupat (interdum etiam vel minus, vel plus) neque ex toto in remissione desistit; sed tantum levius est. Id genus plerique medici *ἡμιπριταῖον* appellant.

Quotidianæ vero variæ sunt, & multiplices. Aliæ enim protinus a calore incipiunt, aliæ a frigore, aliæ ab horrore. Frigus voco, ubi extremæ partes membrorum inalgescunt: horrorem, ubi totum corpus intremitt. Rursus aliæ sic desinunt, ut ex toto sequatur integritas: aliæ sic, ut aliquantum quidem minuatur ex febre, nihilominus tamen quædam reliquiæ remaneant, donec altera accessio accedat: ac sæpe aliæ vix quidquam aut nihil remittunt, sed ita, ut coepere, continuant. Deinde, aliæ fervorem ingentem habent, aliæ tolerabilem: aliæ quotidie pares sunt, aliæ impares; atque invicem altero die leniores, altero vehementiores: aliæ tempore eodem postridie revertuntur, aliæ vel serius vel celerius: aliæ diem noctemque accessione & decessione implent, aliæ minus, aliæ plus; aliæ, cum decedunt, sudorem movent, aliæ non movent; atque alias per sudorem ad integritatem venit, alias corpus tantum imbecillius redditur. Accessiones etiam, modo singulæ singulis diebus fiunt, modo binæ pluresve concurrunt. Ex quo sæpe evenit, ut quotidie plures accessiones remissionesque sint; sic tamen, ut unaquæque alicui priori respondeat.

Interdum vero accessiones quoque confunduntur, sic ut notari neque tempora earum, neque

spatia possint. Neque verum est, quod dicitur a quibusdam, nullam febrem inordinatam esse, nisi aut ex vomica, aut ex inflammatione, aut ex ulcere. Facilior enim semper curatio foret, si hoc verum esset. Sed, quod evidentes causæ faciunt, facere etiam abditæ possunt. Neque de re, sed de verbo controversiam movent, qui, cum aliter aliterque in eodem morbo febres accedant, non easdem inordinate redire, sed alias aliasque subinde oriri dicunt. Quod tamen ad curandi rationem nihil pertineret, etiam si vere diceretur. Tempora quoque remissionum modo liberalia, modo vix ulla sunt.

C A P U T I V.

De curationum diversis generibus.

ET febrium quidem ratio maxime talis est. Curationum vero diversa genera sunt, prout auctores aliquos habent. Asclepiades officium esse medici dicit, ut tuto, ut celeriter, ut jucunde curet. Id votum est: sed fere periculosa esse nimia & festinatio & voluptas solet. Qua vero moderatione utendum sit, ut, quantum fieri potest, omnia ista contingant, prima semper habita salute, in ipsis partibus curationum considerandum erit.

Et ante omnia quæritur, primis diebus æger quæ ratione continendus sit. Antiqui, medicamentis quibusdam datis, concoctionem moliebantur, eo quod cruditatem maxime horrebant: deinde eam materiam, quæ lædere videbatur, ducendo sæpius al-

vum subtrahebant. Asclepiades medicamenta sustulit; alvum non toties, sed fere tamen in omni morbo, subduxit. Febre vero ipsa præcipue se ad remedium uti professus est. Convellendas etiam vires ægri putavit, luce, vigilia, siti ingenti, sic, ut ne os quidem primis diebus elui sineret. Quo magis falluntur, qui per omnia jucundam ejus disciplinam esse contendunt. Is enim ulterioribus quidem diebus cubantis etiam luxuriæ subscripsit, primis vero tororis vicem exhibuit.

Ego autem, medicamentorum dari portiones, & alvum duci non nisi raro debere, concedo. Et id non ideo tamen agendum, ut ægri vires convellantur, existimo; quoniam ex imbecillitate summum periculum est. Minui ergo tantum materiam superantem oportet; quæ naturaliter digeritur, ubi nihil novi accedit. Itaque abstinendus a cibo primis diebus est, & in luce habendus æger (nisi infirmus) interdium est, quoniam corpus ista quoque digerit; isque cubare quam maximo conclavi debet.

Quod ad sitim vero somnumque pertinet, moderandum est, ut interdium vigilet; noctu, si fieri potest, conquiescat: ac neque potet, neque nimium siti crucietur. Os etiam ejus elui potest, ubi & siccum est, & ipsi foetet: quamvis id tempus aptum potioni non est. Commodèque Erasistratus dixit, sæpe inferiore parte humorem non requirente, os & fauces requirere; neque ad rem, male haberi ægrum, pertinere. Ac primo quidem sic tenendus est.

Optimum vero medicamentum est, opportune

cibus datus. qui quando primum dari debeat, quaeritur. Plerique ex antiquis tarde dabant, sæpe quinto die, sæpe sexto: & id fortasse vel in Asia, vel in Ægypto, cœli ratio patitur. Asclepiades, ubi ægrum triduo per omnia fatigaverat, quarto die cibo destinabat. At Themison nuper, non, quando coepisset febris, sed quando desisset, aut certe levata esset, considerabat, &, ab illo tempore expectato die tertio, si non accesserat febris, statim; si accesserat, ubi ea vel desierat, vel, si assidue inhærebat, certe se inclinaverat, cibum dabat.

Nihil autem horum utique perpetuum est. Nam potest primo die primus cibus dandus esse, potest secundo, potest tertio, potest non nisi quarto, aut quinto; potest post unam accessionem, potest post duas, potest post plures. Refert enim, qualis morbus sit, quale corpus, quale cœlum, quæ ætas, quod tempus anni. Minimeque, in rebus multum inter se differentibus, quod intermittendum non est, perpetuum esse præceptum temporis potest. In morbo, qui plus virium aufert, celerius cibus dandus est: itemque eo cœlo, quod magis digerit. Ob quam causam in Africa nullo die æger abstinere recte videtur. Maturius etiam puero, quam juveni; æstate quam hieme, dari debet. Unum illud, & semper, & ubique servandum est, ut ægri vires subinde assidens medicus inspiciat, & quamdiu supererunt, abstinentia pugnet; si imbecillitatem vereri coeperit, cibo subveniat. Id enim ejus officium est, ut ægrum neque supervacua materia oneret, neque imbecilliorē fame perdat. Idque apud Era-

sistratum quoque invenio : qui, quamvis parum docuit, quando venter, quando corpus ipsum exinaniretur, dicendo tamen, hæc esse visenda, & tum cibum dandum, cum corpori deberetur, fatis ostendit, dum vires superessent, dari non oportere; ne deficerent, consulendum esse.

Ex his autem intelligi potest, ab uno medico multos non posse curari: eumque, si artifex est, idoneum esse, qui non multum ab ægro recedit. Sed, qui quæstui serviunt, quoniam is major ex populo est, libenter amplectuntur ea præcepta, quæ sedulitatem non exigunt, ut in hac ipsa re. Facile est enim dies vel accessiones numerare his quoque, qui ægrum raro vident: ille affideat necesse est, qui, quod solum opus est, visurus est, quando nimis imbecillus futurus sit, nisi cibum acceperit. In pluribus tamen ad initium cibi dies quartus aptissimus esse consuevit.

Est autem alia etiam de diebus ipsis dubitatio, quoniam antiqui potissimum impares sequebantur, eosque, tanquam tunc de ægris judicaretur, *κρίσιμους* nominabant. Hi erant dies tertius, quintus, septimus, nonus, undecimus, quartus decimus, unus & vigesimus; ita ut summa potentia septimo, deinde quartodecimo, deinde uni & vigesimo daretur. Igitur sic ægros nutriebant, ut dierum imparium accessiones expectarent: deinde postea cibum, quasi levioribus accessionibus instantibus, darent: adeo ut Hippocrates, si alio die febris defisset, recidivam timere sit solitus.

Id Asclepiades jure ut vanum repudiavit; neque

in ullo die, quia par imparve esset, ægris vel majus vel minus periculum esse dixit. Interdum enim peiores dies pares fiunt, & opportunius post eorum accessiones cibus datur. Nonnunquam etiam in ipso morbo, dierum ratio mutatur; fitque gravior, qui remissior esse consueverat. Atque ipse quartus decimus par est, in quo esse magnam vim antiqui fatebantur. Qui cum octavum primi naturam habere contenderent, ut ab eo secundus septenarius numerus inciperet, ipsi sibi repugnabant, non octavum, neque decimum, neque duodecimum diem sumendo, quasi potentiores: plus enim tribuebant nono, & undecimo. Quod cum fecissent sine ulla probabili ratione, ab undecimo, non ad tertium decimum, sed ad quartum decimum transibant. Est etiam apud Hippocratem, ei, quem septimus dies liberaturus sit, quartum esse gravissimum. Ita, illo quoque auctore, in die pari & gravior febris esse potest, & certa futuri nota. Atque idem alio loco quartum quemque diem, ut in utrumque efficacissimum apprehendit; id est, quartum, septimum, undecimum, quartumdecimum, decimumseptimum. in quo & ab impari ad paris numeri rationem transit: & ne hoc quidem propositum conservavit, cum a septimo die undecimus, non quartus, sed quintus sit. Adeo apparet, quacunque ratione ad numerum respeximus, nihil rationis, sub illo quidem auctore, reperiri. Verum in his quidem antiquos tunc celebres admodum Pythagorici numeri fefellerunt: cum hic quoque medicus non numerare dies debeat, sed ipsas acces-

fiones intueri; & ex his conjectare, quando dandus cibus fit.

Illud autem magis ad rem pertinet, scire, tumne oporteat dari, cum jam bene venæ conquieverunt, aut etiamnum manentibus reliquiis febris. Antiqui enim quam integerrimis corporibus alimentum offerebant. Asclepiades, inclinata quidem febre, sed adhuc tamen inhærente. In quo vanam rationem secutus est: non quo non sit interdum maturius cibus dandus, si mature timetur altera accessio: sed quo scilicet quam sanissimo dari debeat. minus enim corrumpitur, quod integro corpori infertur. Neque tamen verum est, quod Themisoni videbatur, si duabus horis integer futurus esset æger, satius esse tunc dare; ut ab integro corpore potissimum diduceretur. Nam si diduci tam celeriter posset, id esset optimum. Sed cum hoc breve tempus non præstet, satius est, principia cibi a decedente febre, quam reliquias ab incipiente excipi. Ita, si longius tempus secundum est, quam integerrimo dandus est: si breve, etiam antequam ex toto integer fiat. Quo loco vero integritas est, eodem est remissio, quæ maxime in febre continua potest esse. Atque hic quoque quæritur, utrum tot horæ expectandæ sint, quot febrem habuerunt: an satis sit, primam partem earum præteriri, ut ægris jucundius insidat, quibus interdum non vacat. Tutissimum est autem, ante totius accessionis tempus præterire: quamvis, ubi longa febris fuit, potest indulgeri ægro maturius, dum tamen ante minime pars dimidia prætercatur. Idque non in ea

sola febre, de qua proxime dictum est, sed in omnibus ita servandum est.

C A P U T V.

*De febrium speciebus, & singularum curationibus:
& primo, quando cibus febricitantibus dandus sit.*

HÆC magis per omnia genera febrium perpetua sunt: nunc ad singulas earum species descendam. Igitur si semel tantum accessit, deinde desit, eaque vel ex inguine, vel ex lassitudine, vel ex æstu, aliave simili re fuit, sic, ut interior nulla causa metum fecerit, postero die, cum tempus accessionis ita transiit, ut nihil moveret, cibus dari potest. At, si ex alto calor venit, & gravitas vel capitis vel præcordiorum secuta est; neque apparet, quid corpus confuderit; quamvis unam accessionem secuta integritas est: tamen, quia tertiana timeri potest, exspectandus est dies tertius; & ubi accessionis tempus præteriit, cibus dandus est, sed exiguus; quia quartana quoque timeri potest. Et die quarto demum, si corpus integrum est, eo cum fiducia utendum. Si vero postero, tertiove, aut quarto die secuta febris est; scire licet, morbum esse. Sed tertianarum, quartanarumque (quarum & certus circuitus est, & finis integer, & quia liberaliter quæta tempora sunt) expeditior ratio est. de quibus suo loco dicam.

Nunc vero eas explicabo, quæ quotidie urgent. Igitur tertio quoque die cibus ægro commodissime

datur, ut alter febrem minuat, alter viribus subveniat. Sed is dari debet, si quotidiana febris est, quæ ex toto desinat, simulatque corpus integrum factum est: sin, quamvis non accessiones, febres tamen junguntur, & quotidie quidem increscunt, sed sine integritate tamen remittunt, cum corpus ita se habet, ut major remissio non expectetur: si altero die gravior, altero levior accessio est, post gravio-rem. Fere vero gravio-rem accessio-lem levior nox sequitur: quo fit, ut gravio-rem accessio-lem nox quoque tristior antecedit.

At, si continuatur febris, neque levior unquam fit, & dari cibum necesse est, quando dari debeat, magna dissensio est. Quidam, quia fere remissius matutinum tempus ægris est, tunc putant dandum. Quod si respondet, non quia mane est, sed quia remissio est ægris, dari debet. Si vero ne tunc quidem ulla requies ægris est, hoc ipso pejus id tempus est, quod, cum sua natura melius esse debeat, morbi vitio non est, simulque insequitur tempus meridianum; a quo cum omnis æger fere pejor fiat, timeri potest, ne ille magis etiam, quam ex consuetudine, urgeatur. Igitur alii vespere tali ægro cibum dant. Sed, cum eo tempore fere pessimi sint, qui ægrotant, verendum est, ne, si quid tunc moverimus, fiat aliquid asperius. Ob hæc ad mediam noctem decurro, id est, finito jam gravissimo tempore, eodemque longissime distante, secuturis vero antelucanis horis, quibus omnes fere maxime dormiunt: deinde matutino tempore, quod natura sua levissimum est.

Si vero febres vagæ sunt : quia verendum est , ne cibum statim subsequantur , quandocunque quis ex accessione levatus est , tunc debet assumere. At , si plures accessiones eodem die veniunt , considerare oportet , paresne per omnia sint (quod vix fieri potest) an impares. Si per omnia pares sunt : post eam potius accessione cibum dari debet , quæ non inter meridiem & vesperem definit. Si impares sunt : considerandum est , quo distent. Nam , si altera gravior , altera levior est , post graviolem dari debet : si altera longior , altera brevior , post longiorem : si altera gravior , altera longior est , considerandum est , utra magis affligat , illa vi , an hæc tempore , & post eam dandus est. Sed plane plurimum interest , quantæ qualesque inter eas remissiones sint. Nam , si post alteram febrem motio manet , post alteram integrum corpus est ; integro corpore , cibo tempus aptius est.

Si semper febricula manet , sed alterum tamen longius tempus remissionis est ; id potius eligendum est , adeo ut , ubi accessiones continuantur , protinus , inclinata priore , dandus cibum sit. Etenim perpetuum est , ad quod omne consilium dirigi potest , cibum quam maxime semper ab accessione futura reducere : & , hoc salvo , dare quam integerrimo corpori. Quod non inter duas tantum , sed etiam inter plures accessiones servabitur. Sed , cum sit aptissimum , tertio quoque die cibum dare ; tamen , si corpus infirmum est , quotidie dandus est : multoque magis , si continentes febres sine remissione sunt ; quantoque magis corpus affligunt ;

aut si duæ pluresve accessiones eodem die veniunt. Quæ res efficit, ut & a primo die protinus cibus dari quotidie debeat, si protinus venæ conciderunt: & sæpius eodem die, si inter plures accessiones subinde vis corpori deest. Illud tamen in his servandum est, ut post eas febres minus cibi detur, post quas, si per corpus liceret, omnino non daretur. Cum vero febris instet, incipiat, augeatur, consistat, decedat, deinde in decessione consistat, aut finiatur; scire licet, optimum cibo tempus esse febre finita: deinde, cum decessio ejus consistit: tertium, si necesse est, quodocunque decedit: cetera omnia periculosa esse. Si tamen propter infirmitatem necessitas urget, satius esse, consistente jam incremento febris, aliquid offerre, quam incrementum; satius esse, instante, quam incipiente: cum eo tamen, ut nullo tempore is, qui deficit, non sit sustinendus.

Neque hercule satis est, ipsas tantum febres medicum intueri, sed etiam totius corporis habitum, & ad eum dirigere curationem; seu supersunt vires, seu defunt, seu quidam mali affectus interveniunt. Cum vero semper ægros securos agere conveniat, ut corpore tantum, non etiam animo laborent: tum præcipue, ubi cibum sumserunt. Itaque, si qua sunt, quæ exasperatura eorum animos sunt; optimum est, ea, dum ægrotant, eorum notitiæ subtrahere: si id fieri non potest, sustinere tamen post cibum, postque somni tempus, & cum experrecti sunt, tum exponere.

CAPUT VI.

Quando potiones febricitantibus dari expediat.

SED de cibo facilius quidem cum ægris ratio est: quorum sæpe stomachus hunc respuit, etiamsi mens concupiscit. De potione vero ingens pugna est; eoque magis, quo major febris est. Hæc enim sitim accendit, & tum maxime aquam exigit, cum illa periculosissima est. Sed docendus æger est, ubi febris conquieverit, protinus sitim quoque quieturam: longioremque accessionem fore, si quod ei datum fuerit alimentum: ita celerius eum desinere sitire, qui non bibit. Neceffe est tamen, quanto facilius etiam sani famem, quam sitim sustinent, tanto magis ægris in potione, quam in cibo indulgere. Sed primo quidem die nullus humor dari debet: nisi subito sic venæ conciderunt, ut cibus quoque dari debeat. Secundo vero, ceterisque etiam, quibus cibus non dabitur, tamen, si magna sitis urgebit, potio dari potest.

Ac ne illud quidem, ab Heraclide Tarentino dictum, ratione caret: ubi aut bilis ægrum, aut cruditas male habet, expedire quoque, per modicas potiones misceri novam materiam corruptæ. Illud videndum est, ut, qualia tempora cibo leguntur, talia potioni quoque, ubi sine illo datur, deligantur, aut cum ægrum dormire cupiemus: quod fere sitis prohibet. Satis autem convenit, cum omnibus febricitantibus nimius humor alienus sit, tum præ-

cipue esse feminis, quæ ex partu in febres inciderunt.

Sed cum tempora cibo potionique febris & remissionis ratio det, non est expeditissimum scire, quando æger febricitet, quando melior sit, quando deficiat: sine quibus dispensari illa non possunt. Venis enim maxime credimus, fallacissimæ rei; quia sæpe istæ lentiores celerioresve sunt, & ætate, & sexu, & corporum natura. Et plerumque satis sano corpore, si stomachus infirmus est, nonnunquam etiam incipiente febre, subeunt & quiescunt: ut imbecillus is videri possit, cui facile laturo gravis instat accessio. Contra sæpe eas concitat & resolvit sol, & balneum, & exercitatio, & metus, & ira, & quilibet alius animi affectus. adeo ut, cum primum medicus venit, sollicitudo ægri dubitantis, quomodo illi se habere videatur, eas moveat. Ob quam causam, periti medici est, non protinus ut venit, apprehendere manu brachium: sed primum residere hilari vultu, percontarique, quemadmodum se habeat; &, si quis ejus metus est, eum probabili sermone lenire; tum deinde ejus corpori manum admove. Quas venas autem conspectus medici movet, quam facile mille res turbant! Altera res est, cui credimus, calor, æque fallax. Nam hic quoque excitatur æstu, labore, fomno, metu, sollicitudine.

Igitur intueri quidem etiam ista oportet: sed his non omnia credere. Ac protinus quidem scire, non febricitare eum, cujus venæ naturaliter ordinatæ sunt, teporque talis est, qualis esse sanis so-

let. Non protinus autem sub calore motuque febrem esse, concipere: sed ita, si summa quoque arida inæqualiter cutis est; si calor & in fronte est, & ex imis præcordiis oritur; si spiritus ex naribus cum fervore prorumpit; si color, aut rubore, aut pallore novo mutatus est; si oculi graves, & aut persicci, aut subhumidi sunt; si sudor, cum sit, inæqualis est; si venæ non æquis intervallis moventur. Ob quam causam medicus neque in tenebris, neque a capite ægri debet residere; sed illustri loco adversus eum, ut omnes notas ex vultu quoque cubantis perspiciat.

Ubi vero febris fuit, atque decrevit, spectare oportet, num tempora, partesve corporis aliæ paulum madescant, quæ sudorem venturum esse testentur. Ac si qua ejus nota est, tunc demum dare potui calidam aquam; cujus salubris effectus est, si sudorem per omnia membra diffundit. Hujus autem rei causa, continere æger sub veste fatis multa manus debet, eademque crura pedesque contegere: qua mole plerique ægros in ipso impetu febris, potissimeque ubi ardens ea est, male habent. Si sudare corpus cœpit, linteum tepescere oportet, paulatimque singula membra detergere. At ubi sudor omnis finitus est, aut, si is non venit, ubi quam maxime potuit, idoneus esse cibo æger videtur, sub veste leniter ungendus est, tum detergendus, deinde ei cibus dandus.

Cibus autem febricitantibus humidus est aptissimus, aut humori certe quam proximus: utique ex materia quam levissima; maximeque sorbitio: eaque,

si magnæ febres fuerunt, quam tenuissima esse debet. Mel quoque despumatum huic recte adjicitur, quo corpus magis nutriatur: sed id, si stomachum offendit, supervacuum est; sicut ipsa quoque forbitio. Dari vero in vicem ejus potest, vel intrita ex aqua calida, vel alica elota, si firmus est stomachus, & compressa alvus, ex aqua mulsa; si vel ille languet, vel hæc profluit, ex posca. Et primo quidem cibo ita fatis est: secundo vero aliquid adjici potest, ex eodem tamen genere materiæ, vel olus, vel conchylium, vel pomum. Ac, dum febres quidem increscunt, hic solus idoneus cibus est. Ubi vero aut desinunt, aut levantur, semper quidem incipiendum est ab aliquo ex materia levissima, adjiciendum vero aliquid ex media, ratione habita subinde & virium hominis, & morbi.

Apponendi vero ægro varii cibi (sicut Asclepiades præcepit) tum demum sunt, ubi fastidio urgetur, neque fatis vires sufficiunt; ut paulum ex singulis degustando, famem vitet. At si neque vis, neque cupiditas deest, nulla varietate sollicitandus æger est; ne plus assumat, quam concoquat. Neque verum est, quod ab eo dicitur, facilius concoqui cibos varios. eduntur quidem facilius: ad concoctionem autem materiæ genus & modus pertinent. Neque inter magnos dolores, neque incremente morbo, tutum est, ægrum cibo impleri; sed ubi inclinata jam in melius valetudo est.

Sunt aliæ quæque observationes in febribus necessariae: atque illud quidem videndum est, quod quidam solum præcipiunt, an adstrictum corpus sit,

an profluat. Quorum alterum strangulat, quod continet, alterum digerit. Nam, si adstrictum est, ducenda alvus est, movenda urina, eliciendus omni modo sudor. In hoc genere morborum sanguinem etiam misisse, concussisse vehementibus gestationibus corpus, in lumine habuisse, imperasse famem, sitim, vigiliam prodest. Utile est etiam ducere in balneum, prius demittere in folium, tum ungere, iterum ad folium redire, multaque aqua fovere inguina; interdum etiam oleum in folio cum aqua calida miscere; uti cibo rarius & serius, tenui, simplici, molli, calido, exiguo; maximeque oleribus, qualia sunt, lapathum, urtica, malva; vel jure etiam concharum, muscutorumve, aut locustarum: neque danda caro, nisi elixa, est. At potio esse debet magis liberalis, & ante cibum, & post hunc, & cum hoc, ultra quam sitis coget. Poteritque a balneo etiam pingue jus, aut dulcius dari vinum: poterit semel, aut bis interponi Græcum falsum.

Contra vero, si corpus profluat, sudor coercendus, quies adhibenda erit; tenebris, somnoque, quodcumque volet, utendum; non nisi levi gestatione corpus agitandum, & pro genere mali subveniendum. Nam, si venter fluit, aut si stomachus non continet, ubi febris decrevit, liberaliter oportet aquam tepidam potui dare, & vomere cogere; nisi aut fauces, aut præcordia, aut latus dolet, aut vetus morbus est.

Si vero sudor exercet, duranda cutis est, vel nitro, vel sale, quæ cum oleo miscentur. At, si

levius id vitium est, oleo corpus ungendum est: si vehementius, rosa, vel melino, vel myrteo, cui vinum austerum sit adiectum.

Quisquis autem fluore æger est, cum venit in balneum, prius unendus, deinde in solium demittendus est. Si in cute vitium est, frigida quoque, quam calida aqua melius utetur. Ubi ad cibum ventum est, dari debet is valens, frigidus, ficcus, simplex, qui quam minime corrumpi possit, panis tostus, caro assa, vinum asperum, vel certe subausterum; si venter profluit, calidum; si sudores nocent, vomitusve sunt, frigidum.

C A P U T VII.

Quomodo pestilentes febres curari debeant.

DESIDERAT etiam propriam animadversionem in febribus pestilentiae casus. In hac minime utile est, aut fame, aut medicamentis uti, aut ducere alvum. Si vires finunt, sanguinem mittere optimum est; præcipueque, si cum dolore febris est. Si id parum tutum est, ubi febris aut tenuata est, aut levata, vomitu pectus purgare. Sed in hoc maturius, quam in aliis morbis, ducere in balneum opus est; vinum calidum, & meracius dare, & omnia glutinosa: inter quæ quoque carnem, generis ejusdem. Nam quo celerius ejusmodi tempestates corripunt, eo maturius auxilia, etiam cum quadam temeritate, rapienda sunt. Quod si puer est, qui laborat, neque tantum robur ejus est, ut sanguis

mitti possit, siti ei utendum est; ducenda alvus vel aqua vel ptisanæ cremore; tum demum is levibus cibis nutriendus. Et ex toto non sic pueri, ut viri, curari debent. Ergo, ut in alio quoque genere morborum, parcius in his agendum est; non facile sanguinem mittere, non facile ducere alvum, non cruciare vigilia, fameve, aut nimia siti, non vino curare, satis convenit. Vomitus post febrem eliciendus est: deinde dandus cibus ex levissimis; tum is dormiat: postero quoque die, si febris manet, abstineatur: tertio, ad similem cibum redeat. Dandaque opera est, quantum fieri potest, ut inter opportunam abstinentiam cibosque opportunos, omissis ceteris, nutriatur.

Curatio ardentis febris.

Si vero ardens febris extorret, nulla medicamento danda potio est; sed in ipsis accessionibus oleo & aqua refrigerandus est: quæ miscenda manu sunt, donec albescant. Etiam amplo conclavi tenendus, quo multum & purum aerem trahere possit; neque multis vestimentis strangulandus, sed admodum levibus tantum velandus est. Possunt etiam super stomachum imponi folia vitis in aqua frigida tincta. Ac ne siti quidem nimia vexandus est. Alendus maturius est, id est, a die tertio, & ante cibum iisdem perungendus. Si pituita in stomacho coit, inclinata jam accessione, vomere cogendus est; & tunc dandum frigidum olus, aut pomum, ex his, quæ stomacho conveniunt. Si ficcus manet stomachus, protinus vel ptisanæ, vel

alicæ, vel oryzæ cremor dandus est, cum quo recens adeps cocta sit. Cum vero in summo incremento morbus est, utique non ante diem quartum, magna siti antecedente, frigida aqua copiose præstanda est, ut bibat etiam ultra satietatem; & cum jam venter & præcordia ultra modum repleta, satisque refrigerata sunt, vomere debet. Quidam ne vomitum quidem exigunt; sed ipsa aqua frigida, tantum ad satietatem data, pro medicamento utuntur. Ubi utrumlibet factum est, multa veste operiendus est, & collocandus, ut dormiat. Fereque post longam sitim & vigiliam, post multam satietatem, post infractum calorem, plenus somnus venit; per quem ingens sudor effunditur, idque præsentissimum auxilium est: sed in his tamen, in quibus præter ardorem, nulli dolores, nullus præcordiorum tumor, nihil prohibens, vel in thorace, vel in pulmone, vel in faucibus, non ulcus, non defectio, non profluvium alvi fuit. Si quis autem in huiusmodi febre leviter tussit, is neque vehementi siti conflictari, neque bibere aquam frigidam debet; sed eo modo curandus est, quo in ceteris febribus præcipitur.

C A P U T VIII.

Curatio semitertianæ febris, quæ ἡμιτρίτηνος dicitur.

AT, ubi id genus tertianæ est, quod ἡμιτρίτηνος medici appellant, magna cura opus est, ne id fal-

lat. Habet enim plerumque frequentiores accessiones decessionesque, ut aliud morbi genus videri possit; porrigiturque febris in horas viginti quatuor, & triginta sex, ut, quod idem est, non idem esse videatur. Et magnopere necessarium est, neque dari cibum, nisi in ea remissione, quæ vera est; &, ubi ea venit, protinus dari. Plurimique sub alterutro curantis errore subito moriuntur. Ac, nisi magnopere aliqua res prohibet, inter initia sanguis mitti debet; tum dari cibus, qui neque incitet febre, & tamen longum ejus spatium sustineat.

C A P U T I X.

Curatio lentarum febrium.

NONNUNQUAM etiam lentæ febres sine ulla remissione corpus tenent; ac neque cibo, neque ulli remedio locus est. In hoc casu medici cura esse debet, ut morbum mutet: fortasse enim curationi opportunior fiet. Sæpe igitur ex aqua frigida, cui oleum sit adjectum, corpus ejus pertractandum est, quoniam interdum sic evenit, ut horror oriatur, & fiat initium quoddam novi motus; exque eo, cum magis corpus incaluit, sequatur etiam remissio. In his frictio quoque ex oleo & sale salubris videtur.

At, si diu frigus est, & torpor, & jactatio corporis, non alienum est, in ipsa febre dare mulsi tres aut quatuor cyathos, vel cum cibo vinum bene dilutum. Intenditur enim sæpe ex eo febris; &

major ortus calor simul & priora mala tollit, & spem remissionis, inque ea curationis ostendit.

Neque hercule ista curatio nova est, qua nunc quidam traditos sibi ægros, qui sub cautioribus medicis trahebantur, interdum contrariis remediis sanant. Siquidem apud antiquos quoque ante Herophilum & Erasistratum, maximeque post Hippocratem fuit Petron quidam, qui febricitantem hominem, ubi acceperat, multis vestimentis operiebat, ut simul calorem ingentem, sitimque excitaret. Deinde, ubi paulum remitti cœperat febris, aquam frigidam potui dabat; ac, si moverat sudorem, explicuisse se ægrum judicabat: si non moverat, plus etiam aquæ frigidæ ingerebat, & tum vomere cogebat. Si alterutro modo febre liberaverat, protinus suillam assam, & vinum homini dabat. Si non liberaverat, decoquebat aquam sale adjecto, eamque bibere cogebat, ut movendo ventrem purgaret.

Et intra hæc omnis ejus medicina erat. Eaque non minus grata fuit his, quos Hippocratis successores non refecerant, quam nunc est his, quos Herophili vel Erasistrati æmuli diu tractos non expedierunt. Neque ideo tamen non est temeraria ista medicina, quia plures, si protinus a principiis excepit, interemit. Sed, cum eadem omnibus convenire non possint, fere, quos ratio non restituit, temeritas adjuvat. Ideoque ejusmodi medici melius alienos ægros, quam suos, nutriunt. Sed est circumspici quoque hominis, & novare interdum, & augere morbum, & febres accendere; quia cura-

tionem, ubi id, quod est, non recipit, potest recipere id, quod futurum est.

C A P U T X.

Remedia in febribus ad capitis dolorem, & præcordiorum inflammationem, & ariditatem & scabritiem linguæ.

CONSIDERANDUM etiam est, febresne solæ sint, an alia his quoque mala accedant; id est, num caput doleat, num lingua aspera, num præcordia intenta sint. Si capitis dolores sunt, rosam cum aceto miscere oportet, & in id ingerere: deinde habere duo pittacia, quæ latitudinem frontis, longitudinemque æquent: ex his invicem alterum in aceto & rosa habere, alterum in fronte; aut intinctam iisdem lanam succidam imponere. Si acetum offendit, pura rosa utendum est. Si rosa ipsa lædit, oleo acerbo. Si ista parum juvant, teri potest vel iris arida, vel nuces amaræ, vel quælibet herba ex refrigerantibus. Quorum quidlibet ex aceto impositum, dolorem minuit; sed magis aliud in alio. Juvat etiam panis cum papavere injectus, vel cum rosa, cerussa, spumave argenti. Olfacere quoque vel serpillum, vel anethum, non alienum est.

At, si in præcordiis inflammatio & dolor est, primo superimponenda sunt cataplasmata reprimentia; ne, si calidiora fuerint, plus eo materiæ concurrat. Deinde, ubi prima inflammatio se remittit, tunc demum ad calida & humida veniendum

est, ut ea, quæ remanserint, discutiant. Notæ vero inflammationis sunt quatuor, rubor, & tumor, cum calore, & dolore. Quo magis erravit Erasistratus, qui febrem nullam sine hac esse dixit.

Ergo, si sine inflammatione dolor est, nihil imponendum est. hunc enim statim ipsa febris solvit. At, si neque inflammatio, neque febris, sed tantum præcordiorum dolor est; protinus calidis & siccis fomentis uti licet. Si vero lingua sicca est & scabra, detergenda primum penicillo est ex aqua calida: deinde ungenda mixtis inter se rosa & melle. Mel purgat, rosa reprimat, simulque siccescere non finit. At si scabra non est, sed arida, ubi penicillo detergenda est, ungi rosa debet, cui ceræ sit paulum adjectum.

C A P U T X I.

Remedia contra frigus, quod febrem præcedit.

SOLET etiam ante febres esse frigus; idque vel molestissimum morbi genus est. Ubi id expectatur, omni potione prohibendus æger est: hæc enim paulo ante data, multum malo adjicit. Item maturius veste multa tegendus est. Admovenda partibus his, pro quibus metuimus, sicca & calida fomenta: sic, ut ne statim vehementissimi calores incipiant, sed paulatim crescant. Perfricandæ quoque eæ partes manibus unctis ex vetere oleo sunt, eique adjiciendum aliquid ex calefacientibus. Contentique medici quidam una frictione, etiam ex

quolibet oleo, sunt. In harum febrium remissionibus nonnulli tres aut quatuor sorbitionis cyathos, etiamnum ultra manente febre, dant: deinde, ea bene finita, reficiunt stomachum cibo frigido & leni. Ego tum hoc puto tentandum, cum parum cibus, semel & post febrem datus, prodest.

Sed curiose perspiciendum est, ne tempus remissionis decipiat. Sæpe enim in hoc quoque genere valetudinis jam minui febris videtur, & rursus intenditur. Itaque ei remissioni credendum est, quæ etiam immoratur, & jactationem, foetoremque quendam oris, quem ὀζῆν Græci vocant, minuit. Illud satis convenit, si quotidie pares accessiones sunt, quotidie parvum cibum dandum: si impares, post graviolem, cibum; post leviolem, aquam mulsam.

C A P U T XII.

Curatio horroris in febribus.

HORROR autem eas fere febres antecedit, quæ certum habent circuitum, & ex toto remittuntur; ideoque tutissimæ sunt, maximeque curationes admittunt. Nam ubi incerta tempora sunt, neque alvi ductio, neque balneum, neque vinum, neque medicamentum aliud recte datur. Incertum est enim, quando febris ventura sit. ita fieri potest, ut, si subito venerit, summa in eo perniciēs sit, quod auxilii causa fuit inventum. Nihilque aliud fieri potest, quam ut primis diebus bene abstinenceatur

æger : deinde, sub decessu febris ejus, quæ gravissima est, cibum sumat.

At ubi certus circuitus est, facilius omnia illa tentantur; quia facilius proponere nobis & accessionum & decessionum vices possumus. In his autem, cum veteraverunt, utilis fames non est. Primis tantummodo diebus ea pugnandum est: deinde dividenda curatio est, & ante horror, tum febris discutienda. Igitur cum primum aliquis inhorruit, & ex horrore incaluit, dare ei oportet potui tepidam aquam subsalsam, & vomere eum cogere: nam fere talis horror ab his oritur, quæ biliosa in stomacho resederunt. Idem faciendum est, si proximo quoque circuitu æque accessit: sæpe enim sic discutitur. Jamque, quod genus febris sit, scire licet.

Itaque sub expectatione proximæ accessionis, quæ instare tertia potest, deducendus in balneum est; dandaque opera est, ut per tempus horroris in folio sit. Si ibi quoque senserit, nihilominus idem sub expectatione accessionis quartæ faciat: siquidem eo quoque modo sæpe is discutitur. Si nec balneum quidem profuit, ante accessionem alium edat, aut bibat calidam aquam cum pipere: siquidem ea quoque assumpta calorem movent, qui horrorem non admittit. Deinde eo modo, quo in frigore præceptum est, antequam inhorrescere possit, operiatur. fomentisque protinus calidioribus totum corpus circumdare convenit, maximeque involutis extinctis testis & titionibus.

Si nihilominus horror perruperit, multo oleo

calefacto inter ipsa vestimenta perfundatur; cui æque ex calefacientibus aliquid sit adjectum: adhibeturque frictio, quantam is sustinere poterit, maximeque in manibus & pedibus: & spiritum ipse contineat. Neque desistendum est, etiamsi horror est. sæpe enim pertinacia juvantis malum corporis vincit.

Si quid evomuit, danda aqua tepida, iterumque vomere cogendus est; utendumque eisdem est, donec horror finiatur. Sed præter hæc ducenda alvus est, si tardius horror quiescet: siquidem id quoque exonerato corpore prodest. Ultima post hæc auxilia sunt, gestatio & ambulatio. Cibus autem in ejusmodi morbis maxime dandus est, qui mollem alvum præstet; caro glutinosa; vinum, cum dabitur, austerum.

C A P U T XIII.

Curatio quotidiana febris

HÆC ad omnes circuitus febrium pertinent: discernendæ tamen singulæ sunt, sicut rationem habent dissimilem. Si quotidiana est, triduo primo magnopere abstinere oportet; tum cibus, altero quoque die uti. Si res inveteraverit, post febrem experiri balneum, & vinum; magisque si, horrore sublato, hæc superest.

CAPUT XIV.

Curatio tertianæ febris.

SI tertiana vero, quæ ex toto intermittit, aut quartana est; mediis diebus, & ambulationibus uti oportet, aliisque exercitationibus, & unctionibus. Quidam ex antiquioribus medicis Cleophrantus, in hoc genere morborum, multo ante accessionem, caput ægri multa calida aqua perfundebat, deinde vinum dabat. Quod, quamvis pleraque ejus viri præcepta secutus est Asclepiades, recte tamen præteriiit: est enim anceps.

Ipse, si tertiana febris est, tertio die post accessionem dicit alvum duci oportere: quinto, post horrorem vomitum elicere; deinde post febrem, sicut illi mos erat, adhuc calidis dare cibum & vinum: sexto die, in lectulo detineri: sic enim fore, ne septimo die febris accedat. Id sæpe fieri posse, verisimile est. Tutius tamen est, hoc ipso ordine tria remedia, vomitus, alvi ductionis, vini potus, per triduum, id est, die tertio, & quinto, & septimo tentare: nec vinum, nisi post accessionem, die septimo bibere.

Si vero primis diebus discussus morbus non est, inciditque in vetustatem, quo die febris expectabitur, in lectulo se contineat; post febrem perfriquetur: tum, cibo assumpto, bibat aquam; postero die, quo cibo vacat, & ab exercitatione unctioneque, aqua tantum contentus, conquiescat. Et id

quidem optimum est. Si vero imbecillitas urgebit, & post febrem vinum, & medio die paulum cibi debebit assumere.

CAPUT XV.

Curatio quartanæ febris.

EADEM in quartana facienda sunt. Sed cum hæc tarde admodum finiatur, nisi primis diebus discussa est, diligentius ab initio præcipiendum est, quid in ea debeat fieri. Igitur, si cui cum horrore febris accessit, eaque desiit, eodem die & postero tertioque continere se debet, & aquam tantummodo calidam primo die post febrem sumere; biduo proximo, quantum fieri potest, ne hanc quidem: quarto die, si cum horrore febris revertitur, vomere, sicut ante præceptum est: deinde post febrem, modicum cibum sumere, vini quadrantem. Postero tertioque die abstinere, aqua tantummodo calida, si sitis est, assumpta. Septimo die balneo frigus prævenire, abstinere, continere se debet, & aqua tantummodo calida, si sitis est, uti: ac tum ita nono die balneo frigus prævenire, &, si febris redierit, ducere alvum; ubi ex eo corpus conquieverit, inunctione vehementer perfricari, eodem modo sumere cibum & vinum, biduo proximo se abstinere, frictione servata. Decimo tertio die rursus balneum experiri; &, si postea febris accessit, æque perfricari, vinum copiosius bibere. Ac sic proximum est, ut quies tot dierum, & abstinencia cum ceteris, quæ præcipiuntur, febrem tollant.

Si vero nihilominus remanet, aliud ex toto sequendum est curationis genus; idque agendum, ut, quod diu sustinendum est, corpus facile sustineat. Quo minus etiam curatio probari Heraclidis Tarentini debet, qui primis diebus ducendam alvum, deinde abstinendum usque in septimum diem dixit. Quod ut sustinere aliquis possit, tamen etiam febre liberatus vix refectioni valebit. adeo, si febris sæpius accesserit, concidet. Igitur, si tertio decimo die morbus remanebit, balneum neque ante febrem, neque post eam tentandum erit, nisi interdum jam horrore discusso. Horror ipse per eadem, quæ supra præscripta sunt, expugnandus. Deinde post febrem oportebit ungi, & vehementer perfricari; cibum & validum, & fortiter assumere; vino uti, quantum libebit: postero die, cum fatis quieverit, ambulare, exerceri, ungi, perfricari fortiter; cibum accipere sine vino: tertio die abstinere.

Quo die vero febrem expectabit, ante surgere, & exerceri, dareque operam oportet, ut in ipsam exercitationem tempus febris incurrat: sic enim sæpe illa discutitur. At, si in opere occupavit, tum demum se recipere. In ejusmodi valetudine medicamenta sunt, oleum, frictio, exercitatio, cibum, vinum. Si venter adstrictus est, solvendus est.

Sed hæc facile validiores faciunt. Si imbecillitas occupavit, pro exercitatione gestatio est. Si ne hanc quidem sustinet, adhibenda tamen frictio est. Si hæc quoque vehemens onerat, intra quietem, & unctionem, & cibum sistendum est; dandaque opera est, ne qua cruditas in quotidianam id ma-

lum vertat. Nam quartana neminem jugulat: sed, si ex ea facta quotidiana est, in malis æger est; quod tamen, nisi culpa vel ægri vel curantis, nunquam fit.

CAPUT XVI.

Curatio duarum quartanarum.

AT, si duæ quartanæ sunt, neque hæ, quas proposui, exercitationes adhiberi possunt: aut ex toto quiescere opus est, aut, si id difficile est, leviter ambulare, hinc considerare, diligenter involutis pedibus & capite. Quoties febris accessit & desit, cibum modicum sumere, & vinum; reliquo tempore, nisi imbecillitas urget, abstinere. Aut, si duæ febres pæne junguntur, post utramque cibum sumere: deinde vacuo tempore, & moveri aliquid, & post unctionem cibo uti. Cum vero vetus quartana raro, nisi vere, solvatur; utique eo tempore attendendum est, ne quid fiat, quod valetudinem impediat. Prodestque in vetere quartana, mutare subinde victus genus, a vino ad aquam, ab aqua ad vinum, a lenibus cibus ad acres, ab acris ad lenes transire: esse radicem, deinde vomere: jureve pulli gallinacei ventrem resolvere: oleum ad frictiones adjicere, calefacientia ante accessionem sorbere, vel aceti cyathos duos, vel unum sinapis, cum tribus Græci vini salsi; vel mixta paribus portionibus, & in aqua diluta, piper, castoreum, laser, myrrham. Per hæc enim similiaque corpus agitandum est, ut moveatur ex eo statu, quo detinetur.

Si febris quievit, diu meminisse ejus diei convenit: eoque vitare frigus, calorem, cruditatem, lassitudinem. Facile enim revertitur, nisi a sano quoque aliquamdiu timetur.

C A P U T XVII.

Curatio quotidianæ febris, quæ ex quartana facta sit.

AT, si ex quartana, quotidiana facta est: cum id vitio inciderit, per biduum abstinere oportet, vespere frictione uti, & aquam tantummodo potui dare; tertio die sæpe fit, ne febris accedat. Sed siue fuit, siue non fuit, cibus post accessionis tempus est dandus: & si manet, per biduum abstinentia, quanta maxima imperari corpori potest, & fricatione quotidie utendum est.

C A P U T XVIII.

De tribus insaniæ generibus: & primo de ejus curatione, quæ a Græcis φρενίτις dicitur.

ET febrium quidem ratio exposita est. Super sunt vero alii corporis affectus, qui huic superveniunt. ex quibus eos, qui certis partibus assignari non possunt, protinus jungam. Incipiam ab insania, primamque hujus ipsius partem aggrediar, quæ & acuta, & in febre est. Græci φρενίτιν appellant.

Illud ante omnia scire oportet, interdum in ac-

cessione ægros desipere, & loqui aliena. Quod non quidem leve est; neque incidere potest, nisi in febre vehementi, non tamen æque pestiferum est. nam plerumque breve esse consuevit, levatoque accessionis impetu, protinus mens redit. Neque id genus morbi remedium aliud desiderat, quam quod in curanda febre præceptum est.

Phrenitis vero tum demum est, cum continua dementia esse incipit; aut cum æger, quamvis adhuc sapiat, tamen quasdam vanas imagines accipit: perfecta est, ubi mens illis imaginibus addicta est. Ejus autem plura genera sunt: siquidem ex phreneticis alii hilares, alii tristes sunt: alii facilius continentur, & intra verba desipiunt; alii confurgunt, & violenter quædam manu faciunt: atque ex his ipsis, alii nihil nisi impetu peccant; alii etiam artes adhibent, summamque speciem sanitatis in captandis majorum operum occasionibus præbent; sed exitu deprehenduntur.

Ex his autem eos, qui intra verba desipiunt, aut leviter etiam manu peccant, onerare asperioribus coercionibus supervacuum est. Eos vero, qui violentius se gerunt, vincire convenit, ne vel sibi vel alteri noceant. Neque credendum est, si vinctus aliquis, dum levare vinculis cupit, sanum jam se fingat; quamvis prudenter & miserabiliter loquatur, quoniam is dolus insanientis est.

Fere vero antiqui tales ægros in tenebris habebant, eo quod eis contrarium esset, exterreri; & ad quietem animi tenebras ipsas conferre aliquid judicabant. At Asclepiades, tanquam tenebris ipsis

terrentibus, in lumine habendos esse dixit. Neutrum tamen perpetuum est. Alium enim lux, alium tenebræ magis turbant. reperiunturque, in quibus nullum discrimen deprehendi, vel hoc, vel illo modo possit. Optimum itaque est, utrumque experiri, & habere eum, qui tenebras horret, in luce; eum, qui lucem, in tenebris. At ubi nullum tale discrimen est, æger, si vires habet, loco lucido; si non habet, obscuro continendus est.

Remedia vero adhibere, ubi maxime furor urget, supervacuum est: simul enim febris quoque increscit. Itaque tum nihil nisi continendus æger est. Ubi vero res patitur, festinanter subveniendum est. Asclepiades perinde esse dixit, his sanguinem mitti, ac si trucidentur: rationem hanc secutus, quod neque infania esset, nisi febre intenta; neque sanguis, nisi in remissione ejus, recte mitteretur. Ipse in his somnum multa frictione quæsit. Sed cum & intentio febris somnum impediat, & frictio non, nisi in remissione ejus, utilis sit: hoc quoque auxilium debuit præterire. Quid igitur est? Multa in præcipiti periculo recte fiunt, alias omittenda. Et continua quoque febris habet tempora, quibus, etsi non remittit, non tamen crescit. Estque hoc, ut non optimum, sic satis tamen secundum remediis tempus. Quod si vires ægri patiuntur, sanguis quoque mitti debet.

Nec minus deliberari potest, an alvus ducenda sit. Tum, interposito die, convenit caput ad cutem tondere: deinde aqua fovere, in qua verbenæ aliquæ decoctæ sint, vel ex reprimementibus: aut prius

fovere, deinde tondere, & iterum fovere: ac novissime rosa caput naresque implere, offerre etiam naribus rutam, ex aceto contritam, & movere sternutamenta medicamentis in id efficacibus. Quæ tamen facienda sunt in his, quibus vires non desunt. Si vero imbecillitas est, rosa tantum caput, adjecto ferpyllo, similive aliquo, madefaciendum est. Utiles etiam in quibuscunque viribus herbæ duæ sunt, solanum & muralis, si simul ex utraque, succo expresso, caput impleatur. Cum se febris remiserit, frictione utendum est: parcius tamen in his, qui nimis hilares, quam in his, qui nimis tristes sunt.

Adversus omnium autem sic insanientium animos gerere se pro cuiusque natura necessarium est. Quorundam enim vani metus levandi sunt: sicut in homine prædivite famem timente incidit, cui subinde falsæ hereditates nuntiabantur. Quorundam audacia coercenda est: sicut in his fit, in quibus continendis plagæ quoque adhibentur. Quorundam etiam intempestivus risus objurgatione & minis prohibendus est. Quorundam discutiendæ tristes cogitationes: ad quod symphonix, & cymbala, strepitusque proficiunt. Sæpius tamen assentendum, quam repugnandum est: paulatimque, & non evidenter, ab his, quæ stulte dicuntur, ad meliora mens ejus abducenda est. Interdum etiam elicienda ipsius intentio: ut fit in hominibus studiosis literarum, quibus liber legitur, aut recte, si delectantur, aut perperam, si id ipsum eos offendit. Emenando enim convertere animum incipiunt. Quin

etiam recitare , si qua meminerunt , cogendi sunt. Ad cibum quoque quosdam non desiderantes reduxerunt hi , qui inter epulantes eos collocaverunt.

Om nibus vero sic affectis somnus & difficilis , & præcipue necessarius est. sub hoc enim plerique fanescunt. Prodest ad id , atque etiam ad mentem ipsam componendam , crocinum unguentum cum irino in caput datum. Si nihilominus vigilant , quidam somnum moliantur potui dando aquam , in qua papaver aut hyoscyamus decocta sit : alii mandragoræ mala pulvino subji ciunt : alii vel amomum , vel fycamini lacrimam fronti inducunt. Hoc nomen apud Medicos reperio. Sed cur Græci morum *συνόμιον* appellant , cum mori nulla lacrima sit ? Sic vero significatur lacrima arboris in Ægypto nascentis , quam ibi *συνόμορον* appellant. Plurimi , decoctis papaveris corticibus , ex ea aqua subinde spongia os & caput foveant.

Asclepiades ea supervacua esse dixit , quoniam in lethargum sæpe converterent. Præcepit autem , ut primo die , a cibo , potione , somno abstineretur : vespere ei daretur potui aqua : tum frictio ad moveretur lenis , ita ut ne manum quidem , qui fricaret , vehementer imprimeret : postero deinde die , iisdem omnibus factis , vespere ei daretur sorbitio & aqua , rursusque frictio adhiberetur. Per hanc enim nos consecuturos , ut somnus accedat. Id interdum fit , & quidem adeo , ut , illo confitente , nimia fricatio etiam lethargi periculum afferat. Sed si sic somnus non accessit , tum demum illis medicamentis arcessendus est : habita scilicet eadem mo-

deratione, quæ hic quoque necessaria est; ne, quem obdormire volumus, excitare postea non possimus. Confert etiam aliquid ad somnum silanus juxta cadens; vel gestatio post cibum, & noctu; maximeque lecti suspensi motus.

Neque alienum est, si neque sanguis ante missus est, neque mens constat, neque somnus accedit, occipitio inciso cucurbitulam admove: quæ, quia levat morbum, potest etiam somnum facere. Moderatio autem in cibo quoque adhibenda est: nam neque æger implendus, ne insaniat; neque jejuno utique vexandus est, ne imbecillitate in cardiacum incidat. Opus est autem cibo infirmo, maximeque forbitione, & potione aquæ mulsæ, cujus ternos cyathos bis hieme, quater æstate dedisse satis est.

Alterum genus infaniæ est, quod spatium longius recipit, quia fere sine febre incipit, leves deinde febriculas excitat: & consistit in tristitia, quam videtur bilis atra contrahere. In hac utilis detractio sanguinis est. Si quid hanc prohibet, prima est abstinentia: secunda, per album veratrum vomitumque purgatio: post utrumlibet, adhibenda bis die frictio est. Si magis valet, frequens etiam exercitatio; in jejuno vomitus; cibus, sine vino, dandus ex media materia est. Quam quoties posuero, scire licet, etiam ex infirmissima dari posse; dum ne ea sola quis utatur: valentissima tantummodo esse removenda. Præter hæc, servanda alvus est quam tenerrima: removendi terrores, & potius bona spes afferenda: quærenda delectatio ex fabu-

lis ludisque, quibus maxime capi sanus assueverat: laudanda, si qua sunt, ipsius opera, & ante oculos ejus ponenda: leviter objurganda vana tristitia: subinde admonendus, in his ipsis rebus, quæ sollicitant, cûr non potius lætitiæ, quam sollicitudinis causa sit. Si febris quoque accessit, sicut aliæ febres curanda est.

Tertium infantiæ genus est ex his longissimum, adeo ut vitam ipsam non impediat: quod robusti corporis esse consuevit. Hujus autem ipsius species duæ sunt. Nam quidam imaginibus, non mente falluntur; qualem infanientem Ajacem vel Orestem poetarum fabulæ ferunt: quidam animo desipiunt. Si imagines fallunt, ante omnia videndum est, tristes, an hilares sint. In tristitia, nigrum veratrum dejectionis causa, in hilaritate, album, ad vomitum excitandum, dari debet. Idque, si in potione non accepit, pani adjiciendum est, quo facilius fallat. Nam, si bene se purgaverit, ex magna parte morbum levabit. Ergo etiam, si semel datum veratrum parum profecerit, interposito tempore iterum dari debet. Neque ignorare oportet, leviolem esse morbum cum risu, quam serio, infanientium. Illud quoque perpetuum est in omnibus morbis, ubi ab inferiore parte purgandus aliquis est, ventrem ejus ante solvendum esse: ubi a superiore, comprimendum.

Si vero consilium infanientem fallit, tormentis quibusdam optime curatur. Ubi perperam aliquid dixit, aut fecit; fame, vinculis, plagis coercendus est. Cogendus est & attendere, & ediscere aliquid,

& meminisse. Sic enim fiet, ut paulatim metu cogatur considerare, quid faciat. Subito etiam terri, & expavescere, in hoc morbo prodest; & ferre, quidquid animum vehementer perturbat. Potest enim quædam fieri mutatio, cum ab eo statu mens, in quo fuerat, abducta est. Interest etiam, si ipse sine causa subinde rideat, an moestus demissusque sit. Nam demens hilaritas terroribus his, de quibus supra dixi, melius curatur. Si nimia tristitia est, prodest lenis, sed multa bis die frictio: item super caput aqua frigida infusa, demissumque corpus in aquam & oleum.

Illa communia sunt: insanientes vehementer exerceri deberi; multa frictione uti; neque pinguem carnem, neque vinum assumere; cibis uti post purgationem, ex media materia, quam levissimis; non oportere esse vel solos, vel inter ignotos, vel inter eos, quos aut contemnant, aut negligant; mutare debere regiones, &, si mens redit, annua peregrinatione esse iactandos.

Raro, sed aliquando tamen, ex metu delirium nascitur. Quod genus insanientium, specie, similique victus genere curandum est: præterquam quod in hoc insanientiæ genere solo recte vinum datur.

C A P U T XIX.

De cardiacis.

HUIC morbo præcipue contrarium est id genus, quod καρδιακὸν a Græcis nominatur, quamvis
Corn. Celsus.

sæpe ad eum phrenetici transeunt: siquidem mens in illis labat, in hoc constat. Id autem nihil aliud est, quam nimia imbecillitas corporis; quod, stomacho languente, immodico sudore digeritur. Licetque protinus scire id esse, ubi venarum exigui imbecillique pulsus sunt; sudor autem supra consuetudinem, & modo, & tempore, ex toto thorace, & cervicibus, atque etiam capite prorumpit, pedibus tantummodo & cruribus siccioribus, atque frigentibus.

Acuti id morbi genus est. Curatio prima est, supra præcordia imponere, quæ reprimant, cataplasmata: secunda, sudorem prohibere. Id præstat acerbum oleum, vel rosa, vel melinum, aut myrteum. Quorum aliquo corpus leniter perungendum; ceratumque ex aliquo horum tum imponendum est.

Si sudor vincit, delinendus homo est vel gypso, vel argenti spuma, vel cimolia creta, vel etiam subinde horum pulvere respergendus. Idem præstat pulvis ex contritis aridæ myrti vel rubi foliis, aut ex austeri & boni vini arida fece. Pluraque similia sunt, quæ si defunt, satis utilis est quilibet ex via pulvis injectus. Super hæc vero, quo minus corpus insudet, levi veste debet esse contactus, loco non calido, fenestris patentibus, sic ut perflatus quoque aliquis accedat.

Tertium auxilium est, imbecillitati jacentis cibo vinoque succurrere. Cibus non multus quidem, sed sæpe tamen nocte ac die dandus est, ut nutriat, neque oneret. Is esse debet ex infirmissima mate-

ria, & stomacho aptus. Nisi autem necesse est, ad vinum festinare non oportet. Si verendum est, ne deficiat, tum & intrita ex hoc, & hoc ipsum austerum quidem, sed tamen tenue, meracum, egelidum subinde & liberaliter dandum est; adjecta polenta, si modo is æger parum cibi assumit. Idque vinum esse debet, neque nullarum virium, neque ingentium: recteque tota die ac nocte, vel tres heminas æger bibet; si vastius corpus est, plus etiam: si cibum non accipit, perunctum ante perfundere aqua frigida convenit, & tum dare.

Quod si stomachus resolutus parum continet, & ante cibum, & post eum sponte vomere oportet; rursusque post vomitum cibum sumere. Si ne id quidem manserit, sorbere vini cyathum, interpositaque hora, sumere alterum. Si id quoque stomachus reddiderit, totum corpus bulbis contritis superillinendum est: qui, ubi inaruerunt, efficiunt, ut vinum in stomacho contineatur, exque eo toti corpori calor venisque vis redeat.

Ultimum auxilium est, in alvum ptisanæ vel alicæ cremorem ex inferioribus partibus indere, siquidem id quoque vires tuetur. Neque alienum est, naribus quoque æstuantis admoveere, quod reficiat; ut est rosa & vinum: & si qua in extremis partibus frigent, unctis & calidis manibus fovere. Per quæ si consequi potuimus, ut & sudoris impetus minuatur, & vita prorogetur, incipit jam tempus ipsum esse præsidio. Ubi in tuto esse videtur, verendum tamen est, ne ad eandem imbecillitatem cito recidat. Itaque, vino tantum remoto,

quotidie validiorem cibum debet assumere, donec satis virium corpori redeat.

CAPUT XX.

De lethargicis.

ALTER quoque morbus est, aliter phrenetico contrarius. In illo difficilior somnus, prompta ad omnem audaciam mens est: at in hoc marcor, & inexpugnabilis pæne dormiendi necessitas. λήθαργον Græci nominant. Atque id quoque genus acutum est, &, nisi succurritur, celeriter jugulat.

Hos ægros quidam subinde excitare nituntur, admotis his, per quæ siernutamenta evocantur, & his, quæ odore foedo movent, qualis est pix cruda, lana succida, piper, veratrum, castoreum, acetum, allium, cepa. Juxta etiam galbanum incendunt, aut pilos, aut cornu cervinum: si id non est, quodlibet aliud. Hæc enim cum comburuntur, odorem foedum movent.

Tharrias vero quidam, accessionis esse id malum, dixit, levarique, cum ea decessit. Itaque eos, qui subinde excitant, sine usu male habere. Interest autem, in decessione expergiscatur æger, an, cum febris non levetur, aut, levata quoque ea, somnus urgeat. Nam si expergiscitur, adhibere ei, ut sopitò, supervacuum est. neque enim vigilando melior fit; sed per se, si melior est, vigilat. Si vero continens ei somnus est, utique excitandus est; sed his temporibus, quibus febris levissima est, ut

excernat aliquid, & sumat. Excitat autem validissime repente aqua frigida superinfusa. Post remissionem itaque, perunctum oleo multo corpus, tribus aut quatuor amphoris totum per caput perfundendum est. Sed hoc utemur, si æqualis ægro spiritus erit, si mollia præcordia. Sin aliter hæc erunt, ea potiora, quæ supra comprehensa sunt. Et, quod ad somnum quidem pertinet, commodissima hæc ratio est.

Medendi autem causa, caput radendum; deinde postea fovendum est aqua, in qua laurus, aut ruta decocta sit. Altero die imponendum castoreum, aut ruta ex aceto contrita, aut lauri baccæ, aut hedera cum rosa & aceto. Præcipueque proficit, & ad excitandum hominem, naribus admotum, & ad morbum ipsum depellendum, capiti frontive impositum sinapi. Gestatio etiam in hoc morbo prodest: maximeque opportune cibus datus, id est, in remissione, quanta maxima inveniri poterit. Aptissima autem sorbitio est, donec morbus decrescere incipiat, sic ut, si quotidie gravis accessio est, hæc quotidie detur: si alternis, post graviolem, sorbitio, post leviolem, mulsa aqua. Vinum quoque cum tempestivo cibo datum non mediocriter adjuvat.

Quod si post longas febres ejusmodi torpor corpori accessit, cetera eadem servanda sunt. Ante accessionem autem, tribus quatuorve horis castoreum, si venter adstrictus est, cum scammonia mixtum, si non est, per se ipsum cum aqua dandum est. Si præcordia mollia sunt, cibus utendum est

plenioribus: si dura, in iisdem sorbitionibus sub-
stendum; imponendumque est præcordiis, quod
simul & reprimat & emolliat.

CAPUT XXI.

De hydropicis.

SED hic quidem acutus est morbus. Longus vero
fieri potest eorum, quos aqua inter cutem male
habet, nisi primis diebus succurritur; ὕδρωπα Græ-
ci vocant. Atque ejus tres species sunt. Nam mo-
do, ventre vehementer intento, creber intus, ex
motu spiritus, sonus est: modo corpus inæquale
est, tumoribus aliter aliterque per totum id orien-
tibus: modo intus in uterum aqua contrahitur;
&, moto corpore, ita movetur, ut impetus ejus
conspici possit. Primum τυμπανίτην: secundum, λευ-
κοφλεγματίαν, vel ὑπὸ σάρκα: tertium, ἀσκήτην Græci
nominant. Communis tamen omnium est humoris
nimia abundantia; ob quam ne ulcera quidem in
his ægris facile sanescunt. Sæpe vero hoc malum
per se incipit: sæpe alteri vetusto morbo, maxi-
meque quartanæ, supervenit.

Facilius in servis, quam in liberis tollitur. quia,
cum desideret famem, sitim, mille alia tædia, lon-
gamque patientiam, promptius iis succurritur, qui
facile coguntur, quam quibus inutilis libertas est.
Sed ne hi quidem, qui sub alio sunt, si ex toto sibi
temperare non possunt, ad salutem perducuntur.
Ideoque non ignobilis medicus, Chrysippi discipu-

lus, apud Antigonum regem, amicum quendam ejus, notæ intemperantiæ, mediocriter eo morbo implicitum, negavit posse sanari. Cumque alter medicus Epirotes Philippus se sanaturum polliceretur; respondit, illum ad morbum ægri respicere; se, ad animum. Neque eum res fefellit. Ille enim, cum summa diligentia non medici tantummodo, sed etiam regis custodiretur, tamen malagmata sua devorando, bibendoque suam urinam, in exitium sese præcipitavit.

Inter initia tamen, non difficillima curatio est, si imperata sunt corpori, quies, sitis, inedia. At si malum inveteraverit, non sine magna molestia discutitur. Metrodorum tamen, Epicuri discipulum, referunt, cum hoc morbo tentaretur, neque æquo animo ferret necessariam sitim, ubi diu abstinuerat, solitum bibere, deinde evomere. Quod, si redditur, quidquid receptum est, multum tædio demit: si a stomacho retentum est, morbum auget. ideoque in quolibet tentandum non est.

Sed si febris quoque est, hæc in primis submovenda est per eas rationes, per quas huic succurri posse propositum est. Si sine febre æger est, tum demum ad ea veniendum est, quæ ipsi morbo mæderi solent. Atque hic quoque, quæcunque species est, si nondum nimis occupavit, iisdem auxiliis opus est. Multum ambulandum, currendum aliquando, & superiores maxime partes sic perfricandæ, ut calorem in cutem evocet: inter quæ, spiritum ipse contineat. Evocandus est sudor, non exercitatione tantummodo, sed etiam in arena calida,

vel laconico, vel clibano, similibusque aliis: maximeque utiles sunt naturales, & siccae sudationes, quales super Bajas habemus in myrteris. Balneum, atque omnis humor alienus est. Jejuno recte catapotia dantur, facta ex duabus absinthii, myrrhæ tertia parte.

Cibus esse debet ex media quidem materia, sed tamen generis durioris. Potio non ultra danda est, quam ut vitam sustineat: optimaque est, quæ urinam movet. Sed id ipsum moliri cibo, quam medicamento melius est. Si tamen res coget, ex his aliquid, quæ id præstent, erit decoquendum, eaque aqua potui danda. Videntur autem hanc facultatem habere, iris, nardum, crocum, cinnamomum, amomum, cassia, myrrha, balsamum, galbanum, ladanum, œnanthe, panaces, cardamomum, hebenus, cupressi semen, uva taminia, quam *σταφίδα ἀγρία* Græci nominant, abrotanum, rosæ folia, acorum, amaræ nuces, tragoriganum, styrax, costum, junci quadrati & rotundi semen; illud *κύπριον*, hoc *σχόινον* Græci vocant. quæ quoties posuero, non quæ hic nascuntur, sed, quæ inter aromata afferuntur, significabo. Primo tamen, quæ lenissima ex his sunt, id est, rosæ folia, vel nardi spica, tentanda sunt. Vinum quoque utile est austerum, sed quam tenuissimum.

Commodum est etiam, lino quotidie ventrem metiri, &, qua comprehendit alvum, notam imponere: postero quoque die videre, si plenius corpus sit, an extenuetur. id enim, quod tenuatur, medicinam sentit. Neque alienum est, metiri & po-

tionem ejus, & urinam. nam si plus humoris ex-
cernitur, quam assumitur, ita demum secundæ va-
letudinis spes est. Asclepiades in eo, qui ex quar-
tana in hydropa deciderat, se abstinencia bidui, &
frictione usum; tertio die, jam & febre, & aqua
liberato, cibum & vinum dedisse, memoriæ pro-
didit. Hactenus communiter de omni specie dici
potest: si vehementius malum est, diducenda ratio
curandi est.

Ergo, si inflatio, & ex ea dolor creber est, uti-
lis quotidianus, aut alterno quoque die post ci-
bum, vomitus est. Fomentis siccis calidisque uten-
dum est. Si per hæc dolor non finitur, necessariæ
sunt sine ferro cucurbitulæ. Si ne per has quidem
tormentum tollitur, incidenda cutis est, & tum
his utendum. Ultimum auxilium est, si cucurbitu-
læ nihil profuerunt, per alvum infundere copiose
aquam calidam, eamque recipere. Quin etiam quo-
tidie ter quaterve opus est uti frictione vehementi,
cum oleo & quibusdam calefacientibus. Sed in hac
frictione a ventre abstinendum est. Imponendum
vero in eum crebrius sinapi, donec cutem erodat;
ferramentisque candentibus pluribus locis venter
exulcerandus est, & servanda ulcera diutius. Utili-
ter etiam scilla cocta delinitur cutis. Sed diu post has
inflationes abstinendum est ab omnibus inflantibus.

At, si id vitium est, cui λευκοφλεγματία nomen
est, eas partes, quæ tument, subjicere soli oportet;
sed non nimium, ne febricula incidat: si is
vehementior est, caput velandum est, utendumque
frictione, madefactis tantum manibus aqua, cui sal

& nitrum & olei paulum fit adjectum; sic, ut aut pueriles aut muliebres manus adhibeantur, quo mollior earum tactus sit. Idque si vires patiuntur, ante meridiem, tota hora; post meridiem, semihora fieri oportet. Utilia sunt etiam cataplasmata, quæ reprimunt; maximeque, si corpora teneriora sunt. Incidendum quoque est super talum, quatuor fere digitis, ex parte interiore; qua per aliquot dies frequens humor feratur: atque ipsos tumores incidere altis plagis oportet: concutiendumque corpus est multa gestatione, atque, ubi inductæ vulneribus cicatrices sunt, adjiciendum & exercitationibus est & cibis, donec corpus ad pristinum habitum revertatur. Cibus valens esse debet, & glutinosus, maximeque caro. Vinum, si per stomachum licet, dulcius; sed ita, ut invicem biduo triduoque, modo aqua, modo id bibatur. Prodest etiam lactucæ marinæ, quæ grandis juxta mare nascitur, semen, cum aqua potui datum. Si valens est, qui id accipit, ei scilla cocta, sicut supra dixi, delinitur. Auctoresque multi sunt, inflatis vesicis pulsandos tumores esse.

Si vero id morbi genus est, quo in uterum multa aqua contrahitur, ambulare, sed magis modice oportet; malagma, quod digerat, impositum habere; idque ipsum superimposito triplici panno, fascia, non nimium tamen vehementer, adstringere, quod a Tharria profectum, servatum esse a pluribus video. Si jecur, aut lienem affectum esse, manifestum est, ficum pinguem contusam, adjecto melle, superponere. Si per talia auxilia venter non

ficcat, sed humor nihilominus abundat, celeriori via succurrere, ut is per ventrem ipsum emitatur. Neque ignoro, Erasistrato displicuisse hanc curandi viam; morbum enim hunc jocinoris putavit: ideoque non ita illum esse sanandum; frustra-que aquam emitti, quæ, vitiato illo, subinde nascatur. Sed primum, non hujus visceris unius hoc vitium est. Nam & splene affecto, & in totius corporis malo habitu fit. Deinde, ut inde cœperit, tamen aqua nisi emittitur, quæ contra naturam ibi substitit, & jocinori, & ceteris interioribus partibus nocet. Convenitque, corpus nihilominus esse curandum. Neque enim sanat emissus humor, sed medicinæ locum facit, quam intus inclusus impedit. Ac ne illud quidem in controversiam venit, quin non omnes in hoc morbo sic curari possint; sed juvenes robusti, qui vel ex toto carent febre, vel certe satis liberales intermissiones habent. Nam quorum stomachus corruptus est, quive ex atra bile huc deciderunt, quique malum corporis habitum habent, idonei huic curationi non sunt. Cibus autem, quo die primum humor emissus est, supervacuum est, nisi si vires desunt. Insequentibus diebus, & his vinum meracius quidem, sed non ita multum dari debet, paulatimque revocandus æger est ad exercitationes, frictiones, solem, sudationes, navigationes, & idoneos cibos, donec ex toto convalescat. Balneum rarum res amat, & frequentiore in jejuno vomitum. Si æstas est, in mari natare commodum est. Ubi convaluit aliquis, diu tamen alienus ei veneris usus est.

CAPUT XXII.

De tabe, & ejus speciebus & curationibus.

DIUTIUS sæpe & periculosius tabes eos male habet, quos invasit. Atque hujus quoque plures species sunt. Una est, qua corpus non alitur, &, naturaliter semper aliquibus decedentibus, nullis vero in eorum locum subeuntibus, summa macies oritur; &, nisi occurritur, tollit. ἀτροφίαν hanc Græci vocant. Ea duabus fere de causis incidere consuevit. Aut enim nimio timore aliquis minus, aut aviditate nimia plus, quam debet, assumit: ita vel, quod deest, infirmat; vel, quod superat, corrumpitur.

Altera species est, quam Græci καχεξίαν appellant: ubi malus corporis habitus est; ideoque omnia alimenta corrumpuntur. Quod fere fit, cum longo morbo vitata corpora, etiamsi illo vacant, refectiorem tamen non accipiunt; aut cum malis medicamentis corpus affectum est; aut, cum diu necessaria defuerunt; aut, cum inusitados & inutiles cibos aliquis assumit, aliquidve simile incidit. Huic, præter tabem, illud quoque nonnunquam accidere solet, ut per assiduas pustulas, aut ulcera, summa cutis exasperetur, vel aliquæ corporis partes intumescant.

Tertia est, longeque periculosissima species, quam Græci φθίσιν nominaverunt. Oritur fere a capite: inde in pulmonem destillat. Huic exulce-

ratio accedit, & febricula levis fit; quæ etiam, cum quievit, tamen & repetit. Fréquens tussis est, pus exscreatur; interdum cruentum aliquid. Quidquid exscreatum est, si in ignem impositum est, mali odoris est. Itaque, qui de morbo dubitant, hac nota utuntur.

Cum hæc genera tabis sint, animadvertere primum oportet, quid sit, in quo laboratur. Deinde, si tantummodo non ali corpus apparet, causam ejus attendere; &, si cibi minus aliquis, quam debet, assumit, adjicere: sed paulatim, ne si corpus infuetum subita multitudine oneraverit, concoctionem impediat. Si vero plus justo quis assumere solitus est, abstinere uno die; deinde ab exiguo cibo incipere; quotidie adjicere, donec ad justum modum perveniat. Præter hæc convenit ambulare locis quam maxime frigidis, sole vitato: per manus quoque exerceri. Si infirmior est, gestari, ungi, perfricari, si potest, maxime per se ipsum, sæpius eodem die, & ante cibum, & post eum, sic ut interdum oleo quædam adjiciantur calefacientia, donec infudet. Prodestque jejuno prehendere per multas partes cutem, & attrahere, ut relaxetur; aut, imposita resina, & abducta, subinde idem facere. Utile est etiam interdum balneum, sed post cibum exiguum. Atque in ipso folio recte cibi aliquid assumitur: aut si sine hoc frictio fuit, post eam protinus. Cibi vero esse debent ex his, qui facile concoquuntur, qui maxime alunt. Ergo vini quoque, sed austeri, necessarius usus; movenda urina.

At si malus corporis habitus est, primum abstinendum est; deinde alvus ducenda; tum paulatim cibi dandi, adjectis exercitationibus, unctionibus, frictionibus. Utilius his frequens balneum est, sed jejunis; etiam usque ad sudorem. Cibus vero opus est copiosis, variis, boni succi, quique etiam minus facile corrumpantur, vino austero. Si nihil reliqua proficiunt, sanguis mittendus est; sed paulatim, quotidieque pluribus diebus, cum eo, ut cetera quoque eodem modo ferventur.

Quod si mali plus est, & vera phthisis est, inter initia protinus occurrere necessarium est: neque enim facile is morbus, cum inveteraverit, evincitur. Opus est, si vires patiuntur, longa navigatione; cœli mutatione sic, ut densius, quam id est, ex quo discedit æger, petatur. Ideoque aptissime Alexandriam ex Italia itur. Fereque id posse inter principia corpus pati debet, cum hic morbus ætate firmissima maxime oriatur, id est, ab anno duodevigesimo ad annum quintum & trigesimum. Si id imbecillitas non finit, nave tamen non longe gestari commodissimum est. Si navigationem aliqua res prohibet, lectica, vel alio modo corpus movendum est: tum a negotiis abstinendum est, omnibusque rebus, quæ sollicitare animum possunt: somno indulgendum: cavendæ destillationes, ne, si quid cura levarit, exasperent; & ob id vitanda cruditas, simulque sol & frigus: os obtegendum, fauces velandæ, tussicula suis remediis finiendæ: &, quamdiu quidem febricula incurSAT, huic interdum abstinencia, interdum etiam tempestivis cibis

medendum: eoque tempore bibenda aqua. Lac quoque, quod in capitis doloribus, & in acutis febribus, & per eas facta nimia siti, ac si ve præcordia tument, si ve biliosa urina est, si ve sanguis fluxit, pro veneno est; in phthisi tamen, sicut in omnibus longis difficilibusque febriculis, recte dari potest.

Quod si febris aut nondum incurSAT, aut jam remisit, recurrendum est ad modicas exercitationes, maximeque ambulationes, item lenes frictiones. Balneum alienum est. Cibus esse debet primo acer, ut allium, porrum, idque ipsum ex aceto, vel ex eodem intubus, ocimum, lactuca: dein lenis, ut forbitio ex ptisana, vel ex alica, vel ex amylo, lacte adjecto. Idem oryza quoque, &, si nihil aliud est, far præstat. Tum invicem modo his cibus, modo illis utendum est: adjiciendaque quædam ex media materia, præcipueque vel ex aprugna cerebellum, vel pisciculus, & his similia. Farina etiam cum sevo ovillo caprinove mixta, deinde incocta, pro medicamento est. Vinum assumi debet lene austerum.

Haftenus non magna mole pugnatur. Si vehementior noxa est, ac neque febricula, neque tussis quiescit, tenuarique corpus apparet, validioribus auxiliis opus est. Exulcerandus est ferro candenti, uno loco sub mento, altero in gutture, duobus ad mammam utramque; item sub imis ossibus scapularum, quas ὀμοπλάτας Græci vocant, sic, ne fânescere ulcera sinamus, nisi tussi finita: cui per se quoque medendum esse, manifestum est. Tunc ter quaterque die vehementer extremæ partes perfri-

candæ: thorax levi manu pertractandus: post cibum intermittenda hōra, & perfricanda crura, brachiaque. Interpositis denis diebus, demittendus æger in solium est, in quo sit aqua calida & oleum. Ceteris diebus bibenda aqua: tum & vinum, si tussis non est, potui frigidum dandum: si vero est, egelidum. Utile est etiam in remissionibus quotidie cibos dari: frictiones gestationesque similiter adhiberi: itemque acria quarto, aut quinto die sumere, interdum herbam sanguinalem ex aceto, vel plantaginem esse. Medicamentum est etiam vel plantaginis succus per se, vel marrubium ex melle concoctum; ita ut illius cyathus forbeatur, hujus cochleare plenum paulatim delingatur; vel inter se mixta, & incocta resinæ terebinthinæ pars dimidia, butyri & mellis pars altera. Præcipua tamen ex his omnibus sunt victus, vehiculum, & navis, & sorbitio. Alvus cita utique vitanda est. Vomitus in hoc morbo si frequens est, perniciosus est, maximeque sanguinis. Qui meliusculus esse cœpit, adjicere debet exercitationes, frictiones, cibos: deinde ipse se, suppresso spiritu, perfricare; diu abstinere a vino, balneo, venere.

C A P U T XXIII.

De comitialis morbi curationibus.

INTER notissimos morbos est etiam is, qui comitialis, vel major nominatur. Homo subito concidit, ex ore spumæ moventur, deinde interposito

tempore ad se redit, & per se ipsum confurgit. Id genus sæpius viros, quam feminas, occupat; ac solet quidem etiam longum esse, usque ad mortis diem, & vitæ non periculofum. Interdum tamen cum recens est, hominem consumit; & sæpe eum, si remedia non sustulerunt, in pueris veneris, in puellis menstruorum initium tollit. Modo cum distentione membrorum aut nervorum prolabitur aliquis: modo sine illa.

Quidam hos quoque iisdem, quibus lethargicos, excitare conantur: quod admodum supervacuum est: &, quia ne lethargicus quidem his sanatur; &, quia, cum possit ille nunquam expergisci atque ita fame interire, hic ad se utique revertitur.

Ubi concidit aliquis, si nulla nervorum distentio accessit, utique sanguis mitti debet: si accessit, non utique mittendus est, nisi alia quoque hortantur. Necessarium autem est, ducere alvum, vel nigro veratro purgare, vel utrumque facere, si vires patiuntur: tunc caput tondere, oleoque & aceto perungere; cibum post diem tertium, simul cum transit hora, qua concidit, dare. Neque forbitiones autem his, aliique molles & faciles cibi, neque caro, minimeque suilla convenit; sed mediæ materiæ: nam & viribus opus est, & cruditates cavendæ sunt. Cum quibus fugere oportet solem, balneum, ignem, omniaque calefacientia: item, frigus, vinum, venerem, loci præcipitis conspectum, omniumque terrentium, vomitum, lassitudinem, sollicitudines, negotia omnia. Ubi tertio die cibus datus est, intermittere quartum, & invi-

cem alterum quemque; eademque hora cibi servata, donec quatuordecim dies transeant. Quos ubi morbus excessit, acuti vim deposuit: ac si manet, curandus jam ut longus est.

Quod si non, quo die primum id incidit, medicus accessit; sed is, qui cadere consuevit, ei traditus est; protinus eo genere victus habito, qui supra comprehensus est, expectandus est dies, quo prolabatur; utendumque tum vel sanguinis missione, vel ductione alvi, vel nigro veratro, sicut præceptum est. Insequentibus deinde diebus, per eos cibos, quos proposui, vitatis omnibus, quæ cavenda dixi, nutriendus est.

Si per hæc morbus finitus non fuerit, confugiendum erit ad album veratrum; ac ter quoque aut quater eo utendum, non ita multis interpositis diebus; sic tamen, ne iterum unquam sumat, nisi conciderit. Mediis autem diebus vires ejus erunt nutriendæ; quibusdam, præter ea, quæ supra scripta sunt, adjectis. Ubi mane experrectus est, corpus ejus leviter ex oleo vetere cum capite, excepto ventre, permulceatur: tum ambulatione quam maxime longa & recta utatur: post ambulationem loco tepido vehementer & diu, ac non minus ducenties, nisi infirmus erit, perfricetur: deinde per caput multa aqua frigida perfundatur: paulum cibi assumat; conquiescat; rursus ante noctem ambulatione utatur; iterum vehementer perfricetur, sic ut neque venter, neque caput contingatur: post hæc cœnet, interpositisque tribus aut quatuor diebus, uno aut altero acria assumat.

Si ne per hæc quidem fuerit liberatus, caput radatur; ungatur oleo vetere, adjecto aceto & nitro; perfundatur aqua falsa; bibat jejūnus ex aqua castoreum; nulla aqua, nisi decocta, potionis causa utatur. Quidam, jugulati gladiatoris calido sanguine epoto, tali morbo se liberarunt. Apud quos miserum auxilium tolerabile miserius malum fecit. Quod ad medicum vero pertinet, ultimum est, juxta talum, ex utroque crure paulum sanguinis mittere: occipitium incidere, & cucurbitulas admove: ferro candente in occipitio quoque & infra, qua summa vertebra cum capite committitur, adurere duobus locis, ut per ea perniciosus humor evadat. Quibus si finitum malum non fuerit, prope est, ut perpetuum sit. Ad levandum id, tantummodo utendum erit exercitatione multa, frictione, cibisque his, qui supra comprehensi sunt: præcipueque vitanda omnia, quæ ne fierent, excepimus.

C A P U T X X I V.

De regii morbi curatione.

ÆQUE notus est morbus, quem interdum arquatum, interdum regium nominant. Quem Hippocrates ait, si post septimum diem febricitante ægro supervenit, tutum esse, mollibus tantummodo præcordiis substantibus. Diocles ex toto, si post febrem oritur, etiam prodesse; si post hunc febris, occidere. Color autem eum morbum detegit, maxime oculorum, in quibus, quod album esse de-

bet, fit luteum. Soletque accedere & fitis, & dolor capitis, & frequens singultus, & præcordiorum dextra parte durities; &, ubi corporis vehemens motus est, spiritus difficultas, membrorumque resolutio: atque, ubi diutius manet morbus, totum corpus cum pallore quodam inalbescit.

Primo die abstinere ægrum oportet: secundo ducere alvum: tum, si febris est, eam victus genere discutere: si non est, scamnoneam potui dare, vel cum aqua betam albam contritam, vel cum aqua mulsa nuces amaras, absinthium, anisum, sic, ut pars hujus minima sit. Asclepiades aquam quoque falsam, & quidem per biduum, purgationis causa bibere cogebat, iis, quæ urinam movent, rejectis. Quidam, superioribus omiſſis, per hæc, & per eos cibos, qui extenuant, idem se consequi dicunt.

Ego utique, si satis virium est, validiora; si parum, imbecilliora auxilia præfero. Si purgatio fuit, post eam triduo primo modice cibum oportet assumere ex media materia, & vinum bibere Græcum falsum, ut resolutio ventris maneat: tum altero triduo validiores cibos, & carnis quoque aliquid esse, intraque aquam manere: deinde ad superius genus victus reverti, cum eo, ut magis fatietur; omisso Græco vino bibere nigrum austerum; atque ita per hæc variare, ut interdum acres quoque cibos interponat, interdum ad falsum vinum redeat. Per omne vero tempus utendum est exercitatione, frictione, &, si hiems est, balneo; si æstas, frigidis natationibus: lecto etiam, & conclavi cultiore, clauso loco, ut & ludis, lascivia,

per quæ mens exhilaretur : ob quæ regius morbus dictus videtur. Malagma quoque, quod digerat, super præcordia datum prodest; vel arida ibi ficus imposita, si jecur aut lienis affectus est.

C A P U T X X V.

De elephantiae curatione.

IGNOTUS autem pæne in Italia, frequentissimus in quibusdam regionibus is morbus est, quam *ἐλεφαντίασις* Græci vocant; isque longis annumeratur. Totum corpus afficitur ita, ut ossa quoque vitari dicantur. Summa pars corporis crebras maculas crebrosque tumores habet. Rubor earum paulatim in atrum colorem convertitur. Summa cutis inæqualiter crassa, tenuis, dura, mollisque, quasi squamis quibusdam exasperatur, corpus emacrescit, os, furæ, pedes intumescunt. Ubi vetus morbus est, digiti in manibus pedibusque sub tumore conduntur; febricula oritur, quæ facile tot malis obrutum hominem consumit.

Protinus ergo inter initia sanguis per biduum mitti debet; aut nigro veratro venter solvi. Adhibenda tum, quanta sustineri potest, inedia est: paulum deinde vires reficiendæ, & ducenda alvus: post hæc, ubi corpus levatum est, utendum est exercitatione, præcipueque cursu: sudor primum labore ipsius corporis, deinde etiam ficcis sudationibus evocandus: frictio adhibenda: moderandumque inter hæc, ut vires conserventur: balneum

rarum esse debet: cibus sine pinguibus, sine glutinosis, sine inflantibus. Vinum, præterquam primis diebus, recte datur. Corpus contrita plantago & illita optime tueri videtur.

C A P U T XXVI.

De attonitis & eorum curatione.

ATTONITOS quoque raro videmus, quorum & corpus & mens stupet. Fit interdum ictu fulminis, interdum morbo. ἀποπληξίαν hunc Græci appellant. His sanguis mittendus est. Veratro quoque albo, vel alvi ductione utendum. Tum adhibendæ frictiones; & ex media materia minime pingues cibi; quidam etiam acres: & a vino abstinendum.

C A P U T XXVII.

De resolutione nervorum, quæ apoplexia vel paralyſis dicitur.

AT resolutio nervorum frequens ubique morbus est. Sed interdum tota corpora, interdum partes infestat. Veteres auctores illud ἀποπληξίαν, hoc παράλυσιν nominaverunt. nunc utrumque παράλυσιν appellari video. Solent autem, qui per omnia membra vehementer resoluti sunt, celeriter rapi. ac si correpti non sunt, diutius quidem vivunt; sed raro tamen ad sanitatem perveniunt; & plerumque miserum spiritum trahunt, memoria quoque amissa.

In partibus vero nunquam acutus, sæpe longus, fere insanabilis morbus est.

Si omnia membra vehementer resoluta sunt, sanguinis detraçtio vel occidit, vel liberat. Aliud curationis genus vix unquam sanitatem restituit; sæpe mortem tantum differt; vitam interim infestat. Post sanguinis missionem, si non redit & motus & mens, nihil spei superest: si redit, sanitas quoque prospicitur.

At, ubi pars resoluta est, providet malo corporis, vel sanguis missus, vel alvus ducta. Cetera eadem in utroque casu facienda sunt. Siquidem vitare præcipue convenit frigus; paulatimque ad exercitationes revertendum est, sic, ut ingrediatur ipse protinus, si potest. Si id crurum imbecillitas prohibet, vel gestetur, vel motu lecti concutiat: tum id membrum, quod deficit, si potest, per se; si minus, per alium moveatur, & vi quadam ad consuetudinem suam redeat. Prodest etiam torpentis membri summam cutem exasperasse, vel urticis cæsam, vel imposito sinapi, sic, ut, ubi rubere cœperit corpus, hæc removeantur. Scilla quoque contrita, bulbique contriti cum ture recte imponuntur. Neque alienum est, resina cutem tertio quoque die diutius vellere; pluribus etiam locis aliquando sine ferro, cucurbitulas admoveere. Unctioni vero aptissimum est vetus oleum, vel nitrum aceto & oleo mixtum. Quin etiam fovere aqua calida marina; vel, si ea non est, tamen falsa, magnopere necessarium est. At, si quo loco vel naturales, vel etiam manufactæ tales natationes sunt,

iis potissimum utendum est ; præcipueque in his agitanda membra , quæ maxime deficiunt. si id non est , balneum tamen prodest. Cibus esse debet ex media materia , maximeque ex venatione : potio , sine vino , aquæ calidæ. Si tamen vetus morbus est , interponi quarto vel quinto die purgationis causa vinum Græcum falsum prodest. Post coenam utilis vomitus est.

De dolore nervorum.

Interdum vero etiam nervorum dolor oriri solet. In hoc casu non vomere , non medicamentis urinam movere , non sine exercitatione sudores , ut quidam præcipiunt , expedit. Bibenda aqua est bis die. In lectulo leniter satis diu corpus perfri-candum est , deinde retento spiritu ; ab ipsa exercitatione potius superiores partes movendæ : bal-neo raro utendum : mutandum subinde peregrinationibus cælum. Si dolor est , ea ipsa pars sine oleo , nitro ex aqua perungenda est ; deinde involvenda , & subjicienda pruna lenis , & sulphur ; atque ita id suffumigandum ; idque aliquamdiu faciendum , sed jejuno , cum bene jam concoxerit. Cucurbitulæ quoque sæpe dolenti parti admovendæ sunt , pulsandusque leviter inflatis vesicis bubulis is locus est. Utile est etiam sebum miscere cum hyoscyami & urticæ contritis feminibus , sic , ut omnium par-modus sit , idque imponere : fovere aqua , in qua sulphur decoctum sit. Utriculi quoque recte imponuntur aqua calida repleti , aut bitumen cum hor-deacea farina mixtum. Atque in ipso potissimum

dolore , utendum gestatione vehementi est. quod in aliis doloribus pessimum est.

De tremore nervorum.

Tremor autem nervorum æque vomitu medicamentisque urinam moventibus intenditur. Inimica etiam habet balnea , affasque sudationes. Bibenda aqua est : acri ambulatione utendum , item unctio- nibus , frictionibusque , maxime per se ipsum : pila , similibusque superiores partes dimovendæ : cibo quolibet utendum , dummodo concoctioni utique studeatur. Secundum cibum , curis abstinendum : rarissima venere utendum est. Si quando quis in eam prolapsus est , tum oleo leniter diuque in lectulo perfricari manibus puerilibus potius , quam virilibus , debet.

De suppurationibus internis.

Suppurationes autem , quæ in aliqua interiori parte oriuntur , ubi notæ fuerint , primum id agere oportet per ea cataplasmata , quæ reprimunt , ne coitus inutilis materiæ fiat : deinde , si hæc victa sunt , per ea malagmata , quæ digerunt , dissipetur. Quod si consecuti non sumus , sequitur , ut evoce- tur : deinde , ut maturescat. | omnis tum vomicæ finis est , ut rumpatur. Indiciumque est , pus vel alvo vel ore redditum. Sed nihil facere oportet , quo minus , quidquid est puris , excedat. Utendum maxime forbitionibus est , & aqua calida. Ubi pus ferri desiit , transeundum ad faciles quidem , sed tamen validiores & frigidos cibos , frigidamque

aquam sic, ut ab egelidis tamen initium fiat. primoque cum melle quædam edenda, ut nuclei pinei, vel Græcæ nuces, vel avellanæ. Postea submovendum id ipsum, quo maturius induci cicatrix possit. Medicamentum eo tempore ulceri est, succus assumtus vel porri vel marrubii, & omni cibo porrum ipsum adjectum. Oportebit autem uti in his partibus, quæ non afficiuntur, frictionibus, item ambulationibus lenibus. Vitandumque erit, ne vel luctando, vel currendo, vel alia ratione faneſcentia ulcera exasperentur. In hoc enim morbo perniciosus, ideoque omni modo cavendus sanguinis vomitus est.

A. CORN. CELSI
 M E D I C I N Æ
 LIBER QUARTUS.

C A P U T I.

De humani corporis interioribus sedibus.

HACTENUS reperiuntur ea genera morborum, quæ in totis corporibus ita sunt, ut iis certæ sedes assignari non possint: nunc de his dicam, quæ sunt in partibus. Facilius autem omnium interiorum morbi curationesque in notitiam venient, si prius eorum sedes breviter ostendero.

Caput igitur, eaque, quæ in ore sunt, non lingua tantummodo palatoque terminantur, sed etiam, quatenus oculis nostris exposita sunt. In dextra sinistraque circa guttur venæ grandes, quæ σφαγίτιδες nominantur; itemque arteriæ, quas καρτίδες vocant, sursum procedentes ultra aures feruntur. Atque in ipsis cervicibus glandulæ positæ sunt, quæ interdum cum dolore intumescunt. Deinde duo itinera incipiunt: alterum, asperam arteriam nominant; alterum, stomachum. Arteria exterior ad

pulmonem: stomachus interior ad ventriculum fertur. illa spiritum, hic cibum recipit. Quibus cum diversæ viæ sint, qua coeunt, exigua in arteria sub ipsis faucibus lingua est: quæ, cum spiramus, attollitur; cum cibum potionemque assumimus, arteriam claudit. Ipsa autem arteria, dura & cartilaginosa, in gutture assurgit; ceteris partibus residit. Constat ex circulis quibusdam, compositis ad imaginem earum vertebrarum, quæ in spina sunt: ita tamen, ut ex parte exteriori aspera; ex interiori, stomachi modo lævis sit. eaque descendens ad præcordia cum pulmone committitur. Is spongiosus, ideoque spiritus capax, & a tergo spinæ ipsi junctus, in duas fibras, ungulæ bubulæ modo, dividitur. Huic cor annexum est, natura musculosum, in pectore sub sinistro mamma situm; duosque quasi ventriculos habet. At sub corde atque pulmone, transversum ex valida membrana septum est, quod a præcordiis uterum diducit, æque nervosum; multis etiam venis per id discurrentibus; a superiore parte, non solum intestina, sed jecur quoque lienemque discernit. Hæc viscera proxime, sed infra tamen posita, dextra sinistraque sunt. Jecur a dextra parte sub præcordiis ab ipso septo ortum, intrinsecus cavum, extrinsecus gibbum est. quod prominens leviter ventriculo infidet, & in quatuor fibras dividitur. Ex inferiore vero parte ei fel inhæret. At lien in sinistra, non eidem septo, sed intestino innexus est, natura mollis & rarus, longitudinis crassitudinisque modicæ; isque paulum a costarum regione in uterum excedens, ex maxi-

ma parte sub his conditur. atque hæc quidem juncta sunt. Renes vero diverſi: qui lumbis ſub imis coſtis inhærent, a parte earum rotundi, ab altera reſimi; qui & venoſi ſunt, & ventriculos habent, & tunicis ſuper conteguntur. Ac viſcerum quidem hæ ſedes ſunt. Stomachus vero, qui inteſtinorum principium eſt, nervoſus a ſeptima ſpinæ vertebra incipit, ac circa præcordia cum ventriculo committitur. Ventriculus autem, qui receptaculum cibi eſt, conſtat ex duobus tergoribus. iſque inter lienem & jecur poſitus eſt; utroque ex his paulum ſuper eum ingrediente. Suntque etiam membranulæ tenues, per quas inter ſe tria iſta connectuntur, jungunturque ei ſepto, quod tranſverſum eſſe, ſupra poſui. Inde ima ventriculi pars paulum in dexterio- rem partem converſa, in ſummum inteſtinum coarctatur. Hanc juncturam πυλωρον Græci vocant, quoniam portæ modo in inferiores partes ea, quæ excreturi ſumus, emittit. Ab ea jejunum inteſtinum incipit, non ita implicitum. cui tale vocabulum eſt, quia nunquam, quod accipit, continet; ſed protinus in inferiores partes tranſmittit. Inde tenue inteſtinum eſt, in ſinus vehementer implicitum: orbes vero ejus per membranulas ſinguli cum inferioribus connectuntur; qui in dexterio- rem partem converſi, & e regione dexterio- ris coxæ finiti, ſuperiores tamen partes magis complent. Deinde id inteſtinum cum craſſiore altero tranſverſo committitur; quod a dextra parte incipiens, in ſi- niſterio- rem pervium & longum eſt, in dexterio- rem non eſt; ideoque cæcum nominatur. At id, quod

pervium est, late fufum atque finuatum, minusque quam superiora intestina nervosum, ab utraque parte huc atque illuc volutum, magis tamen finifteriores inferioresque partes tenens, contingit jecur atque ventriculum : deinde cum quibusdam membranulis a sinistro rene venientibus jungitur; atque hinc dextra recurvatum in ima dirigitur, qua excernit; ideoque id ibi rectum intestinum nominatur. Contegit vero universa hæc omentum, ex inferiore parte læve & strictum, ex superiore mollius. Cui adeps quoque innascitur; quæ sensu, sicut cerebrum quoque & medulla, caret. At a renibus singulæ venæ, colore albæ, ad vesicam feruntur; οὐρητιήρας Græci vocant, quod per eas inde descendentem urinam in vesicam distillare concipiunt. Vesica autem in ipso sinu nervosa & duplex, cervice plena atque carnosâ, jungitur per venas cum intestino, eoque osse, quod pubi subest: ipsa soluta atque liberior est; aliter in viris atque in feminis posita. Nam in viris juxta rectum intestinum est, potius in sinistram partem inclinata: in feminis super genitale earum posita est, supraque elapsa, ab ipsa vulva sustinetur. Tum in masculis iter urinæ spatiosius & compressius a cervice hujus descendit ad colem: in feminis brevius & plenius, super vulvæ cervicem se ostendit. Vulva autem in virginibus quidem admodum exigua est: in mulieribus vero, nisi ubi gravidæ sunt, non multo major, quam ut manu comprehendatur. Ea, recta continuataque cervice, quem canalem vocant, contra mediam alvum orsa, inde paulum ad dexteriores coxam

convertitur; deinde super rectum intestinum progressa, iliis feminae latera sua innectit. Ipsa autem ilia inter coxas & pubem imo ventre posita sunt. A quibus ac pube abdomen sursum versus ad præcordia pervenit; ab exteriori parte, evidenti cute; ab interiori lævi membrana inclusum; quæ omento jungitur; περιτόναιος autem a Græcis nominatur.

C A P U T II.

De curationibus morborum, qui nascuntur a capite.

HIS veluti in conspectum quendam, quatenus scire curanti necessarium est, adductis, remedia singularum laborantium partium exsequar, orsus a capite: sub quo nomine nunc significo eam partem, quæ capillo tegitur: nam oculorum, aurium, dentium dolor, & si quis similis est, alias erit explicandus.

De capitis dolore.

In capite autem interdum acutus & pestifer morbus est, quam κεφαλαίαν Græci vocant. Cujus notæ sunt, horror validus, nervorum resolutio, oculorum caligo, mentis alienatio, vomitus, sic ut vox supprimatur; vel sanguinis ex naribus cursus, sic ut corpus frigescat, anima deficiat. Præter hæc, dolor intolerabilis, maxime circa tempora, vel occipitium. Interdum autem in capite longa imbecillitas, sed neque gravis, neque periculosa, per hominis ætatem est. Interdum gravior dolor, sed bre-

vis, neque tamen mortiferus; qui vel vino, vel cruditate, vel frigore, vel igne, aut sole contrahitur. Hique omnes dolores modo in febre, modo sine hac sunt; modo in toto capite, modo in parte; interdum sic, ut oris quoque proximam partem excrucient. Præter hæc etiam invenitur genus, quod potest longum esse: ubi humor cutem inflat, eaque intumescit, & prementi digito cedit: ὕδρоекέφαλον Græci appellant.

Ex his id, quod secundo loco positum est, dum leve est, qua sit ratione curandum, dixi, cum persequerer ea, quæ sani homines in imbecillitate partis alicujus facere deberent. Quæ vero auxilia sint capitis, ubi cum febre dolor est, eo loco explicatum est, quo febrium curatio exposita est. nunc de ceteris dicendum est.

Ex quibus id, quod acutum est, & id, quod supra consuetudinem intenditur, idque, quod ex subita causa, etsi non pestiferum, tamen vehemens est, primam curationem habet, qua sanguis mittatur. Sed id, nisi intolerabilis est dolor, supervacuum est. Satiusque est, abstinere a cibo; si fieri potest, etiam a potione: si non potest, aquam bibere. Si postero die dolor remanet, alvum ducere, sternutamenta evocare, nihil assumere, nisi aquam. Sæpe enim dies unus aut alter totum dolorem hac ratione discutit, utique, si ex vino vel cruditate origo est.

Si vero in his auxilii parum est, tonderi oportet ad cutem: deinde considerandum est, quæ causa dolorem excitarit. Si calor, aqua frigida multa per-

fundere caput expedit; spongiam concavam imponere, subinde ex aqua frigida expressam; ungere rosa & aceto, vel potius his tinctam lanam succidam imponere, aliaque refrigerantia cataplasmata. At si frigus nocuit, caput oportet perfundere aqua calida marina, vel certe salsa, aut in qua laurus decocta sit; tum caput vehementer perfricare; deinde calido oleo implere, veste velare. quidam etiam id devinciunt: alii cervicalibus vestimentisque onerant, & sic levantur: alios calida cataplasmata adjuvant. Ergo etiam, ubi causa incognita est, videre oportet, refrigerantia magis, an calefacientia leniant, & his uti, quæ experimentum approbarit.

At si parum causa discernitur, perfundere caput, primum aqua calida, sicut supra præceptum est, vel salsa, vel ex lauro decocta, tum frigida posca. Illa in omni vetusto capitis dolore communia sunt: sternutamenta excitare, inferiores partes vehementer perfricare, gargarizare his, quæ salivam movent, cucurbitulas temporibus & occipitio admove, sanguinem ex naribus detrahare, resina subinde tempora pervellere, & imposito sinapi exulcerare ea, quæ male habent, ante linteolo subiecto, ne vehementer arrodant; candentibus ferramentis, ubi dolor est, ulcera excitare; cibum permodicum cum aqua sumere: ubi levatus est dolor, in balneum ire, ibi multa aqua, prius calida, deinde frigida per caput perfundi. Si discussus ex toto dolor est, etiam ad vinum reverti; sed postea semper, antequam quidquam aliud, aquam bibere.

Diffimile est id genus, quod humorem in caput contrahit. In hoc tonderi ad cutem necessarium est: deinde imponere sinapi, sic ut exulceret. si id parum profuit, scalpello utendum est. Illa cum hydropicis communia sunt, ut exerceatur, insudet, vehementer perfricetur, cibis potionibusque utatur urinam præcipue moventibus.

De morbo, qui circa faciem nascitur.

Circa faciem vero morbus innascitur, quem Græci κυνικὸν σπασμὸν nominant. Is cum acuta fere febre oritur. Os cum motu quodam pervertitur, ideoque nihil aliud est, quam distentio oris. Accedit crebra coloris in facie totoque corpore mutatio: somnus in promptu est.

In hoc sanguinem mittere optimum est. Si finitum eo malum non est, ducere alvum. Si ne sic quidem discussum est, albo veratro vomitum movere. Præter hæc necessarium est vitare solem, lassitudinem, vinum. Sed si discussum iis non est, utendum est cursu, & frictione in eo, quod læsum est, leni & multa; in reliquis partibus breviori, sed vehementi. Prodest etiam movere sternutamenta, caput radere, idque perfundere aqua calida, vel marina, vel certe salsa, sic ut ei quoque sulphur adjiciatur: post perfusionem iterum perfricari, sinapi manducare; eodemque tempore affectis oris partibus ceratum, integris idem sinapi, donec arrodant, imponere. Cibus aptissimus ex media materia est.

De resolutione linguæ.

At si lingua resoluta est, quod interdum per se; interdum ex morbo aliquo fit, sic ut sermo hominis non explicetur; oportet gargarizare ex aqua, in qua vel thymum, vel hyssopum, vel nepeta decocta sit; aquam bibere; caput, & os, & ea, quæ sub mento sunt, & cervicem vehementer perfricare; lasere linguam ipsam linere; manducare, quæ sunt acerrima, id est, sinapi, allium, cepam; magna vi luctari, ut verba exprimantur; exerceri retento spiritu, caput sæpe aqua frigida perfundere, nonnunquam multam esse radiculam, deinde vomere.

De destillatione ac gravedine.

Destillat autem humor ex capite interdum in nares, quod leve est; interdum in fauces, quod pejus est; interdum etiam in pulmonem, quod pessimum est. Si in nares destillaverit, tenuis per has pituita profluit, caput leviter dolet, gravitas ejus sentitur, frequentia sternutamenta sunt. Si in fauces, has exasperat, tussiculam movet. Si in pulmonem, præter sternutamenta & tussim, est etiam capitis gravitas, lassitudo, fitis, æstus, biliosa urina.

Aliud autem (quamvis non multum distans) malum, gravedo est. Hæc nares claudit, vocem obtundit, tussim siccam movet. Sub eadem falsa est saliva, sonant aures, venæ moventur in capite, turbida urina est. Hæc omnia κορύζας Hippocrates nominat. Nunc video apud Græcos in gravedine hoc nomen servari: destillationes, κατασταγµούς appel-

lari. Hæc autem & brevia, &, si neglecta sunt, longa esse consuerunt. Nihil pestiferum est, nisi quod pulmonem exulcerat.

Ubi aliquid ejusmodi sentimus, protinus abstinere a sole, balneo, vino, venere debemus. Inter quæ unctiōe, & assueto cibo nihilominus uti licet. Ambulatione tantum non acri, sed recta utendum est, & post eam caput atque os supra quinquagies perfricandum. Raroque fit, ut si biduo, vel certe triduo nobis temperavimus, id vitium non levetur. Quo levato, si in destillatione crassa facta pituita est, vel in gravedine, nares magis patent, balneo utendum est, multaque aqua prius calida, post egelida, fovendum os, caputque; deinde cum cibo pleniore vinum bibendum. At, si æque tenuis die quarto pituita est, vel nares æque clausæ videntur, assumendum est vinum aminæum, austerum; deinde rursus biduo aqua, post quæ ad balneum, & ad consuetudinem revertendum est.

Neque tamen illis ipsis diebus, quibus aliqua omittenda sunt, expedit tanquam ægros agere: sed cetera omnia quasi sanis facienda sunt, præterquam si diutius aliquem, & vehementius ista sollicitare consueverunt. huic enim quædam curiosior observatio necessaria est. Igitur huic, si in nares vel in fauces destillavit, præter ea, quæ supra retuli, protinus primis diebus multum ambulandum est, perfricandæ vehementer inferiores partes, levior frictio adhibenda thoraci erit, levior capiti, demenda assueto cibo pars dimidia, sumenda ova, amyllum, similiaque, quæ pituitam faciunt crassiores, siti,

quanta maxima sustineri potest, pugnandum est. Ubi per hæc idoneus aliquis balneo factus, eoque usus est, adjiciendus est cibo pisciculus, aut caro; sic tamen, ne protinus iustus modus cibi sumatur: vino meraco copiosius utendum est.

At, si in pulmonem quoque destillat, multo magis & ambulatione & frictione opus est, eademque adhibita ratione in cibis. Si non satis illi proficiunt, acrioribus utendum est, magis somno indulgendum, abstinendumque a negotiis omnibus; aliquando, sed ferius, balneum tentandum.

In gravedine autem, primo die quiescere, neque esse, neque bibere, caput velare, fauces lana circumdare: postero die surgere, diu abstinere a portione, aut, si res coegerit, non ultra heminam aquæ assumere: tertio die panis non ita multum ex parte interiore cum pisciculo, vel levi carne sumere, aquam bibere: si quis sibi temperare non potuerit, quo minus pleniore victu utatur, vomere: ubi in balneum ventum est, multa aqua calida caput & os fovere usque ad sudorem, tum ad vinum redire. Post quæ vix fieri potest, ut idem incommodum maneat. sed, si manserit, utendum erit cibis frigidis, aridis, levibus, humore quam minimo, servatis frictionibus exercitationibusque, quæ in omni tali genere valetudinis necessariae sunt.

CAPUT III.

De cervicis morbis.

A capite transitus ad cervicem est; quæ gravibus admodum morbis obnoxia est. Neque tamen alius importunior acutiorque morbus est, quam is, qui quodam rigore nervorum, modo caput scapulis, modo mentum pectori annectit, modo rectam & immobilem cervicem intendit. Priorem Græci ἐπιστόνον, insequentem ἐμπροστόνον, ultimum τέτανον appellant: quamvis minus subtiliter quidam indiscretis his nominibus utuntur. Ea sæpe intra quartum diem tollunt: si hunc evaserunt, sine periculo sunt.

Eadem omnia ratione curantur; idque convenit. Sed Asclepiades utique mittendum sanguinem credidit. Quod quidam vitandum esse dixerunt, eo quod maxime tum corpus calore egeret; isque esset in sanguine. Verum hoc quidem falsum est. neque enim natura sanguinis est, ut utique caleat; sed ex his, quæ in homine sunt, is celerrime vel calescit, vel refrigescit. Mitti vero necne debeat, ex his intelligi potest, quæ de sanguinis missione præcepta sunt. Utique autem recte datur castoreum, & cum hoc piper, vel laser. Deinde opus est fomento humido & calido. Itaque plerique aqua calida multa cervices subinde perfundunt. Id in præsentia allevat; sed opportuniore nervos frigori reddit. quod utique vitandum est.

Utilius igitur est, cerato liquido primum cervi-

cem perungere; deinde admoveve vesicas bubulas vel utriculos oleo calido repletos, vel ex farina calidum cataplasma, vel piper rotundum cum ficu contusum. Utilissimum tamen est, humido sale fovere. quod quomodo fieret, jam ostendi. Ubi eorum aliquid factum est, admoveve ad ignem, vel si æstas est, in sole ægrum oportet: maximeque oleo vetere; si id non est, Syriaco; si ne id quidem est, adipe quam vetustissima cervicem, & scapulas, & spinam perfricare.

Frictio cum omnibus in homine vertebrae utilis sit, tum iis præcipue, quæ in collo sunt. Ergo die nocteque, interpositis tamen quibusdam temporibus, hoc remedio utendum est: dum id intermittitur, imponendum malagma aliquod ex calefacientibus. Cavendum vero & præcipue frigus. ideoque in eo conclavi, in quo cubabit æger, ignis continuus esse debet, maximeque tempore antelucano, quo præcipue frigus intenditur. Neque inutile erit, caput attonsum habere, idque irino vel cyprino calido madefacere, & superimposito pileo velare: nonnunquam etiam in calidum oleum totum descendere, vel in aquam calidam, in qua fœnum græcum decoctum sit, & adjecta olei pars tertia. Alvus quoque ducta sæpe superiores partes resolvit.

Si vero etiam vehementius dolor crevit, admoventæ cervicibus cucurbitulæ sunt, sic ut cutis incidatur. Eædem aut ferramentis aut sinapi adurendæ. Ubi levatus est dolor, moverique cervix coepit, scire licet, cedere remediis morbum. Sed diu vitandus cibus, quisquis mandendus est. Sorbitio-

nibus utendum, itemque ovis forbilibus, aut haptis mollibusve; jus aliquod assumendum. Id si bene processerit, jamque ex toto recte se habere cervices videbuntur, incipiendum erit a pulticula, vel intrita bene madida. Celerius tamen etiam panis mandendus, quam vinum gustandum: siquidem hujus usus præcipue periculofus; ideoque in longum tempus differendus est.

C A P U T IV.

De faucium morbis: & primum de angina.

UT hoc autem morbi genus circa totam cervicem; sic alterum, æque pestiferum acutumque, in faucibus esse consuevit. Nostri anginam vocant: apud Græcos nomen, prout species est. Interdum enim neque rubor, neque tumor ullus apparet; sed corpus aridum est, vix spiritus trahitur, membra solvuntur. id *συνάγχην* vocant. Interdum lingua faucesque cum rubore intumescunt, vox nihil significat, oculi vertuntur, facies pallet, singultusque est. *ὡς συνάγχη* vocatur. Illa communia sunt; æger non cibum devorare, non potionem potest; spiritus ejus includitur. Levius est, ubi tumor tantummodo & rubor est, cetera non sequuntur. id *παρὰ συνάγχην* appellant.

Quidquid est, si vires patiuntur, sanguis mittendus est, etsi non abundat: secundum est, ducere alvum. Cucurbitula quoque recte sub mento, & circa fauces admovetur; ut id, quod strangulat,

evocet. Opus est deinde fomentis humidis. nam sicca spiritum elidunt. Ergo admoveere spongas oportet : quæ melius in calidum oleum, quam in calidam aquam subinde dimittuntur. Efficacissimusque est hic quoque, salis calidi succus. Tum commodum est, hyssopum, vel nepetam, vel thymum, vel absinthium, vel etiam furfures, aut ficus aridas, cum aqua mulsa decoquere, eaque gargarizare : post hæc palatum ungere vel felle taurino, vel eo medicamento, quod ex moris est. Polline etiam piperis id recte respergitur.

Si per hæc parum proficitur, ultimum est, incidere fatis altis plagis sub ipsis maxillis supra collum, & in palato citra uvam, vel eas venas, quæ sub lingua sunt; ut per ea vulnera morbus erumpat. Quibus si non fuerit æger adjutus, scire licet, malo victum esse. Si vero his morbus levatus est, jamque fauces & cibum & spiritum capiunt, facilis ad bonam valetudinem recursus est. Atque interdum natura quoque adjuvat, si ex angustiore sede vitium transit in latiore. Itaque rubore & tumore in præcordiis orto, scire licet fauces liberari.

Quidquid autem eas levarit, incipiendum est ab humidis, maximeque aqua mulsa decocta : deinde assumendi molles & non acres cibi sunt, donec fauces ad pristinum habitum revertantur. Vulgo audio, si quis pullum hirundinis ederit, angina toto anno non periclitari. Servatumque eum ex fale, cum is morbus urget, comburi, carbonemque ejus contritum in aquam mulsam, quæ potui datur, in-

friari, & prodesse. Id cum idoneos auctores ex populo habeat, neque habere quidquam periculi possit, quamvis in monumentis medicorum non legirim, tamen inferendum huic operi meo credidi.

De difficultate spirandi.

Est etiam circa fauces malum, quod apud Græcos aliud atque aliud nomen habet, prout se intendit. Omne in difficultate spirandi consistit: sed hæc dum modica est, neque ex toto strangulat, δύσπνοια appellatur: cum vehementior est, ut spirare æger sine sono & anhelatione non possit, ἀσθμα: cum accessit id quoque, ne nisi recta ceruice spiritus trahatur, ὀρθόπνοια. Ex quibus id, quod primum est, potest diutius trahi: duo insequentia acuta esse consuerunt. His communia sunt; quod propter angustias, per quas spiritus evadit, sibilum elidit; dolor in pectore præcordiisque est, interdum etiam in scapulis,isque modo decedit, modo revertitur; ad hæc tussicula accedit.

Auxilium est, nisi aliquid prohibet, in sanguinis detractiōe. Neque id satis est, sed lac caprinum calidum jejuno dandum; &, si non febrit, venter solvendus est. Liquanda alvus, interdum etiam duccenda, quibus extenuatum corpus incipit spiritum trahere commodius. Caput autem etiam in lecto sublime habendum est: thorax fomentis, cataplasmatisque calidis, aut ficcis, aut etiam humidis adjuvandus est; & postea vel malagma superimponendum, vel certe ceratum ex cyprino, vel irino unguento. Sumenda deinde jejuno potui multa

aqua, cum qua vel hyssopus cocta, vel contrita capparis radix sit. Datur etiam utiliter aut nitrum, aut nasturtium, alliumve frictum, deinde contritum & cum melle mixtum: simulque coquuntur mel, galbanum, resina terebinthina, &, ubi coierunt, ex his, quod fabæ magnitudinem habet, quotidie sub lingua liquatur. Aut sulphuris ignem non experti P. & quadrans, abrotani P. in vini cyathoteruntur, idque tepesfactum sorbetur. Est etiam non vana opinio, vulpinum jecur, ubi siccum & aridum factum est, contundi oportere, polentamque ex eo potioni aspergi; vel ejusdem pulmonem quam recentissimum assum, sed sine ferro coctum, edendum esse. Præter hæc, sorbitionibus & lenibus cibis utendum est: interdum vino tenui austero: nonnunquam vomitu. Profunt etiam, quæcunque urinam augent: sed nihil magis, quam ambulatio lenta pæne usque ad lassitudinem; frictio multa, præcipue inferiorum partium, vel in sole, vel ad ignem, & per se ipsum, & per alios, usque ad sudorem.

De faucium exulceratione.

In interiore vero faucium parte interdum exulceratio esse consuevit. In hac plerique extrinsecus cataplasmatibus calidis, fomentisque humidis utuntur: volunt etiam vaporem calidum ore recipi. per quæ molliores alii partes eas fieri dicunt, oportunioresque vitio jam hærenti. Sed, si bene sic vitari morbus potest, tuta illa præsidia: si metus ejus est, supervacua sunt. Utique autem perfricare fauces

periculosum est. exulcerat enim. Neque utilia sunt; quæ urinæ movendæ sunt apta: quia possunt, dum transeunt, ibi quoque pituitam extenuare; quam suppressi melius est.

Asclepiades multarum rerum, quas ipsi quoque secuti sumus, auctor bonus, acetum ait quam acerrimum esse sorbendum. hoc enim sine ulla noxa comprimere ulcera. Sed id suppressere sanguinem potest; ulcera ipsa sanare non potest. Melius huic rei lycium est; quod idem quoque æque probat: vel porri, vel marrubii succus, vel nuces græcæ cum tragacantho contritæ & cum passo mixtæ, vel lini semen contritum & cum dulci vino mixtum. Exercitatio quoque ambulandi currendique necessaria est. Frictio a pectore vehemens toti inferiori parti adhibenda.

Cibi vero esse debent neque nimium acres, neque asperi; mel, lenticula, tragum, lac, ptisana, pinguis quoque caro, præcipueque porrum, & quidquid cum hoc mixtum est. Potionis quam minimum esse convenit. Aqua dari potest, vel pura, vel in qua malum cydoneum, palmulæve decoctæ sunt. Gargarizationes quoque lenes: si hæ parum proficiunt, reprimentes utiles sunt.

Hoc genus neque acutum est, & potest esse non longum: curationem tamen maturam, ne vehementer & diu lædat, desiderat.

De tussi.

Tussis vero fere propter faucium exulcerationem molesta est: quæ multis modis contrahitur. Itaque,

illis restitutis, ipsa finitur. Solet tamen interdum per se quoque male habere: & vix, cum vetus facta est, eliditur. ac modo arida est, modo pituitam citat.

Oportet autem hyssopum altero quoque die bibere: spiritu retento currere, sed minime in pulvere: ac lectione uti vehementi; quæ primo impeditur a tussi, post eam vincit: tum ambulare: deinde per manus quoque exerceri, & pectus diu perfricare. Post hæc quam pinguissimæ ficus uncias tres, super prunam incoctas, esse.

Præter hæc, si humida est, profunt frictiones validæ, cum quibusdam calefacientibus, sic, ut caput quoque ficcum vehementer perfricetur: item cucurbitulæ pectori admotæ; sinapi ex parte exteriori faucibus impositum, donec leviter exulceret; potio ex menta, nucibusque græcis & amylo; primoque assumptus panis aridus, deinde aliquis cibus lenis.

At, si sicca tussis est, cum ea vehementissime urget, adjuvat vini austeri cyathus assumptus; dum ne amplius id, interposito tempore aliquo, quam ter aut quater fiat: item laseris quam optimi paulum devorare opus est; porri vel marrubii succum assumere; scillam delingere; acetum ex ea, vel certe acre sorbere, aut cum spica allii contriti duos vini cyathos.

Utilis etiam in omni tussi est peregrinatio, navigatio longa, loca maritima, natationes. Cibus interdum mollis, ut malva, ut urtica: interdum acer, ut lac cum allio coctum. Sorbitiones, quibus laser sit adjectum, aut in quibus porrum incoctum ta-

buerit. Ovum quoque sorbile, sulphure adjecto. Potus primum aqua calida, deinde invicem aliis diebus hæc, aliis vero vinum.

De sanguinis sputo.

Magis terreri potest aliquis, cum sanguinem exspuit. sed id modo minus, modo plus periculi habet. Exit enim modo ex gingivis, modo ex ore. & quidem ex hoc interdum etiam copiose, sed sine tussi, sine ulcere, sine gingivarum ullo vitio; ita ut nihil exscreetur. Verum ut ex naribus, sic ex ore aliquando prorumpit. Atque interdum sanguis profluit, interdum simile aquæ quiddam, in qua caro recens lota est. Nonnunquam autem is a summis faucibus fertur, modo exulcerata ea parte, modo non exulcerata; sed aut ore venæ alicujus adaperto, aut tuberculis quibusdam natis, ex hisque sanguine erumpente. Quod ubi incidit, neque lædit potio aut cibus, neque quidquam, ut ex ulcere, exscreatur. Aliquando, gutture & arteriis exulceratis, frequens tussis sanguinem quoque exundit. Interdum etiam fieri solet, ut aut ex pulmone, aut ex pectore, aut ex latere, aut ex jocinore feratur. Sæpe feminæ, quibus sanguis per menstrua non respondet, hunc exspuunt. Auctoresque medici fuerunt, vel exesa parte aliqua sanguinem exire, vel rupta, vel ore alicujus venæ patefacto. Primam διάβρωσιν, secundam ρηγμοχασµὸν, tertiam ἀναστόµωσιν appellant. Ultima minime nocet; prima gravissime. Ac sæpe quidem evenit, uti sanguinem pus sequatur.

Interdum autem, qui sanguinem ipsum suppressit, satis ad valetudinem profuit. Sed si secuta ulcera sunt, si pus, si tussis est, prout sedes ipsa est, ita varia & periculosa genera morborum sunt. Si vero sanguis tantum fluit, expeditius & remedium & finis est. Neque ignorari oportet, eis, quibus fluere sanguis solet, aut quibus spina dolet, coxæve, aut post cursum vehementem vel ambulationem, dum febris absit, non esse inutile sanguinis mediocre profluvium: idque per urinam redditum ipsam quoque lassitudinem solvere. Ac ne in eo quidem terribile esse, qui ex superiore loco decidit: si tamen in ejus urina nihil novabit. Neque vomitum hujus afferre periculum, etiam cum repetit, si ante confirmare & implere corpus licuit: & ex toto nullum nocere, qui in corpore robusto, neque nimius est, neque tussim aut calorem mover. Hæc pertinent ad universum. nunc ad ea loca, quæ proposui, veniam.

Si ex gingivis exit, portulacam manducasse satis est. Si ex ore, continuisse eo merum vinum: si parum id proficit, acetum. Si inter hæc quoque graviter erumpit, quia consumere hominem potest, commodissimum est, impetum ejus, ad mota occipitio cucurbitula, sic ut cutis quoque incidatur, avertere. Si id mulieri, cui menstrua non feruntur, evenit, eandem cucurbitulam, incisus inguinibus ejus, admovere.

At; si ex faucibus, interioribusve partibus processit, & metus major est, & cura major adhibenda. Sanguis mittendus est; &, si nihilominus ex

ore processit, iterum tertioque, & quotidie paulum aliquid: protinus autem debet sorbere vel acetum, vel etiam cum ture plantaginis aut porri succum; imponendaque extrinsecus supra id, quod dolet, lana succida ex aceto est, & id spongia subinde refrigerandum. Erasistratus horum crura quoque & femora brachiaque pluribus locis deligabat. Id Asclepiades adeo non prodesse, ut etiam inimicum esset, proposuit. Sed id sæpe commode respondere experimenta testantur.

Neque tamen pluribus locis deligari necesse est: sed sat est infra inguina, & super talos, summosque humeros, etiam brachia. Tum, si febris urget, danda est sorbitio; & potui aqua, in qua aliquid ex his, quæ alvum adstringunt, decoctum sit. At, si abest febris, vel elota alica, vel panis ex aqua frigida, & molle quoque ovum dari potest; potui, vel idem, quod supra scriptum est, vel vinum dulce, vel aqua frigida. sed sic bibendum erit, ut sciamus, huic morbo sitim prodesse.

Præter hæc necessaria sunt quies, securitas, silentium. Caput hujus quoque cubantis sublime esse debet, recteque tondetur. Facies sæpe aqua frigida fovenda est. At inimica sunt vinum, balneum, Venus, in cibo oleum, acria omnia, item calida fomenta, conclave calidum & inclusum, multa vestimenta corpori injecta, etiam frictiones, nisi ubi bene sanguis conquievit. Tum vero incipiendum est a brachiis, cruribusque; a thorace abstinendum. In hoc casu per hiemem, locis maritimis; per æstatem, mediterraneis opus est.

CAPUT V.

De stomachi morbis.

FAUCIBUS subest stomachus; in quo plura longa vitia incidere consuerunt. Nam modo ingens calor, modo inflatio hunc, modo inflammatio, modo exulceratio afficit. Interdum pituita, interdum bilis oritur. Frequentissimumque est ejus malum, quo resolvitur: neque ulla re magis aut afficitur, aut corpus afficit.

Ut diverſa autem vitia ejus, ſic etiam remedia ſunt. Ubi exæſtuat, aceto cum roſa extrinſecus ſubinde fovendus eſt; imponendusque pulvis cum oleo; & ea cataplaſmata, quæ ſimul & reprimunt, & molliunt. Potui, niſi quid obſtat, gelida aqua præſtanda.

Si inflatio eſt, profunt admotæ cucurbitulæ; neque incidere cutem neceſſe eſt: profunt ſicca & calida fomenta, ſed non vehementiſſima. Interponenda abſtinentia eſt. Utilis in jejunio potio eſt abſinthii, aut hyſſopi, aut rutæ. Exercitatio primo levis, deinde major adhibenda eſt; maximeque, quæ ſuperiores partes moveat. quod genus in omnibus ſtomachi vitiis aptiſſimum eſt. Poſt exercitationem opus eſt unctiōe, frictiōe; balneo quoque nonnunquam, ſed rarius; interdum alvi ductiōe. Cibis deinde calidis, neque inflantibus: eodemque modo calidis potionibus, primo aquæ; poſt, ubi reſedit inflatio, vini auſteri. Illud quoque in omnibus ſtomachi vitiis præcipiendum eſt, ut, quo mo-

do se quisque æger refecerit, eodem sanus utatur: nam redit huic imbecillitas sua, nisi iisdem defenditur bona valetudo, quibus reddita est.

At si inflammatio aliqua est, quam fere tumor & dolor sequitur, prima sunt quies, & abstinencia; lana sulphurata circumdata; in jejunio absinthium. Si ardor stomachum urget, aceto cum rosa subinde fovendus est: deinde cibus quidem utendum est modicis; imponenda vero extrinsecus, quæ simul & reprimunt & molliunt: deinde, his detractis, utendum calidis ex farina cataplasomatis, quæ reliquias digerant: interdum alvus ducenda: adhibenda exercitatio, & cibus plenior.

At, si exulceratio stomachum infestat, eadem fere facienda sunt, quæ in faucibus exulceratis præcepta sunt. Exercitatio, frictio inferiorum partium adhibenda. Adhibendi lenes & glutinosi cibi, sed citra satietatem. Omnia acria atque acida removenda. Vino, si febris non est, dulci, aut si id inflat, certe leni utendum: sed neque præfrigido, neque nimis calido.

Si vero pituita stomachus impletur, necessarius modo in jejunio, modo post cibum vomitus est. Utilis exercitatio, gestatio, navigatio, frictio. Nihil edendum, bibendumque, nisi calidum; vitatis tantum his, quæ pituitam contrahere consuerunt.

Molestius est, si stomachus bile vitiosus est. Solent autem hi, qui sic tentantur, interpositis quibusdam diebus, hanc, & quidem, quod pessimum est, atram vomere. His recte alvus ducitur: potiones ex absinthio dantur: necessaria gestatio, naviga-

tio, & si fieri potest, ex nausea vomitus: vitanda cruditas: sumendi cibi faciles & stomacho non alieni, vinum austerum.

Vulgatissimum vero pessimumque stomachi vitium est resolutio, id est, cum cibi non tenax est, soletque desinere ali corpus, ac sic tabe consumi. Huic generi inutilissimum balneum est. Lectiones, exercitationesque superioris partis necessariae, item unctiones, frictionesque: hinc perfundi frigida, atque in eadem natate, canalibus ejusdem subicere etiam stomachum ipsum, & magis etiam a scapulis id, quod contra stomachum est: consistere in frigidis, medicatisque fontibus, quales Cutiliarum Sumbruinarumque sunt, salutare est. Cibi quoque assumendi sunt frigidi, qui potius difficulter coquuntur, quam facile vitiantur. Ergo plerique, qui nihil aliud concoquere possunt, bubulam coquunt. Ex quo colligi potest, neque avem, neque venationem, neque piscem dari debere, nisi generis durioris. Potui quidem aptissimum est vinum frigidum, vel certe bene calidum meracum, potissimum Rheticum, vel Allobrogicum, aliudve, quod & austerum & resina conditum est: si id non est, quam asperrimum, maximeque Signinum.

Si cibus non continetur, danda aqua, & eliciendus plenior vomitus est; iterumque dandus cibus, & tum admovendae duobus infra stomachum digitis cucurbitulae, ibique duabus aut tribus horis continendae sunt. Si simul & vomitus, & dolor est, imponenda supra stomachum est lana succida, vel spongia ex aceto, vel cataplasma, quod refrigeret.

Perfricanda vero non diu, sed vehementer brachia, & crura, & calefacienda.

Si plus doloris est, infra præcordia quatuor digitis cucurbitula utendum est: protinus dandus panis ex posca frigida. Si non continuit, post vomitum lene aliquid ex his, quæ non aliena stomacho sint. Si ne id quidem tenuit, singuli cyathi vini, singulis interpositis horis, donec stomachus consistat. Valens etiam medicamentum est, radiculae succus: valentius, acidi punici mali, cum pari modo succi, qui ex dulci punico malo est, adjecto etiam intubi succo, & mentæ, sed hujus minima parte; quibus tantundem, quantum in his omnibus est, aquæ frigida quam optime miscetur. Id enim plus quam vinum ad comprimendum stomachum potest. Supprimendus autem vomitus est, qui per se venit, etsi nausea est.

Sed si coacuit intus cibus, aut computruit, quorum utrumlibet ructus ostendit, ejiciendus est; protinusque, cibus assumtis iisdem, quos proxime posui, stomachus restituendus. Ubi sublatus est præsens metus, ad ea redeundum est, quæ supra præcepta sunt.

C A P U T VI.

De laterum doloribus.

STOMACHUS latetibus cingitur; atque in his quoque vehementes dolores esse consueverunt. Eorum initium vel ex frigore, vel ex ictu, vel ex ni-

mio cursu, vel ex morbo est. Sed interdum id malum intra dolorem est: isque modo tarde, modo celeriter solvitur. interdum ad perniciem quoque procedit; oriturque acutus morbus, qui *πλευριτικός* a Græcis nominatur. Huic dolori lateris, febris & tussis accedit: & per hanc exscreatur, si tolerabilis morbus est, pituita; si gravis, sanguis. Interdum etiam sicca tussis est, quæ nihil emolitur. idque primo vitio gravius, secundo tolerabilius est.

Remedium vero est magni & recentis doloris, sanguis missus. At, si levior, si vetustior casus est, vel supervacuum, vel serum id auxilium est; confugiendumque ad cucurbitulas est, ante summa cute incisa. Recte etiam sinapi ex aceto super pectus imponitur, donec ulcera pustulasque excitet; & tum medicamentum, quod humorem illuc citet. Præter hæc, circumdare primum oportet latus hapso lanæ sulphuratæ: deinde, cum paulum inflammatio se remittit, siccis & calidis fomentis uti. Ab his transitus ad malagmata est.

Si vetustior dolor remanet, novissime resina imposita discutitur. Utendum cibis potionibusque calidis: vitandum frigus. Inter hæc tamen non alienum est extremas partes oleo & sulphure perfricare. Si levata tussis est, leni lectione uti: jamque & acres cibos, & vinum meracius assumere. Quæ ita a medicis præcipiuntur. Attamen sine his rusticos nostros epota ex aqua trixago satis adjuvare dicitur.

Hæc in omni lateris dolore communia sunt: plus negotii est, si acutus quoque morbus is factus est. In hoc, præter ea, quæ supra posita sunt, hæc

animadvertenda sunt: ut cibus sit quam maxime tenuis & lenis, præcipueque sorbitio, eaque ex ptisanâ potissimum, aut jus, in quo porrus cum pullo gallinaceo coctus sit: idque non nisi tertio quoque die detur: si tamen per vires licebit: potui vero aqua mulsa, in qua hyssopum, aut rata decocta sit: Quæ quibus temporibus danda sint, ex ratione vel adauctæ, vel levatæ febris apparebit, sic, ut in remissione quam maxima dentur: cum eo tamen, ut sciamus, non esse ejus generis tussis aridas fauces committendas. sæpe enim, ubi nihil est, quod exscreetur, continuatur, & strangulat. Ob quam causam dixi etiam pejus id genus esse tussis, quod nihil, quam quod pituitam moveret. Sed hic vinum sorbere, ut supra præcepimus, morbus ipse non patitur: in vicem ejus, cremor ptisanæ sumendus est.

Ut his autem in ipso morbi fervore sustinendus æger est, sic, ubi paulum is se remisit, alimenta pleniora, & vini quoque aliquid dari potest; dum nihil detur, quod aut refrigeret corpus, aut fauces asperet. Si in refectioe quoque manserit tussis, intermittere oportebit uno die; posteroque, cum cibo vini paulo plus assumere. Atque, invalescente quoque tussi, tum non erit alienum, ut supra quoque positum est, vini cyathos sorbere. sed in hoc genere valetudinis, dulce, vel certe lene commodius est. Si malum inveteravit, athletico victu corpus firmandum est.

CAPUT VII.

De viscerum morbis : & primo , de pulmone.

A compagine vero corporis ad viscera transfundendum est; & imprimis ad pulmonem veniendum. Ex quo vehemens & acutus morbus oritur, quem *περιπνευμονικόν* Græci vocant. Ejus hæc conditio est. Pulmo totus afficitur. hunc casum ejus subsequitur tussis, bilem vel pus trahens; præcordiorum totiusque pectoris gravitas, spiritus difficultas, magnæ febres, continua vigilia, cibi fastidium, tabes. Id genus morbi plus periculi, quam doloris, habet.

Oportet, si fatis validæ vires sunt, sanguinem mittere: sin minores, cucurbitulas sine ferro præcordiis admove. Tum si fatis valet, gestando ægrum, digerere: si parum, intra domum tantum dimovere. Potionem autem hyssopi dare, cui ficus arida sit incocta; aut aquam mulsam, in qua vel hyssopum, vel ruta decocta sit. Frictione uti diutissime in scapulis, proxime ab his in brachiis, & pedibus, & cruribus, leviter contra pulmonem; idque bis quotidie facere.

Quod ad cibum vero pertinet, huic nec falsis opus est, neque acribus, neque amaris, neque alvum adstringentibus, sed paulo lenioribus. Ergo primis diebus danda est sorbitio ptisanæ, vel alicæ, vel oryzæ, cum qua recens adeps cocta sit. Cum hac, forbile ovum, nuclei pinei: ex melle, panis, vel elota alica ex aqua mulsæ. Potui deinde non

solum pura aqua, sed etiam mulsa egelida; aut, si æstas est, & frigida; nisi quid obstat. Hæc autem altero quoque die, incremente morbo dare satis est.

Ubi incremento constitit, quantum res patitur, ab omnibus abstinendum est, præterquam aqua egelida. Si vires defunt, adjuvandæ sunt aqua mulsa: Profuntque adversus dolores imposita calida fomenta, vel ea, quæ simul & reprimunt & emolliunt. Prodest impositus super pectus sal bene contritus, cum cerato mixtus; quia leviter cutem erodit, eoque impetum materiæ, qua pulmo vexatur, evocat. Utile etiam aliquod malagma est ex his, quæ materiam trahunt. Neque alienum est, dum premit morbus, clausis fenestris ægrum continere: ubi paulum levatus est, ter aut quater die, fenestris aliquantum apertis, parvum aerem recipere. Deinde in refectiōe pluribus diebus a vino abstinere; gestatione, frictiōe uti; sorbitionibus, & prioribus cibis adjicere, ex oleribus porrum; ex carne ungulas, & summa trunculorum, atque pisciculos, sic, ut diu nihil nisi molle & lene sumatur.

C A P U T VIII.

De hepaticis.

ALTERIUS quoque visceris morbus, id est, jecinoris, æque modo longus, modo acutus esse consuevit. ἥπατινὸν Græci vocant. Dextra parte sub præcordiis vehemens dolor est: idemque ad latus dextrum, & ad jugulum, humerumque partis ejus-

dem pervenit : nonnunquam manus quoque dextra torpet : horror validus est. Ubi male est , bilis evo-
mitur : interdum singultus prope strangulat. Et hæc
quidem acuti morbi signa sunt. Longioris vero ,
ubi suppuratio in jecinore est ; dolorque modo
finitur , modo intenditur ; dextra parte præcordia
dura sunt , & tument ; post cibum major difficultas
est : accedit maxillarum quædam resolutio. Ubi in-
veteravit malum , venter & crura pedesque intum-
escunt ; pectus atque humeri , circaque jugulum
utrumque extenuatur.

Initio sanguinem mittere optimum est : tum ven-
ter solvendus est ; si non potest aliter , per nigrum
veratrum. Imponenda extrinsecus cataplasmata ;
primum quæ reprimant ; deinde calida , quæ didu-
cant ; quibus recte iris vel absinthium adjicitur :
post hæc , malagma. Dandæ vero sorbitiones sunt ,
omnesque cibi & calidi , & qui non multum alant ,
& fere qui pulmonis quoque dolori conveniunt ;
præterque eos , qui urinam movent , potionesque
ad id efficaces. Utilia in hoc morbo sunt thymum ,
fatureja , hyssopum , nepeta , amaracum , sesamum ,
lauri bacca , pini flos , herba sanguinalis , mentha ,
ex malo cotoneo medium , columbæ jecur recens
& crudum. Ex quibus quædam per se esse , quæ-
dam adjicere vel sorbitioni vel potioni licet ; sic
tamen , ut parce assumantur. Neque alienum est ,
absinthium contritum ex melle & pipere , ejusque
catapotium quotidie devorare. Abstinentium uti-
que est ab omnibus frigidis. neque enim res ulla
magis jecur lædit. Frictionibus utendum in extre-

mis partibus. Vitandus omnis labor, omnis vehementior motus: ne spiritus quidem diutius continendus est. Ira, trepidatio, pondus, jactus, cursus, inimica sunt. Perfusio corporis multa prodest ex aqua, si hiems est, calida; si æstas, tepida: item liberalis unctio, & in balneo sudor.

Si vero jecur vomica laborat, eadem facienda sunt, quæ in ceteris interioribus suppurationibus. Quidam etiam contra id scalpello aperiunt, & ipsam vomicam adurunt.

C A P U T IX.

De lienosis.

AT lienis, ubi affectus est, intumescit, simulque cum eo pars sinistra; eaque dura est, & prementi renititur; venter intentus est: aliquis etiam cruribus tumor est. Ulcera aut omnino non sanescunt, aut certe cicatricem vix recipiunt. In intenta ambulatione, cursuque, dolor, & quædam difficultas est.

Hoc vitium quies auget. itaque exercitatione & labore opus est: habita tamen ratione, ne febrem ista, si nimium processerint, excitent. Unctiones, frictionesque, & sudores necessarii sunt. Dulcia omnia inimica sunt: item lac & caseus. Acida autem maxime conveniunt. Ergo acetum acre per se forbere, & magis etiam, quod scilla conditum est, expedit. Edenda sunt falfamenta, vel oleæ ex muria dura; lactucæ in aceto tinctæ; intubique & betæ

ex eodem ; & sinapi , asparagis , armoracia , & pastinaca : de carnibus vero ungulæ , rostra , aves macræ , ejusdem generis venatio. Potui vero jejuno dari debet absinthium aquæ incoctum : at post cibum aqua a ferrario fabro , in qua candens ferrum subinde tinctum fit. hæc enim vel præcipue lienem coercet. quod animadversum est in his animalibus , quæ apud hos fabros educata exiguos lienes habent. Potest etiam dari vinum tenue , austerrum ; omniaque in cibis & potionibus , quæ urinæ movendæ sunt : præcipueque ad id valet vel trifolii semen , vel cuminum , vel apium , vel serpyllum , vel cythisus , vel portulaca , vel nepeta , vel thymum , vel hyssopum , vel satireja. hæc enim inde commodissime videntur humorem deducere. Lienis quoque bubulus utiliter esui datur : præcipueque eruca & nasturtium lienem extenuant. Imponenda quoque extrinsecus sunt , quæ levant. fit ex unguento & palmulis , quod *μυροβάλανον* Græci vocant : fit ex lini & nasturtii semine , quo vinum & oleum adjicitur : fit ex cupresso viridi , & arida ficu : fit ex sinapi , cui sevi hircini a renibus quarta pars ponderis adjicitur , teriturque in sale , & protinus imponitur. Multisque modis huic rei capparī aptum est. Nam & ipsum cum cibo assumere , & muriam ejus cum aceto forbere commodum est. Quin etiam extrinsecus radicem contritam , vel corticem ejus cum furfuribus , aut ipsum capparī cum melle contritum imponere expedit. Malaginata quoque huic rei aptantur.

CAPUT X.

De renum morbis.

AT renes ubi affecti sunt, diu male habent. Pejus est, si frequens biliosus vomitus accedit. Oportet conquiescere : cubare molliter : solvere alvum ; si aliter non respondet, etiam ducere : sæpe desiderare in aqua calida : neque cibum, neque potionem frigidam assumere : abstinere ab omnibus falsis, acribus, acidis, pomis : bibere liberaliter : ad-jicere modo cibo, modo potioni piper, porrum, ferulam, album papaver. quæ maxime inde urinam movere consueverunt.

Auxilio quoque his exulceratis sunt, si adhuc ulcera purganda sunt, cucumeris semina detractis corticibus sexaginta, nuclei ex pinu silvestri duodecim, anisi quod tribus digitis sumi possit, croci paulum, contrita & in duas mulsi portiones divisa.

Si vero dolor tantum levandus est, ejusdem cucumeris semina triginta, iidem nuclei viginti, nuges græcæ quinque, croci paululum, contrita & cum lacte potui data. At super quoque recte quædam malagmata injiciuntur ; maximeque ea, quæ humori extrahendo sunt.

CAPUT XI.

De intestinorum morbis : & primo de cholera.

A visceribus ad intestina veniendum est; quæ sunt & acutis & longis morbis obnoxia. Primoque facienda mentio est cholerae; quia commune id stomachi atque intestinorum vitium videri potest. Nam simul & dejectio & vomitus est: præterque hæc inflatio est, intestina torquentur, bilis supra infraque erumpit, primum aquæ similis, deinde ut in ea recens caro lota esse videatur, interdum alba, nonnunquam nigra, vel varia. Ergo eo nomine morbum hunc *χολέραν* Græci nominarunt. Præter ea vero, quæ supra comprehensa sunt, sæpe etiam crura manusque contrahuntur, urget sitis, anima deficit. quibus concurrentibus, non mirum est, si subito quis moritur. Neque tamen ulli morbo minori momento succurritur.

Protinus ergo, ubi ista cœperunt, aquæ tepidæ quam plurimum bibere oportet, & vomere. Vix unquam ea sine vomitu sumitur: sed etiamsi non incidit, miscuisse tamen novam materiam corruptæ prodest; parsque sanitatis est, vomitum esse suppressum. Si id incidit, protinus ab omni potione abstinendum est. Si vero tormina sunt, oportet frigidis & humidis fomentis stomachum fovere: vel, si venter dolet, iisdem egelidis, sic ut venter ipse mediocriter calentibus juvetur. Quod si vehementer & vomitus, & dejectio, & sitis vexant, &

adhuc subcruda sunt, quæ vomuntur, nondum vino maturum tempus est: aqua, neque ea ipsa frigida, sed potius egelida danda est. admoventumque naribus est pulegium ex aceto, vel polenta vino aspersa, vel mentha secundum naturam est.

At cum discussa cruditas est, tum magis verendum est, ne anima deficiat. Ergo tum confugiendum est ad vinum. Id esse oportet tenue, odoratum, & cum aqua frigida mixtum, vel polenta adjecta, vel infracto pane; quem ipsum quoque assumere expedit: quotiesque aliquid aut stomachus, aut venter effudit, toties per hæc vires restituere. Erasistratus primo tribus vini guttis, aut quinis aspergendam potionem esse dixit; deinde paulatim merum adjiciendum. Is, si & ab initio vinum dedit, & metum cruditatis secutus est, non sine causa fecit: si vehementem infirmitatem adjuvari posse tribus guttis putavit, erravit.

At si inanis est homo, & crura ejus contrahuntur, interponenda potio absinthii est. Si extremæ partes corporis frigent, ungendæ sunt calido oleo, cui ceræ paulum sit adjectum; calidisque fomentis nutriendæ. Si ne sub his quidem quies facta est, extrinsecus contra ventriculum ipsum cucurbitula admovenda est, aut sinapi superimponendum. Ubi is constitit, dormire oportet: postero die utique a potione abstinere: die tertio in balneum ire: paulatim se cibo reficere; somnoque, quisquis facile acquiescit; vitetque lassitudinem, & frigora. Si post suppressam choleram febricula manet, alvum duci necessarium est; tum cibus vinoque utendum

est. Sed hic quidem morbus & acutus est, & inter intestina stomachumque versatur sic, ut, cujus potissimum partis sit, non facile dici possit.

CAPUT XII.

De cœliaco ventriculi morbo.

IN ipsius vero ventriculi porta consistit is, qui & longus esse consuevit, & κοιλιακός a Græcis nominatur. Sub hoc venter indurescit, dolorque ejus est: alvus nihil reddit, ac ne spiritum quidem transmittit: extremæ partes frigescunt: difficulter spiritus redditur.

Commodissimum est inter initia calida cataplasmata toti ventri imponere, ut dolorem leniant. Post cibum vomere, atque ita ventrem exinanire. Proximis deinde diebus cucurbitulas sine ferro ventri & coxis admove. Ventrem ipsum liquare dato lacte, & vino falso, frigido; si tempus anni patitur, etiam viridibus ficis; sic tamen, ne quis aut cibus, aut humor universus detur, sed paulatim. Ergo per intervalla temporis sat est cyathos binos ternosve sumere, & cibum pro portione hujus: commodeque facit cyatho lactis cyathus aquæ mixtus, & sic datus. Cibique inflantes & acres utiliores sunt: adeo ut lacti quoque recte contritum alium adjiciatur.

Procedente vero tempore, opus est gestari; maximeque navigare; perfricari ter aut quater die sic, ut nitrum oleo misceatur; perfundi aqua calida post

cibum; deinde sinapi imponere per omnia membra, excepto capite, donec arrodantur & rubeant; maximeque si corpus durum & virile est. paulatim deinde faciendus est transitus ad ea, quæ ventrem comprimunt. Assa caro danda, valens, & quæ non facile corrumpatur: potui vero, pluvialis aqua decocta; sed quæ per binos ternosve cyathos bibatur.

Si vetus vitium est, oportet laser quam optimum ad piperis magnitudinem devorare: altero quoque die vinum vel aquam bibere; interdum interposito cibo, singulos vini cyathos sorbere: ex inferiori parte infundere aquam pluvialem egelidam; maximeque, si dolor in imis partibus remanet.

C A P U T XIII.

De tenuioris intestini morbo.

INTER ipsa vero intestina consistunt duo morbi: quorum alter in tenuiore, alter in pleniore est. Prior acutus est: insequens esse longus potest. Dioscles Carystius tenuioris intestini morbum χέρδαλον, plenioris εἰλεδὸν nominavit. A plerisque video nunc illum priorem εἰλεδὸν, hunc κολικὸν nominari. Sed prior modo supra umbilicum, modo sub umbilico dolorem movet. Fit in alterutro loco inflammatio: nec alvus, nec spiritus infra transmittitur. Si superior pars affecta est, cibus: si inferior, stercus per os redditur. Si utrumlibet vetus est, adjicitur periculo vomitus biliosus, mali odoris, aut varius, aut niger.

Remedium est, sanguinem mittere; vel cucurbitulas pluribus locis admove, non ubique cute incisa: id enim duobus aut tribus locis satis est: ex ceteris spiritum evocare abunde est. Tum animadvertere oportet, quo loco malum sit. solet enim contra id tumere. Et si supra umbilicum est, alvi ductio utilis non est. Si infra est, alvum ducere, ut Erasistrato placuit, optimum est; & sæpe id auxilii satis est. Ducitur autem percolato ptisanæ cremore, cum oleo & melle sic, ut præterea nihil adjiciatur. Si nihil tumet, duas manus imponere oportet supra summum ventrem, paulatimque deducere. invenietur enim mali locus; qui necesse est renitatur; & ex eo demum deliberari poterit, ducenda, necne alvus sit.

Illa communia sunt: calida cataplasmata admove, eaque imponere a mammis usque ad inguina, & spinam; ac sæpe mutare: brachia, cruraque perfricare: demittere totum hominem in calidum oleum. Si dolor non quiescit, etiam in alvum ex parte inferiore tres aut quatuor cyathos calidi olei dare. Ubi per hæc consecuti sumus, ut jam ex inferiore parte spiritus transmittatur, offerre potui mulsum tepidum non multum: (nam ante magna cura vitandum est, ne quid bibat:) si id commode cessit, adjicere forbitionem.

Ubi dolor & febricula quierunt, tum demum uti cibo pleniore; sed neque inflante, neque duro, neque valido, ne intestina adhuc imbecilla lædantur. potui vero nihil præterquam puram aquam. Nam sive quid vinolentum, sive acidum est, id huic

morbo alienum est. Ac postea quoque vitare oportet balneum, ambulationem, gestationem, ceterosque corporis motus. Nam facile id malum redire consuevit; & sive cum frigus subit, sive aliqua jactatio, nisi bene jam confirmatis intestinis, revertitur.

C A P U T XIV.

De morbo intestini plenioris.

Is autem morbus, qui in intestino pleniore est; in ea maxime parte est, quam cæcam esse proposui. Vehemens fit inflatio, vehementes dolores, dextra magis parte: intestinum, quod verti videtur, prope spiritum elidit. In plerisque post frigora cruditatesque oritur, deinde quiescit; & per ætatem sæpe repetens sic cruciat, ut vitæ spatio nihil demat.

Ubi is dolor cœpit, admoveere sicca & calida fomenta oportet; sed primo lenia, deinde validiora; simulque frictione ad extremas partes, id est, crura brachiaque materiam revocare. Si discussum non est, qua dolet, cucurbitulas sine ferro defigere. Est etiam medicamentum ejus rei causa comparatum, quod κολικόν nominatur. Id se reperisse Cassius gloriabatur. magis prodest potui datum. sed ampositum quoque extrinsecus, digerendo spiritum, dolorem levat.

Nisi finito vero tormento, recte neque cibus neque potio assumitur. Quo victu sit utendum iis,

qui hoc genere tentantur, jam mihi dictum est. Confectio medicamenti, quod *κολικόν* nominatur, ex his constat. Costi, anisi, castorei, singulorum P. * III. petroselini P. * IV. piperis longi, & rotundi, singulorum P. * v. papaveris lacrimæ, junci rotundi, myrrhæ, nardi, singulorum P. * VI. quæ melle excipiuntur. Id autem & devorari potest, & ex aqua calida sumi.

CAPUT XV.

De torminibus.

PROXIMA his inter intestinorum mala tormina esse consueverunt. *δυσεντερία* Græce vocatur. Intus intestina exulcerantur: ex his cruor manat; isque modo cum stercore aliquo semper liquido, modo cum quibusdam quasi mucosis excernitur; interdum simul quædam carnosæ descendunt. Frequens dejectiendi cupiditas, dolorque in ano est. Cum eodem dolore exiguum aliquid emittitur: atque eo quoque tormentum intenditur; idque post tempus aliquod levatur, exiguaque requies est, somnus interpellatur, febricula oritur, longoque tempore id malum, cum inveteraverit, aut tollit hominem, aut, etiamsi finitur, excruciat.

Oportet inprimis conquiescere; siquidem omnis agitatio exulcerat: deinde jejunum sorbere vini cyathum, cui contrita radix quinquefolii sit adjecta: imponere cataplasmata super ventrem, quæ reprimunt; quod in superioribus ventris morbis non ex-

pedit : quotiesque defidit, subluere aqua calida, in qua decoctæ verbenæ sint : portulacam vel coctam, vel ex dura muria edisse; cibos potionesque eas, quæ adstringunt alvum.

Si vetustior morbus est, ex inferioribus partibus tepidum infundere vel ptisanæ cremorem, vel lac, vel adipem liquatam, vel medullam cervinam, vel oleum, vel cum rosa butyrum, vel cum eadem album crudum ex ovis, vel aquam, in qua lini semen decoctum sit; vel, si somnus non accedit, vitellos cum aqua, in qua rosæ floris folia cocta sint. Levant enim dolorem hæc, & mitiora ulcera efficiunt; maximeque utilia sunt, si cibi quoque secutum fastidium est. Themison muria dura quam asperrima sic utendum memoriæ prodidit.

Cibi vero esse debent, qui leniter ventrem adstringant. Et ea, quæ urinam moveant, si id consecuta sunt, in aliam partem humorem avertendo, profunt : si non sunt consecuta, noxam augent. itaque nisi in quibus promte id facere consuerunt, non sunt adhibenda. Potui, si febricula est, aqua pura calida, vel ea, quæ ipsa quoque adstringat, dari debet : si non est, vinum lene, austerum. Si pluribus diebus nihil remedia alia juverunt, vetustique jam vitium est, aquæ bene frigidæ potio assumpta ulcera adstringit, & initium secundæ valetudinis facit. Sed ubi venter suppressus est, protinus ad calidam potionem revertendum est.

Solet autem interdum etiam putris fanies, pessimique odoris descendere : solet interdum purus sanguis profluere. Si superius vitium est, alvus aqua

mulsa duci debet; tum deinde eadem infundi, quæ supra comprehensa sunt. Valensque est etiam adversus ulcera intestinorum, minii gleba cum salis hemina contrita: si minus, mixta his aqua in alvum datur. At, si sanguis profluit, cibi portionesque esse debent, quæ adstringant.

CAPUT XVI.

De lævitate intestinorum.

EX torminibus interdum intestinorum lævitas oritur; qua continere nihil possunt, & quidquid assumptum est, imperfectum protinus reddunt. Id interdum ægros trahit, interdum præcipitat.

In hoc utique adhibere oportet comprimentia; quo facilius tenendi aliquid intestinis vis sit. Ergo & super pectus ponatur sinapi; exulcerataque cute, malagma, quod humorem evocet: & ex verbenis decocta in aqua desideat; & cibos portionesque assumat, quæ alvum adstringunt, & frigidis utatur perfusionibus.

Oportet tamen prospicere, ne, simul his omnibus admotis, vitium contrarium per immodicas inflationes oriatur. Paulatim ergo firmari intestina debent, aliquibus quotidie adjectis. Et cum in omni fluore ventris, tum in hoc præcipue necessarium est, non quoties libet desidere, sed quoties necesse est, ut hæc ipsa mora in consuetudinem ferendi oneris intestina deducat.

Alterum quoque, quod æque ad omnes similes

affectus pertinet, in hoc maxime servandum est; ut, cum pleraque utilia insuavia sint, qualis est plantago, & rubi, & quidquid malicorio mixtum est, ea potissimum ex his dentur, quæ maxime æger volet. Deinde, si omnia ista fastidiet, ad excitandam cibi cupiditatem, interponatur aliquid minus utile, sed magis gratum. Exercitationes & frictiones huic quoque morbo necessariae sunt: & cum his sol, ignis, balneum, vomitus, ut Hippocrati visum est, etiam albo veratro, si cetera parum proficient, evocatus.

C A P U T XVII.

De lumbricis alvum occupantibus.

NONNUNQUAM autem lumbrici quoque occupant alvum; hique modo ex inferioribus partibus, modo foedius ore redduntur. Atque interdum latos eos, qui peiores sunt; interdum teretes videmus.

Si lati sunt, aqua potui dari debet, in qua lupinum, aut cortex mori decoctus sit; aut cui adjectum sit contritum vel hyssopum, vel piperis acetabulum, scammonæ paulum. Vel etiam pridie, cum multum allium ederit, vomat. Posteroque die mali punici tenues radículas colligat, quantum manu comprehendet; easque contusas in aquæ tribus sextariis decoquat, donec tertia pars superfit; huic adjiciat nitri paulum, & jejunos bibat. Interpositis deinde tribus horis, duas portiones sumat aut aquæ, vel muriæ duræ sic adjectæ; tum desideat, subjecta calida aqua in pelve.

Si vero teretes sunt, qui pueros maxime exercent, & eadem dari possunt, & quædam leviora; ut contritum semen urticæ, aut brassicæ, aut cumini cum aqua, vel mentha cum eadem, vel absinthium decoctum, vel hyssopum ex aqua mulsa, vel nasturtii semen cum aceto contritum. Edisse etiam & lupinum, & allium prodest; vel in alvum oleum subter dedisse.

CAPUT XVIII.

De tenesmo, intestinorum morbo.

EST autem aliud levius omnibus proximis, de quibus supra dictum est, quod *τενεσμός* Græci vocant. Id neque acutis neque longis morbis annumerari debet, cum & facile tollatur, neque unquam per se jugulet. In hoc æque atque in torminibus frequens desidendi cupiditas est; æque dolor, ubi aliquid excernitur. Descendunt autem pituitæ mucifque similia; interdum etiam leviter subcruenta; sed his interponuntur nonnunquam ex cibo quoque recte cocta.

Desidere oportet in aqua calida; sæpiusque ipsum anum nutrire. cui plura medicamenta idonea sunt: butyrum cum rosa; acacia ex aceto liquata; emplastrum id, quod *τετραφάρμακον* Græci vocant, rosa liquatum; alumen lana circumdatum, & ita appositum. eademque ex inferiore parte indita, quæ torminum auxilia sunt: eadem verbenæ decoctæ, ut inferiores partes foveantur. Alternis vero diebus

aqua, alternis leve & austerum vinum bibendum est. Potio esse debet egelida & frigida propior: ratio victus talis, qualem ad tormina supra præcepimus.

C A P U T XIX.

De ventris fluxu.

LEVIOR etiam, dum recens, dejectio est, ubi & liquida alvus, & sæpius, quam ex consuetudine, fertur, atque interdum tolerabilis dolor est, interdum gravissimus; idque pejus est. Sed uno die fluere alvum sæpe pro valetudine est: atque etiam pluribus, dum febris absit, & intra septimum diem id conquiescat. Purgatur enim corpus, &, quod intus læsurum erat, utiliter effunditur. Verum spatium periculosum est. interdum enim tormina ac febri-culas excitat, viresque consumit.

Primo die quiescere satis est; neque impetum ventris prohibere. Si per se desit, balneo uti, paulum cibi capere: si mansit, abstinere non solum a cibo, sed etiam a potione. Postero die, si nihilominus liquida alvus est, æque conquiescere; paulum adstringentis cibi sumere. Tertio die in balneum ire; vehementer omnia præter ventrem perfricare; ad ignem lumbos, scapulasque admove-re; cibis uti, sed ventrem contrahentibus; vino non multum meraco. Si postero quoque fluet, plus edisse, sed vomere etiam. Ex toto, donec conquiescat, contra siti, fame, vomitu niti. Vix enim fieri potest, ut, post hanc animadversionem, alvus non contrahatur.

Alia via est, ubi velis suppressere, coenare, deinde vomere : postero die lecto conquiescere, vesperi ungi, sed leniter : deinde panis circa feli-
bram ex vino aminæo mero sumere ; tum assum
aliquid, maximeque avem ; & postea vinum idem
bibere aqua pluviali mixtum, idque usque ad quin-
tum diem facere, iterumque vomere. Frigidam au-
tem assidue potionem esse debere, contra priores
auctores Asclepiades affirmavit, & quidem quam
frigidissimam. Ego experimentis quemque in se cre-
dere debere existimo, calida potius, an frigida
utatur.

Interdum autem evenit, ut id pluribus diebus
neglectum, curari difficilior possit. A vomitu oportet
incipere : deinde postero die vesperi tepido loco
ungi ; cibum modicum assumere, vinum meracum
quam asperrimum ; impositam super ventrem ha-
bere cum cerato rutam. In hoc autem affectu cor-
poris neque ambulatione, neque frictione opus est :
vehiculo sedisse, vel magis etiam equo, prodest. ne-
que enim ulla res magis intestina confirmat.

Si vero etiam medicamentis utendum est, aptissi-
mum est id, quod ex pomis fit. Vindemiæ tempore
in grande vas conjicienda sunt pira atque mala sil-
vestria. si ea non sunt, pira Tarentina viridia, vel
Signina, mala Scandiana, vel Amerina, myrrhaphia :
hisque adjicienda sunt cotonea, & cum ipsis corti-
cibus suis punica, forba, & quibus magis utimur,
etiam torminalia, sic ut hæc tertiam ollæ partem
teneant : tum deinde ea musto implenda est ; co-
quendumque id, donec omnia, quæ indita sunt,

liquata, in unitatem quandam coeant. Id gustui non insuave est : & , quodcumque opus est , assumtum leniter , sine ulla stomachi noxa , ventrem tenet. duo aut tria cochlearia uno die sumfisse , satis est. Alterum valentius genus : myrti baccas legere , ex his vinum exprimere , id decoquere , ut decima pars remaneat , ejusque cyathum sorbere. Tertium , quod quandoque fieri potest , malum punicum excavare , exemptisque omnibus feminibus , membranas , quæ inter ea fuerunt , iterum conjicere : tum infundere cruda ova , rudiculaque miscere : deinde malum ipsum super prunam imponere ; quod , dum humor intus est , non aduritur : ubi siccum esse coepit , remove oportet , extractumque cochleari , quod inus est , edisse. Hoc , aliquibus adjectis , majus momentum habet. Itaque etiam in piperatum conjicitur , misceturque cum sale & pipere , esturque ex his. Edenda est pulticula etiam , cum qua paulum ex favo vetere coctum sit. Et lenticula cum malicorio cocta , rubique cacumina in aqua decocta , & ex oleo atque aceto assumpta , efficacia sunt. Atque ea aqua , in qua vel palmulæ , vel malum cotoneum , vel arida sorba , vel rubi decocti sunt , potata. quod genus significo , quoties potionem dandam esse dico , quæ adstringat. Tritici quoque hemina in vino aminæo austero decoquitur ; idque triticum jejuno ac sitienti datur ; superque id vinum id sorbetur. quod jure valentissimis medicamentis annumerari potest. Atque etiam potui datur vinum Signinum , vel refinatum austerum , vel quodlibet austerum. Contunditurque cum corticibus , semi-

nibusque suis punicum malum, vinoque tali miscetur : idque vel merum sorbet aliquis, vel bibit mixtum. Sed medicamentis uti, nisi in vehementibus malis, supervacuum est.

CAPUT XX.

De vulvæ morbo.

Ex vulva quoque feminis vehemens malum nascitur : proximeque ab stomacho, vel afficitur hæc, vel corpus afficit. Interdum etiam sic exanimat, ut tanquam comitali morbo prosternat. Distat tamen hic casus, eo quod neque oculi vertuntur, nec spumæ profluunt, nec nervi distenduntur : sopor tantum est. Idque quibusdam feminis crebro revertens perpetuum est.

Ubi incidit, si satis virium est, sanguis missus adjuvat : si parum est, cucurbitulæ tamen defigendæ sunt in inguinibus. Si diutius aut jacet aut aliqui jacere consuevit, admoveere oportet naribus extinctum ex lucerna linamentum, vel aliud ex his, quæ foedioris esse odoris retuli, quod mulierem excitet. Idemque aquæ frigidæ perfusio efficit. Adjuvatque ruta contrita cum melle, vel ex cypri-
no ceratum, vel quodlibet calidum & humidum cataplasma, naturalibus pube tenus impositum. Inter hæc etiam perfricare coxas, & poplites oportet.

Deinde, ubi ad se rediit, circumcidendum vinum est in totum annum, etiamsi casus idem non revertitur. Frictione quotidie utendum totius quæ-

dem corporis , præcipue vero ventris , & poplitum. Cibus ex media materia dandus. Sinapi superimur ventrem tertio quoque aut quarto die imponendum , donec corpus rubeat.

Si durties manet , mollire commode videtur solanum in lac demissum , deinde contritum , & cera alba atque medulla cervina cum irino ; aut sebum taurinum vel caprinum cum rosa mixtum. Dandum potui etiam vel castoreum est , vel git , vel anethum. Si parum pura est , purgetur junco quadrato. Si vero vulva exulcerata est , ceratum ex rosa fiat : etiam recens suilla adeps , & ex ovis album misceatur , idque apponatur ; vel album ex ovo cum rosa mixtum , adjecto , quo facilius consistat , contritæ rosæ pulvere. Dolens vero ea sulphure suffumigari debet.

At , si purgatio nimia mulieri nocet , remedio sunt cucurbitulæ , cute incisa , iuguinibus vel etiam sub mammis admotæ. Si maligna purgatio est , subijcienda sunt * coercentia. Id faciunt etiam albæ olivæ , & nigrum papaver cum melle assumptum , & gummi cum trito semine apii liquatum , & cum cyatho passi datum.

Præter hæc , in omnibus vesicæ doloribus idoneæ potiones sunt , quæ ex odoribus fiunt , id est , spica nardi , croco , cinnamomo , casia , similibusque. Idemque etiam decocta lentiscus præstat. Si tamen intolerabilis dolor est , & sanguis profluit , etiam sanguinis detractio apta est ; aut certe coxis admotæ cucurbitulæ cute incisa.

De urinæ nimia profusione.

At cum urina super potionum modum etiam sine dolore profluens maciem & periculum facit ; si tenuis est , opus est exercitatione & frictione , maximeque in sole , vel ad ignem. Balneum rarum esse debet , neque longa in eo mora : cibus comprimens : vinum austerum meracum ; per æstatem , frigidum ; per hiemem , egelidum ; sed tantum , quantum minimum sit. Infima alvus quoque vel du-cenda vel lacte purganda est. Si crassa urina est , vehementior esse debet & exercitatio , & frictio : longior in balneo mora : cibus opus est teneris : vinum idem. In utroque morbo vitanda omnia sunt , quæ urinam movere consueverunt.

CAPUT XXI.

De seminis nimia ex naturalibus profusione.

EST etiam circa naturalia vitium , nimia profusio seminis , quod sine venere , sine nocturnis imaginibus sic fertur , ut , interposito spatio , tabe hominem consumat.

In hoc affectu salutare sunt vehementes frictiones , perfusiones , natationesque quam frigidissimæ : neque cibi , nec potio , nisi frigida assumpta. Oportet autem vitare cruditates , omnia infantia : nihil ex his assumere , quæ contrahere semen videntur ; qualia sunt , filigo , simila , ova , alica , amyllum , omnis caro glutinosa , piper , eruca , bulbi , nuclei

pinei. Neque alienum est, fovere inferiores partes aqua, decocta ex verbenis comprimentibus, ex iisdem aliqua cataplasmata imo ventri inguinibusque circumdarè; præcipueque ex aceto rutam. vitare etiam oportet, ne supinus obdormiat.

C A P U T XXII.

De coxarum morbis.

SUPEREST, ut ad extremas partes corporis veniam, quæ articulis inter se conferuntur. Initium a coxis faciam. Harum ingens dolor esse consuevit: isque hominem sæpe debilitat, & quosdam non dimittit. Eoque id genus difficillime curatur, quod fere post longos morbos vis pestifera huc se inclinat: quæ ut illas partes liberat, sic hanc ipsam quoque affectamprehendit.

Fovendum primum aqua calida est: deinde utendum calidis cataplasmatibus. Maxime prodesse videtur, aut cum hordeacea farina, aut cum ficu ex aqua decocta mixtus capparis cortex concisus; vel lolii farina ex vino diluto cocta, & mixta cum arida fæce. quæ quia refrigescunt, imponere noctu malagmata commodius est. Inulæ quoque radix contrita, & postea ex vino austero cocta, & late super coxam imposita, inter valentissima auxilia est. Si ista non solverunt, sale calido & humido utendum est.

Si ne sic quidem finitus dolor est, aut tumor ei accedit, incisa cute admovendæ sunt cucurbitulæ:

movenda urina : alvus, si compressa est, ducenda. Ultimum est, & in veteribus quoque morbis efficacissimum, tribus aut quatuor locis super coxam, cutem candentibus ferramentis exulcerare. Sed frictione quoque utendum est, maxime in sole, & eodem die sæpius, quo facilius ea, quæ coeundo nocuerunt, digerantur. Eaque, si nulla exulceratio est, etiam ipsis coxis : si est, ceteris partibus adhibenda est. Cum vero sæpe aliquid exulcerandum candenti ferramento sit, ut materia inutilis evocetur, illud perpetuum est, non, ut primum fieri potest, hujus generis ulcera sanare ; sed ea trahere, donec id vitium, cui per hæc opitulamur, conquiescat.

C A P U T XXIII.

De genuum dolore.

COXIS proxima genua sunt. in quibus ipsis nonnunquam dolor esse consuevit. In iisdem cataplasmatibus cucurbitulisque præsidium est : sicut etiam, cum in humeris, aliisque commissuris dolor aliquis exortus est. Equitare ei, cui genua dolent, inimicissimum omnium est. Omnes autem ejusmodi dolores, ubi inveteraverunt, vix citra unctionem finiuntur.

CAPUT XXIV.

De manuum & pedum articulorumque vitiis.

IN manibus pedibusque articulorum vitia frequentiora longioraque sunt. Quæ in podagricis chiragricisve esse consuerunt, ea raro vel castratos, vel pueros ante feminæ coitum, vel mulieres, nisi quibus menstrua suppressa sunt, tentant.

Ubi sentire cœperunt, sanguis mittendus est. id enim inter initia statim factum, sæpe annuam, nonnunquam perpetuam valetudinem bonam præstat. Quidam etiam, cum asinino lacte epoto se eluissent, in perpetuum hoc malum evaserunt. Quidam, cum toto anno a vino, mulso, venere sibi temperassent, securitatem totius vitæ consecuti sunt. idque utique post primum dolorem servandum est, etiamsi quievit. Quod si jam consuetudo ejus facta est, potest quidem aliquis esse securior his temporibus, quibus dolor se remisit: majorem vero curam adhibere debet his, quibus id revertitur. quod fere vere autumnove fieri solet.

Cum vero dolor non urget, mane gestari debet; deinde ferri, inambulatione levi se dimovere, &, si podagra est, interpositis temporibus exiguis, invicem modo sedere, modo ingredi; tum, antequam cibum capiat, sine balneo, loco calido leviter perfricari, sudare, perfundi aqua egelida: deinde cibum sumere ex media materia, interpositis rebus urinam moventibus, quotiesque plenior est, evomere.

Ubi dolor vehemens urget, interest, sine tumore is sit, an tumor cum calore, an tumor jam etiam occaluerit. Nam; si tumor nullus est, calidis fomentis opus est. Aquam marinam, vel muriam duram fervefacere oportet, deinde in pelvem con-
jicere, & cum jam homo pati potest, pedes demittere superque pallam dare, & vestimento tegere; paulatim deinde juxta labrum ipsum ex eadem aqua leviter infundere, ne calor intus destituat; ac deinde noctu cataplasmata calefacientia imponere, maximeque hibisci radicem ex vino coctam. Sin vero tumor calorque est, utiliora sunt refrigerantia, recteque in aqua quam frigidissima articuli continentur; sed neque quotidie, neque diu fiat, ne nervi indurescant. Imponendum vero est cataplasma, quod refrigeret: neque tamen in hoc ipso diu permanendum; sed ad ea transeundum, quæ sic reprimunt, ut emolliant.

Si major est dolor, papaveris cortices in vino coquendi, miscendique cum cerato sunt, quod ex rosa factum sit: vel ceræ & adipis suillæ tantundem una liquandum, deinde his vinum miscendum; atque ubi, quod ex eo impositum est, incaluit, detrahendum, & subinde aliud imponendum est.

Si vero tumores etiam occaluerunt, & dolent; levat spongia, quæ imposita subinde ex oleo, vel aceto, vel aqua frigida exprimitur; aut pari portione inter se mixta, pix, cera, alumen. Sunt etiam plura idonea manibus pedibusque malagmata. Quod si nihil superimponi dolor patitur, id, quod sine tumore est, fovere oportet spongia, quæ in aquam

calidam demittatur, in qua vel papaveris cortex, vel cucumeris silvestris radix decocta fit; tum inducere articulis crocum cum succo papaveris & ovillo lacte.

At si tumor est, foveri quidem debet aqua ege-
lida, in qua lentiscus, aliave ex reprimentibus ver-
bena decocta fit: induci vero medicamentum ex
nucibus amaris cum aceto tritis; aut ex cerussa,
cui contritæ herbæ muralis succus sit adjectus. La-
pis etiam, qui carnem exedit, quem *σαρκοφάγον*
Græci vocant, excisus sic, ut pedes capiat, de-
missos eos, cum dolent, retentosque ibi levare
consuevit. Ex quo in Asia lapidi Asio gratia est.

Ubi dolor & inflammatio se remiserunt, (quod
intra dies quadraginta fit, nisi vitium hominis ac-
cessit) modicis exercitationibus, abstinentia, un-
ctionibus lenibus utendum est sic, ut etiam acopo,
vel liquido cerato cyprino articuli perfricentur.
Equitare podagricis quoque alienum est.

Quibus vero articulorum dolor certis tempori-
bus revertitur, hos ante & curioso victu cavere
oportet, ne inutilis materia corpori supersit: &
crebriore vomitu, & si quis ex corpore metus est,
vel alvi ductione uti, vel lacte purgari. Quod Era-
sistratus in podagricis expulit: ne in inferiores par-
tes factus cursus pedes repleret: cum evidens sit,
omni purgatione non superiora tantummodo, sed
etiam inferiora exinaniri.

CAPUT XXV.

De refectiōe convalescentium a morbo.

EX quocunque autem morbo quis convalescit; si tarde confirmatur, vigilare prima luce debet; nihilominus in lecto conquiescere: circa tertiam horam leviter unctis manibus corpus permulcere. Deinde delectationis causa, quantum juvat, ambulare, circumcisa omni negotiosa cogitatione vel actione. Tum gestari diu: multa frictione uti: loca, cœlum, cibos sæpe mutare. Ubi triduo quadriduove vinum bibit, uno aut etiam altero die interponere aquam. Per hæc enim fiet, ne in vitia tabem inferentia incidat, & ut mature vires suas recipiat. Cum vero ex toto convaluerit, periculose vitæ genus subito mutabit, & inordinate aget. Paulatim ergo debebit, omiſſis his legibus, eo transire, ut arbitrio suo vivat.

A. CORN. CELSI
M E D I C I N Æ
LIBER QUINTUS.

P R Æ F A T I O.

DIXI de his malis corporis, quibus victus ratio maxime subvenit. nunc transeundum est ad eam medicinæ partem, quæ magis medicamentis pugnat. His multum antiqui auctores tribuerunt, & Erasistratus, & hi, qui se *ἐμπειρικούς* nominaverunt; præcipue tamen Herophilus, deductique ab illo viri; adeo ut nullum morbi genus sine his curarent. Multaque etiam de facultatibus medicamentorum memoriæ prodiderunt, qualia sunt vel Zenonis, vel Andreæ, vel Apollonii, qui Mys cognominatus est. Horum autem usum ex magna parte Asclepiades non sine causa sustulit; &, cum omnia fere medicamenta stomachum lædant, malique succi sint, ad ipsius victus rationem potius omnem curam suam transtulit. Verum, ut illud in plerisque morbis utilius est, sic multa admodum corporibus nostris incidere consuerunt, quæ sine medicamentis ad sanitatem pervenire non possunt. Illud ante omnia scire convenit, quod omnes medicinæ partes ita innexæ

sunt, ut ex toto separari non possint; sed ab eo nomen trahant, a quo plurimum petunt. Ergo ut illa, quæ victu curat, aliquando medicamentum adhibet; sic illa, quæ præcipue medicamentis pugnat, adhibere etiam rationem victus debet; quæ multum admodum in omnibus malis corporis proficit. Sed cum omnia medicamenta proprias facultates habeant, ac sæpe simplicia opitulentur, sæpe mixta; non alienum videtur ante proponere & nomina, & vires, & mixturas eorum: quo minor ipsam curationem exsequentibus mora sit.

C A P U T I.

De simplicibus facultatibus quarumcunque rerum, ex quibus medicamenta sunt: & primo de his, quæ sanguinem supprimunt.

SANGUINEM supprimunt, atramentum sutorium; quod Græci χάλκανθον appellant, chalcitis, acacia, & ex aqua lycium, tus, aloe, gummi, plumbum combustum, porrum, herba sanguinalis, creta vel cimolia vel figularis, misy, frigida aqua, vinum, acetum, alumen, melinum, squama & ferri & æris; atque hujus quoque duæ species sunt, alia tantum æris, alia rubri æris.

CAPUT II.

Quæ vulnus glutinent.

G LUTINANT vulnus, myrrha, tus, gummi, præcipueque acanthinum, psyllium, tragacantha, cardamomum, bulbi, lini semen, nasturtium, ovi album, gluten, ichthyocolla, vitis alba, contusæ cum testis suis cochleæ, mel coctum, spongia vel ex aqua frigida, vel ex vino, vel ex aceto expressa: ex iisdem lana succida; si levis plaga est, etiam aranea.

Reprimunt, alumen & scissile, quod *σχιστὸν* vocatur, & liquidum, melinum, auripigmentum, ærugo, chalcitis, atramentum futorium.

CAPUT III.

Quæ concoquant, & moveant pus.

C ONCOQUUNT & movent pus, nardum, myrrha, costus, balsamum, galbanum, propolis, styrax, turis & fuligo & cortex, bitumen, pix, sulphur, resina, sebum, adeps, oleum.

CAPUT IV.

Quæ aperiant vulnera.

V ULNERA aperiunt tanquam ora in corporibus; quod *ἀναστομοῦν* Græce dicitur, cinnamomum, balsamum, panaces, juncus quadratus, pulegium, flos albæ violæ, bdellium, galbanum, resina terebinthi-

na & pinea, propolis, oleum vetus, piper, pyrethrum, chamæpitys, uva taminia, sulphur, alumen, rutæ semen.

C A P U T V.

Quæ purgent.

PURGANT, ærugo, auripigmentum, quod ἀρσενικὸν a Græcis nominatur, (huic autem & sandarachæ in omnia eadem vis, sed validior est) squama æris, pumex, iris, balsamum, styrax, tus, turis cortex, refina, & pinea, & terebinthina liquida, œnanthe, lacerti sterminus, sanguis columbæ, & palumbi, & hirundinis, ammoniacum, bdellium (quod in omnia idem, quod ammoniacum, potest; sed valentius est) abrotonum, ficus arida, coccum Gnidium, scobis eboris, omphacium, radícula, coagulum, sed maxime leporinum, (cui eadem, quæ ceteris coagulis, facultas, sed utique validior est) fel taurinum, vitellus crudus, cornu cervinum, gluten, mel crudum, misy, chalcitis, crocum, uva taminia, spuma argenti, galla, squama æris, lapis hæmatites, minium, costum, sulphur, pix cruda, sebum, adeps, oleum, ruta, porrum, lenticula, ervum.

C A P U T VI.

Quæ rodant.

RODUNT, alumen liquidum, sed magis rotundum, ærugo, chalcitis, misy, squama æris, sed ma-

gis rubri, æs combustum, sandaracha, minium finopicum, galla, balsamum, myrrha, turis cortex, galbanum, resina terebinthina humida, piper utrumque, sed rotundum magis, cardamomum, auripigmentum, calx, nitrum, & spuma ejus, apii semen, narcissi radix, omphacium, alcyonium, oleum ex amaris nucibus, allium, mel crudum, vinum, lentiscus, squama ferri, fel taurinum, scammonia, uva taminia, cinnamomum, styrax, cicutæ semen, resina, narcissi semen, sal, nuges amaræ, oleumque earum, atramentum futorium, chrysocola, veratrum, cinis.

C A P U T VII.

Quæ exedant corpus.

EXEDUNT corpus, acaciæ succus, hebenus, ærugo, squama æris, chrysocola, cinis Cyprius, nitrum, cadmia, spuma argenti, hypocistis, diphryges, sal, auripigmentum, sulphur, eruca, sandaracha, salamandra, alcyonium, æris flos, chalcitis, atramentum futorium, ochra, calx, galla, alumen, lac caprifiei, vel lactucæ marinæ, quæ τισύμαλλος a Græcis nominatur, fel, turis fuligo, spodium, lentacula, mel, oleæ folia, marrubium, lapis hæmatites, & Phrygius, & Asius, & scissilis, misy, visum, acetum.

C A P U T V I I I.

Quæ adurant.

ADURUNT, auripigmentum, atramentum futo-
rium, chalcitis, misy, ærugo, calx, charta combu-
sta, sal, squama æris, fæx combusta, myrrha, ster-
cus & lacerti, & columbæ, & palumbi, & hiru-
dinis, piper, coccum Gnidium, allium, diphry-
ges, lac utrumque, (quod proximo capite supra
comprehensum est) veratrum & album & nigrum,
cantharides, corallium, pyrethrum, tus, salaman-
dra, eruca, sandaracha, uva taminia, chryfocolla,
ochra, alumen scissile, ovillum stercus, œnanthe.

C A P U T I X.

Quæ crustas ulceribus inducant.

EADEM fere crustas ulceribus tanquam igne adu-
stis inducunt, sed præcipue chalcitis, utique si cocta
est, flos æris, ærugo, auripigmentum, misy, & id
quoque magis coctum.

C A P U T X.

Quæ crustas ulceribus resolvant.

CRUSTAS vero has resolvit, farina triticea cum
ruta, vel porro, aut lenticula, cui mellis aliquid
adjectum est.

CAPUT XI.

Quæ discutiant ea, quæ in aliqua parte corporis coierunt.

AD discutienda vero ea, quæ in corporis parte aliqua coierunt, maxime possunt, abrotonum, hebenium, amaracus, alba viola, mel, lilium, sam-pfucus, cyperus, lac, fertula campana, serpyllum, cupressus, cedrus, iris, viola purpurea, narcissus, rosa, crocum, prasium, juncus quadratus, nardum, cinnamomum, casia, ammoniacum, cera, resina, uva taminia, spuma argenti, styrax, ficus arida, tragoriganus, lini & narcissi semen, bitumen, for-des ex gymnasio, pyrites lapis, aut molaris, crudus vitellus, amaræ nuces, sulphur.

CAPUT XII.

Quæ evocent, & educant.

EVOCAT & educit, ladanum, alumen rotundum, hebenus, lini semen, omphacium, fel, chalcitis, bdellium, resina terebinthina & pinea, propolis, ficus arida decocta, ster-cus columbæ, pumex, farina lolii, grossi in aqua cocti, elaterium, lauri bac-cæ, nitrum, sal.

CAPUT XIII.

Quæ exasperata lævent.

LÆVAT id, quod exasperatum est, spodium, hebenus, gummi, ovi album, lac, tragacanthum.

CAPUT XIV.

Quæ carnem nutriant, & ulcus impleant.

CARNEM alit, & ulcus implet, refina pinea, ochra Attice, mel, asteriace, cera, butyrum.

CAPUT XV.

Quæ molliant.

MOLLIUNT, æs combustum, terra Eretria, nitrum, papaveris lacrima, ammoniacum, bdellium, cera, sebum, adeps, oleum, ficus arida, sesamum, fertula campana, narcissi & radix & semen, rosæ folia, coagulum, vitellus crudus, amaræ nuces, medulla omnis, stimmi, pix, cochlea cocta, cicutæ semen, plumbi recrementum, σκωρίαν μολύβδου Græci vocant, panaces, cardamomum, galbanum, refina, uva taminia, styrax, iris, balsamum, fordes ex gymnasio, sulphur, butyrum, ruta.

CAPUT XVI.

Quæ cutem purgent.

CUTEM purgat mel, sed magis, si est cum galla; vel ervo, vel lenticula, vel marrubio, vel iride, vel ruta, vel nitro, vel ærugine.

CAPUT XVII.

De mixturis simplicium rerum; & de ratione ponderum.

EXPOSITIS simplicibus facultatibus, dicendum est, quemadmodum misceantur, quæ ex his fiant. Miscentur autem varie, neque hujus ullus modus est, cum ex simplicibus alia demantur, alia adjiciantur; iisdemque servatis, ponderum ratio mutetur. Itaque, cum facultatum materia non ita multiplex sit, innumerabilia mixturarum genera sunt; quæ comprehendi si possent, tamen esset supervacuum. Nam & iidem effectus intra paucas compositiones sunt, & mutare eas cuilibet, cognitis facultatibus, facile est. Itaque contentus his ero, quas accepi velut nobilissimas. In hoc autem volumine eas explicabo, quæ vel desiderari in prioribus potuerunt, vel ad eas curationes pertinent, quas protinus hic comprehendam; sic, ut tamen, quæ magis communia sunt, simul jungam. Si quæ singulis, vel etiam paucis accommodata sunt, in ipsorum locum deferam.

Sed & antea sciri volo, in uncia pondus de-

riorum septem esse. Unius deinde denarii pondus dividi a me in sex partes, id est, sex uncias, ut idem in uncia denarii habeam, quod Græci habent in eo, quem ὀβολὸν appellant. Is ad nostra pondera relatus paulo plus dimidio scrupulo facit.

Quid malagma, & emplastrum, & pastillus inter se differant.

Malagmata vero, atque emplastra, pastillique, quos τροχίσκους Græci vocant, cum plurima eadem habeant; differunt eo, quod malagmata maxime ex floribus eorumque etiam surculis, emplastra pastillique magis ex quibusdam metallicis fiunt. Deinde malagmata contusa abunde mollescunt; nam super integram cutem injiciuntur: laboriose vero continentur ea, ex quibus emplastra pastillique fiunt, ne lædant vulnera, cum imposita sunt. Inter emplastrum autem & pastillum hoc interest, quod emplastrum utique liquati aliquid accipit: in pastillo tantum arida medicamenta aliquo humore junguntur. Tum emplastrum hoc modo fit. Arida medicamenta per se teruntur: deinde mixtis his instillatur aut acetum, aut si quis alius non pinguis humor accessurus est; & ea rursus ex eo teruntur. Ea vero, quæ liquari possunt, ad ignem simul liquantur; & si quid olei misceri debet, tum infunditur. Interdum etiam aridum aliquod ex oleo prius coquitur. Ubi facta sunt, quæ separatim fieri debuerunt, in unum omnia miscentur. At pastilli hæc ratio est. Arida medicamenta contrita humore non pingui, ut vino vel aceto, coguntur, & rursus

coacta, inarescunt: atque, ubi utendum est, ejusdem generis humore diluuntur. Tum emplastrum imponitur, pastillus illinitur, aut alicui molliori, aut cerato miscetur.

C A P U T XVIII.

De malagmatis.

1. *Malagma adversus calidas podagras.*

HIS cognitis, primum malagmata subjiciam; quæ fere non sunt refrigerandi, sed calefaciendi causa reperta. Est tamen, quod refrigerare possit, ad calidas podagras aptum. Habet gallæ & immaturæ & alterius, coriandri seminis, cicutæ, lacrimæ aridæ, gummi, singulorum plenum acetabulum, cerati eloti, quod πεπλυμένον Græci vocant, felibram. Reliqua fere calefaciunt. Sed quædam digerunt materiam, quædam extrahunt, quæ ἐπισπαστικὰ vocantur: pleraque certis magis partibus membrorum accommodata sunt.

2. *Malagma ad materiam extrahendam.*

Si materia extrahenda est, ut in hydropico, in lateris dolore, in incipiente abscessu, in suppuratione quoque mediocri, aptum est id, quod habet refinæ aridæ, nitri, ammoniaci, galbani, singulorum P. * ceræ P. * Aut in quo hæc sunt: æruginis rasæ, turis, singulorum P. II. * ammoniaci falis P. VI. * squamæ æris, ceræ, singulorum P.

VIII. * resinæ aridæ P. XII. * aceti cyathus. Idem præstat cumini farina cum struthio, & melle P. II. *

3. *Malagma ad jecur dolens.*

Si jecur dolet, id in quo est balsami lacrimæ P. XII. * costi, cinnamomi, casia corticis, myrrhæ, croci, junci rotundi, balsami feminis, iridis illyricæ, cardamomi, amomi, nardi, singulorum P. XVI. * Quibus adjicitur nardinum unguentum, donec cerati crassitudo sit. Et hujus quidem recentis usus est: si vero servandum est, resinæ terebinthinæ P. XVI. * ceræ P. X * ex vino leni contunduntur, & cum eo miscentur.

4. *Malagma ad lienem.*

At, si lienis torquet, glandis, quam *μυροβάλανον* Græci vocant, cortex & nitrum paribus portionibus contunduntur, respergunturque aceto quam acerrimo: ubi cerati crassitudinem habet, linteo, antea in aqua frigida madefacto, illinitur, & sic imponitur, supraque farina hordeacea injicitur: sed manere ibi non amplius sex horis debet, ne lienem consumat: satiusque est id bis, aut ter fieri.

5. *Malagma commune pluribus.*

Commune autem & jecinori, & lieni, & abscessibus, & strumæ, parotidibus, articulis, calcibus quoque suppurantibus, aut aliter dolentibus, etiam concoctioni ventris, Lysias composuit ex his: opopanacis, galbani, resinæ, singulorum P. II. * ammoniaci, bdellii, ceræ, sevi taurini, iridis

aridæ P. iv. * cächryos acetabulo, piperis granis quadraginta. quæ contrita irino unguento temperantur.

6. *Malagma ad laterum dolores.*

Ad laterum autem dolores compositio est Apollphanis: in qua sunt resinæ terebinthinæ, turis fuliginis, singulorum P. iv. * bdellii, ammoniaci, iridis: sevi aut vitulini, aut caprini a renibus, visci, singulorum P. iv. * Hæc autem eadem omnem dolorem levant, dura emolliunt, mediocriter calefaciunt.

7. *Ad idem Andreæ.*

Ad idem latus Andreæ quoque malagma est, quod etiam resolvit, humorem educit, pus maturat, ubi id maturum est, cutem rumpit, & ad cicatricem perducit. Prodest impositum minutis majoribusque abscessibus: item articulis, ideoque & coxis, & pedibus dolentibus: item si quid in corpore collisum est, reficit: præcordia quoque dura & inflata emollit: ossa extrahit: ad omnia denique valet, quæ adjuvare calor potest. Id habet ceræ P. xi. * visci, fycamini, quam alias sycomorum vocant, lacrimæ, singulorum P. i. * piperis & rotundi, & longi, ammoniaci thymiamatis, bdellii, iridis Illyricæ, cardamomi, amomi xylobalsami, turis masculi, myrrhæ, resinæ aridæ, singulorum P. x. * pyrethri, cocci Gnidii, spumæ nitri, salis ammoniaci, radicis aristolochiæ Creticæ, cucumeris agrestis radicis, resinæ terebinthinæ liquidæ, sin-

gulorum P. xx. * quibus adjicitur unguenti irini, quantum satis est ad ea mollienda, atque cogenda.

8. *Malagma ad resolvenda, quæ adstricta sunt; & mollienda, quæ dura sunt; & digerenda, quæ coeunt.*

Præcipuum vero est ad resolvenda, quæ adstricta sunt, mollienda, quæ dura sunt, digerenda, quæ coeunt, id, quod ad Polyarchum auctorem refertur. Habet junci quadrati, cardamomi, turis fuliginis, amomi, ceræ, resinæ liquidæ, pares portiones.

9. *Aliud malagma ad eadem.*

Aliud ad eadem Nilei: crocomagmatis, quod quasi recrementum ejus est, P. iv. * ammoniaci thymiamatis, ceræ, singulorum P. xxx. * ex quibus duo priora ex aceto teruntur, cera cum rosa liquatur, & tum omnia junguntur.

10. *Malagma Moschi ad molliendum.*

Proprie etiam dura mollit id, quod Moschi esse dicitur. Habet galbani unciam, turis fuliginis P. iii. * ceræ, ammoniaci thymiamatis trientes, picis aridæ P. ii. * aceti heminas tres.

11. *Malagma Medi ad digerenda, quæ coeunt.*

Fertur etiam ad digerenda, quæ coeunt, sub auctore Medo: quod habet ceræ P. iii. * panacis P. * semis, squamæ æris, aluminis rotundi, item scissilis, singulorum P. i. * plumbi combusti P. i. * & semis.

12. *Malagma Panthemi ad eadem.*

Ad eadem Panthemus utebatur, calcis P. * feminis, sinapis contriti, item fœni græci, aluminis, singulorum P. i. * sevi bubuli P. ii. * & semis.

13. *Malagma ad strumas.*

Ad strumam multa malagmata invenio. Credo autem, quo pejus id malum est, minusque facile discutitur, eo plura esse tentata; quæ in personis varie responderunt. Andreas auctor est, ut hæc misceantur: urticæ feminis P. i. * piperis rotundi, bdellii, galbani, ammoniaci thymiamatis, resinæ aridæ, singulorum P. iv. * resinæ liquidæ, ceræ, pyrethri, piperis longi: lactucæ marinæ feminis, sulphuris ignem non experti, quod *ἀπυρον* vocatur, pares portiones.

14. *Aliud Miconis ad idem.*

Hoc autem Miconis est: fæcis aridæ aceti, spumæ nitri, salis ammoniaci, sinapis, cardamomi, radicis cucumeris silvestris, resinæ, singulorum P. iv. * Quæ ex leni vino contunduntur.

15. *Aliud malagma ad idem valens.*

Expeditius ad idem fit, quod habet visci, felini stercoreis, resinæ, sulphuris ignem non experti pares portiones. Et in quo est sulphuris P. i. * lapidis, quem pyriten vocant, P. iv. * cumini acetabulum. Item in quo est lapidis ejusdem pars una, sulphuris duæ partes, resinæ terebinthinæ partes tres.

16. *Malagma ad strumam, & phymata.*

Arabis autem cujusdam est ad strumam, & orientia tubercula, quæ φύματα vocantur, quod hæc digerit. Habet myrrhæ, salis ammoniaci, turis, resinæ & liquidæ & aridæ, crocomagmatis, ceræ, singulorum P. I. * lapidis ejus, quem πυρίτην vocant, P. IV. * quibus quidam adjiciunt sulphuris P. II. *

17. *Malagma ad strumam, & tubera, & καρκινώδη.*

Est etiam proficiens in struma; & in his tuberculis, quæ difficulter concoquuntur; & in his, quæ καρκινώδη vocantur, quod ex his constat: sulphuris P. II. * nitri P. IV. * myrrhæ P. VI. * fuliginis turis P. * semis, salis ammoniaci P. III. * ceræ P. I. *

18. *Malagma Protarchi ad parotidas, & favum, & mala ulcera.*

Protarchus autem ad παρωτίδας eaque tubercula, quæ μελικηρίδες, id est favi, vel φύματα nominantur, item mala ulcera, pumicis, resinæ pineæ liquidæ, turis fuliginis, spumæ nitri, iridis, singulorum P. VIII. * cum ceræ P. IX. * miscebat, hisque olei cyathum & dimidium adjiciebat.

19. *Malagma adversus panum, & phymata.*

At adversus panum, tum primum orientem, quod φύγεδλον Græci vocant, & omne tuberculum, quod φῦμα nominatur, miscetur ochra, quæ Attice nominatur, cum duabus partibus similæ, hisque, dum contunduntur, subinde mel instillatur, donec malagmatis crassitudo sit.

20. *Malagma adversus phymata.*

Discutit etiam omne tuberculum, quod $\phi\tilde{\upsilon}\mu\alpha$ vocatur, id, quod habet calcis, spumæ nitri, piperis rotundi, singulorum P. i. * galbani P. ii. * falis P. iv. * quæ excipiuntur cerato ex rosa facto.

21. *Malagma ad supprimendum omne, quod abscedit.*

Supprimitque omne, quod abscedit, id, in quo est galbani, fabæ fressæ, singulorum P. i. * myrrhæ, turis, corticis ex radice capparis, singulorum P. iv. * Satisque omnia abscedentia digerit murex combustus, & bene contritus, aceto subinde adjecto.

22. *Malagma ad sanguinem supprimendum.*

At, si plus satis sanguis subit, recte imponitur, quod adversus phymata quoque potest. Constat ex his: bdellii, styracis, ammoniaci, galbani, resinæ & aridæ & liquidæ pineæ; item ex lentisci, turis, iridis, singulorum P. ii. *

23. *Malagma ad carcinodas & phymata lenienda.*

Carcinodes vero & phymata commode his leniuntur: galbani, visci, ammoniaci, resinæ terebinthinæ singulorum P. i. * sevi taurini P. * semis, fæcis combustæ quam maxima portione, dum id siccius non faciat, quam esse malagma oportet.

24. *Malagma ad livorem faciei contusæ.*

Quod si facie contusa livor subcruentus est, hæc compositio nocte & die imposita tollit. Aristolo-

chiæ, thapsiæ, singulorum P. II. * bdellii, styracis, ammoniaci thymiamatis, galbani, resinæ aridæ, & ex lentisco liquidæ, turis masculi, iridis Illyricæ, ceræ, singulorum P. IV. * Item faba quoque imposita proficit.

25. *Malagmata ἀναστομωτικά ad aperiendum.*

Sunt etiam quædam malagmata, quæ ἀναστομωτικά Græci vocant, quoniam aperiendi vim habent. Quale est, quod ex his constat: piperis longi, spumæ nitri, singulorum P. II. * erysimi P. IV. * quæ cum melle miscentur. Idoneaque etiam strumæ aperiendæ sunt ejus generis. Vehementiusque ex his est id, quod habet calcis P. IV. * piperis grana sex, nitri, ceræ, singulorum P. X. * mellis P. III. * olei heminam.

26. *Miconis malagma, ad resolvendum aperiendumque ac purgandum.*

Miconis quoque est, quod resolvit, aperit, purgat. Habet alcyonium, sulphur, nitrum, pumicem, paribus portionibus; quibus tantum picis & ceræ adjicitur, ut fiat cerati crassitudo.

27. *Malagma ad ossa & nervos.*

Ad ossa autem Aristogenis, fit ex his: sulphuris P. I. * resinæ terebinthinæ, nitri spumæ, & ex scilla partis interioris, plumbi eloti, singulorum P. II. * turis fuliginis P. VIII. * ficus aridæ quam pinguis-
simæ, sevi taurini, singulorum P. VIII. * ceræ P. XII. * iridis Macedonicæ P. VI. * sesami fricti ace-

tabulum. maximeque nervis & articulis malagma hoc convenit.

28. *Malagma Euthylei ad articulos, & ad omnem dolorem.*

Igitur Euthylei est, & ad articulos, & ad omnem dolorem, & ad vesicæ, & ad recenti cicatrice contractos articulos, quas ἀγκύλας Græci nominant, conveniens. Quod habet fuliginis turis acetabulum, resinæ tantundem, galbani sine furculis fescunciam, ammoniaci, bdellii, singulorum P. * ceræ P. * semis. Aliud item fit, quod habet iridis, ammoniaci, galbani, nitri, singulorum P. XIV. * resinæ liquidæ P. VI. * ceræ P. XVI. *

29. *Malagma Sofagoræ ad dolores articulorum.*

Ad dolores articulorum Sofagoræ: plumbi combusti, papaveris lacrimæ, corticis hyoscyami, sty-racis, peucedani, sevi, resinæ, ceræ pares portiones.

30. *Chrysippi malagma, ad idem valens.*

Chrysippi: resinæ liquidæ, sandarachæ, piperis, singulorum P. XII. * quibus ceræ paululum adjicitur.

31. *Ctesiphontis malagma ad idem valens, & ad parotidas, & phymata, & strumam.*

Ctesiphontis: ceræ Creticæ, resinæ terebinthinæ, nitri quam ruberrimi, singulorum P. * semis, olei cyathi tres. Sed id nitrum ante per triduum, instillata aqua teritur, & cum sextario ejus incoquitur, donec omnis humor consumatur. Potest vero ea

compositio etiam ad parotidas, phymata, strumam, omnemque coitum humoris emolliendum.

32. *Malagma ad articulos.*

Ad articulos, fici quoque aridæ partem nepetæ mixtam; vel uvam taminiam sine feminibus cum pulegio recte aliquis imponit.

33. *Malagma Aristonis, adversus podagras, & recentia phymata, & omnes dolores.*

Eadem podagræ præsidio sunt. Sed ad eam fit Aristonis quoque, quod habet nardi, cinnamomi, casia, chamæleontis, junci rotundi, singulorum P. VIII. * fevi caprini ex irino liquati P. XX. iridis P. I. * quæ in aceto quam acerrimo jacere per XX dies debet. Idem autem etiam recentia phymata doloresque omnes discutit.

34. *Theoxeni malagma ad pedum dolores.*

At Theoxenus ad pedum dolores, fevi a renibus partem tertiam, salis partes duas miscebat, hisque membranulam illitam imponebat; tum superinjiciebat ammoniacum thymiama in aceto liquatum.

35. *Numenii malagma ad podagram, ceterosque articulos induratos.*

At Numenius podagram, ceterosque articulos induratos hoc mollebat: abrotoni, rosæ aridæ, papaveris lacrimæ, singulorum P. III. * resinæ terebinthinæ P. IV. * turis, spumæ nitri, singulorum P. VIII. iridis, aristolochiæ, singulorum P. XII. *

ceræ P. III. * quibus adjicitur cedri cyathus unus, olei laurini cyathi tres, olei acerbi sextarius.

36. *Dexii malagma, si quando callus in articulis increvit.*

Si quando autem in articulis callus increvit, Dexius docuit imponere, calcis P. IV. * cerussæ P. VIII. * resinæ pineæ P. XX. * piperis grana XXX, ceræ P. II. * Quibus, dum contunduntur, hemina vini lenis instillatur,

C A P U T XIX.

De emplastris.

EX emplastris autem nulla majorem usum præstant, quam quæ cruentis protinus vulneribus injiciuntur. *ἐναίμα* Græci vocant. Hæc enim reprimunt inflammationem, nisi magna vis eam cogit; atque illius quoque impetum minuunt; tum glutinant vulnera, quæ id patiuntur, & cicatricem iisdem inducunt. Constant autem ex medicamentis non pinguius, ideoque *ἀλίπαντα* a Græcis nominantur.

1. *Barbarum emplastrum nigrum, quod cruentis protinus vulneribus injicitur.*

Optimum ex his est, quod Barbarum vocatur. Habet æruginis rasæ P. XII. * spumæ argenti P. XX. * aluminis, picis aridæ, resinæ pineæ aridæ, singulorum P. I. * quibus adjiciuntur olei & aceti singulæ heminæ.

2. *Choacon emplastrum nigrum, ad idem valens.*

Alterum ad idem, quod Choacon vocant, habet

spumæ argenti P. x. * resinæ aridæ tantundem. sed spuma prius ex tribus olei heminis coquitur. His duobus emplastris color niger est. qui fere talis fit, ex pice atque resina: at ex bitumine nigerrimus; ex ærugine, aut æris squama, viridis; ex minio ruber; ex cerussa, albus.

3. *Basilicon emplastrum nigrum ad idem.*

Paucæ admodum compositiones sunt, in quibus aliquid mixturæ varietas novat. Ergo id quoque nigrum est, quod βασιλικὸν nominatur. Habet opopanacis P. i. galbani P. ii. * picis, & resinæ, singulorum P. x. * olei dimidium cyathum.

4. *Smaragdinum emplastrum ad idem.*

At, quod perviride est, smaragdinum appellatur: in quo sunt resinæ pineæ P. iii. * ceræ P. i. * æruginis P. * semis, turis fuliginis P. ii. * olei tantundem, & aceti, quo fuligo & ærugo in unum cogantur.

5. *Emplastrum rufum ad idem.*

Est etiam coloris fere rufi, quod celeriter ad cicatricem vulnera perducere videtur. Habet turis P. i. * resinæ P. ii. * squamæ æris P. iii. * spumæ argenti P. xx. * ceræ P. c. * olei heminam.

6. *Παρακολλητικὸν emplastrum ad idem.*

Præterea est, quod παρακολλητικὸν a glutinando vocant. Constat ex his: bituminis, aluminis scissilis P. iv. * spumæ argenti P. iv. * & olei veteris hemina.

7. *Cephalicum emplastrum Philotæ, capiti conveniens.*

Præterea sunt quædam generis ejusdem, quæ, quia capitibus fractis maxime conveniunt, κεφαλικά a Græcis nominantur. Philotæ compositio habet terræ Eretriæ, chalcitidis, singulorum P. IV. * myrrhæ, æris combusti, singulorum P. X. * ichthyocollæ P. VI. * æruginis rasæ, aluminis rotundi, misyos crudi, aristolochiæ, singulorum P. VIII. * squamæ æris P. XX. * turis masculi P. II. * ceræ P. I. * rosæ, & olei acerbi, ternos cyathos, aceti quantum satis est, dum arida ex eo conteruntur.

8. *Emplastrum viride ad idem valens.*

Aliud ad idem viride. Æris combusti, squamæ æris, myrrhæ, ichthyocollæ, singulorum P. VI. * misyos crudi, æruginis rasæ, aristolochiæ, aluminis rotundi, singulorum P. VIII. * ceræ P. VI. * olei hemina, aceti quod satis sit.

9. *Tetrapharmacum emplastrum, ad pus movendum.*

Puri autem movendo non aliud melius, quam quod expeditissimum est. Τετραφάρμακον a Græcis nominatur. Habet pares portiones ceræ, picis, resinæ, sevi taurini; si id non est, vitulini.

10. *Enneapharmacum emplastrum, ad pus movendum, & ad purgandum valens.*

Alterum ad idem, ἐννεαφάρμακον nominatur; quod magis purgat. Constat ex novem rebus, cera, melle, sevo, resina, myrrha, rosa, medulla vel cer-

vina, vel vitulina, vel bubula, œsypo, butyro: Quorum quoque pondera paria miscentur.

11. *Emplastra, quibus utriusque rei facultas est.*

Sunt autem quædam emplastra, quibus utriusque rei facultas est. quæ, nisi singula habenda sunt, meliora sunt; sed in copia rejicienda sunt; his potius adhibitis, quæ id proprie, quod eo tempore opus est, consequuntur. Exempli causa duo proponam.

Attalum emplastrum ad vulnera.

Est igitur ad vulnera Attalum: quod habet squamæ æris P. VI. * turis fuliginis. P. XV. * ammoniaci tantundem, resinæ terebinthinæ liquidæ P. XXV. * sevi taurini tantundem, aceti heminas tres, olei sextarium.

Judæi emplastrum, fracto capiti accommodatum.

At inter ea, quæ fracto capiti accommodantur; habent quidam id, quod ad auctorem Judæum refertur. Constat ex his: salis P. IV. * squamæ æris rubri, æris combusti, singulorum P. XII. * ammoniaci thymiamatis, turis fuliginis, resinæ aridæ, singulorum P. VI. * resinæ Colophoniacæ, ceræ, sevi vitulini curati, singulorum P. XX. * additur aceti sesquicyathus, olei minus cyatho. Τετραπευμένα Græci appellant, quæ curata vocamus; cum ex sevo puta omnes membranulæ diligenter exemptæ sunt, aut ex alio medicamento.

12. *Emplastra ἐπισπαστικά.*

Sunt etiam quædam emplastra nobilia ad extrahendum. quæ ipsa quoque ἐπισπαστικά nominantur. Quale est, quod, quia lauri baccas habet, διὰ δαφνίδων appellatur. In eo est, resinæ terebinthinæ P. x. * nitri, ceræ, picis aridæ, baccarum lauri, singulorum P. xx. * olei paulum. Quoties autem baccam, aut nucem, aut simile aliquid posuero, scire oportebit, antequam expendatur, ei summam pelliculam esse demendam.

13. *Aliud, διὰ δαφνίδων, ad extrahendum, & pus movendum.*

Aliud eo nomine, quod puri quoque movendo est. Sevi vitulini, ammoniaci thymiamatis, picis, ceræ, nitri, baccarum lauri, resinæ aridæ, aristolochiæ, pyrethri, pares portiones.

14. *Philocratis emplastrum, ad extrahendum, & pus movendum.*

Præter hæc, est Philocratis: quod habet salis ammoniaci P. vii. * aristolochiæ P. viii. * ceræ, resinæ terebinthinæ, fuliginis turis, singulorum P. xv. * spumæ argenti P. xxxii. * Quibus, ut pus quoque moveant, iridis P. iii. * galbani P. vi. * adjiciuntur.

15. *ῥυπῶδες emplastrum, ad extrahendum.*

Optimum tamen ad extrahendum est id, quod a similitudine sordium ῥυπῶδες Græci appellant. Ha-

bet myrrhæ, croci, iridis, propolis, bdellii, capitulorum punici mali, aluminis & scissilis & rotundi, misyos, chalcitidis, atramenti futorii cocti, panacis, salis ammoniaci, visci, singulorum P. IV. * aristolochiæ P. VIII. * squamæ æris P. XVI. * resinæ terebinthinæ P. LXXV. * ceræ, & sevi vel taurini vel hircini, singulorum P. c. *

16. *Emplastrum Hecatæi, ad extrahendum.*

Hecatæo quoque auctore emplastrum generis ejusdem fit ex his : galbani P. II. * fuliginis turis P. IV. * picis P. VI. * ceræ, & resinæ terebinthinæ, singulorum P. VIII. * quibus paulum irini unguenti miscetur.

17. *Alexandrinum emplastrum viride, ad extrahendum.*

Valensque ad idem emplastrum viride Alexandrinum est. Habet aluminis scissilis P. VIII. * salis ammoniaci P. VII. * squamæ æris P. XVI. * myrrhæ, turis, singulorum P. XVIII. * ceræ P. CL. resinæ Colophoniacæ aut pineæ P. CXC. * olei heminam, aceti sextarium.

18. *De emplastris exedentibus.*

Quædam autem sunt emplastra exedentia, quæ σιπτικὰ Græci vocant. quale est id, quod habet resinæ terebinthinæ, fuliginis turis, singulorum P. II. * squamæ æris P. I. * ladani P. II. * aluminis tantundem, spumæ argenti P. IV. *

19. *Emplastrum, quod exest corpus, ossa resolvit, & supercrescentem carnem coerces.*

Exest etiam vehementer corpus, atque ossa quoque resolvit, & supercrescentem carnem coerces id, quod habet spumæ argenti, squamæ æris, uncias singulas; nitri ignem non experti, lapidis Afii, aristolochiæ P. sextantes, ceræ, resinæ terebinthinæ, turis, olei veteris, atramenti futorii, salis ammoniaci P. semis, æruginis rasæ P. bessem, aceti scillitici heminam, vini aminæi tantundem.

20. *Emplastra adversus morsus, & alia recentiora vulnera.*

Emplastrum Diogenis nigrum.

Sunt etiam adversus morsus quædam accommodata; quale est Diogenis nigrum: quod habet bituminis, ceræ, resinæ pineæ aridæ, singulorum P. xx. * spumæ argenti P. c. * olei sextarium. Aut in quo sunt squamæ æris P. iv. * cerussæ, & æruginis rasæ, singulorum P. viii. * ammoniaci P. xii. * ceræ, resinæ pineæ, singulorum P. xxv. * spumæ argenti P. c. * olei sextarium. Aut in quo sunt squamæ æris P. xiv. galbani P. vi * cerussæ, & æruginis rasæ, singulorum P. viii. * ammoniaci P. xii. ceræ, resinæ pineæ, singulorum P. lv. * ex quibus spuma argenti concoquitur.

21. *Ephesium emplastrum rubrum, ad idem valens.*

Rubrum quoque emplastrum, quod Ephesium vocatur, huc aptum est. Habet resinæ terebinthi-

næ P. II. * galbani P. IV. * minii sinopici P. VI. * turis fuliginis P. VI. * ceræ P. VIII. * spumæ argenti P. LVI. * olei veteris heminam.

22. *Aliud emplastrum, ad idem valens.*

Item id, quod ex his constat; squamæ æris, turis fuliginis, singulorum P. IV. * galbani P. VI. * salis ammoniaci P. XII. z * ceræ P. XXV. * olei tribus heminis. Hæc autem aliis quoque recentioribus vulneribus recte imponuntur.

23. *Λευκὰ emplastra, non gravibus vulneribus accommodata, & maxime senilibus.*

Sunt etiam alba lenia, λευκὰ Græci vocant, fere non gravibus vulneribus accommodata, præcipueque senilibus. Quale est, quod habet cerussæ P. LII. * sevi vitulini curati, & ceræ, singulorum P. LVIII. * olei heminas tres, ex quibus ea cerussa coquitur.

24. *Elephantinum emplastrum.*

Aliud, quod habet cerussæ P. XX. * ceræ P. LV. * olei heminam, aquæ sextarium. Quæ quoties adjiciuntur cerussæ vel spumæ argenti, scire licet, illa ex his coquenda esse. Est autem ea percandida compositio, quæ supra posita est, ideoque elephantina nominatur.

25. *Lenia emplastra.*

Lenia quoque quædam emplastra sunt, quas λιπαρὰς fere Græci nominant; ut id, quod habet minii P. IV. * spumæ argenti P. XXV. * ceræ, &

adipis suillæ, singulorum P. xxxv. * vitellos quatuor.

26. *Emplastrum lene.*

Alia compositio generis ejusdem : ceræ, resinæ terebinthinæ, singulorum P. v. * cerussæ P. viii. * spumæ argenti, plumbi recrementi, (σκαρίαν μολύβδου Græci vocant) singulorum P. x. * cicini olei, & myrtei, singulorum heminæ.

27. *Archagathi emplastrum lene.*

Tertia, quæ ad auctorem Archagathum refertur : misyos cocti, æris combusti, singulorum P. iv. * cerussæ coctæ P. viii. resinæ terebinthinæ P. x. * spumæ argenti P. vi. *

28. *Emplastra ejusdem generis, ad leniendum apta.*

Etiamnum generis ejusdem : spumæ argenti, ceræ, adipis suillæ, singulorum P. xxvii. * vitelli cocti quatuor, rosæ hemina. Aut cerati ex oleo myrteo facti partes tres, adipis suillæ pars quarta, paulum ex plumbi recremento. Aut : spumæ argenti selibra, ex olei hemina, & aquæ marinæ altera, cocta donec bullire desierit, cui paulum ceræ sit adjectum. Aut : pares portiones ceræ, sevi, stibii, spumæ argenti, cerussæ.

CAPUT XX.

De pastillis.

Et primo de his, qui ad recentia vulnera glutinanda, sanandaque apti sunt.

PASTILLI quoque facultates diversas habent. Sunt enim ad recentia vulnera glutinanda sanandaque apti. Qualis est, qui habet chalcitidis, mysos, spumæ nitri, floris æris, gallæ, aluminis scissilis modice cocti, singulorum P. I. * æris combusti, capitulorum mali punici, singulorum P. III. * Hunc oportet diluere aceto, ac sic, ubi vulnus glutinandum est, illinire. At, si nervosus aut musculosus is locus est, commodius est cerato miscere, sic ut illius octo partes, nona hujus sit.

1. Alius pastillus ad glutinanda vulnera.

Alius ad idem. Constat ex his: bituminis, aluminis scissilis, singulorum P. I. * æris combusti P. IV. * spumæ argenti P. XI. * olei sextario.

2. De sphragide pastillo, quem Polybus confecit ad glutinandum vulnus.

Sed longe Polybi celeberrimus est: σφραγὶς autem nominatur. Qui habet aluminis scissilis P. IV. * atramenti futorii P. II. * myrrhæ P. V. * aloes tantundem, capitulorum punici mali, fellis taurini, singulorum P. VI. * quæ contrita vino austero excipiuntur.

3. *Pastillus ad ulcera sordida, & nigritiem in auribus, naribus, & in obscœnis partibus, inflammationesque eorum.*

Ad ulcera sordida, & nigritiem in auribus, naribus, obscœnis partibus, inflammationesque eorum: chrysocollæ P. I. * atramenti futorii, aluminis scissilis, singulorum P. II. * halicacabi corticis P. IV. * minii P. VI. * spumæ argenti P. XII. * cerussæ P. XVI. * quæ ex aceto & coguntur, &, ubi utendum est, diluuntur.

4. *Pastillus Andronis ad uvam inflamatam, ad naturalia sordida, etiam cancro laborantia.*

Andronis vero est ad uvam inflamatam, ad naturalia sordida, etiam cancro laborantia: gallæ, atramenti futorii, myrrhæ, singulorum P. I. * aristolochiæ, aluminis scissilis, singulorum P. II. * capitulorum punici mali P. XXV. * ex passo coactorum, &, cum usus exigit, aceto vel vino dilutorum, prout valentius aut lenius vitium est, cui medendum est.

5. *Pastillus ad fissa ani, vel ora venarum fundentia sanguinem, vel cancrum.*

Proprie autem ad ani fissa, vel ora venarum fundentia sanguinem, vel cancrum: æruginis P. II. * myrrhæ P. IV. * gummi P. VIII. turis P. XII. * stibii, lacrimæ papaveris, acaciæ, singulorum P. XVI. * quæ ex vino & teruntur, & in ipso usu deliquantur.

6. *Pastillus ad expellendum calculum cum urina.*

Expellere autem ex vesica cum urina calculum videtur hæc compositio : casiae, croci, myrrhæ, costi, nardi, cinnamomi, dulcis radicis, balsami, hyperici pares portiones conteruntur ; deinde vinum lene instillatur, & pastilli fiunt, qui singuli habeant P. i. * hique singuli quotidie mane jejuno dantur.

CAPUT XXI.

De pessis.

HÆC tria compositionum genera, id est, quæ in malagmatis, emplastris pastillisque sunt, maximum præcipueque varium usum præstant. Sed alia quoque utilia sunt : ut ea, quæ feminis subjiciuntur. Περσους Græci vocant. Eorum hæc proprietas est : medicamenta composita molli lana excipiuntur, eaque lana naturalibus conditur.

1. *Ad sanguinem evocandum.*

Ad sanguinem autem evocandum, cauneis duabus adjicitur nitri P. i. * aut allii semen conteritur, adjicitur myrrhæ paululum, & unguento fusino miscetur. Aut cucumeris silvestris pars interior ex lacte muliebri diluitur.

2. *Ad vulvam molliendam.*

Ad vulvam molliendam, ovi vitellus, & foenum Græcum, & rosa, & crocum temperantur. Aut ela-

terii P. III. * salis tantundem, uvæ taminiae P. VI * melle excipiuntur.

3. *Alia pessi compositio, ad idem valens.*

Aut Boetho auctore, croci, resinæ terebinthinæ, singulorum P. IV. myrrhæ P. III. * rosæ P. I. *. sevi vitulini P. III. * ceræ P. II. * miscentur.

4. *Ad inflammationes vulvæ Numenii pessus.*

Optima autem adversus inflammationes vulvæ Numenii compositio est, quæ habet croci P. III. * ceræ P. I. * butyri P. VIII. * adipis anserinæ P. XII. * vitellos coctos duos, rosæ minus cyatho.

5. *Ad ejiciendum e vulva infantem mortuum.*

Si vero infans intus decessit, quo facilius ejiciatur, malicorium ex aqua terendum, eoque utendum est.

6. *Si mulier vitio locorum concidit, qua curatione utendum sit.*

Si concidere vitio locorum mulier solet, cochleæ cum testis suis comburendæ, conterendæque, deinde his mel adjiciendum est.

7. *Si mulier non comprehendit.*

Si non comprehendit, adeps leonina ex rosa mollienda est.

CAPUT XXII.

De medicamentis, quibus aridis utimur.

I. Ad carnem supercrescentem exedendam.

QUÆDAM autem mixturæ medicamentorum sunt, quibus aridis neque coactis utimur sic, ut inspergamus; aut cum aliquo liquido mixta illinamus: quale est, ad carnem supercrescentem exedendam, quod habet squamæ æris, fuliginis turis, singulorum P. I. * æruginis P. II. * Hæc autem eadem cum melle purgant ulcera; cum cera, implent. Misy quoque & galla, si paribus portionibus misceantur, corpus consumunt: eaque vel arida inspergere licet, vel excepta cadmia illinire.

2. Ad putrem carnem continendam, ne ultra serpat; eamque leniter exedendam, plures compositiones.

Putrem vero carnem continet, neque ultra serpere patitur, & leniter exest, mel vel cum lentacula, vel cum marrubio, vel cum oleæ foliis, ante ex vino decoctis. Item fertula campana in mulso cocta, deinde contrita. Aut calx cum cerato. Aut amaræ nuces cum allio, sic ut hujus pars tertia sit, paulumque his croci adjiciatur. Aut quod habet spumæ argenti P. VI. * cornu bubuli combusti P. XII. * olei myrtei, & vini cyathos ternos. Aut quod ex his constat: floris punici mali, atramenti futorii, aloes, singulorum P. II. * aluminis scissilis, turis, singulorum P. IV. * gallæ P. VIII. * aristolo-

chiæ P. x. * Vehementius idem facit, etiam adurendo, auripigmentum cum chalcitide, & aut nitro, aut calce, aut charta combusta. Item sal cum aceto. Vel ea compositio, quæ habet chalcitidis, capitulorum mali punici, albes, singulorum P. II. *. aluminis scissilis, turis, singulorum P. IV. * gallæ P. VIII. * aristolochiæ P. x. *. mellis quantum satis sit ad ea cogenda. Vel cantharidum, sulphuris, singulorum P. I. * lolii P. III. * quibus adjicitur picis liquida quantum satis est ad jungendum. Vel chalcitis quoque cum resina & ruta mixta: aut cum eadem resina diphryges: aut uva taminia cum pice liquida. Idem vero possunt fæces vini combustæ, & calcis & nitri pares portiones. Vel aluminis scissilis P. I. turis, sandarachæ, nitri, singulorum P. I. * gallæ P. VIII. * aristolochiæ P. x. * mellis quantum satis est.

3. *Hieræ compositio.*

Est etiam Hieræ compositio, quæ habet myrrhæ, chalcitidis, singulorum P. II. * aloes, turis, aluminis scissilis, singulorum P. IV. * aristolochiæ, gallæ immaturæ, singulorum P. VIII. * malicorii contriti P. XX. *

4. *Judæi compositio.*

Est & Judæi: in qua sunt calcis partes duæ, nitri quam ruberrimi pars tertia: quæ urina impuberis pueri coguntur, donec strigmenti crassitudo sit. Sed subinde is locus, cui id illinitur, madefaciendus est.

5. *Jollæ compositio.*

At Jollas, chartæ combustæ, sandarachæ, singulorum P. I. * calcis P. II. P. auripigmenti tantundem miscebat.

6. *Ad sanguinis profluvia vel ex membrana cerebri, vel aliis locis; & ad cancrum, & ad inducendam cicatricem, & ad coercendam carnem increfcentem.*

Si vero ex membrana, quæ super cerebrum est, profluit sanguis, vitellus combustus & contritus inspergi debet. Si ex alio loco sanguinis profluvium est, auripigmenti, squamæ æris, singulorum P. I. * sandarachæ P. II. * marmoris cocti P. IV. * inspergi debent. Eadem cancro quoque obsistunt. Ad inducendam cicatricem, squamæ æris, turis fuliginis, singulorum P. II. * calcis P. IV. * Eadem increfcentem quoque carnem coercent.

7. *Timæi compositio ad ignem sacrum, vel cancrum.*

Timæus autem ad ignem sacrum, vel ad cancrum his utebatur: myrrhæ P. II. * turis, atramenti futorii, singulorum P. III. * sandarachæ, auripigmenti, squamæ æris, singulorum P. IV. * gallæ P. VI. * cerussæ combustæ P. VIII. * Eadem vel arida inspersa, vel melle excepta idem præstant.

8. *Ad sternutamenta excitanda.*

Sternutamenta vero & albo veratro, vel struthio coniecto in nares excitantur, vel his mixtis: piperis, veratri albi, singulorum P. * III. castorei P. I. * spumæ nitri P. II. * struthii P. III.

9. *Gargarizationes quibus fieri debeant.*

Gargarizationes autem aut lævandi causa fiunt, aut reprimendi, aut evocandi. Lævant, lac, cremor vel ptisanæ, vel furfurum. Reprimit aqua, in qua vel lenticula, vel rosa, vel rubus, vel cotoneum malum, vel palmulæ decoctæ sunt. Evocant, sinapi, piper.

C A P U T XXIII.

De antidotis, & quibus malis opitulentur.

ANTIDOTA raro, sed præcipue interdum necessaria sunt, quia gravissimis casibus opitulantur. Ea recte quidem dantur collisis corporibus vel per ictus, vel ubi ex alto deciderunt, vel in viscerum, laterum, faucium, interiorumque partium doloribus. Maxime autem desideranda sunt adversus venena, vel per morsus, vel per cibos, aut potiones nostris corporibus inserta.

I. *Compositio antidoti.*

Unum est, quod habet lacrimæ papaveris P. * z. acori, malobathri P. v. * iridis Illyricæ, gummi, singulorum P. II. * anisi P. III. * nardi Gallici, foliorum rosæ aridorum, cardamomi, singulorum P. IV. * petroselini P. * III. z. trifolii P. v. * casiaæ nigrae, filis, bdellii, balsami feminis, piperis albi, singulorum P. * z. styracis P. * v. z. myrrhæ, opopanacis, nardi Syri, turis masculi, hypocistidis succi, singulorum P. VI. * castorei P. VI. * costi,

piperis albi, galbani, resinæ terebinthinæ, croci, floris junci rotundi, singulorum P. VI. * z. dulcis radicis P. VIII. * z. quæ vel melle vel passo excipiuntur.

2. *Aliud antidotum Ambrosia nominatum, quod Zopyrus Ptolemæo regi composuit.*

Alterum, quod Zopyrus regi Ptolemæo dicitur composuisse, atque Ambrosiam nominasse, ex his constat: costi, turis masculi, singulorum P. v. * piperis albi P. * z. floris junci rotundi P. II. * cinnamomi P. III. * casia nigræ P. IV. * croci Cilicii P. * IV. z. myrrhæ, quam staeten nominant, P. v. * nardi Indici P. * v. z. quæ singula contrita melle cocto excipiuntur: deinde, ubi utendum est, id, quod Ægyptiæ fabæ magnitudinem impleat, in portione vini diluitur.

3. *Antidotum Mithridatis.*

Nobilissimum autem est Mithridatis, quod quotidie sumendo rex ille dicitur adversus venenorum pericula tutum corpus suum reddidisse. In quo hæc sunt: costi P. * z. acori P. v. * hyperici, cumini, sagapeni, acaciæ succi, Hydus Illyricæ, cardamomi, singulorum P. II. * anisi P. III. * nardi Gallici, gentianæ radicis, aridorum rosæ foliorum singulorum P. IV. * papaveris lacrimæ, petroselini, singulorum P. * IV. z. casia, fileris, lolii, piperis longi, singulorum P. VI. * styracis P. * v. z. castorei, turis, hypocistidis succi, myrrhæ, opopanax, singulorum P. VI. * malobathri folii P. VI. * floris junci

rotundi, refinæ terebinthinæ, galbani, dauci Cre-
tici feminis, singulorum P. * v. z. nardi, opobal-
fami, singulorum P. * VI. z. thlaspis P. * VI. radice
Ponticæ P. VII. * croci, zinziberis, cinnamomi,
singulorum P. * VIII. Hæc contrita melle excipiun-
tur, & adversus venenum, quod magnitudinem
nucis Græcæ impleat, ex vino datur. In ceteris au-
tem affectibus corporis pro modo eorum, vel quod
Ægyptiæ fabæ, vel ervi magnitudinem impleat,
fatis est.

C A P U T XXIV.

De acopis.

1. *Acopum nervis utile.*

ACOPA quoque utilia nervis sunt. Quale est;
quod habet floris junci rotundi P. II. * zz. costi,
junci quadrati, lauri baccarum, ammoniaci, carda-
momi, singulorum P. * IV. z. myrrhæ, æris com-
busti, singulorum P. VII. * iridis Illyricæ, ceræ,
singulorum P. IV. * Alexandrini calami, junci ro-
tundi, aspalathi, xylobalsami, singulorum P. XVIII.
* sevi P I. * unguenti irini cyathum.

2. *Acopum Elæodes, nervis utile.*

Alterum, quod ἐλαϊώδες vocant, hoc modo fit:
ceræ P. * z. olei tantundem, refinæ terebinthinæ ad
nucis juglandis magnitudinem, simul incoquuntur:
deinde infusa in mortario teruntur, instillaturque
subinde quam optimi mellis acetabulum, tum irini
unguenti, & rosæ terni cyathi.

3. *Ἐγχρίστα ad ulcera purganda & implenda.*

Ἐγχρίστα autem Græci vocant liquida, quæ illi-
nuntur. Quale est, quod fit ad ulcera purganda &
implenda, maxime inter nervos, paribus portioni-
bus inter se mixtis, butyri, medullæ vitulinæ, sevi
vitulini, adipis anserinæ, ceræ, mellis, resinæ te-
rebinthinæ, rosæ, olei cicini. Quæ separatim omnia
liquantur, deinde liquida miscentur, & tum simul
teruntur. Et hoc quidem magis purgat: magis vero
emollit, si pro rosa cyprus infunditur.

4. *Ad sacrum ignem.*

Ad sacrum ignem: spumæ argenti P. VI. * cornu
bubuli combusti P. II. * conteruntur, adjiciturque
invicem vinum, & id, quod specialiter sil voca-
tur, & myrteum, donec utriusque terni cyathi
conficiantur.

C A P U T XXV.

De catapotiis.

1. *Catapotium ad somnum arcessendum, & levationem
doloris, & simul ad concoquendum.*

CATAPOTIA quoque multa sunt, variisque de
causis fiunt. Ἀνώδυνα vocant, quæ somno dolorem
levant. Quibus uti, nisi nimia necessitas urget, alie-
num est. Sunt enim ex vehementibus medicamentis,
& stomacho alienis. Potest tamen etiam ad conco-
quendum, quod habet papaveris lacrimæ, galbani,

singulorum P. I. * myrrhæ, castorei, piperis, singulorum P. II. * Ex quibus, quod ervi magnitudinem habet, fatis est devorasse.

2. *Catapotium valentius ad somnum.*

Alterum, stomacho pejus, ad somnum valentius, ex his fit: mandragoræ P. * z. apii feminis, item hyoscyami feminis, singulorum P. IV. * quæ ex vino teruntur. Unum autem ejusdem magnitudinis, quæ supra posita est, abunde est sumfisse.

3. *Catapotium ad plurimos dolores per somnum leniendos.*

Sive autem capitis dolores, sive ulcera, sive lipitudo, sive dentes, sive spiritus difficultas, sive intestinorum tormenta, sive inflammatio vulvæ est, sive coxa, sive jecur, aut lienis, aut latus torquet, sive vitio locorum aliqua prolabitur & obmutescit, occurrit dolori per quietem ejusmodi catapotium. Silis, acori, rutæ silvestris feminis, singulorum P. II. * castorei, cinnamomi, singulorum P. II. * papaveris lacrimæ, panacis radices, mandragoræ majorum aridorum, junci rotundi floris, singulorum P. II. * piperis grana LVI. Hæc per se contrita, rursus instillato subinde passo, simul omnia teruntur, donec crassitudo sordium fiat. Ex eo paulum aut devoratur, aut aqua diluitur, & potui datur.

4. *Catapotium aliud ad multa valens.*

Quin etiam silvestris papaveris, cum jam ad excipiendam lacrimam maturum est, manipulus, qui

manu comprehendi potest, in vas demittitur, & superinfunditur aqua, quæ id contegat, atque ita coquitur. Ubi jam bene manipulus is coctus est, ibidem expressus projicitur; & cum eo humore passum pari mensura miscetur, infervetque, donec crassitudinem fordium habeat. Cum infrixit, catapotia ex eo fiunt, ad nostræ fabæ magnitudinem, habentque usum multiplicem. Nam & somnum faciunt, vel per se assumpta, vel ex aqua data: & aurium dolores levant, adjectis exiguo modo rutæ succo, ac passo: & tormina supprimunt ex vino liquata: & inflammationem vulvæ coercent, mixta cerato ex rosa facto, cum paulum his croci quoque accessit: & ex aqua fronti induccta, pituitam in oculos decurrentem tenent.

5. *Catapotium ad inducendum somnum, quem vulva dolens prohibuit.*

Item, si vulva dolens somnum prohibet, croci P. II. * anisi, myrrhæ, singulorum P. I. * papaveris lacrimæ P. IV. * cicutæ feminis P. VIII. * miscentur, excipiunturque vino veteri, &, quod lupini magnitudinem habet, in tribus cyathis aquæ diluitur. Id tamen in febre periculose datur.

6. *Ad jecur sanandum.*

Ad sanandum jecur, nitri P. * z. croci, myrrhæ, nardi Gallici, singulorum P. I. * melle excipiuntur, daturque, quod Ægyptiæ fabæ magnitudinem habeat.

7. *Ad finiendos dolores lateris.*

Ad lateris dolores finiendos, piperis, aristolochiæ, nardi, myrrhæ pares portiones.

8. *Ad thoracis dolores finiendos.*

Ad thoracis, nardi P. i. * turis, casia, singulorum P. iii. * myrrhæ, cinnamomi, singulorum P. vi. * croci P. viii. * resinæ terebinthinæ quadrans, mellis heminæ tres.

9. *Catapotium Athenionis ad tussim.*

Ad tussim, Athenionis : myrrhæ, piperis, singulorum P. i. * castorei, papaveris lacrimæ, singulorum P. i. * Quæ separatim contusa postea junguntur, & ad magnitudinem fabæ nostræ, bina catapotia mane, bina noctu dormituro dantur.

10. *Catapotium Heraclidis Tarentini ad tussim & somnum.*

Si tussis somnum prohibet, ad utrumque Heraclidis Tarentini : croci P. i. * cinnamomi, castorei, papaveris lacrimæ, singulorum P. i. * myrrhæ, piperis longi, costi, galbani, singulorum P. * z.

11. *Catapotium ad purganda ulcera in faucibus tussientibus.*

Quod si purganda sunt ulcera in faucibus tussientibus : panacis, myrrhæ, resinæ terebinthinæ, singulorum P. v. * galbani P. * z. hyssopi P. * z. conterenda sunt, hisque hemina mellis adjicienda, & quod digito excipi potest, devorandum est.

12. *Colice Cassii medici.*

Colice vero Cassii ex his constat : croci, anisi, castorei, singulorum P. iii. * petroselini P. iv. * piperis & longi, & rotundi, singulorum P. v. * papaveris lacrimæ, junci rotundi, myrrhæ, nardi, singulorum P. vi. * quæ melle excipiuntur. Id autem & devorari potest, & ex aqua calida sumi.

13. *Ad infantem mortuum aut secundas expellendas.*

Infantem vero mortuum, aut secundas expellit aquæ potio, cui salis ammoniaci P. i. * aut cui dictamni Cretici P. i. * adjectum est.

14. *Laborantibus ex partu quid dari debeat.*

Ex partu laborantibus, erysimum ex vino tepido jejunis dari debet.

15. *Ad adjuvandam vocem.*

Vocem adjuvat, turis P. i. in duobus cyathis vini datum.

16. *Adversus difficultatem urinæ.*

Adversus urinæ difficultatem : piperis longi, castorei, myrrhæ, galbani, papaveris lacrimæ, croci, costi, uncia singulæ, styracis, resinæ terebinthinæ pondo sextantes, mel, absinthii cyathus. Ex quibus ad magnitudinem fabæ Ægyptiæ & mane & coenato dari debet.

17. *Arteriaces compositio quomodo fiat.*

Arteriace vero hoc modo fit : casia, iridis, cin-

namomi, nardi, myrrhæ, turis, singulorum P. i. * croci P. i. * piperis grana xxx. ex passi tribus sextariis decoquuntur, donec mellis crassitudo his fiat. Aut croci, myrrhæ, turis, singulorum P. i. * conjiciuntur in passi eundem modum, eodemque modo decoquuntur. Aut ejusdem passi heminæ tres usque eo coquuntur, donec extracta inde gutta indurefcet, & adjicitur tritæ casia P. i. *

C A P U T XXVI.

De quinque generibus noxarum corporis:

CUM facultates medicamentorum proposuerim; genera, in quibus noxa corpori est, proponam. Ea quinque sunt. Cum quid extrinsecus læsit, ut in vulneribus. Cum quid intra se ipsum corruptum est, ut in cancro. Cum quid innatum est, ut in vesica calculus. Cum quid increvit, ut vena, quæ intumescens in varicem convertitur. Cum quid deest, ut cum curta pars aliqua est. Ex his alia sunt, in quibus plus medicamenta, alia in quibus plus manus proficit. Ergo, dilatis his, quæ præcipue scalpellum & manum postulant, nunc de his dicam, quæ maxime medicamentis egent. Dividam autem hanc quoque curandi partem, sicut priorem; & ante dicam de his, quæ in quamlibet partem corporis incidunt: tum de his, quæ certas partes infestant. Incipiam a vulneribus.

I. De vulneribus, quæ per tela inferuntur.

In his autem ante omnia scire medicus debet,

quæ insanabilia sint, quæ difficilem curationem habeant, quæ promptiorem. Est enim prudentis hominis, primum eum, qui servari non potest, non attingere, nec subire speciem ejus, ut occisi, quem fors ipsius peremit. Deinde, ubi gravis metus sine certa tamen desperatione est, indicare necessariis periclitantis, in difficili rem esse: ne, si victa ars malo fuerit, vel ignorasse, vel fefellisse videatur. Sed ut hæc prudenti viro conveniunt: sic rursus histrionis est, parvam rem attollere, quo plus præstitisse videatur. Obligarique æquum est confessione promptæ rei, quo curiosius etiam circumspiciat, ne, quod per se exiguum est, majus curantis negligentia fiat.

2. *Quæ vulnera insanabilia sint.*

Servari non potest, cui basis cerebri, cui cor, cui stomachus, cui jecinoris portæ, cui in spina medulla percussa est; cuique aut pulmo medius, aut jejunum, aut tenuius intestinum, aut ventriculus, aut renes vulnerati sunt; cuive circa fauces grandes venæ, vel arteriæ præcisæ sunt.

3. *Quæ vulnera difficilem curationem habeant.*

Vix autem ad sanitatem perveniunt, quibus ulla parte pulmo, aut jecinoris crassum, aut membrana, quæ continet cerebrum, aut lienis, aut vulva, aut vesica, aut ullum intestinum, aut septum transversum vulneratum est. Hi quoque in præcipiti sunt, in quibus usque ad grandes intusque conditas venas in alis vel poplitibus mucro desedit. Periculosa

etiam vulnera sunt, ubicunque venæ majores sunt, quoniam exhaurire hominem profusione sanguinis possunt. Idque evenit non in alis tantum, atque poplitibus; sed etiam in his venis, quæ ad anum testiculosque perveniunt. Præter hæc malum vulnus est, quodcunque in alis, vel feminibus, vel inanibus locis, vel in articulis, vel inter digitos est. Item quodcunque muscolum, aut nervum, aut arteriam, aut membranam, aut os, aut cartilaginem læsit.

4. *Quæ vulnera tutiorem curationem habeant.*

Tutissimum omnium, quod in carne est. Et hæc quidem loco vel pejora, vel meliora sunt. Modo vero periculum facit, quodcunque magnum est.

5. *Observationes in vulneris genere & figura.*

Aliquid etiam in vulneris genere figuraque est. Nam pejus est, quod etiam collisum, quam quod tantum discissum est: adeo ut acuto quoque, quam retuso telo, vulnerari commodius sit. Pejus etiam vulnus est, ex quo aliquid excisum est; ex quo ve caro alia parte abscissa, alia dependet. Pessima, quæ plaga in orbem est: tutissima, quæ lineæ modo recta est. Quo deinde propius huic illive figuræ vulnus est, eo vel deterius, vel tolerabilius est.

6. *Ætatis observatio, & corporis, & vitæ, & temporis.*

Quin etiam confert aliquid & ætas, & corpus, & vitæ propositum, & anni tempus: quia facilius sanescit puer vel adolescens, quam senior; valens,

quam infirmus ; neque nimis tenuis , neque nimis plenus , quam si alterum ex his est ; integri habitus , quam corrupti ; exercitatus , quam iners ; sobrius & temperans , quam vino venerique deditus. Opportunissimumque curationi tempus vernum est ; aut certe neque fervens , neque frigidum. siquidem vulnera & nimius calor & nimium frigus infestant ; maxime tamen horum varietas : ideoque perniciosissimus autumnus est.

7. *Signa eorum , quæ intus læsa sunt.*

Sed pleraque ex vulneribus oculis subjecta sunt : quorundam ipsæ sedes indices sunt , quas alio loco demonstravimus , cum positus interiorum partium ostendimus. Verumtamen , quia quædam vicina sunt , interest quoque , vulnus in summa parte sit , an penitus penetraverit , necessarium est notas subijcere , per quas , quid intus ictum sit , scire possimus ; & ex quibus vel spes , vel desperatio oriatur.

8. *Signa percussæ cordis.*

Igitur , corde percusso , sanguis multus fertur , venæ languescunt , color pallidissimus , sudores frigidi , malique odoris , tanquam in rorato corpore oriuntur : extremisque partibus frigidis matura mors sequitur.

9. *Signa pulmonis icti.*

Pulmone vero icto , spirandi difficultas est : sanguis ex ore spumans , ex plaga rubens , simulque etiam spiritus cum sono fertur : in vulnus inclinari

juvat : quidam sine ratione confurgunt. Multi, si in ipsum vulnus inclinati sunt, loquuntur : si in aliam partem, obmutescunt.

10. *Signa jecinoris vulnerati.*

Jecinoris autem vulnerati notæ sunt : multus sub dextra parte præcordiorum profusus sanguis : ad spinam reducta præcordia ; in ventrem cubandi dulcedo ; punctiones, doloresque usque ad jugulum, junctumque ei latum scapularum os, intenti. quibus nonnunquam etiam biliosus vomitus accedit.

11. *Signa percussorum renum.*

Renibus vero percussis, dolor ad inguina testiculosque descendit : difficulter urina redditur ; eaque aut est cruenta, aut cruor fertur.

12. *Signa vulnerati lienis.*

At, liene icto, sanguis niger a sinistra parte prorumpit : præcordia cum ventriculo ab eadem parte indurescunt : sitis ingens oritur : dolor ad jugulum, sicut jecinore vulnerato, venit.

13. *Signa percussæ vulvæ.*

At, cum vulva percussa est, dolor inguinibus, & coxis, & femoribus est : sanguinis pars per vulnus, pars per naturam descendit : vomitus bilis insequitur. Quædam obmutescunt ; quædam mente labuntur ; quædam, sui compotes, nervorum oculorumque dolore urgeri se confitentur ; morientesque tandem eadem, quæ corde vulnerato, patiuntur.

14. *Signa percussæ cerebri, vel membranæ ejus.*

Sin cerebrum membranave ejus vulnus accepit, sanguis per nares, quibusdam etiam per aures exit; fereque bilis vomitus insequitur: quorundam sensus obtunduntur, appellatique ignorant: quorundam trux vultus est: quorundam oculi, quasi resoluti, huc atque illuc moventur: fereque tertio, vel quinto die delirium accedit. Multorum etiam nervi distenduntur. Ante mortem autem plerique fascias, quibus caput deligatum est, lacerant, ac nudum vulnus frigori objiciunt.

15. *Signa stomachi percussæ.*

Ubi stomachus autem percussus est, singultus, & bilis vomitus insequitur: si quid cibi vel potio- nis assumptum est, id redditur cito: venarum motus elanguescunt: sudores tenues oriuntur; per quos extremæ partes frigescunt.

16. *Signa jejuni intestini, & ventriculi vulnerati, & aliorum intestinorum.*

Communes vero jejuni intestini & ventriculi vulnerati notæ sunt. Nam cibus & potio per vulnus exeunt: præcordia indurescunt: nonnunquam bilis per os redditur. Intestino tantum sedes inferior est. Cetera intestina icæta vel stercus, vel odorem ejus exhibent.

17. *Signa percussæ medullæ, quæ in spina est.*

Medulla vero, quæ in spina est, discussa, nervi

solvuntur, aut distenduntur: sensus intercidit: interposito tempore aliquo sine voluntate inferiores partes vel semen, vel urinam, vel etiam stercus excernunt.

18. *Signa septi transversi percussi.*

At, si septum transversum percussum est, præcordia sursum contrahuntur, spina dolet, spiritus rarus est, sanguis spumans fertur.

19. *Signa vesicæ vulneratæ.*

Vesica vero vulnerata, dolent inguina: quod super pubem est, intenditur: pro urina, sanguis; aut ex ipso vulnere urina descendit: stomachus afficitur. itaque aut bilem vomunt, aut singultiunt: frigus, & ex eo mors sequitur.

20. *De sanguine, & sanie, & pure, & eorum speciebus: quandoque meliora, deteriorave sint.*

His cognitis, etiamnum quædam alia noscenda sunt, ad omnia vulnera ulceraque, de quibus dicturum sumus, pertinentia. Ex his autem exit sanguis, sanies, pus. Sanguis omnibus notus est. Sanies est tenuior hoc, varie crassa, & glutinosa, & colorata. Pus crassissimum albidissimumque, glutinosius & sanguine & sanie. Exit autem sanguis ex vulnere recenti, aut jam sanescente. Sanies est inter utrumque tempus. Pus ex ulcere jam ad sanitatem spectante. Rursus & sanies & pus quasdam species Græcis nominibus distinctas habent. Est enim quædam sanies, quæ vel ἰχὼρ, vel μελίχροα nominatur. Est

pus, quod *ἐλαιῶδες* appellatur. Ἰχθὺς tenuis, subalbidus, ex malo ulcere exit, maximeque ubi, nervo læso, inflammatio secuta est. *Μελίκηρα* crassior est, glutinosior, & subalbida, mellique albo subfimilis. Fertur hæc quoque ex malis ulceribus, ubi nervi circa articulos læsi sunt; & inter hæc loca, maximeque ex genibus. *Ἐλαιῶδες* tenue, subalbidum, quasi unctum, colore atque pinguitudine oleo albo non dissimile apparet in magnis ulceribus sanescentibus. Malus est autem sanguis, nimium aut tenuis, aut crassus; colore vel lividus, vel niger; aut pituita mixtus, aut varius. Optimus calidus, rubens, modice crassus, non glutinosus. Itaque protinus ejus vulneris expedita magis curatio est, ex quo sanguis bonus fluxit. Itemque postea spes in his major est, ex quibus melioris generis quæque proveniunt. Saniem igitur mala est, multa, nimis tenuis, livida, aut pallida, aut nigra, aut glutinosa, aut mali odoris, aut quæ & ipsum ulcus, & junctam ei cutem erodit. Melior est non multa, modice crassa, subrubicunda, aut subalbida. Ἰχθὺς autem pejor est multus, crassus, sublividus aut subpallidus, glutinosus, ater, calidus; mali odoris. Tolerabilior est subalbidus, qui cetera omnia contraria prioribus habet. Melicera autem mala est, multa, & percrassa: melior, quæ & tenuior, & minus copiosa est. Pus inter hæc optimum est. Sed id quoque pejus est, multum, tenue, dilutum; magisque, si ab initio tale est: itemque, si colore fero simile, si pallidum, si lividum, si fæculentum. Præter hæc, si male olet, nisi tamen locus hunc odorem excitat. Melius est,

quo minus est, quo crassius, quo albidius: itemque, si læve est, si nihil olet, si æquale est. Modo tamen, convenire & magnitudini vulneris, & tempori debet. Nam plus ex majore, plus nondum solutis inflammationibus naturaliter fertur. Ἐλαιῶδες quoque pejus est multum, & parum pingue: quo minus autem, quoque id ipsum pinguius, eo melius est.

21. *Curatio adversus profusionem sanguinis in vulneribus.*

Quibus exploratis, ubi aliquis ictus est, qui servari potest, protinus prospicienda duo sunt: ne sanguinis profusio, neve inflammatio interimat. Si profusionem timemus (quod ex sede vulneris, & magnitudine ejus, & ex impetu ruentis sanguinis intelligi potest) siccis linamentis vulnus implendum est, supraque imponenda spongia ex aqua frigida expressa, ac manu super comprimenda. Si parum sic sanguis conquiescit, sæpius linamenta mutanda sunt. Et, si sicca parum valent, aceto madefacienda sunt. Id vehemens ad sanguinem suppressum est: ideoque quidam id vulnere infundunt. Sed alius rursus metus subest, ne, nimis valenter ibi retenta materia, magnam inflammationem postea moveat. Quæ res efficit, ut neque rodentibus medicamentis, neque adurentibus, & ob id ipsum inducentibus crustam, sit utendum, quamvis pleraque ex his sanguinem supprimunt: sed, si semel ad ea decurritur, his potius, quæ mitius idem efficiunt. Quod si illa quoque profluvio vincuntur, venæ, quæ sanguinem fundunt, apprehendendæ,

circaque id, quod ictum est, duobus locis deligandæ intercidendæque sunt, ut & in se ipsæ coeant, & nihilominus ora præclusa habeant. Ubi ne id quidem res patitur, possunt ferro candenti aduri. Sed etiam satis multo sanguine effuso ex eo loco, quo neque nervus, neque musculus est, ut puta in fronte, vel superiore capitis parte, commodissimum tamen est, cucurbitulam admoveere a diversa parte, ut illuc sanguinis cursus revocetur.

22. *Curationes adversus vulnorum inflammationem.*

Et adversus profusionem quidem in his auxilium est: adversus inflammationem autem, in ipso sanguinis cursu. Ea timeri potest, ubi læsum est vel os, vel nervus, vel cartilago, vel musculus, aut ubi parum sanguinis pro modo vulneris fluxit. Ergo quoties quid tale erit, sanguinem mature suppressere non oportebit; sed pati fluere, dum tutum erit, adeo ut, si parum fluxisse videbitur, mitti quoque ex brachio debeat; utique, si corpus juvenile, & robustum, & exercitatum est: multoque magis, si id vulnus ebrietas præcessit. Quod si musculus læsus videbitur, præcidendus erit. nam percussus, mortiferus est: præcisus, sanitatem recipit.

23. *De glutinatione vulnorum.*

Sanguine autem vel suppresso, si nimius erumpit; vel exhausto, si per se parum fluxit; longe optimum est, vulnus glutinari. Potest autem id, quod vel in cute, vel etiam in carne est; si nihil ei præterea mali accedit. Potest caro, alia parte de-

pendens, alia inhærens; si tamen etiamnum integra est, si conjunctione corporis fovetur.

In his vero, quæ glutinantur, duplex curatio est. Nam si plaga in molli parte est, sui debet: maximeque, si discissa auris ima est, vel imus nasus, vel frons, vel bucca, vel palpebra, vel labrum, vel circa guttur cutis, vel venter. Si vero in carne vulnus est, hiatque, neque in unum oræ facile attrahuntur, futura quidem aliena est: imponendæ vero fibulæ sunt (*ἀγκυτήρας* Græci nominant) quæ oras, paulum tamen, contrahant, quo minus lata postea cicatrix sit.

Ex his autem colligi potest, id quoque, quod alia parte dependens, alia inhærebit, si alienatum adhuc non est, futuram, an fibulam postulet. Ex quibus neutra ante debet imponi, quam intus vulnus purgatum est: ne quid ibi concreti sanguinis relinquatur. Id enim & in pus vertitur, & inflammationem movet, & glutinari vulnus prohibet. Ne linamentum quidem, quod suppressendi sanguinis causa inditum est, inibi relinquendum est. nam id quoque inflammat.

Comprehendi vero futura, vel fibula, non cutem tantum, sed etiam aliquid ex carne, ubi suberit hæc, oportebit; quo valentius hæreat, neque cutem abrumpat. Utraque optima est ex acia molli, non nimis torta, quo mitius corpori insidat. Utraque neque nimis rara, neque nimis crebra injicienda est. Si nimis rara est, non continet: si nimis crebra est, vehementer afficit; quia, quo sæpius acus corpus transivit, quoque plura loca injectum vin-

culum mordet, eo majores inflammationes oriuntur; magisque æstate. Neutra etiam vim ullam desiderat: sed ea hætenus utilis est, quæ cutis ducentem quasi sua sponte subsequitur. Fere tamen fibulæ latius vulnus esse patiuntur: futura oras jungit, quæ ne ipsæ quidem inter se contingere ex toto debent; ut si quid intus humoris concreverit, sit qua emanet. Si quod vulnus neutrum horum recipit, id tamen purgari debet.

Deinde omni vulnere primo imponenda est spongia ex aceto expressa. Si sustinere aliquis aceti vim non potest, vino utendum est. Levis plaga juvatur etiam, si ex aqua frigida expressa spongia imponitur. Sed ea, quocunque modo imposita est, dum madet, prodest: itaque ut inarescat, non est committendum. Licetque sine peregrinis, & conquisitis, & compositis medicamentis vulnus curare. Sed si quis huic parum confidit, imponere medicamentum debet, quod sine sevo compositum sit ex his, quæ cruentis vulneribus apta esse proposui: maximeque si caro est, Barbarum: si nervi, vel cartilago, vel aliquid ex eminentibus, quales aures, vel labra sunt, Polybi sphragidem. Alexandrinum quoque viride nervis idoneum est: eminentibusque partibus ea, quam Græci *ρύπτουσιν* vocant.

Solet etiam, colliso corpore, exigua parte findi cutis. Quod ubi incidit, non alienum est, scalpello latius aperire; nisi muscoli nervique juxta sint, quos incidi non expedit. ubi satis diductum est, medicamentum imponendum est. At, si id, quod collisum est, quamvis parum diductum est, latius ta-

men aperiri propter nervos aut musculos non licet; adhibenda sunt ea, quæ humorem leniter extrahant; præcipueque ex his id, quod *ῥυπῶδες* vocari proposui. Non alienum est e iam, ubicunque vulnus est grave, impositum, quo id juvetur, insuper circumdare lanam succidam ex aceto & oleo: vel cataplasma, si mollis is locus est, quod leniter reprimat; si nervosus, aut musculosus, quod emolliat.

24. *Quomodo vulnus ligari conveniat.*

Fascia vero ad vulnus deligandum lintea aptissima est: eaque lata esse debet, ut semel injecta non vulnus tantum, sed paulum utrinque etiam oras ejus comprehendat. Si ab altera parte caro magis recessit, ab ea melius attrahitur: si æque ab utraque, transverse comprehendere oras debet; aut si id vulneris ratio non patitur, media primum injicienda est, ut tum in utramque partem ducatur. Sic autem deliganda est, ut & contineat, neque adstringat. quod non continetur, elabitur: quod nimis adstrictum est, cancro periclitatur. Hieme sæpius fascia circuire debet: æstate, quoties necesse est. Tum extrema pars ejus inferioribus acu assuenda est. nam nodus vulnus lædit; nisi tamen longe est.

Illo neminem decipi decet, ut propriam viscerum curationem requirat, de quibus supra posui. Nam plaga ipsa curanda extrinsecus, vel futura, vel alio medicinæ genere est. In visceribus nihil movendum est; nisi, si quid ex jecinore, aut liene, aut pulmone dumtaxat extremo dependeat,

praecidatur. Alioqui vulnus interius ea victus ratio eaque medicamenta sanabunt, quæ cuique visceri convenire superiore libro proposui.

25. *Quomodo vulnerato agendum sit.*

His ita primo die ordinatis, homo in lecto collocandus est: isque, si grave vulnus est, abstinere, quantum vires patiuntur, ante inflammationem, a cibo debet: bibere, donec sitim finiat, aquam calidam; vel, si æstas est, neque febris, neque dolor est, etiam frigidam. Adeo tamen nihil perpetuum est, sed semper pro viribus corporis æstimandum, ut imbecillitas etiam cibum protinus facere necessarium possit; tenuem scilicet, & exiguum, qui tantum sustineat. multique etiam ex profluvio sanguinis intermorientes ante ullam curationem vino reficiendi sunt; quod alioqui inimicissimum vulneri est.

26. *De notis vulnerum.*

Nimis vero intumescere vulnus, periculosum: nihil intumescere, periculosissimum est. illud indicium est magnæ inflammationis: hoc, emortui corporis. Protinusque, si mens homini consistit, si nulla febris accessit, scire licet, mature vulnus sanum fore. Ac ne febris quidem terrere debet, si in magno vulnere, dum inflammatio est, permanet. Illa perniciosa est, quæ vel levi vulneri supervenit, vel ultra tempus inflammationis durat, vel delirium movet: vel si nervorum rigor aut distentio, quæ ex vulnere orta est, ea non finitur.

Vomitus quoque biliosus non voluntarius, vel protinus, ut percussus est aliquis, vel dum inflammatio manet, malum signum est in his dumtaxat, quorum vel nervi, vel etiam nervosi loci vulnerati sunt. Sponte tamen vomere, non alienum est; præcipue his, quibus in consuetudine fuit: sed neque protinus post cibum, neque jam inflammatione orta, neque cum in superioribus partibus plaga est.

27. *De curationibus vulnerum.*

Biduo sic vulnere habito, tertio die id aperiendum, detergendaque sanies ex aqua frigida est, eademque rursus injicienda sunt. Quinto jam die, quanta inflammatio futura est, se ostendit. Quo die, rursus detecto vulnere, considerandus color est. Quod si lividus, aut pallidus, aut varius, aut niger est; scire licet, malum vulnus esse. idque, quandocunque animadversum est, terrere nos potest. Album, aut rubicundum esse vulnus, commodissimum est. Item cutis dura, crassa, dolens, periculum ostendit. Bona signa sunt, ubi hæc sine dolore, tenuis, & mollis est. Sed si glutinatur vulnus, aut leviter intumuit, eadem sunt imponenda, quæ primo fuerunt.

Si gravis inflammatio est, neque glutinandi spes est, ea, quæ pus moveant. Aquæ quoque calidæ necessarius usus est, ut & materiam digerat, & duritiam emolliat, & pus citet. Ea sic temperanda est, ut manu contingenti jucunda sit; & usque eo adhibenda, donec aliquid minuisse ex tumore, calorem-

que ulceri magis naturalem reddidisse videatur. Post id fomentum, si late plaga non patet, imponi protinus emplastrum debet, maximeque, si grande vulnus est, tetrapharmacum: si in articulis, digitis, locis cartilaginosis, ῥυπῶδες. At si latius hiat, illud emplastrum liquari ex irino unguento oportet, eoque illita linamenta disponi per plagam: deinde emplastrum supra dari, & super id lanam succidam; minusque etiam, quam primo, fasciæ adstringendæ sunt.

28. *Curationes propriæ articulorum.*

Proprie quædam in articulis visenda sunt. In quibus si præcisi nervi sunt, qui continebant, debilitas ejus partis sequitur. Si id dubium est, & ex acuto telo plaga est, ea transversa, commodior est: si ex retuso & gravi est, nullum in figura discrimen est: at visendum est, pus supra articulum, an infra nascatur. Si sub eo nascitur, albumque & crassum diu fertur, nervum præcisum esse credibile est: magisque, quo majores dolores inflammationesque, & quo maturius excitatæ sunt. Quamvis autem non abscissus nervus est; tamen, si circa durus tumor diu permanet, necesse est, & diuturnum ulcus esse, & sano quoque eo, tumorem permanere: futurumque est, ut tarde membrum id vel extendatur, vel contrahatur. Major tamen in extendendo mora est, ubi recurvato articulo curatio adhibita est, quam in recurvando eo, quod rectum continuerimus. Collocari quoque membrum, quod ictum est, ratione certa debet.

Si glutinandum est, ut superius sit : si in inflammatione est, ut in neutram partem inclinatum sit : si jam pus profluit, ut devexum sit.

Optimum etiam medicamentum, quies est. Moveri, & ambulare, nisi sanis, alienum est. Minus tamen periculosum his est, qui in capite vel brachiis, quam qui in inferioribus partibus vulnerati sunt. Minime ambulatio convenit, femine, aut crure, aut pede laborante. Locus, in quo cubabit, tepidus esse debebit. Balneum quoque, dum parum vulnus purum est, inter res infestissimas est. Nam id & humidum & sordidum reddit. Ex quibus ad cancrum transitus esse consuevit. Levis frictio recte adhibetur; sed his partibus, quæ longius absunt a vulnere.

29. *Vulnus quomodo purgandum est.*

Inflammatione finita, vulnus purgandum est. Id optime faciunt tincta in melle linamenta; supraque id emplastrum vel τετραφάρμακον vel ἐννεαφάρμακον dandum est. Tum demum vero purum ulcus est, cum rubet, ac nimium neque siccum, neque humidum est. At, quodcunque sensu caret; quod non naturaliter sentit; quod nimium aut aridum, aut humidum est; quod aut pallidum, aut albidum, aut lividum, aut nigrum est; id purum non est.

30. *Quomodo vulnus implendum est.*

Purgato, sequitur, ut impleatur; jamque calida aqua eatenus necessaria est, ut sanies removeatur. Lanæ succidæ supervacuus usus est: lota melius

circumdatur. Ad implendum autem vulnus proficiunt quidem etiam medicamenta aliqua: itaque ea adhiberi non alienum est; ut butyrum cum rosa, exigua mellis parte; aut cum eadem parte mellis, aut cum eadem rosa, τετραφάρμακον; aut ex rosa linamenta. Plus tamen proficit balneum rarum; cibi boni succi, vitatis omnibus acribus; sed jam plenioribus. nam & avis, & venatio, & suilla elixa dari potest. Vinum omnibus, dum febris, dum inflammatio est, alienum est: itemque usque ad cicatricem, si nervi, musculive vulnerati sunt; etiam, si alte caro. At, si plaga in summa cute generis tuitioris est, potest non pervetus, modice tamen datum, ad implendum quoque proficere. Si quid molliendum est, quod in nervosis locis musculosisque necessarium est, cerato quoque super vulnus utendum est. At, si caro supercrevit, modice reprimat siccum linamentum; vehementius, squama æris. Si plus est, quod tolli opus est, adhibenda sunt etiamnum vehementiora, quæ corpus exedant. Cicatricem, post omnia hæc, commode inducit lycium ex passo aut lacte dilutum; vel etiam per se impositum siccum linamentum.

31. *De ulceribus, quæ extrinsecus per vulnera incidunt, curationibusque eorum.*

Hic ordo felicitis curationis est. Sed quædam tamen periculosa incidere consueverunt. Interdum enim vetustas ulcus occupat, induciturque ei callus, & circum oræ crassæ livent. Post quæ, quidquid me-

dicamentorum ingeritur, parum proficit; quod fere negligenter curato ulceri supervenit.

Interdum vel ex nimia inflammatione, vel ob æstus immodicos, vel ob nimia frigora, vel quia nimis vulnus adstrictum est, vel quia corpus aut senile, aut mali habitus est, cancer occupat. Id genus a Græcis diductum in species est; nostris vocabulis non est. Omnis autem cancer non solum id corrumpit, quod occupavit, sed etiam serpit: deinde aliis aliisque signis discernitur. Nam modo super inflammationem rubor ulcus ambit, isque cum dolore procedit; *έρυσίπelas* Græci nominant: modo ulcus nigrum est, quia caro ejus corrupta est; idque vehementius, etiam putrescendo intenditur. Ubi vulnus humidum est, & ex nigro ulcere humor pallidus fertur, malique odoris est, corruptæ carunculæ, interdum etiam nervi ac membranæ, resolvuntur, specillumque demissum descendit aut in latus, aut deorsum, eoque vitio nonnunquam os quoque afficitur. Modo oritur ea, quam Græci *γάγγραιναν* appellant.

Priores in qualibet parte corporis fiunt: hæc in prominentibus membris, id est, inter ungues, & alas, vel inguina; fereque in senibus, vel his, quorum corpus mali habitus est. Caro in ulcerè vel nigra, vel livida est, sed sicca & arida; proximaque cutis, plerumque subnigris pustulis impletur; deinde ei proxima, vel pallida, vel livida, fereque rugosa & sine sensu est; ulterior in inflammatione est; omniaque ea simul serpunt: ulcus, in locum pustulosum: pustulæ, in eum, qui pallet, aut

livet : pallor aut livor, in id, quod inflammatum est : inflammatio, in id, quod integrum est, transit. Inter hæc deinde febris acuta oritur, ingensque fitis : quibusdam etiam delirium accedit : alii, quamvis mentis suæ compotes sunt, balbutiendo tamen vix sensus suos explicant : incipit affici stomachus : fit foedi spiritus ipse odor. Atque initium ejus quidem mali recipit curationem : ubi vero penitus infedit, insanabile est. plurimique sub frigido sudore moriuntur.

32. *Curatio veteris ulceris.*

Ac pericula quidem vulnerum hæc sunt. Vetus autem ulcus scalpello concidendum est, excidendæque ejus oræ, &, quidquid super eas livet, æque incidendum. Si varicula intus est, quæ his sanari prohibet, ea quoque excidenda. Deinde, ubi sanguis emissus, novatumque vulnus est, eadem curatio adhibenda, quæ in recentibus vulneribus exposita est. Si scalpello aliquis uti non vult, potest sanare id emplastrum, quod ex ladano fit : & cum ulcus sub eo exesum est, id, quo cicatrix inducitur.

33. *Curatio erysipelarum.*

Id autem, quod ἐρυσίπelas vocari dixi, non solum vulnere supervenire, sed sine hoc quoque oriri consuevit : atque interdum periculum majus affert ; utique, si circa cervices aut caput constitit.

Oportet, si vires patiuntur, sanguinem mittere, deinde imponere simul reprimentia & refrigerantia ; maximeque cerussam solani succo, aut cimoliam

cretam aqua pluviali exceptam; aut ex eadem aqua subactam farinam cupresso adjecta, aut, si tenerius corpus est, lenticulam. Quidquid impositum est, betæ folio contegendum est, & super linteolum frigida aqua madens imponendum. Si per se refrigerantia parum proderunt, miscenda erunt hoc modo: sulphuris P. i. * cerussæ, croci, singulorum P. x. * eaque cum vino conterenda sunt, & id his illinendum: aut, si durior locus est, solani folia contrita suillæ adipi miscenda sunt, & illita linteolo superinjicienda.

At, si nigrities est, neque dum serpit, imponenda sunt, quæ carnem putrem lenius exedunt; repurgatumque ulcus sic, ut cetera, nutriendum est. Si magis putre est, jamque procedit ac serpit, opus est vehementius erodentibus. Si ne hæc quidem evincunt, aduri locus debet, donec nullus ex eo humor feratur. nam quod sanum est, siccum est, cum aduritur. Post unctionem putris ulceris, superponenda sunt, quæ crustas a vivo resolvant; Græci eas ἐσχαράς vocant. Ubi exciderunt, purgandum ulcus, maxime melle & refina est. Sed aliis quoque purgari potest, quibus purulenta curantur, eodemque modo ad sanitatem perducendum est.

34. *Curatio gangrænæ.*

Gangrænam vero, si nondum plane tenet, sed adhuc incipit, curare non difficillimum est; utique in corpore juvenili: & magis etiam, si musculi integri sunt; si nervi vel læsi non sunt, vel leviter affecti sunt; neque ullus magnus articulus

nudatus est; aut carnis in eo loco paulum est, ideoque non multum, quod putresceret, fuit; constititque eo loco vitium; quod maxime fieri in digito potest. In ejusmodi casu primum est, si vires patiuntur, sanguinem mittere. Deinde, quidquid aridum est, & intentione quadam proximum quoque locum male habet, usque ad sanum corpus concidere.

Medicamenta vero, dum malum serpit, adhibenda nulla sunt, quæ pus movere consuerunt; ideoque ne aqua quidem calida. Gravia quoque, quamvis reprimentia, aliena sunt: sed his quam levissimis opus est. superque ea, quæ inflammata sunt, utendum est refrigerantibus. Si nihilo magis malum constitit, uri id, quod est inter integrum ac vitiatum locum, debet.

Præcipueque in hoc casu petendum, non a medicamentis solum, sed etiam a victus ratione præsidium est. Neque enim id malum, nisi corrupti vitiosique corporis est. Ergo primo, nisi imbecillitas prohibet, abstinentia utendum. Deinde danda, quæ per cibum potionemque alvum, ideoque etiam corpus adstringant; sed ea levia. Postea, si vitium constitit, imponi super vulnus eadem debent, quæ in putri ulcere præscripta sunt. Ac tum quoque plenioribus cibis uti licebit ex media materia; sed tamen non nisi alvum, corpusque siccantibus: aqua vero pluviali frigida. Balneum, nisi jam certa fiducia redditæ sanitatis est, alienum est: siquidem emollitum in eo vulnus cito rursus eodem malo afficitur. Solent vero nonnunquam nihil omnia au-

xilia proficere, ac nihilominus serpere sub his cancer. Inter quæ miserum, sed unicum, auxilium est, ut cetera pars corporis tuta sit, membrum, quod paulatim emoritur, abscindere.

35. *Curatio vulnerum, ubi quid collisum est, aut detritum, aut infixum.*

Hæ gravissimorum vulnerum curationes sunt. Sed ne illa quidem negligenda, ubi, integra cute, interior pars collisa est; aut ubi derafum, attritumve aliquid est; aut ubi furculus corpori infixus est; aut ubi tenue, sed altum vulnus infedit.

In primo casu commodissimum est malicorium ex vino coquere, interioremque ejus partem conterere, & cerato miscere ex rosa facto, idque superponere: deinde, ubi cutis ipsa exasperata est, inducere lene medicamentum, quale λιπαρά est.

Derafo vero, detritoque, imponendum est emplastrum τετραφάρμακον, minuendusque cibus & vinum subtrahendum. Neque id, quia non habebit altiores ictus, contemnendum erit: siquidem ex ejusmodi casibus sæpe cancri fiunt. Quod si levius id erit, & in parte exigua, contenti esse poterimus eodem leni medicamento.

Surculum vero, si fieri potest, oportet vel manu, vel etiam ferramento ejicere. Si vel præfractus est, vel altius descendit, quam ut ita fieri possit, medicamento evocandus est. Optime autem educit superimposita arundinis radix; si tenera est, protinus contrita; si jam durior, ante in mulso decocta. cui semper mel adjiciendum est, aut aristolochia

cum eodem melle. Pessima ex furculis, arundo est, quia aspera est. Eademque offensa etiam in filice est. Sed usu cognitum est, utramque adversus alteram medicamentum esse, si contrita superimposita est. Facit autem idem in omnibus furculis, quodcunque medicamentum extrahendi vim habet. Idem altis tenuibusque vulneribus aptissimum est. Priori rei Philocratis; huic Hecatæi emplastrum maxime convenit.

36. *Quomodo cicatrix vulnere inducenda, purgandaque sit.*

Ubi vero in quolibet vulnere ventum ad inducendum cicatricem est (quod perpurgatis jam, repletisque ulceribus necessarium est) primum ex aqua frigida linamentum, dum caro alitur: deinde, cum jam continenda est, ficcum imponendum est, donec cicatrix inducatur: tum deligari super album plumbum oportet, quo & reprimatur cicatrix, & colorem maxime sano corpori similem accipit. Idem radix silvestris cucumeris præstat. Idem compositio, quæ habet elaterii P. i. * spumæ argenti P. ii. * unguenti pondo iv. * quæ excipiuntur resina terebinthina, donec emplastri crassitudo ex omnibus fiat. Ac nigras quoque cicatrices leniter purgant, paribus portionibus mixta, ærugo, plumbum elotum, eademque resina cocta; sive eo ungitur cicatrix, quod in facie fieri potest; sive id ut emplastrum imponitur, quod in aliis partibus commodius est.

At, si vel excrevit cicatrix, vel concava est;

stultum est, decoris causa, rursus & dolorem & medicinam sustinere: alioquin res utrique succurri patitur. Siquidem utraque cicatrix exulcerari scalpello potest. Si medicamentum aliquis mavult, idem efficiunt compositiones hæ, quæ corpus exedunt. Cute exulcerata, super eminentem carnem exedentia medicamenta conjicienda sunt: super concavam, implentia; donec utrumque ulcus sanæ cuti æquetur, & tum cicatrix inducatur.

C A P U T XXVII.

De vulneribus, quæ per morsus inferuntur, eorumque curationibus.

DIXI de his vulneribus, quæ maxime per tela inferuntur. Sequitur, ut de his dicam, quæ morfu fiunt, interdum hominis, interdum simiæ, sæpe canis, nonnunquam ferorum animalium, aut serpentium. Omnis autem fere morsus habet quoddam virus.

Itaque, si vehemens vulnus est, cucurbitula admovenda est: si levius, protinus emplastrum injiciendum, præcipueque Diogenis. si id non est, quodlibet ex his, quæ adversus morsus proposui. si ea non sunt, viride Alexandrinum: si ne id quidem est, quodlibet non pingue ex his, quæ recentibus vulneribus accommodantur. Sal quoque his, præcipueque ei, quod canis fecit, medicamentum est, si aridus vulneri imponitur, superque id duobus digitis verberatur. exsaniat enim. Ac balsamentum quoque recte super id vulnus deligatur.

2. *Curatio adversus rabiosi canis morsum.*

Utique autem, si rabiosus canis fuit, cucurbitula virus ejus extrahendum est. Deinde, si locus neque nervosus, neque musculosus est, vulnus id adurendum est. Si uri non potest, sanguinem homini mitti non alienum est. Tum usto quidem vulnere superimponenda, quæ ceteris ustis sunt. Ei vero, quod expertum ignem non est, ea medicamenta, quæ vehementer exedunt. Post quæ nullo novo magisterio, sed jam supraposito ulcus erit implendum, & ad sanitatem perducendum. Quidam post rabiosi canis morsum protinus in balneum mittunt; ibique patiuntur desudare, dum vires corporis finunt, vulnere adaperto, quo magis ex eo quoque virus distillet: deinde multo meracoque vino excipiunt, quod omnibus venenis contrarium est. Idque cum ita per triduum factum est, tutus esse homo a periculo videtur.

Solet autem ex eo vulnere, ubi parum occursum est, aquæ timor nasci. ὕδροφοβία Græci appellant. Miserrimum genus morbi: in quo simul æger & siti & aquæ metu cruciatur. quo oppressis in angusto spes est. Sed unicum tamen remedium est, necopinantem in piscinam non ante ei provisam projicere, & si natandi scientiam non habet, modo mersum bibere pati, modo attollere; si habet, interdum deprimere, ut invitus quoque aqua satietur. sic enim simul & sitis, & aquæ metus tollitur. Sed aliud periculum excipit, ne infirmum corpus in aqua frigida vexatum, nervorum distentio absumat. Id ne

incidat, a piscina protinus in oleum calidum demittendus est. Antidotum autem (præcipue id, quod primo loco posui; ubi id non est, aliud) si nondum æger aquam horret, potui ex aqua dandum est: & si amaritudine offenditur, mel adjiciendum est: & si jam is morbus occupavit, per catapotia sumi potest.

3. *Curationes communes adversus omnes morsus serpentium.*

Serpentium quoque morsus non nimium distantem curationem desiderant: quamvis in ea multum antiqui variarunt, ut in singula anguium genera singula medendi genera præciperent: atque aliis alia; sed in omnibus eadem maxime proficiunt. Igitur in primis super vulnus id membrum deligandum est: non tamen nimium vehementer, ne torpeat. Dein venenum extrahendum est. Id cucurbitula optime facit. Neque alienum est, ante scalpello circa vulnus incidere, quo plus vitii jam sanguinis extrahatur. Si cucurbitula non est, (quod tamen vix incidere potest) tum quodlibet simile vas, quod idem possit. Si ne id quidem est, homo adhibendus est, qui vulnus exfugat.

Neque hercules scientiam præcipuam habent hi, qui Psylli nominantur; sed audaciam usu ipso confirmatam. Nam venenum serpentis, ut quædam etiam venatoria venena, quibus Galli præcipue utuntur, non gustu, sed in vulnere nocent. Ideoque colubra ipsa tuto estur: ictus ejus occidit. & si, stupente ea, (quod per quædam medicamenta cir-

culatores faciunt) in os digitum quis indidit, neque percussus est, nulla in ea saliva noxa est. Ergo quisquis, exemplum Psylli secutus, id vulnus exfluxerit, & ipse tutus erit, & tutum hominem præstabit. Illud interea ante debebit attendere, ne quod in gingivis, palatove, aliave parte oris ulcus habeat. Post hæc is homo loco calido collocandus est sic, ut id, quod percussum erit, in inferiorem partem inclinetur.

Si neque qui exsugat, neque cucurbitula est, forbere oportet jus anserinum, vel ovillum, vel vitulinum, & vomere. Vivum autem gallinaceum pulum per medium dividere, & protinus calidum super vulnus imponere sic, ut pars interior corpori jungatur. Facit id etiam hoædus agnusve discissus, & calida ejus caro statim super vulnus imposita. Emplastra quoque, quæ supra comprehensa sunt. Aptissimumque est, vel Ephesium, vel id, quod ei subiectum est. Præsensque in aliquo antidoto præsidium est. Sin id non est, necessarium est exforbere portionem meri vini cum pipere; vel quidlibet aliud, quo calor movendus est, ne humorem intus coire patiatur. nam maxima pars venenorum frigore interimit. Omnia etiam urinam moventia, quia materiam extenuant, utilia sunt.

4. *Speciales curationes adversus ictus serpentium : & primo adversus ictum aspidis.*

Hæc adversus omnes ictus sunt communia : usus tamen ipse docuit, eum, quem aspis percussit, acetum potius bibere debere. Quod demonstrasse dici-

tur casus cujusdam pueri, qui cum ab hac ictus esset, & partim ob ipsum vulnus, partim ob immodicos æstus siti premeretur, ac locis siccis alium humorem non reperiret, acetum, quod forte secum habebat, ebibit, & liberatus est. Credo, quoniam id, quamvis refrigerandi vim habet, tamen habet etiam dissipandi. Quo fit, ut terra respersa eo spumet. Eadem ergo vi verisimile est spissescentem quoque intus humorem hominis ab eo discutî, & sic dari sanitatem.

5. *Adversus ictum scorpionis.*

In quibusdam etiam aliis serpentibus certa quædam auxilia fatis nota sunt. Nam scorpio sibi ipse pulcherrimum medicamentum est. Quidam contritum cum vino bibunt. Quidam eodem modo contritum super vulnus imponunt. Quidam super prunam eo imposito, vulnus suffumigant, undique veste circumdata, ne is fumus dilabatur; tum carbonem ejus super vulnus deligant. Bibere autem oportet herbæ solaris (quam ἡλιοτρόπιον Græci vocant) semen, vel certe folia ex vino. Super vulnus vero etiam furfures ex aceto, vel ruta silvatica recte imponitur, vel cum melle sal tostus. Cognovi tamen medicos, qui ab scorpione ictis nihil aliud, quam ex brachio sanguinem miserunt.

6. *Adversus aranei & scorpionis ictum.*

Ad scorpionis etiam, & ad aranei ictum, allium cum ruta recte miscetur, ex oleoque contritum superimponitur.

7. *Adversus cerasitis, & dipsadis, & hæmorrhoidis ictum.*

At, si cerasites, aut dipsas, aut hæmorrhoids percussit, asphodeli, quod Ægyptiæ fabæ magnitudinem æquet, arefactum, in duas portiones dividendum est sic, ut ei rutæ paulum adjiciatur. Trifolium quoque & mentastrum, & cum aceto panaces æque proficiunt. Costumque & casia, & cinnamomum recte per portionem assumuntur.

8. *Adversus chersydri ictum, & cerasitis.*

Adversus chersydri vero ictum, panaces, aut laser, quod sit scrupulorum P. II. * vel porri succus cum hemina vini sumendus est, & edenda multa satureja. Imponendum autem super vulnus stercus caprinum ex aceto coctum; aut ex eodem hordeacea farina; aut ruta, vel nepeta, cum sale contrita, melle adjecto. Quod in eo quoque vulnere, quod cerasites fecit, æque valet.

9. *Adversus phalangii ictum.*

Ubi vero phalangium nocuit, præter eam curationem, quæ manu redditur, sæpe homo demittendus in solium est, dandusque ei myrrhæ & uvæ taminæ par modus ex passi hemina; vel radiculae semen, aut lolii radix ex vino; & super vulnus furfures ex aceto cocti, imperandumque, ut is conquiescat.

10. *Adversus ictus Italorum anguium, qui minus terribiles peregrinis sunt.*

Verum hæc genera serpentium & peregrina, & aliquanto magis pestifera sunt; maximeque æstuosius gignuntur locis. Italia frigidioresque regiones hac quoque parte salubritatem habent, quod minus terribiles angues edunt. Adversus quos satis proficit herba betonica, vel cantabrica, vel centaurion, vel agrimonia, vel trixago, vel personata, vel marinæ pastinacæ, singulæ binæve tritæ, & cum vino potui datæ, & super vulnus impositæ. Illud ignorari non oportet, omnis serpentis ictum & jejuni & jejuno magis nocere. ideoque perniciosissimi sunt, cum incubant: utilissimumque est, ubi ex anguibus metus est, non ante progredi, quam quis aliquid assumfit.

11. *Remedium generale adversus omnia venena, vel in cibo, vel in potione assumpta.*

Non tam facile his opitulari est, qui venenum, vel in cibo, vel in potione sumserunt. Primum, quia non protinus sentiunt, ut ab angue icti: ita ne succurrere quidem statim sibi possunt. Deinde, quia noxa non a cute, sed ab interioribus partibus incipit. Commodissimum est tamen, ubi primum sentit aliquis, protinus oleo multo epoto vomere. Deinde, ubi præcordia exhaustit, bibere antidotum: si id non est, vel merum vinum.

12. *Specialia remedia adversus quædam venena : & primo adversus cantharidas.*

Sunt tamen quædam remedia propria adversus quædam venena, maximeque leviora. Nam si cantharidas aliquis ebibit, panacès cum lacte contusa, vel galbanum vino adjecto dari, vel lac per se debet.

13. *Adversus cicutam.*

Si cicutam, vinum merum calidum cum ruta quamplurimum ingerendum est; deinde is vomere cogendus : posteaque lafer ex vino dandum. Isque, si febre vacat, in calidum balneum mittendus : si non vacat, ungendus ex calefacientibus est. Post quæ quies ei necessaria est.

14. *Adversus hyoscyamum.*

Si hyoscyamum, fervens mulsum bibendum est, aut quodlibet lac, maxime tamen asininum.

15. *Adversus cerussam.*

Si cerussam, jus malvæ, vel juglandis ex vino contritæ, maxime profunt.

16. *Adversus sanguisugam, si epota est, & lac, quod intus coïit.*

Si sanguisuga epota est, acetum cum sale bibendum est. Si lac intus coïit, aut passum, aut coagulum, aut cum aceto lafer.

17. *Adversus fungos inutiles.*

Si fungos inutiles quis assumerit, radícula aut

e posca, aut cum sale & aceto edenda est. Ipsi vero hi & specie quidem discerni possunt ab utilibus, & cocturæ genere idonei fieri. Nam sive ex oleo inferbuerunt, sive piri furculus cum his inferbuit, omni noxa vacant.

18. *De adustis corporis locis, & quomodo curari debeant.*

Adustis quoque locis extrinsecus vis infertur; itaque sequi videtur, ut de his dicam. Hæc autem optime curantur foliis aut lilii, aut linguæ caninæ, aut betæ in vetere vino oleoque decoctis. Quorum quodlibet protinus impositum ad sanitatem perducit.

Sed dividi quoque curatio potest in ea, quæ mediocriter exedentia reprimentiaque, primo & pustulas prohibeant, & summam pelliculam exasperent: deinde ea, quæ lenia ad sanitatem perducant. Ex prioribus est lenticulæ cum melle farina; vel myrrha cum vino; vel creta cimolia cum turis cortice contrita, & aqua coacta, atque, ubi usus necessitas incidit, aceto diluta. Ex insequentibus, quælibet λιπαρά. Sed idonea maxime est, quæ vel plumbi recrementum, vel vitellos habet.

Est etiam illa adustorum curatio, dum inflammatio est, impositam habere cum melle lenticulam: ubi ea declinavit, farinam cum ruta, vel porro, vel marrubio, donec crustæ cadant: tum ervum cum melle, aut irim, aut resinam terebinthinam, donec ulcus purum sit: novissime ficcum linamentum,

CAPUT XXVIII.

De interioribus ulceribus, quæ, aliqua corporum parte corrupta, nascuntur.

I. De carbunculo.

AB his, quæ extrinsecus incidunt, ad ea veniendum est, quæ interius, corrupta aliqua corporum parte, nascuntur. Ex quibus non aliud carbunculo pejus. Ejus hæ notæ sunt. Rubor est, superque eum non nimium pustulæ eminent, maxime nigræ, interdum sublividæ, aut pallidæ. In his fanies esse videtur: infra color niger est. Ipsum corpus aridum, & durius, quam naturaliter oportet. Circaque quasi crusta est; eaque inflammatione cingitur. Neque in eo loco levare cutis potest, sed inferiori carni quasi affixa est. Somnus urget. Nonnunquam horror, aut febris oritur, aut utrumque. Idque vitium subteractis quasi quibusdam radicibus serpit; interdum celerius, interdum tardius. Supra quoque, procedens inalbescit; dein lividum fit; circumque exiguæ pustulæ oriuntur. Et si circa stomachum faucesve incidit, subito spiritum sæpe elidit.

Nihil melius est, quam protinus adurere. Neque id grave est. nam non sentit; quoniam ea caro mortua est. Finisque adurendi est, dum ex omni parte sensus doloris est. Tum deinde vulnus, sicut cetera adusta, curandum est. Sequitur enim sub medicamentis erodentibus crusta: quæ undique a viva carne diducta, trahit secum, quidquid corruptum erat;

purusque jam sinus curari potest implentibus. At, si in summa cute vitium est, possunt succurrere quædam vel exedentia tantum, vel etiam adurentia. Vis pro magnitudine adhibenda est. Quodcumque vero medicamentum impositum est, si satis proficiet, protinus a viva corruptam partem resolvat.

Certaque esse fiducia potest fere, si undique vitiosa caro excedat, qua hujusce rei medicamentum exest: si id non fit, medicamentumque malo vincitur, utique ad unctionem properandum est. Sed in ejusmodi casu abstinendum a cibo, a vino est. Aquam liberaliter bibere expedit. Magisque ea servanda sunt, si febricula quoque accessit.

2. *De carcinomate.*

Non idem periculum *καρκίνωμα* affert, nisi imprudentia curantis agitatum est. Id vitium fit maxime in superioribus partibus, circa faciem, nares, aures, labra, mammas feminarum. Et in jecore, aut splene hoc nascitur. Circa locum aliqua quasi puncta sentiuntur: isque immobilis, inæqualiter tumet; interdum etiam torpet. Circa eum inflatæ venæ quasi recurvantur: hæque pallent, aut livent: nonnunquam etiam in quibusdam delitescunt. Tactusque is locus, aliis dolorem affert, in aliis eum non habet. Et nonnunquam sine ulcere durior aut mollior est, quam esse naturaliter debet. Nonnunquam iisdem omnibus ulcus accedit. Interdumque nullam habet proprietatem: interdum simile his est, quæ vocant Græci *κονδυλώματα*, aspredine quadam & magnitudine sua: colorque ejus ruber est, aut lenticulæ

similis. Neque tuto secatur. nam protinus aut resolutio nervorum, aut distentio insequitur. Sæpe homo ictus obmutescit, atque ejus anima deficit. Quibusdam etiam, si id ipsum pressum est, quæ circa sunt, intenduntur & intumescunt. Ob quæ pessimum id genus est. Fereque primum id fit, quod κακόνδεσ a Græcis nominatur. Deinde ex eo id καρκίνωμα, quod sine ulcere est. Deinde ulcus. Ex eo, thymium.

Tolli nihil, nisi κακόνδεσ, potest: reliqua curationibus irritantur, & quo major vis adhibita est, eo magis. Quidam usi sunt medicamentis adurentibus; quidam ferro adusserunt: quidam scalpello exciderunt. neque ulli unquam medicina profuit: sed adusta, protinus concitata sunt, & increverunt, donec occiderent. Excisa etiam, post inductam cicatricem, tamen reverterunt, & causam mortis attulerunt. Cum interim plerique nullam vim adhibendo, qua tollere id malum tentent, sed imponendo tantum lenia medicamenta, quæ quasi blandiantur, quo minus ad ultimam senectutem perveniant, non prohibentur. Discernere autem cacoethes, quod curationem recipit, a carcinomate, quod non recipit, nemo scire potest, nisi tempore & experimento.

Ergo, ubi primum id vitium notatum est, imponi debent medicamenta adurentia. Si levatur malum, minuunturque ejus indicia, procedere curatio potest & ad scalpellum, & ad ustionem. Si protinus irritatum est, scire licet, jam carcinoma esse; removendaque sunt omnia acria, omnia vehementia. Sed, si sine ulcere is locus durus est, imponi ficum quam pinguissimam, aut ῥυπῶδεσ emplastrum satis

est. Si ulcus æquale est, ceratum ex rosa injiciendum est, adjiciendusque ei pulvis ex contrita testa, ex qua faber ferrarius tingere candens ferrum solitus est. Si id nimium supercrevit, tentanda squama æris est (quæ lenissima ex adurentibus est) eatenus, ne quid eminere patiatur: sed ita, si nihil exacerbavit: sin minus, eodem cerato contenti esse debemus.

3. *De theriomate.*

Est etiam ulcus, quod *ὑπέρωμα* Græci vocant. Id & per se nascitur, & interdum ulceri ex alia causa factō supervenit. Color est vel lividus, vel niger: odor foedus: multus, & muco similis humor. Ipsum ulcus neque tactum, neque medicamentum sentit: prurigne tantum movetur. at circa dolor est, & inflammatio. Interdum etiam febris oritur. Nonnunquam ex ulcere sanguis erumpit. Atque id quoque malum serpit. Quæ omnia sæpe intenduntur, fitque ex his ulcus, quod *ἐρπητα ἐσθιόμενον* Græci vocant; quia celeriter serpendo, penetrandoque usque ad ossa, corpus vorat. Id ulcus inæquale est, cœno simile; inestque multus humor glutinosus; odor intolerabilis; majorque, quam pro modo ulceris, inflammatio. Utrumque, sicut omnis cancer, fit maxime in senibus; vel his, quorum corpora mali habitus sunt.

Curatio utriusque eadem est: sed in majore malo major vis necessaria. Ac primum, a victus ratione ordinandum est: ut quiescat in lectulo: ut primis diebus a cibo abstineat: aquam quamplurimam assumat. Alvus quoque ei ducatur. Dein, post inflam-

mationem, cibum boni succi capiat, vitatis omnibus acribus : potionis quantum volet, sic, ut interdiu quidem aqua contentus sit : in cœna etiam vini austeri aliquid bibat. Non æque tamen fame in his, quos ἐρπης urgebit, atque in his, qui σπρίσσει adhuc habebunt, utendum erit. Et victus quidem talis necessarius est.

Super ulcus vero inspergenda est arida aloe, œnanthe, &, si parum proficiet, chalcitis. Ac, si quis nervus, exesa carne, nudatus est, contegendus ante linteolo est, ne sub eo medicamento aduratur. Si validioribus etiamnum remediis opus est, ad eas compositiones veniendum est, quæ vehementius adurunt. Quidquid autem inspergitur, averso specillo infundi debet. Superdanda cum melle sunt vel linamenta, vel oleæ folia ex vino decocta, vel marubium : eaque linteolo contegenda in aqua frigida madefacto, dein bene expresso. Circaque, qua tumor ex inflammatione est, imponenda, quæ reprimant, cataplasmata. Si sub his nihil proficitur, ferro locus aduri debet; diligenter nervis, si qui apparent, ante contactis. Adustum vel medicamentis vel ferro corpus, primum purgandum, deinde implendum esse, apparere cuilibet ex prioribus potest.

4. *De sacro igne.*

Sacer quoque ignis malis ulceribus annumerari debet. Ejus duæ species sunt. Alterum est subrubicundum, aut mixtum rubore atque pallore; exasperatumque per pustulas continuas, quarum nulla altera major est, sed plurimæ perexiguæ. In his sem-

per fere pus, & sæpe rubor, cum calore est: serpitque id nonnunquam, sanefcente eo, quod primum vitiatum est: nonnunquam etiam exulcerato, ubi, ruptis pustulis, ulcus continuatur, humorque exit, qui esse inter faniem & pus videri potest. Fit maxime in pectore, aut lateribus, aut eminentibus partibus, præcipueque in plantis. Alterum autem est in summæ cutis exulceratione, sed sine altitudine, latum, sublividum, inæqualiter tamen; mediumque sanescit, extremis procedentibus: ac sæpe id, quod jam sanum videbatur, iterum exulceratur. At circa, proxima cutis, quæ vitium receptura est, tumidior & durior est, coloremque habet ex rubro subnigrum. Atque hoc quoque malo fere corpora seniores tentantur, aut quæ mali habitus sunt; sed in cruribus maxime.

Omnis autem sacer ignis, ut minimum periculum habet ex his, quæ serpunt; sic prope difficillime tollitur. Medicamentum ejus fortissimum est, uno die febris, quæ humorem noxium absumat. Pus, quo crassius & albidius est, eo periculi minus est. Prodest etiam infra os ulcerum cædi, quo plus puris exeat, & id, quo ibi corruptum corpus est, extrahatur. Sed tamen, si febricula accessit, abstinentia, lectulo, alvi ductione opus est. In omni vero sacro igni, neque lenibus & glutinosis cibis, neque falsis & acribus utendum est; sed his, quæ inter utrumque sunt: qualis est panis sine fermento, piscis, hœdus, aves, exceptoque apro, omnis fere venatio. Si non est febricula, & gestatio utilis est, & ambulatio, & vinum austerum, & balneum. Atque

in hoc quoque genere potio magis liberalis esse, quam cibus, debet.

Ipfa autem ulcera, si mediocriter serpunt, aqua calida: si vehementius, vino calido fovenda sunt. Deinde acu pustulæ, quæcunque sunt, aperiendæ. Tum imponenda ea, quæ putrem carnem exedant. Ubi inflammatio sublata, ulcusque purgatum est, imponi lene medicamentum debet. In altero autem genere, possunt proficere mala cotonea in vino cocta, atque contrita: potest emplastrum vel Hieræ, vel τετραφάρμακον, cui quinta pars turis adjecta sit: potest nigra hederæ ex vino austero cocta; ac, si celeriter malum serpit, non aliud magis proficit. Purgato ulcere, quod in summa cute esse proposui, satis ad sanitatem eadem lenia medicamenta proficient.

5. *De chironio ulcere.*

Chironium autem ulcus appellatur, quod & magnum est, & habet oras duras, callosas, tumentes. Exit sanies non multa, sed tenuis: odor malus. neque in ulcere, neque in ejus tumore ulla est inflammatio: dolor modicus est. Nihil serpit, ideoque nullum periculum affert; sed non facile sanescit. Interdum tenuis cicatrix inducitur, deinde iterum rampitur, ulcusque renovatur. Fit maxime in pedibus & cruribus.

Super id imponi debet, quod & lene aliquid, & vehemens, & reprimens habeat. Quale ejus rei causa fit ex his: squamæ æris, plumbi eloti combusti, singulorum P. VI. * cadmiæ, ceræ, singulorum P.

VIII. * rosæ quantum satis est ad ceram simul cum eis molliendam.

6. *De ulceribus, quæ ex frigore in pedibus & manibus oriuntur.*

Fiunt etiam ex frigore hiberno ulcera, maxime in pueris, & præcipue pedibus, digitisque eorum, nonnunquam etiam in manibus. Rubor cum inflammatione mediocri est. Interdum pustulæ oriuntur, deinde exulceratio. Dolor autem modicus: prurigo major est. Nonnunquam humor exit, sed non multus; qui referre vel pus, vel faniem videtur.

In primis multa calida aqua fovendum est, in qua rapa decocta; aut si ea non sunt, aliquæ verbenæ ex reprimentibus. Si nondum adaperitum ulcus est, æs, quam maxime calidum quis pati potest, admovendum est. Si jam exulceratio est, imponi debet alumen, æqua portione cum ture contritum, cum vino adjecto; aut malicorium in aqua coctum, deinde contritum. Si summa detracta pellicula est, hic quoque melius lenia medicamenta proficiunt.

7. *De struma.*

Struma quoque est tumor, in quo subter concreta quædam ex pure & sanguine quasi glandulæ oriuntur. Quæ vel præcipue fatigare medicos solent, quoniam & febres movent, nec unquam facile maturescunt; &, sive ferro, sive medicamentis curantur, plerumque iterum juxta cicatrices ipsas resurgunt; multoque post medicamenta sæpius. qui-

bus id quoque accedit, quod longo spatio detinent. Nascuntur maxime in cervice; sed etiam in alis, & inguinibus, & in lateribus. In mammis quoque feminarum se reperisse, chirurgus Meges auctor est.

Propter hæc & album veratrum recte datur, atque etiam sæpius, donec ea digerantur. Et medicamenta imponuntur, quæ humorem vel educant, vel dissipent; quorum supra mentio facta est. Adurentibus quoque quidam utuntur, quæ exedunt, crustaque eum locum adstringunt: tunc vero ut ulcus curant. Quæcunque autem ratio curandi est, corpus, puro ulcere, exercendum atque alendum est, donec ad cicatricem perveniat. Quæ cum medici doceant, quorundam rusticorum experimento cognitum, quem struma male habet, eum, si anguem edit, liberari.

8. *De furunculo.*

Furunculus vero, est tuberculum acutum cum inflammatione, & dolore; maximeque ubi jam in pus vertitur. Qui ubi adaperitus est, & exiit pus, subter apparet pars carnis in pus versa, pars corrupta subalbida, subrubra; quem ventriculum quidam furunculi nominant. In eo nullum periculum est, etiamsi nulla curatio adhibeatur: maturescit enim per se, atque erumpit. Sed dolor efficit, ut potior medicina sit, quæ maturius liberet.

Proprium ejus medicamentum galbanum est. sed alia quoque supra comprehensa sunt. Si cetera defunt, imponi debet, primum, non pingue empla-

strum, ut id reprimat : deinde, si non repressit, quodlibet puri movendo accommodatum. si ne id quidem est, vel refina, vel fermentum. Expresso pure, nulla ultra curatio necessaria est.

9. *De phymate.*

Phyma vero nominatur tuberculum furunculo simile, sed rotundius & planius, sæpe etiam majus. Nam furunculus ovi dimidii magnitudinem raro explet, nunquam excedit. Phyma etiam latius patere consuevit : sed inflammatio dolorque sub eo minores sunt. Ubi divulsum est, pus eodem modo apparet : ventriculus, qui in furunculo, non invenitur : verum omnis corrupta caro in pus vertitur. Id autem in pueris & sæpius nascitur, & facilius tollitur : in juvenibus rarius oritur, & difficilius curatur. Ubi ætas induravit, ne nascitur quidem. Quibus vero medicamentis discuteretur, supra propositum est.

10. *De phygethlo.*

Φύγεθλον autem est tumor, non altus, sed latus, in quo quiddam pustulæ simile est. Dolor distentionisque vehemens est, & major quam pro magnitudine tumoris : interdum etiam febricula. idque tarde maturescit, neque magnopere in pus convertitur. Fit maxime aut in cervice, aut in alis, aut in inguinibus. Panum, ad similitudinem figuræ, nostri vocant. Atque id ipsum quo medicamento tolleretur, supra demonstravi.

II. *De abscessibus.*

Sed cum omnes hi nihil nisi minuti abscessus sint, generale nomen trahit latius vitium, totum ad supurationem spectans. Idque fere fit aut post febres, aut post dolores partis alicujus, maximeque eos, qui ventrem infestarunt. Sæpiusque oculis expostum est, siquidem latius aliquid intumescit ad similitudinem ejus, quod $\phi\tilde{\upsilon}\mu\alpha$ vocari proposui, rubetque cum calore, & paulo post etiam cum durtia, magisque nocenter adolescit, & sitim vigiliamque exprimit. Interdum tamen nihil horum in cute deprehendi potest; maximeque, ubi altius pus movetur: sed cum siti vigiliaque sentiuntur intus aliquæ punctiones. Et, quod de subito durius non est, melius est: &, quamvis non rubet, coloris tamen aliter mutati est. quæ signa jam pure oriente nascuntur: tumor ruborque multo ante incipiunt.

Sed, si locus mollis est, avertendus is materiæ aditus est per cataplasmata, quæ simul & repri-
munt, & refrigerant: qualia & alias & paulo ante in erysipelate proposui. Si jam durior est, ad ea veniendum est, quæ digerant, & resolvant: qualis est ficus arida contusa: aut fæx mixta cum cerato, quod ex adipe suilla coactum sit; aut cucumeris radix, cui ex farina duæ partes adjectæ sint, ante ex mulso decoctæ. Licet etiam miscere æquis portionibus ammoniacum, galbanum, propolim, viscum, pondusque adjicere myrrhæ dimidio minus, quam in prioribus singulis erit. Atque emplastra quoque & malagmata idem efficiunt, quæ supra explicui.

Quod per hæc discussum non est, necesse est, maturescat. Idque quo celerius fiat, imponenda est farina hordeacea, ex aqua cocta, cui & olerum aliquid recte miscetur. Eadem autem hæc in minoribus quoque abscessibus, quorum nomina proprietatesque supra reddidi, recte fiunt. Eademque omnium curatio: tantum modo distat. Crudum est autem, in quo major quasi venarum motus est, & gravitas, & ardor, & distentio, & dolor, & rubor, & durities; &, si major abscessus est, horror, atque etiam febricula permanet: penitusque condita suppuratione pro his, quæ alibi cutis ostendit, punctiones sunt. Ubi ista se remiserunt, jamque is locus prurit, & aut sublividus, aut subalbidus est, matura suppuratio est. Ex qua, ubi vel per ipsa medicamenta, vel etiam ferro aperta est, pus debet emitti. Tum, si qua in alis, vel inguinibus sunt, sine linamento nutrienda sunt. In ceteris quoque partibus, si una plaga exigua est, si mediocris suppuratio fuit, si non alte penetravit, si febris non est, si valet corpus, æque linamenta supervacua sunt. In reliquis, parce tamen, nec, nisi magna plaga est, imponi debent. Commode vero mel super linamenta, vel sine his imponitur lenticula ex melle, aut malicorium ex vino coctum. quæ & per se & mixta idonea sunt.

Si qua circa duriora sunt, ad ea mollienda, vel malva contrita, vel fœni Græci linive semen ex passio coctum superdandum est. Quidquid deinde impositum est, non adstringi, sed modice deligari debet. Illo neminem decipi decet, ut in hoc genere

cerato utatur. Cetera, quæ pertinent ad purgandum ulcus, ad implendum, ad cicatricem inducendam conveniunt, quæ in vulneribus exposita sunt.

12. *De fistulis.*

Nonnunquam autem ex ejusmodi abscessibus, & ex aliis ulcerum generibus, fistulæ oriuntur. Id nomen est ulceri alto, angusto, calloso. Fit in omni fere parte corporis: habetque quædam in singulis locis propria. Prius de communibus dicam. Genera igitur fistularum plura sunt. siquidem aliæ breves sunt, aliæ altius penetrant: aliæ rectæ intus feruntur, aliæ multoque plures transversæ: aliæ simplices sunt, aliæ duplices triplicesve; quæ ab uno ore orfæ intus tres fiunt, aut etiam in plures sinus dividuntur: aliæ rectæ, aliæ flexæ, & tortuosæ sunt: aliæ intra carnem desinunt, aliæ ad ossa aut cartilaginem penetrant; aut, ubi neutrum horum subest, ad interiora perveniunt; aliæ deinde facile, aliæ cum difficultate curantur, atque etiam quædam insanabiles reperiuntur.

Expedita curatio est in fistula simplici, recenti, intra carnem. Adjuvatque ipsam corpus, si juvenile, si firmum est. Inimica contraria his sunt: itemque, si fistula os, vel cartilaginem, vel nervum, vel musculos læsit; si articulum occupavit; si vel ad vesicam, vel ad pulmonem, vel ad vulvam, vel ad grandes venas arteriasve, vel ad inania, ut guttur, stomachum, thoracem penetravit. Ad intestina quoque eam tendere, semper periculosum, sæpe pestiferum est. Quibus multum mali accedit,

si corpus vel ægrum, vel senile, vel mali habitus est.

Ante omnia autem demitti specillum in fistulam convenit; ut, quo tendat, & quam alte perveniat, scire possimus; simul etiam protinus humida, an siccior sit: quod, extracto specillo, patet. Si vero os in vicino est, id quoque disci potest, si jam necne eo fistula penetrarit, & quatenus nocuerit. Nam, si molle est, quod ultimo specillo contingitur, intra carnem adhuc vitium est: si magis id renititur, ad os ventum est. Ibi deinde si labitur specillum, nondum caries est: si non elabitur, sed æquali innititur, caries quidem, verum adhuc levis est: si inæquale quoque & asperum subest, vehementius os exesum est. At cartilago ubi subhæsit, ipsa sedes docet: perventumque esse ad eam; ex renisu patet.

Sed ex his quidem colliguntur fistularum sedes, spatia, noxæ. Simples vero hæ sint, an in plures partes diducantur, cognosci potest ex modo puris. Cujus si plus fertur, quam quod simplici spatio convenit, plures sinus esse manifestum est. Cumque fere juxta sint caro, & nervus, & aliqua nervosa, quales fere tunicæ membranæque sunt, genus quoque puris docebit, num plures sinus intus diversa corporis genera perferint. Siquidem ex carne pus læve, album, copiosius fertur: at ex nervoso loco, coloris quidem ejusdem, sed tenuius & minus: ex nervo, pingue & oleo non dissimile. Denique etiam corporis inclinatio docet, num in plures partes fistulæ penetrarint, quia sæpe, cum quis aliter decubuit, aliterque membrum colloca-

vit, pus ferri, quod jam defierat, iterum incipit; testaturque, non solum alium finum esse, ex quo descendat, sed etiam in aliam corporis partem eum tendere.

Sed si in carne & recens & simplex est; ac neque rugosa, neque cava sede; neque in articulo, sed in eo membro, quod per se immobile, non nisi cum toto corpore movetur, satis proficiet emplastrum, quod recentibus vulneribus imponitur, dum habeat vel salem, vel alumen, vel squamam æris, vel æruginem, vel ex metallicis aliquid. Exque eo collyrium fieri debet altera parte tenuius, altera paulo plenius. Idque ea parte, qua tenuius est, antecedente demitti oportet in fistulam, donec purus sanguis se ostendat. quæ in omnibus fistularum collyriis perpetua sunt. Idem deinde emplastrum in linteolo superimponendum; supraque injicienda spongia est, in acetum ante demissa: solvique quinto die satis est. Genusque victus adhibendum est, quo carnem ali docui.

Ac, si longius a præcordiis fistula est, ex intervallo jejunum radículas edisse, deinde vomere, necessarium est.

Vetustate callosa fit fistula. Callus autem neminem fallit, quia durus est, & aut albus, aut pallidus. Sed tum validioribus medicamentis opus est. Quale est, quod habet papaveris lacrimæ P. I. * gummi P. III. * cadmiæ P. IV. * atramenti futoriū P. VIII. * ex quibus aqua coactis collyrium fit. Aut in quo sunt gallæ P. I. * æruginis, sandarachæ, aluminis Ægyptii, singulorum P. I. * atramenti fu-

torii combusti P. II. * Aut quod constat ex chalcitide, & e saxo calce; quibus auripigmenti dimidio minus, quam in singulis prioribus est, adjicitur, eaque melle cocto excipiuntur. Expeditissimum autem est ex præcepto Megetis, æruginis rarfæ P. II. * conterere, deinde ammoniaci thymiamatis P. II. * aceto liquare, eoque infuso æruginem cogere. Idque ex primis medicamentis est. Sed, ut hæc maximi effectus sunt, si cui ista non adsunt, facile tamen est callum quibuslibet adurentibus medicamentis erodere: satisque est vel papyrum intortum, vel aliquid ex penicillo in modum collyrii adstrictum eo illinere. Scilla quoque cocta & mixta cum calce, callum exest.

Si quando vero longior & transversa fistula est, demisso specillo, contra principium hujus incidere commodissimum est, & collyrium utrinque, quod volueris, demitti.

At si duplicem esse fistulam vel multiplicem existimamus, sic tamen ut brevis, intraque carnem sit, collyrio uti non debemus; quod unam partem curet, reliquas omittat: sed eadem medicamenta arida in calamus scriptorium conjicienda sunt,isque ori fistulæ aptandus, inspirandumque, ut ea medicamenta intus compellantur. Aut eadem ex vino liquanda, vel, si sordidior fistula est, ex mulso, si callosior, ex aceto sunt; atque intus infundendum. Quidquid inditum est, superponenda sunt, quæ refrigerent & reprimant. nam fere, quæ circa fistulam sunt, habent aliquid inflammationis. Neque alienum est, ubi quis resolverit, antequam rur-

sus alia medicamenta conjiciat, per oricularium clysterem fistulam eluere; si plus puris fertur, vino; si callus durior est, aceto; si jam purgatur, mulso, vel aqua, in qua ervum coctum sit, sic ut huic quoque mellis paulum adjiciatur.

Fere vero fit, ut ea tunica, quæ inter foramen & integram carnem est, victa medicamentis tota exeat, infraque ulcus purum sit. Quod ubi contigit, imponenda glutinantia sunt; præcipueque spongia melle cocto illita. Neque ignoro, multis placuisse linamentum in modum collyrii compositum, tinctum melle, implendi causa demitti. sed celerius id glutinatur, quam impletur. Neque verendum est, ne purum corpus puro corpori junctum non coeat, adjectis quoque medicamentis ad id efficacibus; cum sæpe exulceratio digitorum, nisi magna cura prospeximus, sanescendo in unum eos jungat.

13. *De ulceris genere, quod μελικηρία nominatur.*

Est etiam ulceris genus, quod a favi similitudine μελικηρίς a Græcis nominatur. Idque duas species habet. Alterum subalbidum, furunculo simile; sed majus, & cum dolore majore. Quod, ubi maturescit, habet foramina; per quæ fertur humor glutinosus, & purulentus; nec tamen ad justam maturitatem pervenit. Si divisum est, multo plus intus corrupti, quam in furunculo, apparet, altiusque descendit. Raro fit nisi in capillis.

Alterum est minus, super corpus eminens, durum, latum, subviride, subpallidum, magis exulceratum: siquidem ad singulorum pilorum radices

foramina sunt, per quæ fertur humor glutinosus, subpallidus, crassitudinem mellis, aut visci referens, interdum olei. Si inciditur, viridis intra caro apparet. Dolor autem, & inflammatio ingens est, adeo ut acutam quoque febrem movere consueverint.

Super id, quod minus crebris foraminibus exasperatum est, recte imponitur & ficus arida, & lini semen in mulso coctum, & emplastra ac malagmata materiam educentia, aut quæ proprie huc pertinentia supra posui.

Super alterum, & ea medicamenta, & farina ex mulso cocta, sic ut ei dimidium resinæ terebinthinæ misceatur; & ficus in mulso decocta, cui paulum hyssopi contriti sit adjectum; & uvæ taminiae pars quarta fico adjecta. Quod si parum in utrolibet genere medicamenta proficiunt, totum ulcus usque ad sanam carnem excidi oportet. Ulcere ablato, super plagam medicamenta danda sunt; primum, quæ pus citent; deinde, quæ purgent, tum quæ impleant.

14. *De acrochordone, & thymio, & myrmeciis, & clavo.*

Sunt vero quædam verrucis similia; quorum diversa nomina, ut vitia sunt. Ἀκροχορδῶνα Græci vocant, ubi sub cute coit aliquid durius, & interdum paulo asperius, coloris ejusdem; infra tenue, ad cutem latius. Idque modicum est, quia raro fabæ magnitudinem excedit. Vix unum tantum eodem tempore nascitur; sed fere plura, maximeque in pueris: eaque nonnunquam subito desinunt, non-

nunquam mediocrem inflammationem excitant: sunt, quæ etiam in pus convertuntur.

Θύμιον nominatur, quod super corpus quasi verrucula eminet, ad cutem tenue, supra latius, subdurum, & in summo perasperum. Id, quæ summum, colorem floris thymi repræsentat; unde ei nomen est; ibique facile finditur, & cruentatur; nonnunquam aliquantum sanguinis fundit: fereque circa magnitudinem fabæ Ægyptiæ est, raro majus, interdum perexiguum. Modo autem unum, modo plura nascuntur, vel in talis, vel palmis, vel inferioribus pedum partibus: pessima tamen in obscœnis sunt: maximeque ibi sanguinem fundunt.

Μυρμήκια autem vocantur humiliora thymio durioraque. quæ radices altius exigunt, majoremque dolorem movent, infra lata, super autem tenuia, minus sanguinis mittunt: magnitudine vix unquam lupini modum excedunt. Nascuntur ea quoque aut in palmis, aut in inferioribus partibus pedum.

Clavus autem nonnunquam quidem etiam alibi, sed in pedibus tamen maxime nascitur; præcipue autem ex contuso, quamvis interdum aliter: doloremque, etiamsi non alias, tamen ingredienti movet.

Et his acrochordon, sive thymium sæpe etiam per se finiuntur; &, quo minora sunt, eo magis. Myrmecia & clavi sine curatione vix unquam desinunt. Acrochordon, si excisa est, nullam radiculam relinquit, ideoque ne renascitur quidem. Thymio clavoque excisis, subter rotunda radicula nascitur, quæ penitus descendit ad carnem: eaque re-

liſta idem rurfus exigit. Myrmecia latiffimis radicibus inhærent : ideoque ne excidi quidem fine magna exulceratione poſſunt. Clavum ſubinde deradere, commodiffimum eſt. nam fine ulla vi fic emolleſcit. ac, ſi ſanguinis quoque aliquid emiſſum eſt, ſæpe emoritur. Tollitur etiam, ſi quis eum circumpurgat, deinde imponit reſinam, cui miſcuit pulveris paulum, quem ex lapide molari contrito fecit. Cetera vero genera medicamentis adurenda ſunt. Aliiſque id, quod ex ſæce vini; myrmeciis id, quod ex alumine & ſandaracha fit, aptiſſimum. Sed ea, quæ circa ſunt, foliis contegi debent, ne ipſa quoque exulcerentur. deinde poſtea lenticula imponi ſolet. Tollit thymium etiam ficus in aqua cocta.

15. *De puſtularum generibus.*

At puſtulæ maxime vernis temporibus oriuntur. Earum plura genera ſunt. Nam modo circa totum corpus partemve aſpredo quædam fit, ſimilis iis puſtulis, quæ ex urtica, vel ex ſudore naſcuntur : *ἐξανθήματα* Græci vocant. æque modo rubent, modo colorem cutis non excedunt. Nonnunquam plures, ſimiles varis oriuntur, nonnunquam majores puſtulæ, lividæ, aut pallidæ, aut nigræ, aut aliter naturali colore mutato : ſubeſtque his humor. Ubi hæ ruptæ ſunt, infra quaſi exulcerata caro apparet. *φλυκταίναι ἐλκώδεις* Græce nominantur. Fiunt vel ex frigore, vel ex igni, vel ex medicamentis.

Φλυζάκιον autem paulo durior puſtula eſt, ſubalbida, acuta. ex qua ipſa quod exprimitur, humidum eſt. Ex puſtulis vero nonnunquam etiam ul-

cuscula fiunt, aut aridiora, aut humidiora : & modo tantum cum prurigine, modo etiam cum inflammatione ac dolore ; exitque aut pus, aut sanies, aut utrumque. Maximeque id evenit in ætate puerili : raro, in medio corpore : sæpe, in eminentibus partibus.

Pessima pustula est, quæ ἐπιπυκτὶς vocatur. Ea colore vel sublivida, vel subnigra, vel alba esse consuevit. Circa hanc autem vehemens inflammatio est ; &, cum adaperata est, reperitur intus exulceratio mucosa, colore humori suo similis. Dolor ex ea supra magnitudinem ejus est : neque enim ea faba major est. Atque hæc quoque oritur in eminentibus partibus, & fere noctu. unde nomen quoque a Græcis ei ἐπιπυκτὶς est impositum.

In omni vero pustularum curatione primum est, multum ambulare, atque exerceri : si quid ista prohibet, gestari. Secundum est, cibum minuere : abstinere ab omnibus acribus & extenuantibus. eademque nutrices facere oportet, si lactens puer ita affectus est. Præter hæc, is, qui jam robustus est, si pustulæ minutæ sunt, desudare in balneo debet ; simulque super eas nitrum inspergere ; oleoque vinum miscere, & sic ungi ; tum descendere in solium. Si nihil sic proficitur, aut si majus pustularum genus occupavit, imponenda lenticula est ; detractaque summa pellicula, ad medicamenta lenia transfundendum. Ἐπιπυκτὶς post lenticulam, recte herba quoque sanguinali, vel viridi coriandro curatur.

Ulcera ex pustulis facta tollit spuma argenti cum semine fœni Græci mixta sic, ut his invicem rosa

atque intubi succus adjiciatur, donec mellis crassitudo fiat. Proprie ad eas pustulas, quæ infantes male habent, lapidis, quem *πυρίτην* Græci vocant, P. VIII. * cum quinquaginta amaris nucibus miscetur, adjiciunturque olei cyathi tres. Sed prius ungi ex cerussa pustulæ debent, tum hoc illini.

16. *De scabie.*

Scabies vero est durior cutis rubicundior. ex qua pustulæ oriuntur, quædam humidiores, quædam ficciores. Exit ex quibusdam fanies; fitque ex his continuata exulceratio pruriens; serpitque in quibusdam cito. Atque in aliis quidem ex toto desinit, in aliis vero certo tempore anni revertitur. Quo asperior est, quoque prurit magis, eo difficilius tollitur. Itaque eam, quæ talis est, *ἀγρία* Græci appellant, id est feram.

In hac quoque victus ratio eadem, quæ supra; necessaria est. Medicamentum autem ad incipientem hanc idoneum est, quod fit ex spodii, croci, æruginis, singulorum P. I. * piperis albi, omphacii, singulorum P. I. * cadmiæ P. VIII. * At, ubi jam exulceratio est, id, quod fit ex sulphuris P. I. * ceræ P. IV. * picis liquidæ hemina, olei sextariis duobus, quæ simul incoquuntur, dum crassitudo mellis fiat. Est etiam, quod ad Protarchum auctorem refertur. Habet hoc farinæ lupinorum sextarium, nitri cyathos quatuor, picis liquidæ heminam, resinæ humidæ selibram, aceti cyathos tres. Crocum quoque, lycium, ærugo, myrrha, cinis, æquis portionibus recte miscentur, & ex passo coquuntur. Idque

omnem pituitam ubique sustinet. At, si nihil aliud est, amurca ad tertiam partem decocta, vel sulphur pice liquida mixtum, sicut de pecoribus proposui; hominibus quoque scabie laborantibus opitulantur.

47. *De impetiginis speciebus.*

Impetiginis vero species sunt quatuor. Minime mala est, quæ similitudine scabiem repræsentat. nam & rubet, & durior est, & exulcerata est, & rodit. Distat autem ab ea, quia magis exulcerata est, & varis similes pustulas habet; videnturque esse in ea quasi bullulæ quædam, ex quibus interposito tempore, quasi squamulæ resolvuntur, certioribusque hæc temporibus revertitur.

Alterum genus pejus est, simile papulæ feræ, sed asperius rubicundiusque, figuras varias habens squamulæ ex summa cute decidunt, rosio major est, celerius & latius procedit, certioribusque etiam nonnunquam priori temporibus & fit, & definit. Rubrica cognominatur.

Tertia etiamnum deterior est. nam & crassior est, & durior, & magis tumet; in summa cute finitur, & vehementius rodit. Ipsa quoque squamosa, sed nigra procedit late, & tarde eminus serpit; in temporibus aut oritur, aut definit; neque ex toto tollitur. Nigræ cognomen est.

Quartum genus est, quod curationem omnino non recipit, distans colore. nam subalbidum est, & recenti cicatrici simile; squamulasque habet pallidas, quasdam subalbidas, quasdam lenticulæ similes: quibus demtis, nonnunquam profluit sanguis.

Alioqui vero humor ejus albidus est, cutis dura atque fissa est, proceditque latius.

Hæc vero omnia maxime genera oriuntur in pedibus, & manibus; atque ungues quoque infestant. Medicamentum non aliud valentius est, quam quod ad scabiem quoque pertinere sub auctore Protarcho retuli. Serapion autem, nitri P. II. * sulphuris P. IV. * excipiebat resina copiosa, eoque utebatur.

18. *De papulis.*

Papularum vero duo genera sunt. Altera est, in qua per minimas pustulas cutis exasperatur, & rubet, leviterque roditur, medium habet pauxillo lævius: tarde serpit. idque vitium maxime rotundum incipit, eademque ratione in orbem procedit. Altera autem est, quam ἀγρία, id est, feram, Græci appellant. In qua similiter quidem, sed magis cutis exasperatur, exulceraturque, ac vehementius & roditur, & rubet, interdum etiam pilos remittit.

Quæ minus rotunda est, difficilior sanescit: nisi sublata est, in impetiginem vertitur. Sed levis papula etiam, si jejuna saliva quotidie defricatur, sanescit. Major commodissime murali herba tollitur, si super eadem trita est. Ut vero ad composita medicamenta veniamus, idem illud Protarchi tanto valentius in his est, quanto minus in his vitii est. Alterum ad idem, Miconis: nitri rubri, turis, singulorum P. I. * cantharidum purgatarum P. II. * sulphuris ignem non experti tantundem, resinæ terebinthinæ liquidæ P. XX. * farinæ lolii sext. III. git cyathos tres, picis crudæ sext. unum.

19. *De vitiliginis speciebus, id est, de alphi, & melane, & leuce.*

Vitiligo quoque, quamvis per se nullum periculum affert, tamen foeda est, & ex malo corporis habitu fit. Ejus tres species sunt. Ἀλφός vocatur, ubi color albus est, fere subasper & non continuus, ut quædam quasi guttæ dispersæ esse videantur. Interdum etiam latius, & cum quibusdam intermissionibus serpit. Μέλας colore ab hoc differt, quia niger est, & umbræ similis. cetera eadem sunt. Λεύκη habet quiddam simile alphi, sed magis albida est, & altius descendit; in eaque albi pili sunt, & lanugini similes. Omnia hæc serpunt: sed in aliis celerius, in aliis tardius. Alphos & melas in quibusdam variis temporibus & oriuntur & desinunt. Leuce, quem occupavit, non facile dimittit.

Priora curationem non difficillimam recipiunt: ultimum vix unquam sanescit; ac, si quid ei vitio demtum est, tamen non ex toto sanus color redditur. Utrum autem aliquod horum sanabile sit, an non sit, experimento facile colligitur. Incidi enim cutis debet, aut acu pungi. si sanguis exit, quod fere fit in duobus prioribus, remedio locus est: si humor albidus, sanari non potest. Itaque ab hoc quidem abstinendum est.

Super id vero, quod curationem recipit, imponenda lenticula mixta cum sulphure & ture, sic, ut ea contrita ex aceto sit. Aliud ad idem, quod ad Irenæum auctorem refertur. Alcyonium, nitrum, cuminum, fici folia arida paribus portionibus con-

tunduntur, adjecto aceto. His in sole vitiligo perungitur: deinde non ita multo post, ne nimis erodatur, eluitur. Proprie quidam, Micone auctore, eos, quos alphos vocari dixi, hoc medicamento perungunt: sulphuris P. II. * nitri P. IV. * myrrhæ aridæ contritæ acetabulum miscent, deinde in balneo super vitiliginem inspergunt farinam ex faba, tum hæc inducunt. Hi vero, quos melanas vocari dixi, curantur, cum simul contrita sunt alcyonium, tus, hordeum, faba, eaque sine oleo in balneo ante sudorem insperguntur. Tum genus id vitiliginis defricatur.

A. CORN. CELSI
M E D I C I N Æ
LIBER SEXTUS.

C A P U T I.

De vitiis singularum corporis partium.

DIXI de his vitiis, quæ, per totum corpus orientia, medicamentorum auxilia desiderant. nunc ad ea veniam, quæ non nisi in singulis partibus incidere consueverunt, oriùs a capite.

De capillis fluentibus.

In hoc igitur capillis fluentibus maxime quidem sæpe radendo succurritur. Adjicit etiam vim quandam ad continendum, ladanum cum oleo mixtum. Nunc de his capillis loquor, qui post morbum fere fluunt. Nam, quo minus caput quibusdam ætate nudetur, succurri nullo modo potest.

C A P U T II.

De porrigine.

PORRIGO autem est, ubi inter pilos quædam quasi squamulæ surgunt, eæque a cute resolvuntur; & interdum madent, multo sæpius siccæ sunt. Idque evenit modo sine ulcere, modo exulcerato loco; huic

quòque modo malo odore, modo nullo accedente: Fereque id in capillo fit, rarius in barba, aliquando etiam in supercilio. Ac neque sine aliquo corporis vitio nascitur, neque ex toto inutile est. Nam bene integro capite, non exit: ubi aliquod in eo vitium est, non incommodum est, summam cutem potius subinde corrumpi, quam id, quod nocet, in aliam partem magis necessariam verti.

Commodius est ergo subinde peccando repurgare, quam id ex toto prohibere. Si tamen ea res nimium offendit, quod humore sequente fieri potest, magisque, si is etiam mali odoris est, caput sæpe radendum est; dein id super adjuvandum aliquibus ex leviter reprimentibus; quale est nitrum cum aceto, vel ladanum cum myrteo & vino, vel myrobalanum cum vino. Si parum per hæc proficitur, vehementioribus uti licet; cum eo, ut sciamus, utique in recenti vitio id inutile esse.

C A P U T III.

De sycofi.

EST etiam ulcus, quod a fici similitudine σύκοσις a Græcis nominatur. Caro excrescit. Et id quidem generale est. Sub eo vero duæ species sunt. Alterum ulcus durum & rotundum est: alterum humidum & inæquale. Ex duro exiguum quiddam & glutinosum exit: ex humido plus, & mali odoris. Fit vero utrumque in iis partibus, quæ pilis conteguntur: sed quidem id, quod callosum & ro-

tundum est, maxime in barba; id vero, quod humidum, præcipue est in capillo.

Super utrumque oportet imponere elaterium, aut lini semen contritum & aqua coactum, aut ficum in aqua decoctam, aut emplastrum tetrapharmacum ex aceto subactum. Terra quoque Eretria ex aceto liquata recte illinitur.

CAPUT IV.

De areis.

AREARUM quoque duo genera sunt. Commune utrique est, quod, emortua summa pellicula, pili primum extenuantur; deinde excidunt: ac, si ictus is locus est, sanguis exit liquidus, & mali odoris: increfcitque utrumque in aliis celeriter, in aliis tarde. Pejus est, quod densam cutem, & subpinguem, & ex toto glabram fecit. Sed ea, quæ ἀλωπεκία nominatur, sub qualibet figura dilatatur. Fit & in capillo, & in barba. Id vero, quod a serpentis similitudine ὀφίασις appellatur, incipit ab occipitio: duorum digitorum latitudinem non excedit: ad aures duobus capitibus serpit, quibusdam etiam ad frontem, donec se duo capita in priorem partem committant. Illud vitium in qualibet ætate est: hoc fere in infantibus. Illud vix unquam sine curatione: hoc per se sæpe finitur.

Quidam hæc genera arearum scalpello exasperant. quidam illinunt adurentia ex oleo; maximeque chartam combustam. quidam resinam terebinthinam cum thapsia inducunt. Sed nihil melius est, quam

novacula quotidie radere : qua cum paulatim summa pellicula excisa est, adaperiuntur pilorum radiculae. Neque ante oportet desistere, quam frequentem pilum nasci apparuerit. Id autem, quod subinde raditur, illini atramento scriptorio satis est.

C A P U T V.

De varis, & lenticulis, & ephelide.

PÆNE ineptiæ sunt, curare varos, & lenticulas, & ephelidas : sed eripi tamen feminis cura cultus sui non potest. Ex his autem, quæ supra proposui, vari lenticulaeque vulgo notæ sunt; quamvis rarior ea species est, quam ξένιον Græci vocant, cum sit ea lenticula rubicundior, & inæqualior. Ἐφελὶς vero a plerisque ignoratur : quæ nihil est, nisi asperitas quædam & durities mali coloris. Cetera non nisi in facie : lenticulae etiam in alia parte nonnunquam nasci solent. de qua per se scribere alio loco, visum operæ pretium non est.

Sed vari commodissime tolluntur imposita resina, cui non minus quam ipsa est, aluminis scissilis, & paulum mellis adjectum est. Lenticulam tollunt galbanum & nitrum, cum pares portiones habent, contritaque ex aceto sunt, donec ad mellis crassitudinem venerint. His corpus illinendum, &, interpositis pluribus horis, mane eluendum est, oleoque leviter unguendum.

Ephelidem tollit resina, cui tertia pars salis fossilis & paulum mellis adjectum est. Ad omnia vero

ista, atque etiam ad colorandas cicatrices, potest ea compositio, quæ ad Tryphonem patrem auctorem refertur. In ea pares portiones sunt myrobalani, crocomagmatis, cretæ cimoliæ subcæruleæ, nucum amararum, farinæ hordei atque ervi, struthii albi, fertulæ campanæ seminis. quæ omnia contrita, melle quam amarissimo coguntur, illitumque a vespere usque mane eluitur.

CAPUT VI.

De oculorum morbis & primo de his, qui lenibus medicamentis curantur.

SED hæc quidem mediocria sunt. Ingentibus vero & variis casibus oculi nostri patent. Qui cum magnam partem ad vitæ simul & usum & dulcedinem conferant, summa cura tuendi sunt.

Protinus autem orta lippitudine, quædam notæ sunt, ex quibus, quid eventurum sit, colligere possimus. Nam, si simul & lacrima & tumor & crassa pituita coeperint; si ea pituita lacrimæ mixta est; neque lacrima calida est, pituita vero alba & mollis, tumor non durus; longæ valetudinis metus non est. At si lacrima multa & calida, pituitæ paulum, tumor modicus, idque in uno oculo est; longum id, sed sine periculo, futurum est. Idque lippitudinis genus minime cum dolore est; sed vix ante vigesimum diem tollitur: nonnunquam per duos menses durat; sed quandoque finitur, si pituita alba & mollis esse incipit, lacrimæque miscetur.

Aut, si simul hæ utrumque oculum invaserunt; potest esse brevior, sed periculum ulcerum est. Pituita autem sicca & arida dolorem quidem movet, sed maturius desinit; nisi quid exulceravit.

Tumor magnus, si sine dolore est, & ficcus, sine ullo periculo est: si ficcus quidem, sed cum dolore est, fere exulcerat; & nonnunquam ex eo casu fit, ut palpebra cum oculo glutinetur. Ejusdem exulcerationis timor in palpebris pupillisve est; ubi, super magnum dolorem, lacrimæ falsæ calidæque eunt; aut etiam si, tumore jam finito, diu lacrima cum pituita profluit.

Pejus etiamnum est, ubi pituita pallida aut livida est, lacrima calida aut multa profluit, caput calet, a temporibus ad oculos dolor pervenit, nocturna vigilia urget. siquidem sub his oculis plerumque rumpitur, votumque est, ut tantum exulceretur. Intus ruptum oculum febricula juvat. Si foras jam ruptus procidit, sine auxilio est. Si de nigro aliquid albidum factum est, diu manet. At, si asperum, & crassum est, etiam post curationem vestigium aliquod relinquit.

Curari vero oculos sanguinis detractio, medicamento, balneo, fotu, vino, vetustissimus auctor Hippocrates memoriæ prodidit. Sed eorum tempora & causas parum explicuit: in quibus Medicinæ summa est. Neque minus in abstinentia & alvi ductione sæpe auxilii est. Hos igitur interdum inflammatio occupat: ubi cum tumore in his dolor est; sequiturque pituitæ cursus, nonnunquam copiosior vel acrior, nonnunquam utraque parte

moderatioꝛ. In ejusmodi casu prima omnium sunt quies & abstinentia. Ergo primo die, loco obscuro cubare debet sic, ut a sermone quoque abstineat: nullum cibum assumere; si fieri potest, ne aquam quidem; sin minus, certe quam minimum ejus.

Quod si graves dolores sunt, commodius secundo die; si tamen res urget, etiam primo sanguis mittendus est; utique si in fronte venæ tument, si firmo corpori materia superest. Si vero minor impetus, minus acrem curationem requirit: alvum non nisi secundo tertiove die duci oportet. At modica inflammatio neutrum ex his auxilium desiderat: satisque est, uti quiete & abstinentia.

Neque tamen in lippientibus longum jejunium necessarium est, ne pituita tenuior atque acrior fiat: sed secundo die dari debet id, quod levissimum videri potest ex his, quæ pituitam faciunt crassioꝛem; qualia sunt ova forbilia: si minor vis urget, pulticula quoque, aut panis ex lacte. Insequentibus diebus, quantum inflammationi detrahatur, tantum adjici cibis poterit; sed generis ejusdem: utique ut nihil falsum, nihil acre, nihil ex his, quæ extenuant, sumatur; nihil potui præter aquam. Et victus quidem ratio talis maxime necessaria est.

Protinus autem primo die, croci P. I. * & farinæ candidæ quam tenuissimæ P. II. * excipere oportet ovi albo, donec mellis crassitudinem habeat: idque in linteolum illinere, & fronti agglutinare, ut, compressis venis, pituitæ impetum cohibeat. Si crocum non est, rus idem facit. Linteolo an lana excipiatur, nihil interest. Superinungi vero oculi

debent sic, ut croci quantum tribus digitis comprehendi potest, fumatur, myrrhæ ad fabæ, papaveris lacrimæ ad lenticulæ magnitudinem, eaque cum passo conterantur, & specillo super oculos inducantur. Aliud ad idem: myrrhæ P. I. * mandragoræ succi P. II. * papaveris lacrimæ P. II. * foliorum rosæ, cicutæ feminis, singulorum P. III. * acaciæ P. IV. * gummi P. VIII. * Et hæc quidem interdiu: noctu vero, quo commodior quies veniat, non alienum est, superimponere candidi panis interiorem partem ex vino subactam. nam & pituitam reprimat, &, si quid lacrimæ processit, absorbet, & oculum glutinari non patitur.

Si grave id & durum, propter magnum oculorum dolorem, videtur, ovi & album & vitellus in vas defundendum est, adjiciendumque eo multum paulum, idque digito permiscendum; ubi facta unitas est, demitti debet lana mollis bene carpta, quæ id excipiat, superque oculos imponi. Ea res & levis est, & refrigerando pituitam coercet, & non exarescit, & glutinari oculum non patitur. Farina quoque hordeacea cocta, & cum malo cotoneo cocto mixta, commode imponitur. Neque ab ratione abhorret, etiam penicillo potissimum uti expresso, si levior impetus est, ex aqua; si major, ex posca. Priora fascia deliganda sunt, ne per somnum cadant: at hoc superimponi satis est, quia & reponi ab ipso ægro commode potest: &, cum inaruit, iterum madefaciendum est. Si tantum mali est, ut somnum diu prohibeat, eorum aliquid dandum est, quæ *ἀνέσχυρα* Græci vocant: satisque est puero, quod

ervi; viro, quod fabæ magnitudinem impleat. In ipsum vero oculum primo die, nisi modica inflammatio est, nihil recte conjicitur: sæpe enim potius concitatur eo pituita, quam minuitur. A secundo die, gravi quoque lippitudini per indita medicamenta recte succurritur, ubi vel jam sanguis missus, vel alvus ducta est; aut, ubi neutrum necessarium esse, manifestum est.

2. *De diversis oculorum collyriis.*

Multa autem multorum auctorum collyria ad id apta sunt; novisque etiam nunc mixturis temperari possunt; cum lenia medicamenta, & modice reprimentia, facile & varie misceantur. Ego nobilissima exsequar.

3. *Philonis collyrium.*

Est igitur Philonis, quod habet cerussæ elotæ, spodii, gummi, singulorum P. I. * papaveris lacrimæ combustæ P. I. * Illud scire oportet, hæc quoque omnia medicamenta, singula primum per se teri, deinde mixta iterum, adjecta paulatim vel aqua, vel alio humore; gummi cum quasdam alias facultates habeat, hoc maxime præstare, ut, ubi collyria facta inaruerunt, glutinata sint, neque frientur.

4. *Dionysii collyrium.*

Dionysii vero collyrium est: papaveris lacrimæ combustæ, donec tenerescat P. I. * turis combusti, gummi, singulorum P. II. * spodii P. IV. *.

5. *Cleonis collyrium.*

Cleonis nobile admodum : papaveris lacrimæ frictæ P. I. * croci P. I. * gummi P. * v. quibus, cum teruntur, adjicitur rosæ succus. Aliud ejusdem valentius : squamæ æris, quod *στόμαμα* appellant, P. I. * croci P. II. * spodii P. IV. * plumbi & eloti, & combusti P. I. * gummi tantundem. Ejus aliud quoque ad idem est, maxime ubi multa pituita profluit : castorei P. * I. aloes P. * I. croci P. * I. myrrhæ P. * II. lycii P. III. * cadmiæ curatæ P. VIII. * stibis tantundem, acaciæ succi P. XII. * quod, cum gummi miscuit, in pyxidicula servatur. Theodotus vero huic compositioni adjecit papaveris lacrimæ combustiæ P. * I. æris combusti & eloti P. II. * nucleorum palmarum combustorum P. x. * gummi P. XII. *

6. *Theodoti collyrium, acharistum appellatum.*

At ipsius Theodoti, quod a quibusdam *ἀχαρίστων* nominatur, ejusmodi est : castorei, nardi Indici, singulorum P. I. * lycii P. II. * papaveris lacrimæ tantundem; myrrhæ P. II. * croci, cerussæ elotæ, aloes, singulorum P. III. * cadmiæ botryodis elotæ, æris combusti, singulorum P. VIII. * gummi P. XVIII. * acaciæ succi P. XX. * stibis tantundem, quibus aqua pluvialis adjicitur.

7. *Cythion vel tephrrion collyrium.*

Præter hæc, ex frequentissimis collyriis est id, quod quidam cythion, quidam a cinereo colore tephrrion appellant. Habet amyli, tragacanthæ, acaciæ succi, gummi, singulorum P. I. * papaveris

lacrimæ P. II. * cerussæ elotæ P. IV. * spumæ argenti elotæ P. VIII. quæ æque ex aqua pluviali conteruntur.

8. *Euelpidis collyrium, trygodes nominatum.*

Euelpides autem, qui ætate nostra maximus fuit oculusarius medicus, utebatur eo, quod ipse composuerat. Τρυγῶδες nominabat. Habet autem hoc, castorei P. II. * lycii, nardi, papaveris lacrimæ, singulorum P. I. * croci, myrrhæ, aloes, singulorum P. IV. * æris combusti P. VIII. * cadmiæ, & stibis, singulorum P. XII. * acaciæ succi P. XXVI. * gummi tantundem.

Quo gravior vero quæque inflammatio est, eo magis leniri medicamentum debet, adjecto vel albo ovi, vel muliebri lacte. At, si neque medicus, neque medicamentum præsto est, sæpius utrumlibet horum in oculos penicillo ad id ipsum facto infusum, id malum lenit. Ubi vero aliquis relevatus est, jamque cursus pituitæ constitit, reliquias fortasse leviores futuras discutiunt balneum & vinum. Igitur lavari debet leviter, ante ex oleo perfricatus, diutiusque in cruribus & feminibus; multaue calida aqua fovere oculos; deinde per caput prius calida, tum egelida perfundi: a balneo cavere, ne quo frigore afflatus lædatur: post hæc cibo paulo pleniore, quam ex eorum dierum consuetudine, uti vitatis tamen omnibus pituitam extenuantibus: vinum bibere lene, subausterum, modice vetus; neque effuse, neque timide, ut neque cruditas ex eo, & tamen somnus fiat, lenianturque intus latentia

acria. Sed, si quis in balneo sensit maiorem oculorum perturbationem, quam attulerat (quod incidere his solet, qui, manente adhuc pituitæ cursu, festinarunt) quamprimum discedere debet: nihil eo die vini assumere; cibi minus etiam, quam pridie. deinde cum primum fatis pituita substitit, iterum ad usum balnei redire.

Solet tamen evenire nonnunquam, siue tempestatum vitio, siue corporis, ut pluribus diebus neque dolor, neque inflammatio, & minime pituitæ cursus finiatur. Quod ubi incidit, jamque ipsa vetustate res matura est, ab his eisdem auxilium petendum est, id est, balneo ac vino. Hæc enim ut in recentibus malis aliena sunt, quia concitare ea possunt, & accendere; sic in veteribus, quæ nullis aliis auxiliis cesserunt, admodum efficacia esse consueverunt: videlicet hic quoque, ut alibi, cum secunda vana fuerint, contrariis adjuvantibus. Sed ante tonderi ad cutem convenit: deinde in balneo aqua calida quamplurima caput atque oculos fovere: tum utrumque penicillo detergere, & ungere caput irino unguento; continereque in lectulo se, donec omnis calor, qui conceptus est, finiatur, desinatque sudor, qui necessario in capite collectus est. Tum ad idem cibi vinique genus veniendum est sic, uti potiones meracæ sint; obtegendumque caput, & quiescendum. Sæpe enim post hæc gravis somnus, sæpe sudor, sæpe alvi dejectio pituitæ cursum finit. Si levatum est malum (quod aliquando serius fit) per plures dies idem fieri oportet, donec ex toto sanitas restituatur. Si diebus eisdem alvus nihil red-

dit, ducenda est, quo magis superiores partes leventur.

Nonnunquam autem ingens inflammatio tanto impetu erumpit, ut oculos e sua sede propellat. *πρόπτωσιν* id, quoniam oculi procidunt, Græci appellant. Iis utique, si vires patiuntur, sanguinem mitti: si id fieri non potest, alvum duci, longioremque inediam induci, necessarium est. Opus autem lenissimis medicamentis est. Ideoque Cleonis collyrio quidam, quod ex duobus ante positum est, utuntur. Sed optimum est Nilei: neque de ullo magis inter omnes auctores convenit.

9. *Nilei collyrium, omnium optimum.*

Id habet nardi Indici, papaveris lacrimæ, singulorum P. * gummi P. I. * croci P. II. * foliorum rosæ recentium P. IV. * quæ vel aqua pluviali, vel vino leni subaustero coguntur. Neque alienum est, malicorium, vel fertulam campanam ex vino coquere, deinde conterere: aut myrrham nigram cum rosæ foliis miscere: aut hyoscyami folia cum ovi vitello cocti: aut farinam cum acaciæ succo, vel passo, aut mulso. Quibus si folia quoque papaveris adjiciuntur, aliquanto valentiora sunt. Horum aliquo præparato, penicillo fovere oculos oportet, ex aqua calida expresso, in qua ante vel myrti vel rosæ folia decocta sint: deinde, ex illis aliquid imponi. Præter hæc, ab occipitio incisa cute, cucurbitula admovenda est.

Quod si per hæc restitutus oculus in sedem suam non est, eodemque modo prolapsus permanet, scire

oportet, lumen esse amissum : deinde futurum, ut aut indurescat is, aut in pus vertatur. Si suppuratio se ostendit, ab eo angulo, qui tempori propior est, incidi oculus debet; ut, effuso pure, & inflammatio ac dolor finiatur, & intus tunicæ residant, quo minus foeda postea facies sit. Utendum deinde vel iisdem collyriis est ex lacte aut ovo; vel croco, cui album ovi misceatur. At, si induruit, & sic emortuus est, ne in pus verteretur; quatenus foede prominebit, excidendum erit sic, ut hamo summa tunica apprehendatur; deinde infra id scalpellus incidat: tum eadem medicamenta erunt conjicienda, donec omnis dolor finiatur. Iisdem medicamentis in eo quoque oculo utendum est, qui primum procidit, deinde per plura loca fissus est.

10. *De carbunculis oculorum.*

Solent etiam carbunculi ex inflammatione nasci, nonnunquam in ipsis oculis, nonnunquam in palpebris: & in his ipsis, modo ab interiore, modo ab exteriori parte. In hoc casu alvus ducenda est: cibus minuendus: lac potui dandum; ut acria, quæ læserunt, leniantur. Quod ad cataplasmata & medicamenta pertinet, his utendum, quæ adversus inflammationes proposita sunt. Atque hic quoque Nilei collyrium optimum est. Si tamen carbunculus in exteriori palpebræ parte est, ad cataplasmata aptissimum est lini semen ex mulso coctum; aut, si id non est, tritici farina eodem modo cocta.

11. *De pustulis oculorum.*

Pustulæ quoque ex inflammationibus interdum oriuntur. Quod si inter initia protinus incidit, magis etiam servanda sunt, quæ de sanguine & quiete supra posui: sin serius, quam ut sanguis mitti possit, alvus tamen ducenda est. Si id quoque aliqua res inhibet, utique victus ratio servanda est. Medicamentis autem hic quoque lenibus opus est; quale Nilei, quale Cleonis est.

12. *Philetis collyrium ad pustulas oculorum.*

Id quoque, quod Philetis vocatur, huic aptum est. Myrrhæ, papaveris lacrimæ, singulorum P. I. * plumbi eloti, terræ Samiæ, quæ ἀστὴρ vocatur, tragacanthæ, singulorum P. IV. * stibis cocti, amyli, singulorum P. VI. * spodii eloti, cerussæ elotæ, singulorum P. VIII. * quæ aqua pluviatili excipiuntur. Usus collyrii, vel ex ovo, vel ex lacte est.

13. *De ulceribus oculorum, & de διὰ λιβάνου collyrio.*

Ex pustulis ulcera interdum fiunt; eaque recentia æque lenibus medicamentis nutrienda sunt, & iisdem fere, quæ supra in pustulis posui. Fit quoque proprie ad hæc, quod διὰ λιβάνου vocatur. Habet æris combusti, & eloti, papaveris lacrimæ frictæ, singulorum P. I. * spodii eloti, turis, stibis combusti & eloti, myrrhæ, gummi, singulorum P. II. *

14. *De imminutione oculorum.*

Evenit etiam, ut oculi, vel ambo, vel singuli, minores fiant, quam esse naturaliter debeant. Idque

& acer pituitæ cursus in lippitudine efficit, & continuati fletus, & ictus parum bene curati. In his quoque iisdem lenibus medicamentis ex muliebri lacte utendum est: cibus vero his, qui maxime corpus alere, & implere consuerunt; vitandaque omnimodo causa, quæ lacrimas excitet, & cura domesticorum. quorum etiam tale si quid incidit, ejus notitiæ subtrahendum: atque acria quoque medicamenta, & acres cibi non alio magis nomine his nocent, quam quod lacrimas movent.

15. *De pediculis palpebrarum.*

Genus quoque vitii est, qui inter pilos palpebrarum pediculi nascuntur. id *οδελρίασις* Græci nominant. Quod cum ex malo corporis habitu fiat, raro non ultra procedit: sed fere, tempore interposito, pituitæ cursus acerrimus sequitur; exulceratisque vehementer oculis, aciem quoque ipsam corrumpit.

His alvus ducenda est: caput ad cutem tondendum, diuque quotidie jejunis perfricandum. His, ambulationibus aliisque exercitationibus diligenter utendum: gargarizandumque ex mulso, in quo nepeta & pinguis ficus decocta sit: sæpe in balneo multa calida aqua fovendum caput: vitandi acres cibi; lacte pingui vinoque utendum: bibendumque liberalius, quam edendum est. Medicamenta vero intus quidem lenia danda sunt; ne acriorem pituitam concitent: super ipsos vero pediculos alia, quæ necare eos, & prohibere, ne similes nascantur, possint. Ad id ipsum spumæ nitri P. i. * sandarachæ P.

I. * uvæ taminiae P. * I. simul teruntur, adjicitur-
que vetus oleum pari portione, atque acetum,
donec ei mellis crassitudo sit.

16. *De oculorum gravioribus morbis, qui ex inflam-*
mationibus oriuntur, & validioribus medicamentis
curantur, & de Andreae collyrio, & de διὰ κέρατος.

Haftenus oculorum morbi lenibus medicamentis
nutriuntur. Genera deinde alia sunt, quæ diversam
curationem desiderant; fereque ex inflammationi-
bus nata sunt, sed finitis quoque his manentia. at-
que inprimis in quibusdam perseverat tenuis pituitæ
cursus. Quibus alvus ab inferiore parte evocanda
est, demendum aliquid ex cibo. Neque alienum est,
illini frontem compositione Andreae. Quæ habet
gummi P. I. * cerussæ, stibis, singulorum P. II. * spu-
mæ argenti & coctæ & elotæ P. IV. * sed ea spuma
ex aqua pluviali coquitur; & arida hæc medica-
menta ex succo myrti conteruntur. His illita fronte,
cataplasma quoque superinjiciendum ex farina, quæ
frigida aqua coacta sit, cuique aut acaciæ succus, aut
cupressus adjecta sit. Cucurbitula quoque, inciso
vertice, recte accommodatur; aut ex temporibus
sanguis emittitur. Inungi vero eo debet, quod habet
squamæ æris, papaveris lacrimæ, singulorum P. I. *
cervini cornu combusti & eloti, plumbi eloti, gum-
mi, singulorum P. IV. * turis P. XII. Hoc vero col-
lyrium quia cornu habet, διὰ κέρατος nominatur.
Quotiescunque non adjicio, quod genus humoris
adjiciendum sit, aquam intelligi volo.

17. *Μεμιγμένον, Euelpidis collyrium.*

Ad idem Euelpidis, quod *μεμιγμένον* nominabat. In eo papaveris lacrimæ, & albi piperis, singulæ unciaë sunt, gummi libra, æris combusti P. I. * Inter has autem curationes, post intermissionem aliquam, profunt balneum & vinum. Cumque omnibus lip-pientibus vitandi cibi sint, qui extenuant; tum præcipue, quibus tenuis humor diu fertur. Quod si jam fastidium est eorum, quæ pituitam crassio-rem reddunt, sicut in hoc genere materiæ maxime prom-tum est; confugiendum est ad ea, quæ, quia ven-trem, corpus quoque adstringunt.

18. *De oculorum ulceribus supercrescentibus, sordidis, cavis, veteribus.*

At ulcera, si cum inflammatione finita non sunt, aut supercrescentia, aut sordida, aut cava, aut certe vetera esse consuerunt. Ex his supercrescentia col-lyrio, quod *μεμιγμένον* vocatur, optime reprimun-tur. Sordida purgantur & eodem, & eo, quod smi-lion nōminatur.

19. *Smilion collyrium.*

Habet æruginis P. IV. * gummi tantundem, am-moniaci, minii sinopici, singulorum P. XVI. * quæ quidam ex aqua; quidam, quo vehementiora sint, ex aceto terunt.

20. *Phynon collyrium Euelpidis.*

Id quoque Euelpidis, quod phynona appellabat; huic utile est: croci P. I. * papaveris lacrimæ, gum-

mi, singulorum P. II. * æris combusti & eloti, myrrhæ, singulorum P. IV. * piperis albi P. VI. * Sed ante linitum, hoc unguendum est.

21. *Sphæron collyrium Euelpidis.*

Id quoque ejusdem, quod sphæron nominabat, eodem valet. Lapis hæmatitis eloti P. II. * piperis grana sex, cadmiæ elotæ, myrrhæ, papaveris lacrimæ, singulorum P. III. * croci P. IV. * gummi P. VIII. * quæ cum vino aminæo conteruntur.

22. *Liquidum Euelpidis collyrium.*

Liquidum quoque medicamentum ad idem componebat. in quo erant hæc: æruginis P. * minii combusti, atramenti sutorii, cinnamomi, singulorum P. III. * croci, nardi, papaveris lacrimæ, singulorum P. I. * myrrhæ P. II. * æris combusti P. III. * cineris ex odoribus P. IV. * piperis grana xv. Hæc ex vino austero teruntur: deinde cum passi tribus heminis decoquuntur, donec corpus unum sit. Idque medicamentum vetustate efficacius fit.

23. *De cavis oculorum ulceribus.*

Cava vero ulcera commodissime implent ex his, quæ supra posita sunt, sphæron, & id, quod philetis vocatur. Idem sphæron vetustis ulceribus & vix ad cicatricem venientibus optime succurrit.

24. *Hermonis collyrium.*

Est etiam collyrium, quod cum ad plura valeat, plurimum tamen proficere in his ulceribus videtur. Refertur ad Hermonem auctorem. Habet piperis longi P. I. z. * albi P. v. * cinnamomi, costi, singu-

lorum P. I. * atramenti sutorii, nardi, casiae, castorei, singulorum P. II. * gallae P. V. * myrrhæ, croci, turis, lycii, cerussæ, singulorum P. VIII. * papaveris lacrimæ P. XII. * aloes, æris combusti, cadmiæ, singulorum P. XVI. * acaciæ; stibis, gummi, singulorum P. XXV. *

25. *De cicatricibus oculorum, quæ ex ulceribus factæ sunt, & de asclepia, & canopite, & pyxino, collyriis.*

Factæ vero ex ulceribus cicatrices duobus vitiis periclitantur; ne aut cavæ, aut crassæ sint. Si cavæ sunt, potest eas implere id, quod sphæron vocari dixi; vel id, quod asclepias nominatur. Habet papaveris lacrimæ P. II. * sagapeni, opopanacis, singulorum P. III. * æruginis P. IV. * gummi P. VIII. * piperis P. XII. * cadmiæ elotæ, cerussæ, singulorum P. XVI. *. At, si crassæ cicatrices sunt, extenuat vel smilion, vel canopite collyrium, quod habet cinnamomi, acaciæ, singulorum P. I. * cadmiæ elotæ, croci, myrrhæ, papaveris lacrimæ, gummi, singulorum P. II. * piperis albi, turis, singulorum P. III. æris combusti P. IX. * cum aqua pluviali. Vel Euelpidis pyxinum, quod ex his constat: salis fossilis P. IV. * ammoniaci thymiamatis P. VIII. * papaveris lacrimæ P. XII. * cerussæ P. XV. * piperis albi, croci Siculi, singulorum P. LII. * gummi P. XIII. * cadmiæ elotæ P. XI. * Maxime tamen tollere cicatricem videtur id, quod habet gummi P. III. * æruginis P. I. * crocomagmatis P. IV. *

26. *De alio genere inflammationis oculorum.*

Est etiam genus inflammationis, in qua si cui tumet ac distenduntur cum dolore oculi, sanguinem ex fronte emitti necessarium est: multaque aqua calida caput atque oculos fovere: gargarizare & lenticula, vel ex fici cremore: inungi acribus medicamentis, quæ supra comprehensa sunt; maximeque eo, quod sphæron nominatur, quodque lapidem hæmatiten habet. Atque alia quoque utilia sunt, quæ ad extenuandam aspritudinem fiunt; de qua protinus dicam.

Hæc autem inflammationem oculorum fere sequitur; interdum major, interdum levior. Nonnunquam etiam ex aspritudine lippitudo fit, deinde aspritudinem ipsam auget, fitque ea in aliis brevis, in aliis longa, & quæ vix unquam finiatur.

In hoc genere valetudinis quidam crassas, durasque palpebras, & ficulneo folio, & asperato specillo, & interdum scalpello eradunt; versasque quotidie medicamentis suffricant. Quæ neque nisi in magna vetustaque aspritudine, neque sæpe facienda sunt. Nam melius eodem ratione victus & idoneis medicamentis pervenitur. Ergo exercitationibus utemur, & balneo frequentiore; multaque oculorum palpebras aqua calida fovebimus: cibos autem sumemus acres & extenuantes.

27. *Cæsarianum collyrium.*

At medicamentum id, quod Cæsarianum vocatur, habet atramenti futorii P. i. * misyos P. * piperis albi P. v. * papaveris lacrimæ, gummi, singulo-

rum P. II. * cadmiæ lotæ P. III. * stibis P. VI. * Satisque constat, hoc collyrium adversus omne genus oculorum valetudinis idoneum esse; exceptis his, quæ lenibus nutriuntur.

28. *Hieracis collyrium.*

Id quoque, quod Hieracis nominatur, ad aspritudinem potest. Habet myrrhæ P. I. * ammoniaci thymiamatis P. II. * æruginis rasæ P. IV. * cum aqua pluviatili. Ad idem idoneum est etiam id, quod canopite, & id, quod smilion vocatur, & id, quod pyxinum, & id, quod sphærion. Si composita medicamenta non adsunt, felle caprino, vel quam optimo melle satis commode aspritudo curatur.

29. *De arida lippitudine.*

Est etiam genus aridæ lippitudinis, ξηροφθαλμίαν Græci appellant. Neque tument, neque fluunt oculi, sed rubent tantum, & cum dolore quodam fere levi ac prurigne gravescunt, & palpebræ citra duritiem ullam noctu prægravi pituita inhærescunt: quantoque minor generis hujus impetus, tanto finis minus expeditus est.

In hoc vitio multum ambulare, multum exerceri, lavari sæpe, ibique desudare, multaque frictione uti necessarium est. Cibi neque qui implent, neque nimium acres, apti sunt, sed inter hos medii. Mane, ubi concoxisse manifestum est, non est alienum ex sinapi gargarizare, tum deinde caput atque os diutius perfricare.

30. *Rhinion collyrium.*

Collyrium vero aptissimum est, quod rhinion vocatur. Habet myrrhæ P. I. * papaveris lacrimæ, acaciæ succi, piperis, gummi, singulorum P. I. * lapidis hæmatitis, lapidis phrygii, lycii, lapidis scissilis, singulorum P. II. * æris combusti P. IV. * Ac pyxinum quoque eidem accommodatum est.

31. *Ad oculos scabros collyria.*

Si vero scabri oculi sunt, quod maxime in angulis esse consuevit, potest prodesse rhinion, id quod supra positum est. Potest similiter prodesse id, quod habet æruginis rasæ, piperis longi, papaveris lacrimæ, singulorum P. II. * piperis albi, gummi, singulorum P. IV. * cadmiæ lotæ, cerussæ, singulorum P. VI. * Nullum tamen melius est, quam Euelpidis, quod βασιλικὸν nominabat. Habet papaveris lacrimæ, cerussæ, lapidis Asii, singulorum P. II. * gummi P. XIII. * piperis albi P. IV. * croci P. VI. * psorici P. XIII. * Nulla autem per se materia est, quæ psoricum nominetur; sed chalcitidis aliquid, & cadmiæ dimidio plus ex aceto simul conteruntur, idque in vas fictile inditum, & contextum ficulneis foliis, sub terra reponitur, sublatumque post dies viginti rursus teritur, & sic appellatur. Verum in basilico quoque collyrio convenit, ad omnes affectus oculorum id esse idoneum, qui non lenibus medicamentis curantur.

Ubi non sunt autem medicamenta composita, scabros angulos lævant & mel & vinum. Succurritque & his & aridæ lippitudini, si quis panem ex

vino subactum super oculum imponit. Nam, cum fere fit humor aliquis, qui modo ipsum oculum, modo angulos, aut palpebras exasperat, sic &, si quid prodit humoris, extrahitur; & si quid juxta est, repellitur.

32. *De caligine oculorum.*

Caligare vero oculi nonnunquam ex lippitudine, nonnunquam etiam sine hac, propter senectutem, imbecillitatemve aliam, consuerunt. Si ex reliquiis lippitudinis id vitium est, adjuvat collyrium, quod asclepias nominatur. Adjuvat & id, quod ex crocomagmate fit.

33. *Διὰ κρόκου collyrium.*

Proprie etiam ad id componitur, quod διὰ κρόκου vocant. Habet piperis P. I. * croci cilicii, papaveris lacrimæ, cerussæ, singulorum P. II. * pforici, gummi, singulorum P. IV. *

34. *De caligine, quæ propter senectutem; aut aliam imbecillitatem fit.*

At, si ex senectute aliave imbecillitate id est, recte inungi potest, & melle quam optimo, & cyprino, & oleo vetere. Commodissimum tamen est, balsami partem unam, & olei veteris, aut cyprini partes duas, mellis quam acerrimi partes tres miscere. Utilia quoque huic medicamenta sunt, quæ ad caliginem proxime, quæque ad extenuandas cicatrices supra comprehensa sunt.

Cuicunque vero oculi caligabunt, huic opus erit multa ambulatione, atque exercitatione; frequenti

Balneo, ubi totum quidem corpus perfricandum est, præcipue tamen caput ex irino, donec infuset; velandumque postea, nec detegendum, antequam sudor & calor domi conquierint. Tum cibis utendum acribus, & extenuantibus, interpositisque aliquibus diebus, ex sinapi gargarizandum.

35. *De suffusione oculorum.*

Suffusio quoque, quam Græci ὑπόχυσιν nominant, interdum oculi potentiæ, qua cernit, se opponit. Quod si inveteraverit, manu curandum est. Inter initia nonnunquam etiam certis observationibus discutitur. Sanguinem ex fronte vel naribus mittere; in temporibus venas adurere; gargarizando pituitam evocare; suffumigare; oculos acribus medicamentis inungere, expedit. Victus optimus est, qui pituitam extenuat.

36. *De resolutione oculorum.*

At ne resolutio quidem oculorum (quam περιέλυσιν Græci nominant) alio victus modo, vel aliis medicamentis curanda est. Exposuisse tantum genus vitii satis est. Igitur interdum evenit, modo in altero oculo, modo in utroque, aut ex ictu aliquo, aut ex morbo comitiali, aut ex distentione nervorum, qua vehementer ipse oculus concussus est, ut is neque quoquam intendi possit, nec omnino consistat; sed huc illucve sine ratione moveatur, idque ne conspectum quidem rerum præstet.

37. *De mydriasi oculorum.*

Non multum ab hoc malo distat id, quod μυδρία-

Græci vocant. Pupilla effunditur & dilatatur; aciesque ejus hebescit, ac pæne caligat. Difficillime genus id imbecillitatis eliditur. In utraque vero, id est, & paralyfi & mydriasi, pugnandum est per eadem omnia, quæ in caligine oculorum præcepta sunt, paucis tantum mutatis: siquidem ad caput irino interdum acetum, interdum nitrum adjiciendum est; oculos vero melle inungi satis est. Quidam in posteriore vitio calidis aquis usi, relevatique: quidam sine ulla manifesta causa subito occæcati sunt. Ex quibus nonnulli, cum aliquamdiu nihil vidissent, repentina profusione alvi, lumen receperunt. Quo minus alienum videtur, & recenti re, & interposito tempore, medicamentis quoque moliri dejectiones, quæ omnem noxiam materiam in inferiora depellant.

38. *De imbecillitate oculorum.*

Præter hæc imbecillitas oculorum est, ex qua quidem interdum satis, noctu nihil cernunt. quod in feminam bene respondentibus menstruis non cadit. Sed sic laborantes inungi oportet humore jocinoris (maxime hircini; sin minus, caprini) ubi id assum coquitur, excepto; atque edi quoque ipsum jecur debet. Licet tamen etiam iisdem medicamentis non inutiliter uti, quæ vel cicatrices, vel aspritudinem extenuant. Quidam contrito semine portulacæ mel adjiciunt eatenus, ne id ex specillo distillet, eoque inungunt. Exercitationibus, balneo, & frictionibus, gargarizationibus iisdem, his utendum est.

39. *Ad oculos, qui extrinsecus offenduntur, cum sanguine suffusi sunt.*

Et hæc quidem in ipsis corporibus oriuntur. Extrinsecus vero interdum sic ictus oculum lædit, ut sanguis in eo suffundatur. Huic nihil commodius est, quam sanguine vel columbæ, vel palumbi, vel hirundinis inungere. Neque id sine causa fit; cum horum acies extrinsecus læsa, interposito tempore in antiquum statum redeat, celerrimeque hirundinis. Unde etiam locus fabulæ factus est, per parentes id herba restitui, quod per se fanescit. Eorum ergo sanguis nostros quoque oculos ab externo casu commodissime tuetur, hoc ordine, ut sit hirundinis optimus, deinde palumbi, minime efficax columbæ, & illi ipsi, & nobis.

Supra percussum vero oculum, ad inflammationem leniendam, non est alienum imponere etiam cataplasma. Sal ammoniacus, vel quilibet alius quam optimus teri debet, sic, ut ei paulatim oleum adjiciatur, donec crassitudo strigmenti fiat. Id deinde miscendum est cum hordeacea farina, quae ex mulso decocta sit. Facile autem, recognitis omnibus, quæ medici quoque prodiderunt, apparere cuilibet potest, vix ullum ex iis, quæ supra comprehensa sunt, oculi vitium esse, quod non simplicibus quoque, & promptis remediis subinde subremoveri possit.

CAPUT VII.

De aurium morbis.

HACTENUS in oculis ea reperiuntur, in quibus medicamenta plurimum possint: ideoque ad aures transeundum est; quarum usum proximum a luminibus natura nobis dedit. Sed in his aliquanto majus periculum est. nam vitia oculorum intra ipsos nocent: aurium inflammationes doloresque, interdum etiam ad dementiam mortemque præcipitant. Quo magis inter initia protinus succurrendum est, ne majori periculo locus sit.

Ergo, ubi primum dolorem aliquis sensit, abstinere & continere se debet. Postero die, si vehementius malum est, caput tondere, idque irino unguento calido perungere, & operire. At magnus cum febre vigiliaque dolor exigit, ut sanguis quoque mittatur. Si id aliquæ causæ prohibent, alvus solvenda est. Cataplasmata quoque calida, subinde mutata, proficiunt; sive fœni græci, sive lini, sive alia farina ex mulso decocta est. Recte etiam subinde admoventur spongiæ, ex aqua calida expressæ. Tum, levato dolore, ceratum circumdari debet ex irino, aut cyprino factum. In quibusdam tamen melius, quod ex rosa factum est, proficit. Si vehemens inflammatio somnum ex toto prohibet, adijci cataplasmati debent papaveris cortices fricti atque contriti sic, ut ex his pars dimidia sit; eaque tum simul ex passio vel mulso decoquuntur. In aurem vero infundere aliquod medicamentum oportet.

tet; quod semper ante tepefieri convenit, commodissimeque per strigilem instillatur. ubi auris repleta est, super lana mollis addenda est, quæ humorem intus contineat. Et hæc quidem communia sunt.

Medicamentum vero est & rosæ, & radicum arundinum succus, & oleum, in quo lumbrici cocti sunt, & humor ex amaris nucibus, aut ex nucleo mali perfici expressus. Composita vero ad inflammationem doloremque leniendum hæc fere sunt: castorei, papaveris lacrimæ, pares portiones conteruntur, deinde adjicitur his passum. Vel papaveris lacrimæ, croci, myrrhæ par modus sic teritur, ut invicem modo rosa, modo passum instilletur. Vel id, quod amarum in Ægyptia faba est, conteritur, rosa adjecta: quibus myrrhæ quoque paulum a quibusdam miscetur, vel papaveris lacrimæ, aut tus cum muliebri lacte, vel amararum nucum cum rosa succus. Vel castorei, myrrhæ, papaveris lacrimæ pares portiones cum passo. Vel croci P. I. * myrrhæ, aluminis scissilis, singulorum P. III. * quibus, cum teruntur, paulatim miscentur passi cyathi tres, mellis minus cyatho. Idque ex primis medicamentis est. Vel papaveris lacrima ex aceto. Licet etiam compositione uti Themisonis, quæ habet castorei, opopanax, papaveris lacrimæ ex aceto, singulorum P. II. * spumæ nitri P. IV. * quæ contrita passo excipiuntur, donec cerati crassitudinem habeant; atque ita reponuntur. Ubi usus requiritur, rursus id medicamentum, adjecto passo, specillo teritur. Illud perpetuum est, quotiescunque crassius medicamentum

est, quam ut in aurem instillari possit, adjiciendum eum esse humorem, ex quo id componi debet, donec satis liquidum sit.

2. *De pure & malo odore aurium.*

Si vero pus quoque aures habent, recte lycium per se infunditur; aut irinum unguentum; aut porri succus cum melle; aut centaureæ succus cum passo; aut dulcis mali punici succus in ipsius cortice tepefactus, adjecta myrrhæ exigua parte. Recte etiam miscentur myrrhæ, quam *στακτὴν* cognominant, P. I. * croci tantundem, nuces amaræ XV. mellis sesquicyathus. quæ contrita, cum utendum est, in cortice mali punici tepefiant. Ea quoque medicamenta, quæ oris exulcerati causa componuntur, æque ulcera aurium sanant. Quæ si vetustiora sunt, & multa sanies fluit, apta compositio est, quæ ad auctorem Erasistratum refertur. habet piperis P. I. * croci P. I. * myrrhæ, misyos cocti, singulorum P. II. * æris combusti P. II. * hæc ex vino teruntur: deinde ubi inaruerunt, adjiciuntur passi heminæ tres, & simul incoquantur. Cum utendum est, adjicitur iis mel & vinum. Est etiam Ptolemæi chirurgi medicamentum, quod habet lentisci P. I. * gallæ P. I. * omphacii P. I. * succum punici mali. Est Menophili validum admodum, quod ex his constat: piperis longi P. I. * castorei P. II. * myrrhæ, croci, papaveris lacrimæ, nardi Syriaci, turis, mālicorii, ex Ægyptia faba partis interioris, nucum amararum, mellis quam optimi, singulorum P. IV. * Quibus, cum teruntur, adjici-

citur acetum quam acerrimum, donec crassitudo in his passi fiat. Est Cratonis : cinnamomi, casiae, singulorum P. I. * nardi, lycii, myrrhae, singulorum P. I. * aloes P. II. * mellis cyathi tres, vini sextarius. Ex quibus lycium cum vino decoquitur; deinde his alia miscentur. At, si multum puris, malusque odor est, æruginis rasæ, turis, singulorum P. II. * mellis cyathi duo, aceti quatuor simul incoquuntur. ubi utendum est, dulce vinum miscetur. Aut aluminis scissilis, papaveris lacrimæ, acaciæ succi par pondus miscetur, hisque adjicitur hyoscyami succi dimidio minor, quam unius ex superioribus, portio; eaque trita ex vino diluuntur. Per se quoque hyoscyami succus satis proficit.

3. *Compositiones ad omnia aurium vitia.*

Commune vero auxilium adversus omnes aurium casus, jamque usu comprobatum, Asclepiades composuit. In eo sunt cinnamomi, casiae, singulorum P. I. * floris junci rotundi, castorei, albi piperis & longi, amomi, myrobalani, singulorum scrupuli duo, turis masculi, nardi Syriaci, myrrhae pinguis, croci, spumæ nitri, singulorum P. II. * Quæ separatim contrita, rursus mixta, ex aceto conteruntur; atque ita condita, ubi utendum est, aceto diluuntur. Eodem modo commune auxilium auribus laborantibus est, Polybi sphragis ex dulci vino liquata. Quæ compositio priore libello continetur.

Quod si & sanies profluit, & tumor est, non alienum est, mixto vino per oricularium clysterem

eluire ; & tum infundere vinum austerum cum rosa mixtum , cui spodii paulum sit adjectum , aut lycium cum lacte , aut herbæ sanguinalis succum cum rosa , aut mali punici succum cum exigua parte myrrhæ.

4. *De ulcere sordido aurium.*

Si sordida quoque ulcera sunt , melius mulso eluuntur ; & tum aliquod ex his , quæ supra scripta sunt , quod mel habeat , infunditur. Si magis pus profluit , & caput utique tondendum est , & multa calida aqua perfundendum , & gargarizandum , & usque ad lassitudinem ambulandum , & cibo modico utendum est. Si cruor quoque ex ulceribus apparuit , lycium cum lacte debet infundi ; vel aqua , in qua rosa decocta sit , succo aut herbæ sanguinalis , aut acaciæ adjecto.

Quod si super ulcera caro increvit , eaque mali odoris sanguinem fundit , aqua tepida elui debet ; tum infundi id , quod ex ture & ærugine , & aceto , & melle fit , aut mel cum ærugine incoctum. Squama quoque æris cum sandaracha contrita per fistulam recte instillatur.

5. *Adversus aurium vermes.*

Ubi vero vermes orti sunt , si juxta sunt , protrahendi oriculario specillo sunt : si longius , medicamentis enecandi ; cavendumque , ne postea nascantur. Ad utrumque proficit album veratrum cum aceto contritum. Elui quoque aurem oportet vino , in quo marrubium decoctum sit. Sic emortui ver-

mes in primam auris partem prolabuntur, unde facillime educi possunt.

6. *Ad compressa aurium foramina.*

Sin foramen auris compressum est, & intus crassa sanies subest, mel quam optimum addendum est. Si id parum proficit, mellis cyatho & dimidio, æruginis rasæ P. II. * adjiciendum est, incoquendumque, & eo utendum. Iris quoque cum melle idem perficit. Item mellis & rosæ scrupuli duo. Item galbani P. II. * myrrhæ cum melle, & fellis taurini, singulorum P. II. * vini quantum satis est ad myrrham diluendam.

7. *Ad gravem auditum.*

Ubi verò gravius aliquis audire cœpit, (quod maxime post longos capitis dolores evenire consuevit) in primis aurem ipsam considerare oportet. Apparebit enim aut crusta, qualis super ulcera innascitur, aut fordium coitus. Si crusta est, infundendum est aut oleum calidum, aut cum melle ærugo, vel porri succus, aut cum mulso nitri paulum. Atque, ubi crusta a corpore jam recedit, eluenda auris aqua tepida est; quo facilius ea per se diducta oriculario specillo protrahatur. Si fordes, æque molles sunt, eodem specillo eximendæ sunt. At, si duræ sunt; acetum & cum eo nitri paululum conjiciendum est; cumque emollitæ sunt, eodem modo elui aurem, purgarique oportet. Quod si capitis gravitas manet, attondendum idem; & leniter, sed diu perfricandum est, adjecto vel irino, vel laureo oleo, sic ut utrilibet paulum aceti misceatur:

tum diu ambulandum, leniterque post unctionem aqua calida caput fovendum: cibisque utendum ex imbecillissima & media materia; magisque assumendæ dilutæ potiones: nonnunquam gargarizandum est. Infundendum autem in aurem castoreum cum aceto & laureo oleo & succo radiculae corticis: aut cucumeris agrestis succus, adjectis rosæ foliis contritis. Immaturæ quoque uvæ succus cum rosa instillatus, adversus surditatem satis proficit.

8. *Ad sonitum aurium intra se ipsos.*

Aliud vitii genus est, ubi aures intra se ipsæ sonant. Atque hoc quoque fit, ne externum sonum accipiant. Levissimum est, ubi id ex gravedine est: pejus, ubi ex morbo, capitivæ longis doloribus incidit: pessimum, ubi, magnis morbis venientibus, maximeque comitiali, provenit. Si ex gravedine est, purgare aurem oportet, & spiritum continere, donec inde humor aliquis exspumet. Si ex morbo vel capitis dolore, quod ad exercitationem, frictionem, perfusionem, gargarizationemque pertinet, eadem facienda sunt: cibis non utendum nisi extenuantibus: in aurem dandus radiculae succus cum rosa, vel cum succo radicis ex cucumere agresti, vel castoreum ex aceto, & laureo oleo. Veratrum quoque cum aceto conteritur, deinde melle cocto excipitur, & inde collyrium factum in aurem demittitur. Si sine his cœpit, ideoque novo metu terret, in aurem dari debet castoreum cum aceto, vel irino, vel laureo oleo; aut huic mixtum castoreum cum succo nucum amararum; aut myr-

rha & nitrum cum rosa & aceto. Plus tamen in hoc quoque proficit victus ratio; eademque facienda sunt, quæ supra comprehendi, cum majore quoque diligentia: & præterea, donec is sonus finiat, a vino abstinendum.

Quod si simul & sonus, & inflammatio est, laureum oleum coniecisse abunde est, aut id, quod ex amaris nucibus exprimitur; quibus quidam vel castoreum, vel myrrham miscent.

9. *Ad ea, quæ in aurem inciderunt, extrahenda.*

Solet etiam interdum in aurem aliquid incidere, ut calculus, aliquodve animal. Si pulex intus est, compellendum eo lanæ paulum est; quo ipse is subit, & simul extrahitur. Si non est secutus, aliudve animal est, specillum lana involutum in resinam quam glutinosissimam, maximeque terebinthinam demittendum, idque in aurem injiciendum, ibique vertendum est. utique enim comprehendet & eximet. Sin aliquid exanime est, specillo oriculario protrahendum est, aut hamulo retuso paulum recurvato. Si ista nihil proficiunt, potest eodem modo resina protrahi. Sternutamenta quoque admota id commode elidunt, aut oriculario clystere aqua vehementer intus compulsa. Tabula quoque collocatur, media inhærens, capitibus utrinque pendentibus, superque eam homo deligatur in id latus versus, cujus auris eo modo laborat, sic ut extra tabulam emineat: tum malleo caput tabulæ, quod a pedibus est, feritur; atque ita concussa aure, id, quod inest, excidit.

CAPUT VIII.

De narium morbis.

NARES vero intus exulceratas fovere oportet vapore aquæ calidæ. Id & spongia expressa atque admota fit, & subjecto vase oris angustî, calida aqua repleto. Post id fomentum, illinenda ulcera sunt, aut plumbi rëcremento, aut cerussa, aut argenti spuma; cum quodlibet horum aliquis conterit, eique, dum teritur, invicem vinum & oleum myrteum adjicit, donec mellis crassitudinem fecerit. Sin autem ea ulcera circa nares sunt, pluresque crustas & odorem foedum habent, quod genus Græci ὀξαιρᾶν appellant; sciri quidem debet, vix ei malo posse succurri. Nihilominus tamen hæc tentari possunt; ut caput ad cutem tondeatur, assidueque vehementer perfricetur, multa calida aqua perfundatur: multa ei deambulatio sit; cibus modicus, neque acer, neque valentissimus. Tum in narem ipsam mel cum exiguo modo resinæ terebinthinæ conjiciatur, (quod specillo quoque involuto lana fit) attrahaturque spiritu is succus, donec in ore gustus ejus sentiatur. Sub his enim crustæ resolvuntur, quæ tum per sternutamenta elidi debent. Puris ulceribus vapor aquæ calidæ subjiciendus est: deinde adhibendum aut lycium ex vino dilutum, aut amurca, aut omphacium, aut menthæ, aut marrubii succus; aut atramentum futorium, quod candens factum, deinde contritum sit; aut interior scillæ pars contrita; sic ut horum cuilibet mel adjicia-

tur. Cujus in ceteris admodum exigua pars esse debet; in atramento futorio tanta, ut ea mixtura liquida fiat; cum scilla utique pars major; involvendumque lanâ specillum est, & in eo medicamento intingendum, eoque ulcera implenda sunt. Rursusque linamentum involutum & oblongum eodem medicamento illinendum, demittendumque in narem est, & ab inferiore parte lenitèr deligandum. Idque per hiemem & ver bis die; per æstatem & autumnum, ter die fieri debet.

2. *De carnosis carunculis narium.*

Interdum vero etiam in naribus carunculæ quædam similes muliebribus mammis nascuntur, hæque imis partibus, quæ cartilaginossæ sunt, inhærent. Has curare oportet medicamentis adurentibus; sub quibus ex toto consumuntur. Πολύπους vero est caruncula, modo alba, modo subrubra, quæ narium ossi inhæret; & modo ad labra tendens narem implet; modo retro per id foramen, quo spiritus a naribus ad fauces descendit, adeo increscit, uti post uvam conspici possit; strangulatque hominem, maxime austro aut euro flante; fereque mollis est, raro dura; eaque magis spiritum impedit, & nares dilatat; quæ fere καρκινώδης est, itaque attingi non debet. Illud aliud genus fere quidem ferro curatur; interdum tamen inarescit, si addita in narem per linamentum aut penicillum ea compositio est, quæ habet minii sinopici, chalcitidis, calcis, sandarachæ, singulorum P. I. * atramenti futorii P. II. *

CAPUT IX.

De dentium dolore.

IN dentium autem dolore, qui ipse quoque maximis tormentis annumerari potest, vinum ex toto circumcidendum est; cibo quoque primo abstinendum, deinde eo modico mollique utendum; ne mandentis dentes irritet; tum extrinsecus admovendus per spongiam vapor aquæ calidæ; imponendumque ceratum ex cyprino aut irino factum, lanaque id comprehendendum, caputque velandum est. Quod si gravior is dolor est, utiliter & alvus ducitur, & calida cataplasmata super maxillas injiciuntur, & ore humor calidus cum medicamentis aliquibus continetur, sæpiusque mutatur. Cujus rei causa & quinquefolii radix in vino mixto coquitur; & hyoscyami radix vel in posca, vel in vino mixto coquitur sic, ut paulum his salis adjiciatur; & papaveris non nimium aridi cortices, & mandragoræ radix, eodem modo. Sed in his tribus utique vitandum est, ne, quod haustum erit, devoretur. Ex populo quoque alba cortex radice in hunc usum in vino mixto recte coquitur; & in aceto cornu cervinum rasum & nepeta cum teda pingui: ac ficus item pinguis vel in mulso, vel in aceto & melle; ex quibus cum ficus discocta est, is humor percolatur. Specillum quoque lana involutum in calidum oleum demittitur, eoque ipse dens foveretur. Quin etiam quædam quasi cataplasmata in dentem ipsum illinuntur. In quem usum ex malo punico acido

atque arido malicorii pars interior cum pari portione & gallæ & pinei corticis conteritur, misceturque his minium; eaque contrita aqua pluviatili coguntur. Aut panacis, papaveris lacrimæ, peucedani, uvæ taminiaæ sine seminibus pares portiones conteruntur. Aut galbati partes tres, papaveris lacrimæ pars quarta. Quidquid dentibus admotum est, nihilo minus supra maxillam ceratum (quale supra posui) esse debet lana obtectum. Quidam etiam myrrhæ, cardamomi, singulorum P. I. * croci, pyrethri, ficorum, piperis, singulorum P. IV. * sinapis P. VIII. * contrita linteolo illinunt, imponuntque in humero partis ejus, qua dens dolet; si is superior est, a scapulis; si inferior, a pectore: idque dolorem levat; &, cum levavit, protinus submovendum est.

Si vero exesus est dens, festinare ad eximendum eum, nisi res coegit, non est necesse: sed tum omnibus fomentis, quæ supra posita sunt, adjiciendæ quædam valentiores compositiones sunt, quæ dolorem levant; quales hæ sunt, quæ habent papaveris lacrimæ P. I. * piperis P. II. * foreos P. X. * quæ contrita galbano excipiuntur, idque circumdatur: aut Menemachi, maxime ad maxillares dentes; in qua sunt, croci P. I. * cardamomi, turis fuliginis, ficorum, piperis, pyrethri, singulorum P. IV. * sinapis P. VIII. * Quidam autem miscent pyrethri, piperis, elaterii, singulorum P. I. * aluminis scissilis, papaveris lacrimæ, uvæ taminiaæ, sulphuris ignem non experti, bituminis, lauri baccharum, sinapis, singulorum P. II. * Quod si dolor exi-

mi eum cogit, & piperis semen cortice liberatum, & eodem modo bacca hederæ coniecta in id foramen, dentem findit, isque per testas excidet. Et plani piscis (quam nostri pastinacam, Græci τρυγόνεα vocant) aculeus torretur, deinde conteritur, resinaque excipitur, quæ denti circumdata hunc solvit. Et alumen scissile in id foramen coniectum dentem citat. Sed id tamen involutum in lanula demitti commodius est, quia sic dente servato dolorem levat. Hæc a medicis accepta sunt: sed agrestium experimento cognitum est, cum dens doluerit, herbam mentastrum cum suis radicibus velli debere, & in pelvem conjici, supraque aqua^d infundi, collocarique juxta sedentem hominem undique veste contactum; tum in pelvem candentes filices demitti, sic, ut aqua tegantur, hominemque eum hiantem ore vaporem excipere, ut supra dictum est, undique inclusum. Nam & sudor plurimus sequitur, & per os continens pituita defluit; idque sæpe longiorem, sæpe annuam valetudinem bonam præstat.

C A P U T X.

De tonsillis.

SI vero tonsillæ sine exulceratione per inflammationem intumuerunt, caput velandum est, extrinsecus is locus vapore calido fovendus; multa ambulatione utendum; caput in lecto sublime habendum; gargarizandumque est ex reprimētibus. Radix quoque ea, quam dulcem appellant, contusa & in passo mulsove decocta, idem præstat. Leni-

terque quibusdam medicamentis eas illini non alienum est, quæ hoc modo sunt. Ex malo punico dulci succus exprimitur, & ejus sextarius in leni igne coquitur, donec ei mellis crassitudo sit; tum croci, myrrhæ, aluminis scissilis, singulorum P. II. * per se conteruntur, paulatimque his adjiciuntur vini lenis cyathi duo, mellis unus; deinde priori succo ista miscentur, & rursus leniter incoquantur: aut ejusdem succi sextarius eodem modo coquitur, atque eadem ratione trita ei adjiciuntur hæc, nardi P. * omphacii P. I. * cinnamomi, myrrhæ, casia, singulorum P. I. * Eadem autem hæc & auribus & naribus purulentis accommodata sunt. Cibus in hac quoque valetudine lenis esse debet, ne exasperet.

Quod si tanta inflammatio est, ut spiritum impediat, in lecto conquiescendum; a cibo abstinendum, neque assumendum quidquam, præter aquam calidam, est: alvus quoque ducenda est: gargarizandum ex fico & mulso: illinendum mel cum omphacio: intrinsecus admovendus, sed aliquanto diutius, vapor calidus, donec ea suppurent, & per se aperiantur. Si pure substance non rumpuntur hi tumores, incidendi sunt: deinde ex mulso calido gargarizandum.

At, si modicus quidem tumor, sed exulceratio est, fursurum cremori ad gargarizandum paulum mellis adjiciendum est; illinendaque ulcera hoc medicamento: passi quam dulcissimi tres heminae ad unam coquuntur; tum adjicitur turis P. I. * croci, myrrhæ, singulorum P. * leniterque omnia rursus

fervescunt. Ubi pura ulcera sunt, eodem furfurum cremore, vel lacte gargarizandum est. Atque hic quoque cibus lenibus opus est; quibus adjici dulce vinum potest.

C A P U T XI.

De oris ulceribus.

ULCERA autem oris, si cum inflammatione sunt, & parum pura ac rubicunda sunt, optime his medicamentis curantur, quæ supra posita ex malis puni-
cis fiunt. Continendusque sæpe ore reprimens cremor est, cui paulum mellis sit adjectum: utendumque ambulationibus, & non acri cibo. Simulatque vero pura ulcera esse cœperunt, lenis humor, interdum etiam quam optima aqua ore continenda est. Prodestque assumptum purum vinum, pleniorque cibus, dum acribus vacet: inspergigue ulcera debent alumine scissili, cui dimidio plus gallæ immaturæ sit adjectum.

Si jam crustas habent, quales in adustis esse consuerunt, adhibendæ sunt eæ compositiones, quas Græci ἀνθράς nominant. Junci quadrati, myrrhæ, sandarachæ, aluminis, pares portiones. Aut croci, myrrhæ, singulorum P. II. * iridis, aluminis scissilis, sandarachæ, singulorum P. IV. * junci quadrati P. VIII. *. Aut gallæ, myrrhæ, singulorum P. II. * aluminis scissilis P. II. * rosæ foliorum P. IV. *. Quidam autem croci P. * aluminis scissilis, myrrhæ, singulorum P. I. * sandarachæ P. II. * junci quadrati P. IV. * miscent. Priora arida insperguntur: hoc cum

melle illinitur; neque ulceribus tantum, sed etiam tonfillis.

Verum ea longe periculosissima sunt ulcera, quas *ἀφθας* Græci appellant; sed in pueris: hos enim sæpe consumunt. in viris & mulieribus idem periculum non est. Hæc ulcera a gingivis incipiunt, deinde palatum, totumque os occupant; tum ad uvam faucesque descendunt. quibus obsessis, non facile fit, ut puer convalescat. ac miserius etiam est, si lactens adhuc infans est; quo minus imperari remedium aliquod potest. Sed imprimis nutrix cogenda est exerceri ambulationibus, iisque operibus, quæ superiores partes movent: mittenda in balneum, jubendaque ibi calida aqua mammas perfundere: tum alenda cibis lenibus, & his, qui non facile corrumpuntur: potione, si febricitat puer, aquæ; si sine febre est, vini diluti. ac, si alvus nutritici subsistit, ducenda est. Si pituita in os ejus coit, vomere debet. Tum ipsa ulcera perungenda sunt melle, cui rhus, quem Syriacum vocant, aut amaræ nuces adjectæ sunt: vel mixtis inter se rosæ foliis aridis, pineis nucleis, menthæ coliculo cum melle: vel eo medicamento, quod ex moris fit: quorum succus eodem modo, quo punici mali, ad mellis crassitudinem coquitur, eademque ratione ei crocum, myrrha, alumen, vinum, mel miscetur. Neque quidquid dandum, ad quod humor evocari possit. Si vero jam firmior puer est, gargarizare debet his fere, quæ supra comprehensa sunt. At, si leniora medicamenta in eo parum proficiunt, adhibenda sunt ea, quæ adurendo crustas ulceribus inducant; quale est scis-

file alumen, vel chalcitis, vel atramentum futorium. Prodest etiam fames & abstinencia, quanta maxima imperari potest. Cibus debet esse lenis. Ad purganda tamen ulcera, interdum caseus ex melle recte datur.

C A P U T XII.

De linguæ ulceribus.

LINGUÆ quoque ulcera non aliis medicamentis egent, quam quæ prima parte superioris capitis exposita sunt. Sed quæ in latere ejus nascuntur, diutissime durant. Videndumque est, num contra dens aliquis acutior sit, qui sanescere sæpe ulcus eo loco non finit, ideoque limandus est.

C A P U T XIII.

De parulidibus & ulceribus gingivarum.

SOLENT etiam interdum juxta dentes in gingivis tubercula quædam oriri dolentia; παρουλίδας Græci appellant. Hæc initio leniter sale contrito perfricare oportet, aut inter se mixtis sale fossili combusto, cupresso, nepeta: deinde eluere os cremore lenticulæ, & inter hæc hiare, donec pituitæ satis profluat. In majore vero inflammatione iisdem medicamentis utendum est, quæ ad ulcera oris supra posita sunt: & mollis linamenti paulum involvendum aliqua compositione ex his, quas ἀνδράς vocari dixi; demittendumque id inter dentem & gingivam. Quod si durior erit, & id prohibebit, extrin-

fecus admovendus erit spongiæ vapor calidus, imponendumque ceratum. Si suppuratio se ostendet, diutius eo vapore utendum erit: & continendum ore calidum mulsum, in quo ficus decocta sit. Itemque subcrudum incidendum, ne, si ibi diutius pus permanferit, os lædat. Quod si major is tumor est, commodius totus exciditur, sic ut ex utraque parte dens liberetur. Pure exempto, si levis plaga est, satis est ore calidam aquam continere, & extrinsecus fovere eodem vapore: si major est, lenticulæ cremore uti, iisdemque medicamentis, quibus cetera ulcera oris curantur.

Alia quoque ulcera in gingivis plerumque oriuntur, quibus eadem, quæ in reliquo ore, succurrunt. Maxime tamen mandere ligustrum oportet, succumque eum ore continere. Fit etiam interdum, ut ex gingivæ ulcere, siue *παρουλὶς* fuit, siue non fuit, diutius pus feratur, dente aut corrupto, aut fracto, vel aliter vitiato osse: maximeque id per fistulam evenire consuevit. Quod ubi incidit, locus aperiendus, dens eximendus; testa ossis, si qua excessit, recidenda est; si quid vitiosi est, radendum. Post quæ, quid fieri debeat, supra in aliorum ulcerum curatione comprehensum est. Si vero a dentibus gingivæ recedunt, eadem antheræ succurrunt. Utile est etiam pira aut mala non permatura mandere, & ore eum humorem continere. Idemque præstare non acre acetum in ore retentum potest.

CAPUT XIV.

De uvæ morbo.

UVÆ vehemens inflammatio terrere quoque debet. Itaque in hac & abstinencia necessaria est, & sanguis recte mittitur; &, si id aliqua res prohibet, alvus utiliter ducitur: caputque super hæc velandum, & sublimius habendum est: tum aqua gargarizandum, in qua simul rubus & lenticula decocta sit. Illinenda autem ipsa uva vel omphacio, vel galla, vel alumine scissili, sic ut cuilibet eorum mel adjiciatur. Est etiam medicamentum huic aptum, quod Andronium appellatur. constat ex his: alumine scissili, squama æris rubri, atramento futorio, galla, myrrha, misy. quæ per se contrita, mixtaque rursus, paulatim adjecto vino austero, teruntur, donec his mellis crassitudo sit. Chelidoniæ quoque succo per cochlear illita uva maxime prodest. Ubi horum aliquo illita uva est, fere multa pituita decurrit: cumque ea quievit, ex vino calido gargarizandum.

Quod si minor in ea inflammatio, laser terere, eique adjicere frigidam aquam satis est, eamque aquam cochleari exceptam ipsi uvæ subjicere. Ac mediocriter eam tumentem aqua quoque frigida, eodem modo subjecta, reprimit. Ex eadem autem aqua gargarizandum quoque est, vel cum lasere, vel sine eo. At curationis uvæ productæ per manum, ratio subjecta est.

CAPUT XV.

De cancro oris.

SI quando autem ulcera oris cancer invasit; primo considerandum est, num malus corporis habitus sit; eique occurrendum: deinde ipsa ulcera curanda. Quod si in summa parte id vitium est, satis proficit anthera, humido ulceri arida inspersa; ficciori, cum exigua parte mellis illita. Si paulo altius, chartæ combustæ partes duæ, auripigmenti pars una. Si penitus malum descendit, chartæ combustæ partes tres, auripigmenti pars quarta: aut pares portiones salis fricti, & iridis frictæ: aut item pares portiones chalcitidis, calcis, auripigmenti. Necessarium autem est linamentum in rosa tingere, & super adurentia medicamenta imponere; ne vicinum & sanum locum lædant. Quidam etiam in acris aceti heminam frictum salem conjiciunt, donec tabescere desinat; deinde id acetum coquunt, donec exsiccetur; eumque salem contritum inspergunt. Quoties autem medicamentum injicitur, & ante & post os diluendum est vel cremore lenticulæ, vel aqua, in qua aut ervum, aut oleæ, aut verbenæ decoctæ sint, sic, ut cuilibet eorum paulum mellis misceatur. Acetum quoque ex scilla retentum ore, satis adversus hæc ulcera proficit: & ex aceto cocto sali, sicut supra demonstratum est, rursus mixtum acetum. sed & diu continere utrumlibet, & id bis aut ter die facere, prout vehemens malum est, necessarium est. Quod si puer est, cui id incidit, spe-

cillum lana involutum in medicamentum demittendum est, & super ulcus tenendum, ne per imprudentiam adurentia devoret. Et, si dolor in gingivis est, moventurque aliqui dentes, rejici eos oportet; nam curationes vehementer impediunt. Si nihil medicamenta proficiunt, ulcera erunt adurenda. Quod tamen in labris ideo non est necessarium, quoniam excidere commodius est. Et id quidem, æque adustum, atque excisum, sine ea curatione, quæ corpori manu adhibetur, impleri non potest. Gingivarum vero ossa, quæ hebetia sunt, in perpetuum ustione nudantur; neque enim postea caro increscit. Imponenda tamen adustis lenticula est, donec sanitatem, qualis esse potest, recipiant.

C A P U T XVI.

De parotidibus.

HÆC in capite fere medicamentis egent. Sub ipsis vero auribus oriri *παρωτίδες* solent; modo in secunda valetudine, ibi inflammatione orta; modo post longas febres, illuc impetu morbi converso. Id abscessus genus est. Itaque nullam novam curationem desiderat: animadversionem tantummodo hanc habet necessariam. Si sine morbo id intumuit, primum reprimentium experimentum est: si ex adversa valetudine, illud inimicum est, maturarique & quam primum aperiri commodius est.

CAPUT XVII.

De umbilico prominente.

AD umbilicos vero prominentes, ne manu ferroque utendum sit, ante tentandum est, ut abstineant. alvus his ducatur: imponatur super umbilicum id, quod ex his constat: cicutæ & fuliginis, singulorum P. I. * cerussæ elotæ P. IV. * plumbi eloti P. VIII. * ovis duobus; quibus etiam solani succus adjicitur. Hoc diutius impositum esse oportet; & interim conquiescere hominem; cibo modico uti, sic ut vitentur omnia infantia.

CAPUT XVIII.

De obscœnarum partium vitiis.

PROXIMA sunt ea, quæ ad partes obscœnas pertinent. quarum apud Græcos vocabula & tolerabilius se habent, & accepta jam usu sunt, cum omni fere medicorum volumine atque sermone jactentur: apud nos scœdiora verba, ne consuetudine quidem aliqua verecundius loquentium commendata sunt: ut difficilis hæc explanatio sit, simul & pudorem, & artis præcepta servantibus. Neque tamen ea res a scribendo detertere me debuit. Primum, ut omnia, quæ salutaria accepi, comprehenderem: dein, quia in vulgus eorum curatio etiam præcipue cognoscenda est, quæ invitissimus quisque alteri ostendit.

2. *De colis morbis.*

Igitur si ex inflammatione coles intumuit, redacique summa cutis, aut rursus induci non potest, multa calida aqua fovendus locus est. Ubi vero glans contacta est, oriculario quoque clystere inter eam cutemque aqua calida inferenda est. si mollita sic & extenuata cutis ducenti paruit, expeditior reliqua curatio est: si tumor vicit, imponenda est vel lenticula vel marrubium, vel oleæ folia ex vino cocta, sic ut cuilibet eorum, dum teritur, mellis paulum adjiciatur: sursumque coles ad ventrem deligandus est; quod in omni curatione ejus necessarium est: isque homo continere se, & abstinere a cibo debet, & potione aquæ tantum a siti vindicari. Postero die rursus adhibendum iisdem rationibus aquæ fomentum est, & tum vi quoque experiundum, an cutis sequatur. Eaque, si non parebit, leviter summa scalpello concidenda erit. nam, cum sanies profluxerit, extenuabitur is locus, & facilius cutis ducetur.

Sive autem hoc modo victa erit, sive nunquam repugnaverit; ulcera vel in cutis interiore parte, vel in glande, ultrave eam in cole reperientur: quæ necesse est, aut pura siccaque sint, aut humida & purulenta. Si sicca sunt, primum aqua calida fovenda sunt: deinde imponendum lycium ex vino est, aut amurca cocta cum eodem, aut cum rosa butyrum. Si tenuis iis humor inest, vino eluenda sunt; tum butyro rosæ & mellis paulum, & resinæ terebinthinæ pars quarta adjicienda est, eoque uten-

dum. At, si pus ex iis profluit, ante omnia elui mulso calido debent: tum imponi piperis P. i. * myrrhæ P. ii. * croci, misyos cocti, singulorum P. ii. * quæ ex vino austero coquuntur, donec mellis crassitudinem habeant. Eadem autem compositio tonsillis, uvæ madenti, oris nariumque ulceribus accommodata est. Aliud ad idem: piperis P. i. * myrrhæ P. i. * croci P. ii. * misyos cocti P. i. * æris combusti P. ii. * quæ primum ex vino austero conteruntur; deinde, ubi inaruerunt, iterum teruntur ex passi tribus cyathis, & incoquuntur, donec visci crassitudinem habeant. Ærugo quoque cum cocto melle, & ea, quæ ad oris ulcera supra comprehensa sunt, curant. Aut Erasistrati compositio, aut Cratonis, recte super purulenta naturalia imponitur. Folia quoque oleæ ex novem cyathis vini coquuntur; his adjicitur aluminis scissilis P. iv. * lycii P. viii. * mellis sesquicyathus: ac, si plus puris est, id medicamentum ex melle: si minus, ex vino diluitur. Illud perpetuum est, post curationem, dum inflammatio manet, quale supra positum est, cataplasma super dare, & quotidie ulcera eadem ratione curare. Quod si pus & multum, & cum malo odore cœpit profluere, elui cremore lenticulæ debet, sic, ut ei mellis paulum adjiciatur: aut oleæ, aut lentisci folia, vel marrubium decoquendum est, eoque humore eodem modo cum melle utendum: imponendaque eadem; aut etiam omphacium cum melle; aut id, quod ex ærugine & melle ad aures fit; aut compositio Andronis; aut anthera, sic, ut ei paulum mellis adjiciatur. Qui-

dam ulcera omnia, de quibus adhuc dictum est, lycio ex vino curant.

Si vero ulcus latius atque altius serpit, eodem modo elui debet: imponi vero, aut ærugo, aut omphacium cum melle; aut Andronis compositio; aut marrubii, myrrhæ, croci, aluminis scissilis cocti, rosæ foliorum aridorum, gallæ, singulorum P. I. * minii sinopici P. II. * quæ per se singula primum teruntur, deinde juncta iterum, melle adjecto, donec liquidi cerati crassitudinem habeant; tum in æneo vase leniter coquantur, ne superfluant; cum jam guttæ indurescunt, vas ab igne removetur: idque medicamentum tum, prout opus est, aut ex melle aut ex vino liquatur. Idem autem per se etiam ad fistulas utile est.

Solet etiam interdum ad nervos ulcus descendere; profluitque pituita multa, sanies tenuis malique odoris, non cocta, aut aquæ similis, in qua caro recens lota est: doloresque is locus, & punctiones habet. Id genus quamvis inter purulenta est, tamen lenibus medicamentis curandum est; quale est emplastrum τετραφάρμακον ex rosa liquatum, sic, ut turris quoque paulum ei misceatur: aut id, quod ex butyro, rosa, resina, melle fit; supra vero a me positum est. Præcipueque id ulcus multa calida aqua fovendum est, velandumque, neque frigori committendum.

Interdum autem per ipsa ulcera coles sub cute exesus est sic, ut glans excidat. Sub quo casu cutis ipsa circumcidenda est. Perpetuumque est, quoties glans, aut ex cole aliquid, vel excidit, vel abscin-

ditur, illam non esse servandam, ne confidat, ulcereque agglutinetur, ac neque reduci possit postea, & fortasse fistulam quoque urinæ cludat.

Tubercula etiam, quæ φύματα Græci vocant, circa glandem oriuntur; quæ vel medicamentis, vel ferro aduruntur; & cum crustæ exciderunt, squama æris inspergitur, ne quid ibi rursus increseat.

3. *De cancro, qui in cole nascitur.*

Hæc citra cancrum sunt; qui cum in reliquis partibus, tum in his quoque vel præcipue ulcera infestat. Incipit a nigritie, quæ si cutem occupavit, protinus specillum subjiciendum, eaque incidenda est; deinde oræ vulsellæ prehendendæ, tum, quidquid corruptum est, excidendum, sic, ut ex integro quoque paulum dematur, idque adurendum. Quoties quid ustum est, id quoque sequitur, ut imponenda lenticula sit: deinde, ubi crustæ exciderunt, ulcera sic, ut alia, curentur.

At, si cancer ipsum colem occupavit, inspergenda aliqua sunt ex adurentibus, maximeque id, quod ex calce, chalcitide, auripigmento componitur. Si medicamenta vincuntur, hic quoque scalpello, quidquid corruptum est, sic, ut aliquid etiam secum integri trahat, præcidi debet. Illud quoque æque perpetuum est, exciso cancro, vulnus esse adurendum. Sed sive ex medicamentis, sive ex ferro crustæ occalluerint, magnum periculum est, ne his decidentibus, ex cole profusio sanguinis insequatur. Ergo longa quiete & immobili pæne corpore

opus est, donec ex ipso crustæ puræ leniter resolvantur. At si vel volens aliquis, vel imprudens, dum ingreditur, immature crustas diduxit, & fluit sanguis, frigida aqua adhibenda est. Si hæc parum valet, decurrendum est ad medicamenta, quæ sanguinem supprimunt. Si ne hæc quidem succurrunt, aduri diligenter & timide debet: neque ullo postea motu dandus eidem periculo locus est.

4. *De phagedæna in cole nascente.*

Nonnunquam etiam id genus ibi cancri, quod *φayέδαινα* a Græcis nominatur, oriri solet. In quo minime differendum, sed protinus iisdem medicamentis occurrendum est; &, si parum valent, ferro adurendum. Quædam etiam nigrities est, quæ non sentitur, & serpit, ac, si sustinuimus, usque ad vesicam tendit; neque succurri postea potest. Si id in summa glande circa fistulam urinæ est, prius in ea tenue specillum demittendum est, ne claudatur; deinde id ferro adurendum: si vero alte penetravit, quidquid occupatum est, præcidendum est. Cetera eadem, quæ in aliis cancris, facienda sunt.

5. *De carbunclo, qui in cole nascitur.*

Occalescit etiam in cole interdum aliquid; idque omni pæne sensu caret. quod ipsum quoque excidi debet. Carbunculus autem ibi natûs, ut primum apparet, oriculario clystere eluendus est: deinde ipse quoque medicamentis urendus, maximeque chalcitide cum melle, aut ærugine cum cocto melle, aut ovillo stercore frictio & contrito cum eo-

dem melle. Ubi is excidit, liquidis medicamentis utendum est, quæ ad oris ulcera componuntur.

6. *De testiculorum morbis.*

In testiculis vero, si qua inflammatio sine ictu orta est, sanguis ex talo mittendus est: a cibo abstinendum: imponendum, quod est ex fabæ farina ex mulso cocta, & cum cumino contrito ex melle cocto; aut contritum cuminum cum cerato ex rosa facto; aut lini semen frictum, contritum, & in mulso coctum; aut tritici farina ex mulso cocta cum cupresso; aut lilii radix contrita. At, si iidem induruerunt, imponi debet lini vel fœni Græci semen ex mulso coctum; aut ex cyprino ceratum; aut similia ex vino contrita, cui paulum croci sit adjectum. Si vetustior jam durities est, maxime proficit cucumeris agrestis radix ex mulso cocta, deinde contrita.

Si ex ictu tument, sanguinem mitti necessarium est; magisque, si etiam livent. Imponendum vero utrumlibet ex his, quæ cum cumino componuntur, supraque proposita sunt; aut ea compositio, quæ habet nitri cocti P. I. * resinæ pineæ, cumini, singulorum P. II. * uvæ taminæ sine feminibus P. IV. * mellis quantum satis sit ad ea cogenda. Quod si ex ictu testiculis aliquid desit, fere quoque pus increfcit; neque aliter succurri potest, quam si, inciso scroto, & pus emissum, & ipse testiculus excisus est.

7. *De ani morbis.**De rhagadiis.*

Anus quoque multa tædiique plena mala recipit, nec inter se multum abhorrentes curationes habet. Ac primum in eo sæpe, & quidem pluribus locis, cutis scinditur; *ῥαγάδια* Græci vocant. Id si recens est, quiescere homo debet, & in aqua calida desidere. Columbina quoque ova coquenda sunt, &, ubi induruerunt, purganda: deinde alterum jacere in aqua bene calida debet, altero calido foveri locus, sic, ut invicem utroque aliquis utatur. Tum tetrapharmacum, aut rhyodes rosa diluendum est; aut œsypum recens miscendum cum cerato liquido ex rosa facto; aut eidem cerato liquido plumbum elotum adjiciendum; aut resinæ terebinthinæ myrrha; aut spumæ argenti vetus oleum; & quolibet ex his id perungendum. Si, quidquid læsum est, extra est, neque intus reconditum, eodem medicamento tinctum linamentum superdandum est, &, quidquid ante adhibuimus, cerato contegendum. In hoc autem casu, neque acribus cibis utendum, neque asperis, nec alvum comprimentibus: ne aridum quidem quidquam satis utile est, nisi admodum paulum. Liquida, lenia, pingua, glutinosa, meliora sunt. Vino leni uti nihil prohibet.

8. *De condylomate.*

Condyloma autem est tuberculum, quod ex quadam inflammatione nasci solet. Id ubi ortum est, quod ad quietem, cibos, potionesque pertinet, ea-

dem fervari debent, quæ proxime scripta sunt. Iisdem etiam ovis recte tuberculum id fovetur. sed desidere ante homo in aqua debet, in qua verbenæ decoctæ sunt ex reprimentibus; tum recte imponitur & lenticula cum exigua mellis parte, & sertula campana ex vino cocta, & rubi folia contrita cum cerato ex rosa facto; & cum eodem cerato contritum vel cotoneum malum, vel malicorii ex vino cocti pars interior: & chalcitis cocta atque contrita, deinde œsypo ac rosa excepta; & ex ea compositione, quæ habet turis P. I. * aluminis scissilis P. II. * cerussæ P. III. * spumæ argenti P. v. * quibus, dum teruntur, invicem rosa & vinum instillatur. Vinculum autem ei loco linteolum aut panniculus quadratus est, qui ad duo capita duas ansas, ab altera vero parte totidem fascias habet; cumque subjectus est, ansis ad ventrem datis, a posteriore parte in eas adductæ fasciæ conjiciuntur, atque, ubi arctatæ sunt, dexterior sinistra, sinisterior dextra procedit, circumdatæque circa alvum inter se novissime nodo deligantur. Sed, si vetus condyloma jam induruit, neque sub his curationibus desidit, aduri medicamento potest, quod ex his constat: æruginis P. II. * myrrhæ P. IV. * gummi P. VIII. * turis P. XII. * stibii, papaveris lacrimæ, acaciæ, singulorum P. XVI. * Quo medicamento quidam etiam ulcera, de quibus proxime dixi, renovant. Si hoc parum in condylomate proficit, adhiberi possunt etiam vehementius adurentia. Ubi consumtus est tumor, ad medicamenta lenia transeundum est.

9. *De hæmorrhoidibus.*

Tertium autem ani vitium est, ora venarum tanquam capitulis quibusdam turgentia, quæ sæpe sanguinem fundunt; *αἱμορροΐδας* Græci vocant. Idque etiam in ore vulvæ feminarum incidere consuevit. Atque in quibusdam parum tuto supprimitur; qui sanguinis profluvio imbecilliores non fiunt. habent enim purgationem hanc, non morbum. Ideoque curati quidam, cum sanguis exitum non haberet, inclinata in præcordia ac viscera materia, subitis & gravissimis morbis correpti sunt. Si cui vero id nocet, is desiderare in aqua ex verbenis debet: imponere maxime malicorium cum aridis rosæ foliis contritum; aut ex his aliqua, quæ sanguinem supprimunt. Solet autem oriri inflammatio, maxime ubi dura alvus eum locum læsit. Tum in aqua dulci desidendum est, & id fovendum ovis, imponendi vitelli cum rosæ foliis ex passo subactis: idque, si intus est, digito illinendum; si extra, superillitum panniculo imponendum est. Ea quoque medicamenta, quæ recentibus scissuris posita sunt, hic idonea sunt. Cibis vero in hoc casu iisdem, quibus in prioribus, utendum est. Si ista parum juvant, solent imposita medicamenta adurentia ea capitula absumere. Ac, si jam vetustiora sunt, sub auctore Dionysio inspergenda sandaracha est; deinde imponendum, quod ex his constat: squamæ æris, auripigmenti, singulorum P. v. * faxi calcis P. viii. * postero die acu compungendum. Aduſtis capitulis fit cicatrix, quæ sanguinem fundi prohibet. Sed, quoties is suppres-

sus est, ne quid periculi afferat, multa exercitatione digerenda materia est: prætereaque & viris, & feminis, quibus menstrua non proveniunt, interdum ex brachio sanguis mittendus est.

10. *Si anus, vel os vulvæ procidit, qua curatione utendum sit.*

At, si anus ipse, vel os vulvæ procidit (nam id quoque interdum fit) considerari debet, purumne id sit, quod provolutum est, an humore mucoso circumdatum. Si purum est, in aqua desidere homo debet, aut salsa, aut cum verbenis vel malicorio incocta. Si humidum, vino austero subluendum est, illinendumque sæce vini combusta. Ubi utrolibet modo curatum est, intus reponendum est: imponendaque plantago contrita, vel folia falicis in aceto cocta; tum linteolum & super lana, eaque deliganda sunt, cruribus inter se devinctis.

11. *De fungo ani, aut vulvæ.*

Fungo quoque simile ulcus in eadem sede nasci solet. Id, si hiems est, egelida; si aliud tempus, frigida aqua fovendum est: dein squama æris inspergenda, supraque ceratum ex myrteo factum, cui paulum squamæ, fuliginis, calcis sit adjectum. Si hac ratione non tollitur, vel medicamentis vehementioribus, vel ferro adurendum est.

CAPUT XIX.

De digitorum ulceribus.

DIGITORUM autem vetera ulcera commodissime curantur, aut lycio, aut amurca cocta, cum utrilibet vinum adjectum est. In iisdem recedere ab ungue caruncula cum magno dolore consuevit; *πτερύγιον* Græci appellant. Oportet alumen Melium rotundum in aqua liquare, donec mellis crassitudinem habeat: tum, quantum ejus aridi fuit, tantundem mellis infundere, & rudicula miscere, donec similis croco color fiat, eoque illinere. Quidam ad eundem usum decoquere simul malunt, cum paria pondera aluminis aridi & mellis miscuerint. Si hac ratione ea non exciderunt, excidenda sunt: deinde digiti fovendi aqua ex verbenis, imponendumque super medicamentum ita factum: chalcitis, malicorium, squama æris excipiuntur fico pingui leviter cocto ex melle; aut chartæ combustæ, auripigmenti, sulphuris ignem non experti par modus cerato miscetur ex myrteo facto; aut æruginis rarsæ P. I. * squamæ æris P. II. * mellis cyatho coguntur; aut pares portiones miscentur, saxi calcis, chalcitidis, auripigmenti. Quidquid horum impositum est, tegendum linteolo aqua madefacto est. Tertio die digitus resolvendus est, &, si quid aridi est, iterum excidendum, similisque adhibenda curatio est. Si non vincitur, purgandum est scalpello, tenuibusque ferramentis adurendum, &, sicut reliqua usta, curandum.

At, ubi scabri ungues sunt, circum aperiri debent, qua corpus contingunt: tum super eos ex hac compositione aliquid imponi, fandarachæ, sulphuris, fingulorum P. II. * nitri, auripigmenti, fingulorum P. IV. * resinæ liquidæ P. VIII. * tertioque id die resolvendum est. Sub quo medicamento vitiosi ungues cadunt, & in eorum locum meliores renascuntur.

A. CORN. CELSI
M E D I C I N Æ
L I B E R S E P T I M U S.

P R Æ F A T I O.

De chirurgica, & qui in ea claruerint, & qualis esse chirurgus debeat, & quid hoc in libro describatur.

TERTIAM esse medicinæ partem, quæ manu curet, & vulgo notum, & a me propositum est. Ea non quidem medicamenta atque victus rationem omittit; sed manu tamen plurimum præstat. estque ejus effectus inter omnes medicinæ partes evidentissimus. Siquidem in morbis cum multum fortuna conferat, eademque sæpe salutaria, sæpe vana sint; potest dubitari, secunda valetudo medicinæ, an corporis beneficio contigerit. In his quoque, in quibus medicamentis maxime nitimur, quamvis profectus evidentior est, tamen sanitatem & per hæc frustra quæri, & sine his reddi sæpe, manifestum est. Sicut in oculis quoque deprehendi potest; qui a medicis diu vexati, sine his interdum sanescunt. At in ea parte, quæ manu curat, evidens est, omnem profectum, ut aliquid ab aliis adjuvetur, hinc tamen plurimum trahere. Hæc autem pars, cum sit vetu-

stiffima, magis tamen ab illo parente omnis medicinæ Hippocrate, quam a prioribus exculta est. Deinde, posteaquam diducta ab aliis habere professores suos coepit, in Ægypto quoque increvit, Philoxeno maxime auctore, qui pluribus voluminibus hanc partem diligentissime comprehendit. Gorgias quoque & Sostratus, & Herones & Apollonii duo, & Ammonius Alexandrinus, multique alii celebres viri, singuli quædam reppererunt. Ac Romæ quoque non mediocres professores, maximeque nuper Tryphon pater, & Euelpistus, Phlegetis filius, &, ut ex scriptis ejus intelligi potest, horum eruditissimus Meges, quibusdam in melius mutatis, aliquantum ei disciplinæ adjecerunt.

Esse autem chirurgus debet adolescens, aut certe adolescentiæ propior; manu strenua, stabili, nec unquam intremiscente, eaque non minus sinistra, quam dextra promptus; acie oculorum acri, claraque; animo intrepidus, immisericors, sic, ut sanari velit eum, quem accepit, non ut clamore ejus motus, vel magis, quam res desiderat, properet, vel minus, quam necesse est, secet: sed perinde faciat omnia, ac si nullus ex vagitibus alterius affectus oriatur.

Potest autem requiri, quid huic parti proprie vindicandum sit; quia vulnerum quoque ulcerumque multorum curationes, quas alibi exsecutus sum, chirurgi sibi vindicant. Ego eundem quidem hominem posse omnia ista præstare concipio: atque, ubi se diviserunt, eum laudo, qui quamplurimum percipit. Ipse autem huic parti ea reliqui, in quibus

vulnus facit medicus, non accipit; & in quibus vulneribus ulceribusve plus perfici manu, quam medicamento, credo: tum, quidquid ad ossa pertinet. Quæ deinceps exsequi aggrediar, dilatisque in aliud volumen ossibus, in hoc cetera explicabo: præpositisque his, quæ in qualibet parte corporis fiunt, ad ea, quæ proprias sedes habent, transibo.

C A P U T I.

De vexatis.

VEXATA igitur, in quacunque parte corporis fiat, quamprimum sic curari debent, ut, qua dolor est, ea scalpello cutis crebro incidatur, detergeaturque eodem adverso profluens sanguis. quod si paulo tardius subvenitur, jamque etiam rubor est; qua rubet corpus: si tumor quoque accessit, quacunque is est, id optimum auxilium est. Tum superdanda reprimentia sunt; maximeque lana succida ex aceto & oleo. Quod si levior is casus est, possunt etiam, sine scalpello, imposita eadem mederi. Et, si nihil aliud est, cinis quoque, maxime ex sarmentis: si is non est, quilibet alius ex aceto, vel etiam ex aqua coactus.

C A P U T II.

De his, quæ per se intumescunt, quomodo incidenda, & curanda sint.

VERUM hoc quidem promptum est. In his autem negotium majus est, quæ per se, vitio intus orto,

intumescunt, & ad suppurationem spectant. Ea omnia genera abscessuum esse alias proposui, medicamentaque eis idonea exsecutus sum: nunc superest, ut dicam, quæ in iisdem manu fieri debeant. Ergo, priusquam indurescant, cutem incidere, & cucurbitulam accommodare oportet; quæ, quidquid illud malæ corruptæque materiæ coiit, extrahat: idque iterum, tertioque recte fit, donec omne indicium inflammationis excidat. Neque tamen fas non est, nihil cucurbitula agere.

Interdum enim, sed raro, quidquid abscedit, velamento suo includitur. id antiqui tunicam nominabant. Meges, quia tunica omnis nervosa est, dicit, non nasci sub eo vitio nervum, quo caro consumeretur, sed, subiecto jam vetustiore pure, cal- lum circumdari. Quod ad curationis rationem nullo loco pertinet; quia quidquid dixi, si tunica est, idem, si callus est, fieri debet: neque ulla res prohibet, etiamsi callus est, tamen, quia cingit, tunicam nominari. Tum pure quoque maturior hæc interdum esse consuevit. ideoque, quod sub ea est, extrahi per cucurbitulam non potest. sed facile id intelligitur, ubi nihil admota illa mutavit. Ergo, siue id incidit, siue jam durities est, in hac auxilii nihil est: sed, ut alias scripsi, vel avertenda concurrans eo materia, vel digerenda, vel ad maturitatem perducenda est. Si priora contigerunt, nihil præterea necessarium est. Si pus maturuit, in alis quidem & inguinibus raro secandum est: item ubicunque mediocris abscessus est: item quoties in summa cute, vel etiam carne vitium est; nisi festi-

nare curandi imbecillitas cogit. Satisque est cata-
plasmatis efficere, ut per se pus aperiatur. nam fere
fine cicatrice potest esse is locus, qui expertus fer-
rum non est. Si autem altius malum est, considerari
debet, nervosusne is locus sit, an non sit. Nam, si
fine nervis est, candenti ferramento aperiri debet.
cujus hæc gratia est, quod exigua plaga diutius ad
pus evocandum patet, parvaque postea cicatrix fit.
At, si nervi juxta sunt, ignis alienus est, ne vel
distendantur hi, vel membrum debilitent; necessa-
ria vero opera scalpelli est. Sed cetera etiam subcru-
da aperiri possunt; inter nervos ultima expectanda
maturitas est, quæ cutem extenuet, eique pus jun-
gat, quo propius reperiat. Itemque aliam rectam
plagam desiderant; in carne, quia fere vehementer
cutem extenuat, tota ea super pus excidenda est.
Semper autem, ubi scalpellus admovetur, id agen-
dum est, ut & quam minimæ & quam paucissimæ
plagæ sint: cum eo tamen, ut necessitati succurra-
mus, & in modo, & in numero. Nam majores fi-
nus, latius; interdum etiam duabus aut tribus li-
neis incidendi sunt. Dandaque opera, ut imus sinus
exitum habeat; ne quis humor intus subsidat, qui
proxima & adhuc sana rodendo finuet. Est etiam in
rerum natura, ut cutis latius excidenda sit. Nam,
ubi post longos morbos totus corporis habitus vi-
tius est, lateque se sinus diffudit, & in eo pars
cutis pallet; scire licet, eam jam emortuam esse,
& inutilem futuram. Ideoque excidere commodius
est: maxime, si circa articulos majores id evenit,
cubantemque ægrum fluens alvus exhaurit, neque

per alimenta quidquam corpori accedit. Sed excidi ita debet, ut plaga ad similitudinem myrtei folii fiat, quo facilius sanescat. Idque perpetuum est, ubicunque medicus ex quacunque causa cutem excidit. Pure effuso, in alis vel inguinibus linamento opus non est; spongia ex vino imponenda est. In ceteris partibus, si æque ea linamenta supervacua sunt, purgationis causa paulum mellis infundendum, dein glutinantia superdanda: si illa necessaria sunt, super ea quoque similiter dari spongia eodem modo ex vino expressa debet. Quando autem linamentis opus sit, quando non sit, alias dictum est. Cetera eadem, incisa suppuratione, facienda sunt, quæ, ubi per medicamenta rupta est, facienda esse proposui.

CAPUT III.

De bonis, malisve signis suppurationum.

PROTINUS autem, quantum curatio efficiat, quantumque aut sperari, aut timeri debeat, ex quibusdam signis intelligi potest; fereque iisdem, quæ in vulneribus exposita sunt. Nam bona signa sunt, somnum capere, facile spirare, siti non confici, cibum non fastidire, si febricula fuit, ea vacare: itemque habere pus album, læve, non foedi odoris. Mala sunt, vigilia, spiritus gravitas, sitis, cibi fastidium, febris; pus nigrum, aut sæculentum & foedi odoris: item procedente curatione eruptio sanguinis; aut si, antequam sinus carne impleatur, oræ carnosæ fiunt, illa quoque ipsa carne hebetæ,

nec firma. Deficere tamen animam, vel in ipsa curatione, vel postea, pessimum omnium est. Quin etiam morbus ipse, siue subito solutus est, dein suppuratio exorta est; siue effuso pure permanet, non injuste terret. Estque inter causas timoris, si sensus in vulnere rodentium non est. Sed ut hæc ipsa fortuna huc illucve discernit; sic medici partium est, eniti ad reperiendam sanitatem. Ergo, quoties ulcus resolverit, eluere id, si reprimendus humor videbitur, vino ex aqua pluviali mixto, vel aqua, in qua lenticula cocta sit, debet: si purgandum erit, mulso; rursusque imponere eadem. Ubi jam repressus videbitur humor, ulcusque purum erit, produci carnem conveniet, & foveri vulnus pari portione vini ac mellis, superque imponi spongiam ex vino & rosa tinctam. Per quæ cum caro producat, plus tamen, ut alias quoque dixi, victus ratio eo confert, id est, solutis jam febribus & cibi cupiditate reddita, balneum rarum; quotidiana, sed levis gestatio; cibi portionesque corpori reficiendo aptæ. Quæ omnia, per medicamenta quoque supuratione rupta, sequuntur. Sed, quia magno malo vix sine ferro mederi licet, in hunc locum reservata sunt.

C A P U T IV.

De fistulis.

ADVERSUS fistulas quoque, si altius penetrant, ut ad ultimas demitti collyrium non possit, si tortuosæ sunt, si multiplices, majus in manu, quam in medicamentis, præsidium est; minusque operæ est,

si sub cute transversæ feruntur, quam si rectæ intus tendunt. Igitur, si sub cute transversa fistula est, demitti specillum debet, supraque id ea incidi. Si flexus reperiuntur, hi quoque simul specillo & ferro persequendi sunt. Idemque faciendum, si plures se quasi ramuli ostendunt. Ubi ad fines fistulæ ventum est, excidendus ex toto callus est, superque fibulæ dandæ, & medicamentum, quo glutinetur. At, si recta subter tendit, ubi, quo maxime ferat, specillo exploratum est, excidi is sinus debet: dein fibula oris cutis injicienda est, & æque glutinantia medicamenta superdanda sunt; aut, si corruptius ulcus est (quod interdum osse vitiato fit) ubi id quoque curatum est, pus moventia.

2. *De costarum fistulis.*

Solent autem inter costas fistulæ subter exire. Quod ubi incidit, eo loco costa ab utraque parte decidenda & eximenda est, ne quid intus corruptum relinquatur. Solent quoque, ubi costas transierunt, septum id, quod transversum a superioribus visceribus intestina discernit, violare. Quod intelligi & ex loco, & ex magnitudine doloris, potest, & quia nonnunquam spiritus eo cum humore quasi bullante prorumpit, maximeque, si hunc ore ille continuit. In eo medicamini locus nullus est. In ceteris vero, quæ circa costas sanabilia sunt, pingua medicamenta inimica sunt; ceteris, quæ ad vulnera accommodantur, uti licet: optime tamen sicca linamenta, vel, si purgandum aliquid videtur, in melle tincta imponuntur.

3. *De ventris fistulis.*

Ventri nullum os subest; sed ibi perniciosæ admodum fistulæ fiunt: adeo ut Sostratus insanabiles esse crediderit. Id non ex toto ita se habere usus ostendit. Et quidem, quod maxime mirum videri potest, tutior fistula est contra jecur, & lienem, & ventriculum, quam contra intestina: non quo perniciosior ibi res sit, sed quo alteri periculo locum faciat. Cujus experimento moti quidam auctores parum modum rei cognoverunt. Nam venter sæpe etiam telo perforatur, prolapsaque intestina conduntur, & oras vulneris futuræ comprehendunt. quod quemadmodum fiat, mox indicabo. Itaque, etiam ubi tenuis fistula abdomen perripit, excidere eam licet, futuraque oras conjungere. Si vero ea fistula latius patuit, excisa necesse est latius foramen relinquat. quod nisi magna vi, utique ab interiore parte, sui non potest, qua quasi membrana quædam finit abdomen, quam *περιτόναιον* Græci vocant. Ergo, ubi aliquis ingredi ac moveri cœpit, rumpitur illa futura, atque intestina solvuntur. quo fit, ut pereundum homini sit. Sed non omnimodo res ea desperationem habet: ideoque tenuioribus fistulis adhibenda curatio est.

4. *De ani fistulis.*

Propriam etiamnum animadversionem desiderant eæ, quæ in ano sunt. In has demisso specillo, ad ultimum ejus caput incidi cutis debet: dein novo foramine specillum educi lino sequente, quod in

aliam ejus partem, ob id ipsum perforatam, conjectum sit. Ibi linum prehendum vinciendumque cum altero capite est, ut laxè cutem, quæ super fistulam est, teneat. Idque linum debet esse crudum, & duplex triplexve, sic tortum, ut unitas facta sit. Interim autem licet negotia agere, ambulare, lavari, cibum capere, perinde atque sanissimo. Tantummodo id linum bis die, salvo nodo, ducendum est sic, ut subeat fistulam pars, quæ superior fuerit. Neque committendum est, ut id linum putrescat: sed tertio quoque die nodus resolvendus est, & ad caput alterum recens linum alligandum, eductoque vetere, id in fistula cum simili nodo relinquendum. Sic enim id paulatim cutem, quæ supra fistulam est, incidit: simulque & id sanescit, quod a lino relictum est; & id, quod ab eo mordetur, inciditur. Hæc ratio curationis longa, sed sine dolore est.

Qui festinat, adstringere cutem lino debet, quo celerius fecet; noctuque ex penicillo tenuia quædam intus demittere, ut cutis hoc ipso extenuetur, quo extenditur: sed hæc dolorem movent. Adjicitur celeritati, sicut tormento quoque, si & linum, & id, quod ex penicillo est, aliquo medicamento illinitur ex iis, quibus callum exedi posui. Poterit tamen fieri, ut ad scalpelli curationem etiam illo loci veniendum sit, si intus fistula fert, si multiplex est. Igitur in hæc genera demisso specillo, duabus lineis incidenda cutis est; ut media inter eas habenula tenuis admodum ejiciatur, ne protinus oræ coeant; sitque locus aliquis linamentis, quæ quam paucissima superinjicienda sunt; omniaque eodem

modo facienda, qui in abscessibus positus est. Si vero ab uno ore plures finus erunt, recta fistula scalpello erit incidenda; ab eo ceteræ, quæ jam patebunt, lino excipiendæ. Si intus aliqua procedet, quo ferrum tuto pervenire non poterit, collyrium demittendum erit.

Cibus autem in omnibus ejusmodi casibus, si manu, si medicamentis agetur, dari debet humidus; potio liberalis, diuque aqua. ubi jam caro increscit, tum demum & balneis raris utendum erit, & cibus corpus implentibus.

C A P U T V.

De telis e corpore extrahendis.

TELA quoque, quæ illata corporibus intus hæserunt, magno negotio sæpe ejiciuntur. Suntque quædam difficultates ex generibus eorum; quædam ex his sedibus, in quas illa penetrarunt. Omne autem telum extrahitur, aut ab ea parte, qua venit, aut ab ea, in quam tetendit. illic viam, qua redeat, ipsum sibi fecit: hic, a scalpello accipit; nam contra mucronem caro inciditur. Sed si non alte telum insedit, & in summa carne est, aut certe magnas venas & loca nervosa non transiit; nihil melius est, quam, qua venit, id evellere. Si vero plus est, per quod telo revertendum, quam quod perrumpendum est; jamque venas nervosque id transiit, commodius est aperire quod superest, eaque extrahere. nam & propius petitur, & tutius evellitur, & in majore membro, si medium mucro transiit, facilius

fanescit, quod pervium est; quia utrinque medicamento fovetur. Sed, si retro telum recipiendum est, amplianda scalpello plaga est; quo facilius id sequatur, quoque minor oriatur inflammatio: quæ major fit, si ab illo ipso telo, dum redit, corpus laniatur. Item, si ex alia parte vulnus aperitur, laxius esse debet, quam ut telo postea transeunte amplietur. Summa autem utraque parte ita habenda cura est, ne nervus, ne vena major, ne arteria incidatur. Quorum ubi aliquid detectum est, excipiendum hamo retuso est, abducendumque a scalpello. Ubi autem satis incisum est, telum eximendum est: tunc quoque eodem modo, & eadem cura habita, ne sub eo, quod eximetur, aliquid eorum lædatur, quæ tuenda esse proposui.

2. *De sagittis recipiendis.*

Hæc communia sunt. Propria quædam in singulis telorum generibus subjicienda sunt, quæ protinus subjiciam. Nihil tam facile in corpore, quam sagitta, conditur, eademque altissime insidit. Hæc autem eveniunt, & quia magna vi fertur illa, & quia ipsa in angusto est. Sæpius itaque ab altera parte, quam ex qua venit, recipienda est; præcipueque, quia fere spiculis cingitur; quæ magis laniant, si retro, quam si contra trahuntur. Sed inde, aperta via, caro diduci debet ferramento, facto ad similitudinem Græcæ literæ Ψ . Deinde, ubi apparuit, si mucroni arundo inhæret, propellenda est, donec ab altera parte apprehendi, & extrahi possit. Si jam illa decidit, solumque intus ferrum est; mucro vel di-

gitis apprehendi, vel forfice, atque ita educi debet. Neque alia ratio extrahendi est, ubi ab ea parte, qua venit, evelli magis placuit. nam, ampliato vulnere, aut arundo, si inest, evellenda est; aut, si ea non est, ferrum ipsum. Quod si spicula apparuerunt, eaque brevia & tenuia sunt, forfice ibi comminui debent, vacuumque ab his telum educi: si ea majora valentioraque sunt, fixis scriptoriis calamis contegenda, ac, ne quid lacerent, sic evellenda sunt. Et in sagittis quidem hæc observatio est.

3. *De latis telis educendis.*

Latum vero telum si conditum est, ab altera parte educi non expedit, ne ingenti vulnere ipsi quoque ingens vulnus adjiciamus. Evellendum est ergo quodam genere ferramenti, quod Διοκλέους γραφίσκον Græci vocant, quoniam auctorem Dioclem habet; quem inter priscos maximosque medicos fuisse, jam posui. Lamina vel ferrea, vel ænea etiam, ab altero capite duos utrinque deorsum conversos uncus habet; ab altero duplicata lateribus, leviterque extrema in eam partem inclinata, quæ sinuata est; insuper ibi etiam parte inclinata, quæ perforata est. Hæc juxta telum transversa demittitur: deinde, ubi ad imum mucronem ventum est, paululum torquetur, ut telum foramine suo excipiat: cum in cavo mucro est, illico duo digiti, subiecti partis alterius uncis, simul & ferramentum id extrahunt, & telum.

4. *De alio telorum genere.*

Tertium genus telorum, quod interdum evelli

debet, est plumbea glans, aut lapis, aut simile aliquid, quod, perrupta cute, integrum intus infedit. In omnibus his latius vulnus aperiendum, idque, quod inest, ea, qua venit, forfice extrahendum est. Accedit vero aliquid difficultatis sub omni ictu, si telum vel ossi inhæsit, vel in articulo se inter duo ossa demersit. In osse usque eo movendum est, donec laxetur is locus, qui mucronem momordit; & tum vel manu, vel forfice telum extrahendum est. quæ ratio quoque in dentibus ejiciendis est. Et vix unquam ita telum non sequitur. sed, si morabitur, excuti quoque ictum aliquo ferramento poterit. Ultimatum est, ubi non evellitur, terebra juxta forare; ab eo quoque foramine, ad speciem literæ v contra telum os excidere sic, ut lineæ, quæ diducuntur, ad telum spectent: eo facto, id necesse est labet, & facile auferatur.

Inter duo vero ossa si per ipsum articulum perrupit, circa vulnus duo membra fasciis habenisque deliganda, & per has in diversas partes diducenda sunt, ut nervos distendant: quibus extentis, laxius inter ossa spatium est, ut sine difficultate telum recipiatur. Illud videndum est, sicut in aliis locis posui, ne quis nervus, aut vena, aut arteria a telo lædatur, dum id extrahitur: eadem scilicet ratione, quæ supra posita est.

5. *De venenato telo evellendo.*

At, si venenato quoque telo quis ictus est, iisdem omnibus, si fieri potest, etiam festinantius actis, adjicienda curatio est, quæ vel epoto veneno, vel

a serpente ictis adhibetur. Vulneris autem ipsius; extracto telo, medicina non alia est, quam quæ esset, si corpore icto nihil inhæsisset. de qua satis alio loco dictum est.

C A P U T VI.

De gangliis, & meliceride, & atheromate, & steatomate, capitis tuberculis.

HÆC venire in qualibet parte corporis possunt: reliqua certas sedes habent, de quibus dicam, orsus a capite. In hoc multa variaque tubercula oriuntur, γάγγλια, μελικηρίδας, ἄθερόματα nominant; aliisque etiamnum vocabulis quædam alii discernunt; quibus ego στεατόματα quoque adjiciam. quæ quamvis & in cervice, & in alis, & in lateribus oriri solent; per se tamen non posui, cum ista omnia mediocres differentias habeant, ac nec periculo terreant, neque diverso genere curentur. Omnia autem ista & ex parvulo incipiunt, & diu paulatimque crescunt, & tunica sua includuntur. Quædam ex his dura ac renitentia, quædam mollia cedentiaque sunt: quædam spatio nudantur, quædam tecta capillo suo permanent, fereque sine dolore sunt. Quid intus habeant, ut conjectura præfagiri potest; sic ex toto cognosci, nisi cum ejecta sunt, non potest. Maxime tamen in his, quæ renituntur, aut lapillis quædam similia, aut concreti confertique pili reperiuntur. In his vero, quæ cedunt, aut melli simile aliquid, aut tenui pulticulæ, aut quasi rasæ cartilagini, aut carni hebeti & cruentæ; quibus aliqui

colores esse consueverunt. Fereque ganglia renituntur : atheromati subest quasi tenuis pulticula : meliceridi, liquidior humor ; ideoque pressus circumfluit : steatomati pingue quiddam, idque latissime patere consuevit, resolvitque totam cutem superpositam sic, ut ea labet ; cum in ceteris sit adstrictior. Omnia, derasa ante, si capillis conteguntur, per medium oportet incidere ; sed steatomatis tunica quoque secanda est, ut effundatur, quidquid intus coit ; quia non facile a cute & subiecta carne ea separaretur : in ceteris ipsa tunica inviolata servanda est. Protinus autem alba & intenta se ostendit ; tum scalpelli manubriolo diducenda a cute & carne est, ejiciendaque cum eo, quod intus tenet. Si quando tamen ab inferiore parte tunicæ musculus inhæsit, ne is lædatur, superior pars illius decidenda, alia ibidem relinquenda est. Ubi tota exempta est, committendæ oræ, fibulaque his injicienda, & super medicamentum glutinans dandum est. Ubi vel tota tunica, vel aliquid ex ea relictum est, pus morventia adhibenda sunt.

CAPUT VII.

De oculorum vitiis, quæ scalpello & manu curantur.

SED ut hæc neque genere vitii, neque ratione curationis inter se multum distant : sic in oculis, quæ manum postulant, & ipsa diversa sunt, & aliter aliterque curantur. Igitur in superioribus palpebris vesicæ nasci solent, pingues gravesque ; quæ

vix attollere oculos sinunt, levesque pituitæ cursus, sed assiduos, in oculis movent. Fere vero in pueris nascuntur. Oportet, compresso digitis duobus oculo, atque ita cure intenta, scalpello transversam lineam incidere, suspensa leviter manu, ne vesica ipsa vulneretur, & ut, si locus patefactus est, ipsa prorumpat; tum digitis eam apprehendere oportet, & evellere. facile autem sequitur. Dein superinungi collyrio debet ex iis aliquo, quo lippientes oculi superinunguntur: paucissimisque diebus cicatricula inducitur. Molestius est, ubi incisa vesica est, effundit enim humorem; neque postea, quia tenuis admodum est, potest colligi. Si forte id incidit, eorum aliquid imponendum est, quæ puri movendo sunt.

2. *De crithe.*

In eadem palpebra super pilorum locum tuberculum parvulum nascitur, quod a similitudine hordei, a Græcis κριθή nominatur. Tunica quiddam, quod difficulter maturescit, comprehensum est. Id vel calido pane, vel cera subinde calefacta foveri oportet sic, ne nimius is calor sit, sed facile ea parte sustineatur. hac enim ratione sæpe discutitur, interdum concoquitur. Si pus se ostendit, scalpello dividi debet, &, quidquid intus humoris est, exprimi: eodem deinde vapore postea quoque foveri, & superinungi, donec ad sanitatem perveniat.

3. *De chalaziis palpebrarum.*

Alia quoque quædam in palpebris huic non dissimilia nascuntur; sed neque utique figuræ ejusdem,

& mobilia, simulatque digito huc vel illuc impelluntur. Quæ, quia grandini similia sunt, χαλάζια Græci vocant. Hæc incidi debent, si sub cute sunt, ab exteriori parte; si sub cartilagine, ab interiori: dein scalpelli manubriolo diducenda ab integris partibus sunt. Ac, si intus plaga est, inungendum primo lenibus, deinde acrioribus: si extra, superdandum emplastrum, quo id glutinetur.

4. *De angue oculorum.*

Unguis vero, quod πτερύγιον Græci vocant, est membranula nervosa, oriens ab angulo; quæ nonnunquam ad pupillam quoque pervenit, eique officit. Sæpius a narium, interdum etiam a temporum parte nascitur. Hunc recentem non difficile est discutere medicamentis, quibus cicatrices in oculis extenuantur. Si inveteravit, jamque ei crassitudo quoque accessit, excidi debet. Post abstinentiam vero unius diei, vel adversus in sedili contra medicum is homo collocandus est, vel sic aversus, ut in gremium ejus caput resupinus effundat. Quidam, si in sinistro oculo vitium est, adversum, si in dextro, resupinum collocari volunt. Alteram autem palpebram a ministro diduci oportet, alteram a medico: sed ab hoc, si ille adversus est, inferiorem; si supinus, superiorem. Tum idem medicus hamulum acutum, paulum mucrone intus recurvato, subjicere extremo ungui debet, eumque infigere; atque eam quoque palpebram tradere alteri: ipse, hamulo apprehenso, levare unguem, eumque acu trajicere limum trahente: deinde acum ponere, lini duo capita

apprehendere, & per ea erecto ungue, si qua parte oculo inhæret, manubriolo scalpelli diducere, donec ad angulum veniat: deinde invicem modo remittere, modo attrahere, ut sic & initium ejus, & finis anguli reperiatur. Duplex enim periculum est, ne vel ex ungue aliquid relinquatur, quod exulceratum vix ullam recipiat curationem; vel ex angulo quoque caruncula abscidatur. Quæ, si vehementius unguis ducitur, sequitur, ideoque decipit; ac si abscissa est, patescit foramen, per quod postea semper humor descendit: *ῥύαδα* Græci vocant. Verus ergo anguli finis utique noscendus est: qui ubi satis constitit, non nimium adducto ungue scalpellus adhibendus est; deinde excidenda ea membranula, ne quid ex angulo lædatur. Eo deinde ex melle linamentum superdandum est, supraque linteolum, & aut spongia, aut lana succida: proximisque diebus diducendus quotidie oculus est, ne cicatrice inter se palpebræ glutinentur, (siquidem id quoque tertium periculum accedit) eodemque modo linamentum imponendum, ac novissime inungendum collyrio, quo ulcera ad cicatricem perducuntur.

Sed ea curatio vere esse debet, aut certe ante hiemem. De qua re, ad plura loca pertinente, semel dixisse satis erit. Nam duo genera curationum sunt: alia, in quibus eligere tempus non licet, sed utendum est eo, quod incidit; sicut in vulneribus, & fistulis: alia, in quibus nullus dies urget, & expectare tutissimum & facile est; sicut evenit in iis, quæ & tarde increscunt, & dolore non cruciant. In his ver expectandum est: aut, si quid magis preffit,

melior tamen autumnus, quam hiems vel æstas est; atque is ipse medius, jam fractis æstibus, nondum ortis frigoribus. Quo magis autem necessaria pars erit, quæ tractabitur, hoc quoque majori periculo subiecta est. & sæpe, quo major plaga facienda, eo magis hæc temporis ratio servabitur.

5. *De encanthide.*

Ex curatione vero unguis, ut dixi, vitia nascuntur, quæ ipsa aliis quoque de causis oriri solent. Interdum enim fit in angulo, parum ungue exciso, vel aliter, tuberculum, quod palpebras parum diduci patitur: ἐγκανθὶς Græce nominatur. Excipi hamulo, & circumcidi debet: hic quoque diligenter temperata manu, ne quid ex ipso angulo abscidatur. Tum exiguum linamentum respergendum est vel cadmia, vel atramento futorio: inque eum angulum, diductis palpebris, inferendum, supraque eodem modo deligandum: proximisque diebus similiter nutriendum, tantum ut primis aqua egelida, vel etiam frigida foveatur.

6. *De ancyloblepharo.*

Interdum inter se palpebræ coalescunt, aperiri que non potest oculus. Cui malo solet etiam illud accedere, ut palpebræ cum albo oculi cohærescant; scilicet, cum in utroque fuit ulcus negligenter curatum. sanescendo enim, quod diduci potuit & debuit, glutinabitur; ἀγκυλοβλέφαρον sub utroque vitio Græci vocant. Palpebræ tantum inter se cohærentes, non difficulter diducuntur; sed interdum frustra, nam

rursus glutinantur. Experiri tamen oportet, quia bene res sæpius cedit. Igitur aversum specillum inferendum, diducendæque eo palpebræ sunt: deinde exigua penicilla interponenda, donec exulceratio ejus loci finiatur. At, ubi albo ipsius oculi palpebra inhæsit, Heraclides Tarentinus auctor est, adverso scalpello subsecare, magna cum moderatione, ut neque ex oculo, neque ex palpebra quidquam abscindatur; ac, si necesse est, ex palpebra potius. Post hæc, inungatur oculus medicamentis, quibus aspersione curatur: quotidieque palpebra vertatur, non solum ut ulceri medicamentum inducatur, sed etiam ne rursus inhæreat: ipsique etiam ægro præcipiatur, ut sæpe eam duobus digitis attollat. Ego sic restitutum esse neminem memini. Meges se quoque multa tentasse, neque unquam profuisse, quia semper iterum oculo palpebra inhæserit, memoriæ prodidit.

7. *De ægilope.*

Etiamnum in angulo, qui naribus propior est, ex aliquo vitio quasi parva fistula aperitur, per quam pituita assidue destillat: *αἰγίλωπα* Græci vocant. Idque assidue male habet oculum: nonnunquam etiam, exeso osse, usque ad nares penetrat. Idque interdum naturam carcinomatis habet: ubi intentæ venæ & recurvatæ sunt, color pallet, cutis dura est, & levi tactu irritatur, inflammationemque in eas partes, quæ conjunctæ sunt, evocat. Ex his eos, qui quasi carcinoma habent, curare periculosum est, nam mortem quoque ea res maturat. Eos vero, qui

bus ad nares tendit, supervacuum. neque enim faneſcunt. At, quibus id in angulo eſt, poteſt adhiberi curatio; cum eo, ne ignotum ſit, eſſe difficilem. quantoque angulo propius id foramen eſt, tanto difficilius eſt; quoniam peranguſtum eſt, in quo verſari manus poſſit: recenti tamen re mederi facilius eſt. Hamulo autem ſummum ejus foraminis excipiendum; deinde totum id cavum, ſicut in fiſtulis dixi, uſque ad os excidendum; oculoque & ceteris junctis partibus bene obtectis, os ferramento adurendum eſt vehementius. quod ſi jam carie vexatum eſt, quo craſſior huic ſquama abſcedat. Quidam adurentia imponunt, ut atramentum ſutorium, vel chalcitidem, vel æruginem rafam. quod & tardius & non idem facit. Oſſe aduſto, curatio ſequitur eadem, quæ in ceteris uſtis.

8. *De pilis palpebrarum oculum irritantibus.*

Pili vero, qui in palpebris ſunt, duabus de cauſis oculum irritare conſueverunt. Nam modo palpebræ ſuperioris ſumma cutis relaxatur, & procidit; quo fit, ut ejus pili ad ipſum oculum convertantur, quia non ſimul cartilago quoque ſe remiſit: modo ſub ordine naturali pilorum alius ordo ſubcreſcit, qui protinus intus ad oculum tendit. Curationes vero hæ ſunt. Si pili nati ſunt, qui non debuerunt, tenuis acus ferrea ad ſimilitudinem haſtæ lata, in ignem conjicienda eſt: deinde candens, ſublata palpebra ſic, ut ejus pernicioſi pili in conſpectum curantis veniant, ſub ipſis pilorum radicibus ab angulo immittenda eſt, ut ea tertiam partem palpebræ

transuat: deinde iterum, tertioque ad alterum angulum. quo fit, ut omnes pilorum radices adustæ emoriantur. Tum superimponendum medicamentum est, quod inflammationem prohibeat: atque ubi crustæ exciderunt, ad cicatricem perducendum. Facillime autem id genus sanescit. Quidam ajunt, acu transui juxta pilos exteriorem partem palpebræ oportere, eamque transmitti duplicem capillum muliebrem ducentem; atque ubi acus transiit, in ipsius capilli sinum, qua duplicatur, pilum esse injiciendum, & per eum in superiorem palpebræ partem attrahendum, ibique corpori agglutinandum, & imponendum medicamentum, quo foramen quoque glutinetur. sic enim fore, ut is pilus in exteriorem partem postea spectet. Id primum fieri non potest, nisi in pilo longiore; cum fere breves eo loco nascantur. Deinde, si plures pili sunt, necesse est longum tormentum, cum toties acus transuet, magnam inflammationem moveat. Novissime, cum humor aliquis ibi subsit, oculo & ante per pilos & tum per palpebræ foramina affecto, vix fieri potest, ut gluten, quo vinctus est pilus, non resolvatur: eoque fit, ut is eo, unde vi abductus est, redeat. Ea vero curatio, quæ palpebræ laxioris ab omnibus frequentatur, nihil habet dubii. Siquidem oportet confecto oculo mediam palpebræ cutem, sive ea superior, sive inferior est, apprehendere digitis, ac levare. tum considerare, quantulo detracto futurum sit, ut naturaliter se habeat. Siquidem hic quoque duo pericula circumstant: si nimium fuerit excisum, ne contegi oculus non possit; si parum, ne

nihil actum sit, & frustra sectus aliquis sit. Qua deinde incidendum videbitur, per duas lineas atramento notandum est sic, ut inter oram, quæ pilos continet, & propiorem ei lineam, aliquid relinquatur, quod apprehendere acus postea possit. His constitutis, scalpellus adhibendus est: &, si superior palpebra est, ante; si inferior, postea propius ipsis pilis incidendum: initiumque faciendum in sinistro oculo, ab eo angulo, qui temporis; in dextro, ab eo, qui naribus propior est: idque, quod inter duas lineas est, excidendum. deinde oræ vulneris inter se simplici futura committendæ, operiendusque oculus est: &, si parum palpebra descendet, laxanda utique; si nimium, aut adstringenda, aut etiam rursus tenuis habenula ab ulteriore ora excidenda. Ubi secta est, aliæ futuræ adjiciendæ, quæ supra tres esse non debent. Præter hæc, in superiore palpebra sub pilis ipsis incidenda linea est, ut ab inferiore parte diducti pili sursum spectent. Idque, si levis inclinatio est, etiam solum satis tuetur. Inferior palpebra eo non eget. His factis, spongia, ex aqua frigida expressa, super deliganda est. Postero die glutinans emplastrum injiciendum. Quarto futura tollenda est, & collyrio, quod inflammationes reprimit, superinungendum.

9. *De lagophthalmo.*

Nonnunquam autem, nimium sub hac curatione excisa cute, evenit, ut oculus non contegatur. Idque interdum etiam alia de causa fit. *λαγώφθαλμος* Græci appellant. In quo si nimium palpebræ deest,

nulla id restituere curatio potest : si exiguum , mēderi licet. Paulum infra supercilium cutis incidenda est lunata figura , cornibus ejus deorsum spectantibus. Altitudo esse plagæ usque ad cartilaginem debet, ipsa illa nihil læsa. nam, si ea incisa est, palpebra concidit, neque attolli postea potest. Cute igitur tantum diducta, fit, ut paululum in ima oculi ora descendat; hiantē scilicet super plaga. In quam linamentum conjiciendum est, quod & conjungi diductam cutem prohibeat, & in medio carunculam ciet: quæ ubi eum locum implevit, postea recte oculus operitur.

10. *De ectropio.*

Ut superioris autem palpebræ vitium est, quo parum descendit, ideoque oculum non contegit: sic inferioris, quo parum sursum attollitur, sed pendet & hiat, neque potest cum superiore committi. Atque id quoque evenit interdum ex simili vitio curationis, interdum etiam senectutē. *ἐκτρόπιον* Græci vocant. Si ex mala curatione est, eadem ratio medicinæ est, quæ supra posita est: plagæ tantum cornua ad maxillas, non ad oculum convertenda sunt. Si ex senectute est, tenui ferramento id totum extrinsecus adurendum est, deinde melle inungendum, & quarto die vapore aquæ calidæ fovendum, inungendumque medicamentis ad cicatricem perducentibus.

11. *De staphylomate.*

Hæc fere circa oculum in angulis palpebrisque

incidere consuerunt. In ipso autem oculo nonnunquam summa attollitur tunica, sive ruptis intus membranis aliquibus, sive laxatis; & similis figura acino fit. unde id σταφύλωμα Græci vocant. Curatio duplex est. Altera, ad ipsas radices per medium transuere acu, duo lina ducente; deinde alterius lini duo capita ex superiore parte, alterius ex inferiore adstringere inter se, quæ paulatim secando id excidant. Altera, in summa parte ejus ad lenticulæ magnitudinem excidere; deinde spodium aut cadmiam infricare. Utrolibet autem facto, album ovi lana excipiendum & imponendum; posteaque vapore aquæ calidæ fovendus oculus, & lenibus medicamentis ungendus est.

12. *De clavis oculorum.*

Clavi autem vocantur callosa in albo oculi tubercula; quibus nomen a figuræ similitudine est. Hos ad imam radicem perforare acu commodissimum est, infraque eam excidere, deinde lenibus medicamentis inungere.

13. *De oculorum natura.*

Suffusionis jam alias feci mentionem, quia cum recens incidit, medicamentis quoque sæpe discutitur: sed, ubi vetustior facta est, manus curationem desiderat; quæ inter subtilissimas haberi potest. De qua antequam dico, paucis ipsius oculi natura indicanda est. Cujus cognitio, cum ad plura loca pertineat, tum vel præcipue ad hunc pertinet. Is igitur summas habet duas tunicas: ex quibus superior a Græcis κερατοειδής vocatur. Ea, qua parte alba est,

fatis crassa, pupillæ loco extenuatur. Huic inferior adjuncta est media parte, qua pupilla est, modico foramine concava, circa tenuis, ulterioribus partibus ipsa quoque plenior, quæ *χαριοειδής* a Græcis nominatur. Hæ duæ tunicæ, cum interiora oculi cingant, rursus sub his coeunt; extenuatæque & in unum coactæ per foramen, quod inter ossa est, ad membranam cerebri perveniunt, eique inhærescunt. Sub his autem, qua parte pupilla est, locus vacuus est: deinde infra rursus tenuissima tunica, quam Herophilus *ἀραχνοειδῆ* nominavit. Ea media subsidet; eoque cavo continet quiddam, quod, a vitri similitudine, *υαλοειδές* Græci vocant. Id neque liquidum, neque aridum est; sed quasi concretus humor. Ex cujus colore pupillæ color vel niger est, vel cæsius, cum summa tota tunica alba sit. Id autem superveniens ab interiore parte membranula includit. Sub his gutta humoris est, ovi albo similis: a qua videndi facultas proficiscitur. *κρυσταλλοειδής* a Græcis nominatur.

14. *De suffusione.*

Igitur vel ex morbo, vel ex ictu concrescit humor sub duabus tunicis, qua locum vacuum esse proposui; isque paulatim indurefcens, interiori potentiæ se opponit. Vitiique ejus plures species sunt; quædam sanabiles, quædam, quæ curationem non admittunt. Nam si exigua suffusio est, si immobilis, colorem vero habet marinæ aquæ, vel ferri nitentis, & a latere sensum aliquem fulgoris relinquit, spes superest. Si magna est, si nigra pars oculi,

amiffa naturali figura, in aliam vertit, fi fuffufioni color cæruleus eft, aut auro fimilis, fi labat, & hac atque illac movetur, vix unquam fuccurritur. Fere vero pejor eft, quæ ex graviore morbo, majoribusve capitis doloribus, vel icflu vehementiore orta eft. Neque idonea curationi fenilis ætas eft; quæ fine novo vitio, tamen aciem hebetem habet: ac ne puerilis quidem; fed inter has media ætas. Oculus quoque curationi neque exiguus, neque concavus, fatis opportunus eft. Atque ipfius quoque fuffufionis quædam maturitas eft. Exfpectandum igitur eft, donec jam non fluere, fed duritie quadam concreviffe videatur.

Ante curationem autem mōdico cibo uti, bibere aquam triduo debet; pridie, ab omnibus abftinere. Poft hæc in adverfo fedili collocandus eft loco lucido, lumine adverfo, fic ut contra medicus paulo altius fedeat; a posteriore autem parte caput ejus, qui curabitur, minifter contineat, & immobile id præftet: nam levi motu eripi acies in perpetuum poteft. Quin etiam ipfe oculus, qui curabitur, immobilior faciendus eft, fuper alterum lana impofita & deligata. Curari vero finifter oculus dextra manu, dexter finiftra debet. Tum acus admovenda eft, aut acuta, aut forte non nimium tenuis, eaque demittenda, fed recta, eft per fummas duas tunicas medio loco inter nigrum oculi & angulum tempori propiorem, e regione mediæ fuffufionis fic, ne qua vena lædatur. Neque tamen timide demittenda eft, quia inani loco excipitur. Ad quem cum ventum eft, ne mediocriter quidem peritus falli poteft, quia

prementi nihil renititur. Ubi eo ventum est, inclinanda acus ad ipsam suffusionem est, leviterque ibi verti & paulatim eam deducere infra regionem pupillæ debet; ubi deinde eam transiit, vehementius imprimi, ut inferiori parti insidat. Si hæsit, curatio expleta est. Si subinde redit, eadem acu magis concidenda, & in plures partes dissipanda est: quæ singulæ & facilius conduntur, & minus late officiunt. Post hæc educenda acus recta est, imponendumque est lana molli exceptum ovi album, & supra, quod inflammationem coerceat, atque ita devinciendum.

Post hæc opus est quiete, abstinentia, lenium medicamentorum inunctionibus, cibo (qui postero die satis mature datur) primum liquido, ne maxillæ laborent; deinde, inflammatione finita, tali, qualis in vulneribus propositus est. Quibus, ut aqua quoque diutius bibatur, necessario accedit.

15. *De pituita oculorum.*

De pituitæ quoque tenuis cursu, qui oculos infestat, quatenus medicamentis agendum est, jam explicui. Nunc ad ea veniam, quæ curationem ex manu postulant. Animadvertimus autem, quibusdam nunquam siccescere oculos, sed semper humore tenui madere: quæ res aspritudinem continuat, ex levibus momentis inflammationes & lippitudines excitat, totam denique vitam hominis infestat. Idque in quibusdam nulla ope adjuvari potest, in quibusdam sanabile est. Quod primum discrimen nosse oportet, ut alteri succurratur, alteri manus non injiciatur.

Ac primum supervacua curatio est in his, qui ab infantibus id vitium habent, quia necessario mansurum est usque mortis diem. Deinde non necessaria etiam in his, quibus non multa, sed acris pituita est, siquidem manu nihil adjuvantur; medicamentis, & victus ratione, quæ crassiores pituitas reddit, ad sanitatem perveniunt. Lata etiam capita vix medicinæ patent. Tum interest, pituitam emittant venæ, quæ inter calvariam & cutem sunt, an quæ inter membranam cerebri & calvariam. Superiores fere per tempora oculos rigant; inferiores, per eas membranas, quæ ab oculis ad cerebrum tendunt. Potest autem adhiberi remedium his, quæ supra os fluunt; non potest his, quæ sub osse. Ac ne his quidem succurritur, quibus pituita utrinque descendit; quia levata altera parte, nihilominus altera infestat.

Quid sit autem, hac ratione cognoscitur. Rasocapite ea medicamenta, quibus in lippitudine pituita suspenditur, a superciliis usque ad verticem illini debent: si ficci oculi esse cœperunt, apparet per eas venas, quæ sub cute sunt, irrigari: si nihilominus madent, manifestum est sub osse descendere: si est humor, sed levior, duplex vitium est. Plurimi tamen ex laborantibus reperiuntur, quos superiores venæ exerceant; ideoque pluribus etiam opitulari licet. Idque non in Græcia tantummodo, sed in aliis quoque gentibus celebre est: adeo ut nulla medicinæ pars magis per nationes quasque exposita sit.

Reperti in Græcia sunt, qui novem lineis cutem

capitis inciderent : duabus in occipitio rectis ; una super eas transversa : dein duabus super aures , una inter eas item transversa , tribus inter verticem & frontem rectis. Reperti sunt , qui a vertice recta eas lineas ad tempora deducerent ; cognitisque , ex motu maxillarum , musculorum initiis , leviter super eos cutem inciderent , diductisque per retusos hamos oris , infererent linamenta , ut neque inter se cutis antiqui fines committerentur , & in medio caro increfceret , quæ venas , ex quibus humor ad oculos transfret , adstringeret. Quidam etiam atramento duas lineas duxerunt a media aure ad mediam alteram aurem ; deinde a naribus ad verticem : tum ubi lineæ committebantur , scalpello inciderunt ; & post , sanguine effuso , os ibidem adusserunt. Nihilominus autem & in temporibus , & inter frontem atque verticem eminentibus venis idem candens ferrum admoverunt.

Frequens curatio est , venas in temporibus adurere , quæ fere quidem in ejusmodi malo tument : sed tamen , ut inflentur magisque se ostendant , cervix ante modice deliganda est. Tenuibusque feramentis , & retusis venæ adurendæ ; donec in oculis pituitæ cursus conquiescat. Id enim signum est quasi excæcatorum itinerum , per quæ humor ferebatur.

Valentior tamen medicina est , ubi tenues conditæque venæ sunt , ideoque legi non possunt , eodem modo cervice deligata , retentoque ab ipso spiritu , quo magis venæ prodeant , atramento notare eas contra tempora , & inter verticem ac frontem : deinde cervice resoluta , qua notæ sunt , venas inci-

dere, & sanguinem mittere: ubi satis fluxit, tenuibus ferramentis adurere. contra tempora quidem, timide, ne subjecti muscoli, qui maxillas tenent, sentiant: inter frontem vero & verticem, vehementer, ut sic squama ab osse recedat.

Efficacior tamen etiamnum est Afrorum curatio, qui verticem usque ad os adurant sic, ut squamam remittat. Sed nihil melius est, quam quod in Gallia quoque Comata fit, ubi venas in temporibus & in superiore capitis parte legunt. Adusta quo modo curanda sint, jam explicui. Nunc illud adjicio: neque ut crustæ decidant, neque ut ulcus impleatur, adustis venis, esse properandum, ne vel sanguis erumpat, vel cito pus supprimatur; cum per hoc ficcescere eas partes opus sit, per illud exhauriri opus non sit. Si quando tamen sanguis eruperit, infrianda medicamenta esse, quæ sic sanguinem supprimant, ne adurant. Quemadmodum autem venæ deligendæ sint, quidque lectis his faciendum sit, cum venero ad crurum varices, dicam.

C A P U T V I I I.

De aurium morbis, qui manu & scalpello curantur.

VERUM ut oculi multiplicem curationem, etiam manus exigunt: sic in auribus admodum pauca sunt, quæ in hac medicinæ parte tractentur. Solet tamen evenire vel a prima natali die protinus, vel postea facta exulceratione, deinde per cicatricem aure repleta, ut foramen in ea nullum sit, ideo-

que audiendi usu careat. Quod ubi incidit, specillo tentandum est, altene id repletum, an in summo tantum glutinatum sit. Nam si alte est, prementi non cedit: si in summo, specillum protinus recipit. Illud attingi non oportet, ne sine effectus spe distentio oriatur nervorum, & ex ea mortis periculum sit: hoc facile curatur. Nam qua cavum esse debet, vel medicamentum aliquod imponendum est ex adurentibus, vel candente ferro aperiendum, vel etiam scalpello incidendum. Cumque id patefactum, & jam ulcus purum est, conjicienda eo pinna est, illita medicamento cicatricem inducente: circaque idem medicamentum dandum, ut cutis circa pinnam sanescat: quo fit, ut, ea remota, postea facultas audiendi sit.

At ubi aures, invito puta, perforatæ sunt, & offendunt, trajicere id cavum celeriter candente acufatis est, ut leniter ejus oræ exulcerentur; aut etiam adurente medicamento idem exulcerare: postea deinde imponere id quod purget; tum quod eum locum repleat, & sic cicatricem inducat. Quod si magnum id foramen est, sicut solet esse in his, qui majora pondera auribus gesserunt, incidere, quod superest, ad extremum oportet: supra deinde oras scalpello exulcerare, & postea suere, ac medicamentum, quo id glutinetur, imponere. Tertium est, si quid ibi curti est, sarcire. quæ res cum in labris quoque & naribus fieri possit, eandem etiam curationem habeat, simul explicanda est.

CAPUT IX.

Curta in auribus, labrisque ac naribus, quomodo faciri, & curari possint.

CURTA igitur in his tribus, si qua parte parva sunt, curari possunt: si qua majora sunt, aut non recipiunt curationem, aut ita per hanc deformantur, ut minus indecora ante fuerint. Atque in aure quidem & naribus deformitas sola timeri potest: in labris vero, si nimium contracta sunt, usus quoque necessarii jactura fit; quia minus facile & cibus assumitur, & sermo explicatur. Neque enim creatur ibi corpus; sed ex vicino adducitur. quod in levi mutatione, & nihil eripere, & fallere oculum potest; in magna non potest. Neque senile autem corpus, neque quod mali habitus est, neque in quo difficulter ulcera sanescunt, huic medicinæ idoneum est; quia nusquam aut celerius cancer occupat, aut difficilius tollitur.

Ratio curationis ejusmodi est: id quod curtatum est, in quadratum redigere; ab interioribus ejus angulis lineas transversas incidere, quæ citeriorem partem ab ulteriore ex toto diducant; deinde ea, quæ sic resolvimus, in unum adducere. Si non satis junguntur, ultra lineas, quas ante fecimus, alias duas lunatas, & ad plagam converfas immittere, quibus summa tantum cutis diducatur: sic enim fit, ut facilius, quod adducitur, sequi possit. quod non vi cogendum est; sed ita adducendum, ut ex facili subsequatur, & dimissum non multum recedat.

Interdum autem ab altera parte cutis haud omnino adducta deformem, quem reliquit locum, reddit. Hujusmodi loci altera pars incidenda, altera intacta habenda est. Ergo neque ex imis auribus, neque ex medio naso imisve narium partibus, neque ex angulis labrorum quidquam attrahere tentabimus. Utrunque autem petemus, si quid summis auribus, si quid imis aut mediis naribus, aut mediis labris deerit. Quæ tamen interdum etiam duobus locis curta esse consuerunt: sed eadem ratio curandi est. Si cartilago in eo, quod incisum est, eminet, excidenda est: neque enim aut glutinatur, aut acuto trajicitur. Neque longe tamen excidi debet, ne inter duas oras liberæ cutis utrinque coitus puris fieri possit. Tum junctæ oræ inter se suendæ sunt, utrinque cute apprehensa; & qua priores lineæ sunt, ea quoque futuræ injiciendæ sunt. Siccis locis, uti naribus, illita spuma argenti satis proficit. In ultiores vero, lunatasque plagas, linamentum dandum est; ut caro increscens vulnus impleat. Summaque cura, quod ita sutum est, tuendum esse, apparere ex eo potest, quod de cancro supra posui. Ergo etiam tertio quoque die fovendum erit vapore aquæ calidæ: rursusque idem medicamentum injiciendum. fereque septimo die glutinatum est. Tum futuræ eximi, & ulcus ad sanitatem perduci debet.

CAPUT X.

De polypo.

POLYPUM vero, qui in naribus nascitur, præcipue ferro curari jam alias posui. Ergo etiam hunc ferramento acuto, in modum spathæ facto, resolvere ab osse oportet: adhibita diligentia, ne infra cartilago lædatur; in qua difficilis curatio est. Ubi abscissus est, unco ferramento extrahendus est. Tum implicitum linamentum, vel aliquid ex penicillo respergendum est medicamento, quo sanguis supprimitur, eoque nares leniter implendæ. Sanguine suppresso, linamento vulnus purgandum est. Ubi purum est, eo pinna, eodem modo, quo in aure supra positum est, medicamento illita, quo cicatrix inducitur, intus demittenda, donec ex toto id sanescat.

CAPUT XI.

De oxæna.

ID autem vitium, quod ὀξάνα a Græcis vocatur, si medicamentis non cederet, quemadmodum manu curandum esset, apud magnos chirurgos non reperi. Credo, quia res raro ad sanitatem satis proficit; cum aliquod in ipsa curatione tormentum habeat. Apud quosdam tamen positum est, vel futilem fistulam, vel enodem scriptorium calamum in narem esse conjiciendum, donec sursum ad os perveniat: tum per id tenue ferramentum candens dandum esse ad ipsum os: deinde adustum locum purgandum esse

ærugine & melle : ubi purus est , lycio ad sanitatem perducendum. Vel narem incidendam esse ab ima parte ad os , ut & conspici locus possit , & facilius candens ferramentum admoveri. Tum sui narem debere ; & adustum quidem ulcus eadem ratione curari : futuram vero illini vel spuma argenti , vel alio glutinante.

C A P U T XII.

De oris vitiis , quæ manu & ferro curantur.

I. *De dentibus.*

IN ore quoque quædam manu curantur. Ubi inprimis dentes nonnunquam moventur , modo propter radicum imbecillitatem , modo propter gingivarum arescentium vitium. Oportet in utrolibet candens ferramentum gingivis admovere , ut leviter attingat , non ut insadat. Adustæ gingivæ melle illinendæ , & mulso eluendæ sunt. Ut pura ulcera esse cœperunt , arida medicamenta infrienda sunt ex his , quæ reprimunt.

Si vero dens dolores movet , eximique eum , quia medicamenta nihil adjuvant , placuit , circumradi debet , ut gingiva ab eo resolvatur ; tum is concutiendus est. Eademque facienda , donec bene moveatur ; nam dens hærens cum summo periculo evellitur , ac nonnunquam maxilla loco movetur. Idque etiam majore periculo in superioribus dentibus fit , quia potest tempora oculosve concutere. Tum , si fieri potest , manu ; si minus , forfice dens excipiendus est.

Ac si exesus est, ante id foramen vel linamento, vel bene accommodato plumbo replendum est, ne sub forfice confringatur. Recta vero forfex ducenda est, ne inflexis radicibus os rarum, cui dens inhæret, parte aliqua frangatur. Neque ideo nullum ejus rei periculum est; utique in dentibus brevibus, quæ fere longiores radices habent: sæpe enim forfex, cum dentem comprehendere non possit, aut frustra comprehendat, os gingivæ prehendit & frangit.

Protinus autem, ubi plus sanguinis profluit, scire licet, aliquid ex osse fractum esse. Ergo specillo conquirenda est testa, quæ recessit, & vulsella protrahenda est. Si non sequitur, incidi gingiva debet, donec labans ossis testa recipiatur. Quod si factum statim non est, indurescit extrinsecus maxilla, ut is hiare non possit. Foris imponendum calidum ex farina & fico cataplasma est, donec ibi pus moveatur: tum incidi gingiva debet. Pus quoque multum profluens, ossis fracti nota est. Itaque etiam tum id extrahi convenit. Nonnunquam etiam, eo læso, fissura fit. quæ eradi debet.

Dens autem scaber, qua parte niger est, radendus est, illinendusque rosæ flore contrito, cui gallæ quarta pars & altera myrrhæ sit adjecta: continendumque ore crebro vinum meracum. Atque in eo casu velandum caput, ambulatione multa, frictione capitis, cibo non acri utendum est.

At, si ex ictu vel alio casu aliqui labant dentes, auro cum his, qui bene hærent, vinciendi sunt; continendaque ore reprimentia, ut vinum, in quo malicorium decoctum, aut in quo galla candens

conjecta sit. Si quando etiam in pueris alter dens nascitur, quam prior excidat, is, qui cadere debuit, circumpurgandus & evellendus est; is, qui natus est in locum prioris, quotidie digito adurgendus, donec ad justam magnitudinem perveniat. Quotiescunque dente exempto radix relicta est, protinus ea quoque ad id facto forfice, quam *ρίζάραν* Græci vocant, eximenda est.

2. *De tonsillis induratis.*

Tonsillas autem, quæ post inflammationes induerunt, *ἀντιάδες* autem a Græcis appellantur, cum sub levi tunica sint, oportet digito circumradere & evellere: si ne sic quidem resolvuntur, hamulo excipere, & scalpello excidere: tum ulcus aceto eluere, & illinire vulnus medicamento, quo sanguis supprimatur.

3. *De uva.*

Uva, si cum inflammatione descendit, dolorique est, & subrubicundi coloris, præcidi sine periculo non potest: solet enim multum sanguinem effundere, itaque melius est iis uti, quæ alias proposita sunt. Si vero inflammatio quidem nulla est, nihilominus autem ea ultra justum modum a pituita deducta est, & tenuis, acuta, alba est, præcidi debet. itemque, si ima, livida & crassa; summa, tenuis est. Neque quidquam commodius est, quam vulsella prehendere, sub eaque, quod volumus, excidere. Neque enim ullum periculum est, ne plus minusve præcidatur: cum liceat tantum infra vulsellam relinquere, quantum inutile esse manifestum est; id-

que præcidere, quo longior uva est, quam esse naturaliter debet. Post curationem eadem facienda sunt, quæ in tonsillis proxime posui.

4. *De lingua.*

Lingua vero quibusdam cum subiecta parte a primo natali die iuncta est; qui ob id ne loqui quidem possunt. Horum extrema lingua vulsellis apprehendenda est, sub eaque membrana incidenda: magna cura habita, ne venæ, quæ juxta sunt, violentur, & profusione sanguinis noceant. Reliqua curatio vulneris in prioribus posita est. Et plerique quidem, ubi consanuerunt, loquuntur. Ego autem cognovi, qui, succisa lingua, cum abunde super dentes eam promeretur, non tamen loquendi facultatem consecutus est. Adeo in medicina etiam, ubi perpetuum est, quod fieri debet, non tamen perpetuum est id, quod sequi convenit.

5. *De abscessu sub lingua.*

Sub lingua quoque interdum aliquid abscedit; quod fere consistit in tunica, doloresque magnos movet. Quod, si exiguum est, incidi semel fatis est: si majus, summa cutis usque ad tunicam excidenda est: deinde utrinque oræ hamulis excipiendæ, & tunica, undique circumdata, liberanda est: magna diligentia per omnem curationem habita, ne qua major vena incidatur.

6. *De labris.*

Labra autem sæpe finduntur, eaque res habet

cum dolore etiam hanc molestiam, quod sermo prohibetur; qui subinde eas rimas cum dolore diducendo sanguinem citat. Sed has, si in summo sunt, medicamentis curare commodius est, quæ ad ulcera oris fiunt: si vero altius descenderunt, necessarium est tenui ferramento adurere. quod spathæ simile, quasi transcurrere, non imprimi debet. postea facienda eadem sunt, quæ in naribus adustis exposita sunt.

C A P U T XIII.

De cervicis vitio.

AT in cervice, inter cutem & asperam arteriam; tumor increscit (βρογχοκήλην Græci vocant) quo, modo caro hebes, modo humor aliquis, melli aquæve similis, includitur; interdum etiam minutis offibus pili immixti. Ex quibus quidquid est, quod tunica continetur, potest adurentibus medicamentis curari. Quibus summa cutis cum subiecta tunica exeditur. quo facto, siue humor est, profluit; siue quid densius, digitis educitur: tum ulcus sub linamentis fanescit. Sed scalpelli curatio brevior est. Medio tumore una linea inciditur usque ad tunicam: deinde vitiosus sinus ab integro corpore digito separatur, totusque cum velamento suo eximitur: tum aceto, cui vel salem vel nitrum aliquis adjecit, eluitur; oræque una futura junguntur: ceteraque eadem, quæ in aliis futuris, superinjiciuntur: leniter deinde, ne fauces urgeat, deligatur. Si quando autem tunica eximi non potuerit, intus in-

ſpergenda adurentia, linamentisque id curandum eſt, & ceteris pus moventibus.

C A P U T XIV.

De umbilici vitiis.

SUNT etiam circa umbilicum plura vitia; de quibus, propter raritatem, inter auctores parum conſtat. Veriſimile eſt autem, id a quoque prætermiſſum, quod ipſe non cognoverat; a nullo id, quod non viderat, fictum. Commune omnibus eſt, umbilicum indecore prominere. Cauſæ requiruntur? Meges tres has poſuit: modo inteſtinum eo irrumperere, modo omentum, modo humorém. Soſtratus nihil de omento dixit. Duobus iisdem adjecit, carnem ibi interdum increſcere; eamque modo integram eſſe, modo carcinomati ſimilem. Gorgias ipſe quoque omenti mentionem omiſit: ſed eadem tria cauſatus, ſpiritum quoque interdum eo dixit irrumperere. Heron, omnibus his quatuor poſitis, & omenti mentionem habuit, & ejus, quod ſimul & omentum & inteſtinum habuerit.

Quod autem horum ſit, his indiciis cognoscitur. Ubi inteſtinum prolapſum eſt, tumor neque durus, neque mollis eſt: omni frigore comminuitur; non ſolum ſub omni calore, ſed etiam retento ſpiritu creſcit: ſonat interdum; atque, ubi reſupinatus eſt aliquis, delapſo inteſtino, ipſe deſidit. Ubi vero omentum eſt, cetera ſimilia ſunt, tumor mollior, ab ima parte latus, extenuatus in verticem eſt; ſi quis apprehendit, elabitur. Ubi utrumque eſt, indi-

cia quoque mixta sunt, & inter utrumque mollities. At caro durior est, semperque, etiam resupinato corpore, tumet, prementique non cedit, prioribus facile cedentibus. Si vitiosa est, easdem notas habet, quas in carcinomate exposui. Humor autem, si premitur, circumfluit. At spiritus pressus cedit, sed protinus redit: resupinato quoque corpore tumorem in eadem figura tenet.

Ex his id, quod ex spiritu vitium est, medicinam non admittit. Caro quoque, carcinomati similis, cum periculo tractatur. itaque omittenda est. Sana excidi debet; idque vulnus linamentis curari. Humorem quidam vel inciso summo tumore effundunt, & vulnus iisdem linamentis curant. In reliquis variae sententiæ sunt. Ac resupinandum quidem corpus esse, res ipsa testatur; ut in uterum, sive intestinum, sive omentum est, relabatur. Sinus vero umbilici, tum vacuus, a quibusdam duabus regulis excipitur; vehementerque earum capitibus deligatis, ibi emoritur: a quibusdam ad imum acu trajectatur, duo lina ducente; deinde utriusque lini duobus capitibus diversæ partes adstringuntur, (quod in uva quoque oculi fit:) nam sic id, quod supra vinculum est, moritur. Adjecerunt quidam, ut, antequam vincirent, summum una linea inciderent exciderentque; quo facilius digito demisso, quod illuc irrupisset, depellerent: tum deinde vinxerunt. Sed abunde est, jubere spiritum continere, ut tumor, quantus maximus esse potest, se ostendat: tum imam basim ejus atramento notare; resupinatoque homine, digitis tumorem eum premere, ut, si quid

delapsum non est, manu cogatur : post hæc, umbilicum attrahere, &, qua nota atramenti est, lino vehementer adstringere : deinde partem superiorem aut medicamentis, aut ferro adurere, donec emoriatur : atque, ut cetera uita, ulcus nutrire. Idque non solum ubi intestinum, vel omentum, vel utrumque est, sed etiam, ubi humor est, optime proficit.

Sed ante quædam visenda sunt, ne quod ex vinculo periculum sit. Nam curationi neque infans, neque aut robustus annis, aut senex aptus est; sed a septimo fere anno ad quartum decimum. Deinde ei corpus idoneum est id, quod integrum est : at quod mali habitus est, quodque papulas, impetigines, similiaque habet, idoneum non est. Levibus quoque tumoribus facile subvenitur : at in eorum, qui nimis magni sunt, curatione periculum est. Tempus autem anni & autumnale, & hibernum vitandum est. Ver idoneum maxime est. Ac prima æstas non aliena est. Præter hæc, abstinere pridie debet. Neque id satis est : sed alvus quoque ei ducenda est; quo facilius omnia, quæ excesserunt, intra alvum confidant.

C A P U T XV.

Quomodo aqua hydropicis emittatur.

AQUAM his, qui hydropici sunt, emitti oportere, alias dixi. nunc, quemadmodum id fiat, dicendum est. Quidam autem sub umbilico, fere quatuor interpositis digitis a sinistra parte; quidam, ipso

umbilico perforato, id facere consuerunt: quidam, cute primum adusta, deinde interiore abdomine inciso; quia, quod per ignem divisum est, minus celeriter coit. Ferramentum autem demittitur, magna cura habita, ne qua vena incidatur. Id tale esse debet, ut fere tertiam digiti partem latitudo mucronis impleat; demittendumque ita est, ut membranam quoque transeat, qua caro ab interiore parte finitur: eo tum plumbea aut ænea fistula conjicienda est, vel recurvatis in exteriorem partem labris, vel in medio circumcingente quadam remora, ne tota intus delabi possit. Hujus ea pars, quæ intra, paulo longior esse debet, quam quæ extra; ut ultra interiorem membranam procedat. Per hanc effundendus humor est: atque ubi major pars ejus evocata est, cludenda demisso linteolo fistula est; & in vulnere, si id ustum non est, relinquenda. Deinde per infrequentes dies circa singulas heminas emittendum, donec nullum aquæ vestigium appareat. Quidam tamen etiam non usta cute, protinus fistulam recipiunt, & super vulnus spongiam expressam ex aqua frigida, vel ex aceto deligant: deinde postero die rursus fistulam demittunt (quod recens vulnus paulum diductum patitur) ut, si quid humoris superest, emittatur: idque bis ita fecisse contenti sunt.

CAPUT XVI.

De ventre ic̃tu perforato, & intestinis vulneratis.

NONNUNQUAM autem venter ic̃tu aliquo perforatur; sequiturque, ut intestina evolvantur. Quod ubi incidit, protinus considerandum est, an integra ea sint; deinde, an his color suus maneat. Si tenuius intestinum perforatum est, nihil profici posse, jam retuli. Latius intestinum sui potest: non quod certa fiducia sit; sed quod dubia spes, certa desperatione sit potior. interdum enim glutinatur. Tum, si utrumlibet intestinum lividum, aut pallidum, aut nigrum est, quibus illud quoque necessario accedit, ut sensu careat; medicina omnis inanis est. Si vero adhuc ea sui coloris sunt, cum magna festinatione succurrendum est: momento enim alienantur externo & insueto spiritu circumdata. Resupinandus autem homo est, coxis erectioribus; &, si angustius vulnus est, quam ut intestina commodè refundantur, incidendum est, donec satis pateat. Ac, si jam ficciora intestina sunt, perluenda aqua sunt, cui paulum admodum olei sit adjectum. Tum minister oras vulneris leviter diducere manibus suis, vel etiam duobus hamis, membranæ interiori injectis, debet: medicus priora semper intestina, quæ posteriora prolapsa sunt, condere sic, ut orbium singulorum locum servet. Repositis omnibus, leniter homo concutiendus est. quo fit, ut per se singula intestina in suas sedes diducantur, & inibi confidant. His conditis, omentum quoque consideran-

dum est : ex quo , si quid jam nigri & emortui est , forfice excidi debet : si quid integrum est , leniter super intestina diduci : futura autem , neque summæ cutis , neque interioris membranæ per se , satis proficit ; sed utriusque . Et quidem duobus linis vincienda est , spissior quam alibi ; quia & rumpi facilius motu ventris potest , & non æque magnis inflammationibus pars ea exposita est . Igitur in duas acus fila conjicienda , eæque duabus manibus tenendæ ; & prius interiori membranæ futura injicienda est sic , ut sinistra manus in dexteriore ora , dextra in sinisteriore a principio vulneris orsa , ab interiori parte in exteriorem acum immittat . quo fit , ut ab intestinis ea pars semper acuum longe sit , quæ acuta est . Semel utraque parte trajecta , permutandæ acus inter manus sunt , ut ea sit in dextra , quæ fuit in sinistra , ea veniat in sinistram , quam dextra continuit : iterumque eodem modo per oras immittendæ sunt : atque ita tertio & quarto , deincepsque permutatis inter manus acubus includenda plaga . Post hæc , eadem fila , eademque acus ad cutem transferendæ , similique ratione ei quoque parti utraque futura injicienda ; semper ab interiori parte acubus venientibus , semper inter manus trajectis . Dein glutinantia injicienda . Quibus aut spongiam , aut succidam lanam ex aceto expressam accedere debere , manifestius est , quam ut semper dicendum sit . Impositis his , leniter deligari venter debet .

CAPUT XVII.

De interiore membrana abdominis rupta.

INTERDUM tamen vel ex ictu aliquo, vel retento diutius spiritu, vel sub gravi fasce, interior abdominis membrana, superiore cute integra, rumpitur. Quod feminis quoque ex utero sæpe evenire consuevit: fitque præcipue circa ilia. Sequitur autem, cum superior caro mollis sit, ut non satis intestina contineat, hisque intenta cutis indecore intumescat. Atque id quoque aliter atque aliter curatur. Quidam enim per acum duobus linis ad imam basin immixtis sic utrinque devinciunt, quemadmodum & in umbilico, & in uva positum est, ut quidquid super vinculum est, emoriatur. Quidam medium tumorem excidunt, ad similitudinem myrtacei folii (quod semper eodem modo servandum esse, jam posui) & tum oras futura jungunt. Commodissimum est autem, resupinato corpore, experiri manu, qua parte is tumor maxime cedat, quia necesse est, ea parte rupta membrana sit; quaque integra est, ea magis obnitatur: tum, qua rupta videbitur, immittendæ scalpello duæ lineæ sunt, ut, exciso medio, interior membrana utrinque recentem plagam habeat; quia, quod vetus est, futura non coit. Loco patefacto, si qua parte membrana non novam plagam, sed veterem habet, tenuis excidenda habena est, quæ tantum oras ejus exulceret. Cetera, quæ ad futuræ reliquam curationem pertinent, supra comprehensa sunt.

2. *De varicibus ventris.*

Præter hæc evenit, ut in quorundam ventribus varices sint, quarum quia nulla alia curatio est, quam quæ in cruribus esse consuevit, tum eam partem explanaturus, hanc quoque eo differo.

CAPUT XVIII.

De testiculorum natura, & morbis.

VENIO autem ad ea, quæ in naturalibus partibus circa testiculos oriri solent. quæ quo facilius explicem, prius ipsius loci natura paucis proponenda est. Igitur testiculi simile quiddam medullis habent, nam sanguinem non emittunt, & omni sensu carent: dolent autem in ictibus & inflammationibus tunicæ, quibus hi continentur. Dependent vero ab inguinibus per singulos nervos, quos κρεμαστήρας Græci nominant, cum quorum utroque binæ descendunt & venæ & arteriæ. Hæc autem tunica conteguntur tenui, nervosa, sine sanguine, alba, quæ ἐλαιοειδής a Græcis nominatur. Super eam valentior tunica est, quæ interiori vehementer ima parte inhæret. δαρτόν Græci vocant. Multæ deinde membranulæ venas & arterias, eosque nervos comprehendunt, atque inter duas quoque tunicas superioribus partibus leves parvulæque sunt. Hactenus propria utrique testiculo & velamenta, & auxilia sunt. Communis deinde utrique, omnibusque interioribus sinus est, qui jam conspicitur a nobis. ὄσχεον Græci, scrotum nostri vocant. Isque ab ima parte

mediis tunicis leviter innexus, a superiore tantum circumdatus est.

Sub hoc igitur plura vitia esse consuerunt. quæ modo ruptis tunicis, quas ab inguinibus incipere proposui, modo his integris fiunt, siquidem interdum vel ex morbo primum inflammatur, deinde postea pondere abrumpitur, vel ex ictu aliquo protinus rumpitur tunica, quæ diducere ab inferioribus partibus intestina debuit. Tum pondere eo devolvitur, aut omentum, aut etiam intestinum: atque ibi reperta via, paulatim ab inguinibus in inferiores quoque partes missum, subinde nervosas tunicas, & ob id ejus rei patientes diducit. *ἐντεροκήλην* & *ἐπιπλοκήλην* Græci vocant: apud nos indecorum, sed commune his, herniæ nomen est.

Deinde, si descendit omentum, nunquam in scroto tumor tollitur, siue inedia fuit, siue corpus huc illucve conversum, aut aliquo modo collocatum: itemque, si retentus est spiritus, non magno-pere increscit, tactu vero inæqualis est, & mollis, & lubricus.

At si intestinum quoque descendit, tumor is sine inflammatione modo minuitur, modo increscit; estque fere sine dolore, &, cum conquiescit aliquis aut jacet, interdum ex toto desidit, interdum sic dividitur, ut in scroto exiguæ reliquiæ maneant: at sub clamore, & satietate, & si sub aliquo pondere is homo nixus est, crescit: frigore omni contrahitur, calore diffunditur; estque tum scrotum & rotundum, & tactu læve: idque, quod subest, lubricum est; si pressum est, ad inguen revertitur; di-

missumque, iterum cum quodam quasi murmure devolvitur. & id quidem in levioribus malis evenit. Nonnunquam autem stercore accepto vastius tumet, retroque compelli non potest: affertque tum dolorem & scroto, & inguinibus, & abdomini. Nonnunquam stomachus quoque affectus primum rufam bilem per os reddit, deinde viridem, quibusdam etiam nigram.

Integris vero membranis interdum eam partem humor dstringit. Atque ejus quoque species duæ sunt. Nam vel inter tunicas is increscit, vel in membranis, quæ ibi circa venas & arterias sunt, ubi hæ gravatæ occalluerunt. Ac ne ei quidem humori, qui inter tunicas est, una sedes est. Nam modo inter summam & mediam, modo inter mediam & imam consistit. Græci communi nomine, quidquid est, ὑδροκήλην appellant: nostri, ut scilicet nullis discriminibus satis cognitis, hæc quoque eodem nomine, quo priora, habent.

Signa autem quædam communia sunt, quædam propria. Communia, quibus humor deprehenditur: propria, quibus locus. Humorem subesse discimus, si tumor est, nunquam ex toto se remittens, sed interdum levior, aut propter famem, aut propter febriculam, maximeque in pueris: isque mollis est, si non nimius humor subest; at, si is vehementer increvit, renititur sicut uter repletus & arcte adstrictus: venæ quoque in scroto inflantur; &, si digito premimus, cedit humor, circumfluensque id, quod non premitur, attollit; & tanquam in vitro cornuve per scrotum apparet; isque, quantum in ipso

est, sine dolore est. Sedes autem ejus sic deprehenditur. Si inter summam mediamque tunicam est, cum digitis duobus premimus, paulatim humor inter eos revertens subit: scrotum remissius & albidius est; si ducitur, aut nihil, aut parvulum intenditur: testiculus ea parte neque visu, neque tactu sentitur. At, si sub media tunica est, intentum scrotum magis se attollit, adeo ut superior coles sub tumore eo delitescat.

Præter hæc æque integris tunicis ramex innascitur. *κισσοκήλην* Græci appellant. Venæ intumescunt; hæ quoque intortæ, conglomeratæque ad superiorem partem, vel ipsum scrotum implent, vel mediam tunicam, vel imam: interdum etiam sub ima tunica, circa ipsum testiculum nervumque ejus, crescunt. Ex his eæ, quæ in ipso scroto sunt, oculis patent: hæ vero, quæ mediæ imæve tunicæ insident, ut magis conditæ non æque quidem cernuntur, sed tamen etiam visui subiectæ sunt: præterquam quod & tumoris aliquid est, pro venarum magnitudine & modo; & id prementi magis renititur, ac per ipsos venarum toros inæquale est; &, qua parte id est, testiculus magis justo dependet. Cum vero etiam super ipsum testiculum nervumque ejus id malum increvit, aliquanto longius testiculus ipse descendit, minorque altero fit, utpote alimento amisso.

Raro, sed aliquando caro quoque inter tunicas increscit. *Σαρκοκήλην* Græci vocant.

Interdum etiam ex inflammatione tumet ipse testiculus, ac febres quoque affert; &, nisi celeriter

ea inflammatio conquievit, dolor ad inguina atque ilia pervenit; partesque hæ intumescunt, & nervus, ex quo testiculus dependet, plenior fit, simulque indurescit.

Super hæc, inguen quoque nonnunquam ramices implent. Βουβωνικήλην appellant.

C A P U T XIX.

De testiculorum curationibus communibus: & primo de incisione & curatione inguinis vel scroti.

HIS cognitis, de curatione dicendum est. In qua quædam communia omnium sunt, quædam propria singulorum. Prius de communibus dicam. Loquar autem nunc de his, quæ scalpellum desiderant, nam quæ vel sanari non possint, vel aliter nutriri debeant, dicendum erit, simul cum ad species singulas venero. Inciditur autem interdum inguen, interdum scrotum. In utraque curatione homo ante triduum bibere aquam; pridie abstinere etiam a cibo debet: ipso autem die collocari supinus: deinde, si inguen incidendum est, idque jam pube contegitur, ante radendum est: & tum, extento scroto, ut cutis inguinis intenta sit, id incidendum sub imo ventre, qua cum abdomine tunicæ inferiores committuntur. Aperendum autem audacter est, donec summa tunica, quæ ipsius scroti est, incidatur, perveniaturque ad eam, quæ media est. Plaga facta, foramen deorsum versus subest. In id demittendus est sinistræ manus digitus index, ut diductis interve-

nientibus membranulis, finum laxet. Minister autem, sinistra manu comprehenso scroto, sursum versus eum debet extendere, & quam maxime ab inguinibus abducere; primum cum ipso testiculo, dum medicus omnes membranulas, quæ super mediam tunicam sunt, si digito deducere non potest, scalpello abscidat: deinde sine eo, ut is delapsus ipsi plagæ jungatur, digitoque inde promatur, & super ventrem cum duabus suis tunicis collocetur. Inde, si qua vitiosa sunt, circumcidenda sunt. In quibus cum multæ venæ discurrant, tenuiores quidem præcidi protinus possunt; majores vero ante longiore lino deligandæ sunt, ne periculose sanguinem fundant.

Sin media tunica vexata erit, aut sub ea malum increverit, excidenda erit sic, ut alte ad ipsum inguen præcidatur. Infra tamen non tota demenda est: nam quod ad basin testiculi vehementer cum ima tunica connexum est, excidi sine summo periculo non potest. itaque ibi relinquendum est.

Idem in ima quoque tunica, si læsa est, faciendum est. Sed non a summa inguinis plaga, verum infra paulum ea abscidenda, ne, læsa abdominis membrana, inflammationes moveat. Neque tamen nimium ex ea sursum relinquendum est, ne postea sinuetur, & sedem eidem malo præstet.

Purgatus ita testiculus per ipsam plagam cum venis, & arteriis, & nervo suo leniter demittendus est; videndumque, ne sanguis in scrotum descendat, neve concretus aliquo loco maneat. Quæ ita fient, si venis vinciendo medicus prospexerit. Lina,

quibus capita earum continebuntur, extra plagam dependere debebunt. quæ, pure orto, sine ullo dolore excident. Ipsi autem plagæ injiciendæ duæ fibulæ sunt; & insuper medicamentum, quo glutinetur.

Solet interdum ab altera ora necessarium esse aliquid excidi, ut cicatrix major & latior fiat. Quod ubi incidit, linamenta super non fulcienda, sed leviter tantum ponenda sunt; supraque ea, quæ inflammationem repellant, id est, ex aceto vel lana succida, vel sponsia: cetera eadem, quæ, ubi pus moveri debet, adhibenda sunt.

At, cum infra incidi oportet, resupinato homine, subjicienda sub scroto sinistra manus est; deinde id vehementer apprehendendum, & incidendum; si parvulum est, quod nocet, modice, ut tertia pars integra, ad sustinendum testiculum, infra relinquitur: si majus est, etiam amplius, ut paulum tantummodo ad imum, cui testiculus insidere possit, integrum maneat. Sed primo rectus scalpellus quam levissima manu teneri debet, donec scrotum ipsum diducat, tum inclinandus mucro est, ut transversas membranas secet, quæ inter summam mediamque tunicam sunt. At, si vitium in proximo est, mediam tunicam attingi non oportet: si sub illa quoque conditur, etiam illa incidenda est; sicut tertia quoque, si illa vitium tegit. Ubicunque reperi-
tum malum est, ministrum ab inferiore parte exprimere moderate scrotum oportet: medicum, digito manubriolove scalpelli diductam inferiorem partem tunicæ extra collocare; deinde eam ferramento, quod a similitudine corvum vocant, incidere sic,

ut intrare duo digiti, index & medius possint. His deinde coniectis excipienda reliqua pars tunicæ, & inter digitos scalpellus immittendus est, eximendumque aut effundendum, quidquid est noxium.

Quamcunque autem tunicam quis violavit, illam quoque debet excidere; ac mediam quidem, ut supra dixi, quam altissime ab inguine; imam autem, paulo infra. Ceterum antequam excidantur, hæ quoque vinciri lino summe debent; & ejus lini capita extra plagam relinquenda sunt, sicut in aliis quoque venis, quæ id requisierint.

Eo facto, testiculus intus reponendus est: oræque scroti futuris inter se committendæ; neque paucis, ne parum glutinentur, & longior fiat curatio; neque multis, ne inflammationem augeant. Atque hic quoque videndum est, ne quid in scroto sanguinis maneat; tum imponenda glutinantia sunt.

Si quando autem in scrotum sanguis defluxit, aliquidve concretum ex eo decedit, incidi subter id debet; purgatoque eo spongia, acri aceto madens, circumdari. Deligatum autem vulnus omne, quod ex his causis factum est, si dolor nullus est, quinque primis diebus non est resolvendum, sed bis die tantum aceto irroranda lana vel spongia imposita: si dolor est, tertia die resolvendum; & ubi fibulæ sunt, hæ incidendæ; ubi linamentum, id mutandum est; rosaque & vino madefaciendum id, quod imponitur. Si inflammatio increscit, adjiciendum prioribus cataplasma ex lenticula & melle; vel ex malicorio, quod in austero vino coctum sit; vel ex his mixtis. Si sub his inflammatio non conquierit, post

diem quintum multa calida aqua vulnus fovendum, donec scrotum ipsum & extenuetur, & rugosius fiat: tum imponendum cataplasma ex triticea farina, cui resina pinea adjecta sit. quæ ipsa, si robustus curatur, ex aceto; si tener, ex melle coquenda sunt. Neque dubium est, quodcumque initium fuit, si magna inflammatio est, quin ea, quæ pus movent, imponenda sint.

Quod si pus in ipso scroto ortum est, paulum id incidi debet, ut exitus detur; linamentumque eatenus imponendum est, ut foramen tegat. Inflammatione finita, propter nervos propiore cataplasmate, dein cerato utendum est. Hæc proprie ad ejusmodi vulnera pertinent. Cetera, & in curatione, & in victu, similia his esse debent, quæ in alio quoque vulnerum genere præcepimus.

C A P U T XX.

De intestini in scrotum devoluti curatione.

HIS propositis ad singulas species veniendum est. Ac, si cui parvulo puero intestinum descendit, ante scalpellum experienda vinctura est. Fascia ejus rei causa fit, cui imo loco pila assuta est ex panniculis facta, quæ ad repellendum intestinum ipsi illi subjicitur: deinde reliqua fasciæ pars arcte circumdatur. sub quo sæpe & intus compellitur intestinum, & inter se tunicæ glutinantur. Rursus, si ætas processit, multumque intestini descendisse ex tumore magno patet, adjiciunturque dolor & vomitus,

(quæ ex stercore, & ex cruditate, eo delapso, fere accidunt) scalpellum adhiberi sine perniciæ non posse, manifestum est: levandum tantummodo malum, & per alias curationes extrahendum est.

Sanguis mitti ex brachio debet: deinde, si vires patiuntur, imperanda tridui abstinencia est; si minus, certe pro vi corporis quam longissima. Eodem vero tempore superhabendum cataplasma ex lini semine, quod ante aliquis ex mulso decoxerit. Post hæc, & farina hordeacea cum resina injicienda; & is demittendus in folium aquæ calidæ, cui oleum quoque adjectum sit; dandumque aliquid cibi lenis & calidi. Quidam etiam alvum ducunt. Id deducere aliquid in scrotum potest, educere ex eo non potest. Per ea vero, quæ supra scripta sunt, levato malo, si quando alias dolor reverterit, eadem erunt facienda.

Sine dolore quoque si multa intestina prolapsa sunt, secari supervacuum est: non quo excludi a scroto non possint (nisi tamen id inflammatio prohibuit) sed quo repulsa inguinibus immorentur, ibique tumorem excitent, atque ita fiat mali non finis, sed mutatio.

At in eo, quem scalpello curari oportebit, simul atque ad mediam tunicam vulnus in inguine factum pervenerit, duobus hamulis ea juxta ipsas oras apprehendi debebit, dum eductis omnibus membranulis medicus eam liberat. Neque enim nisi cum periculo læditur, quæ excidenda est; cum intestinum esse, nisi sub ea, non possit. Ubi diducta autem erit, ab inguine usque ad testiculum incidi debebit

fic, ne is ipse lædatur; tum excidi. Fere tamen hanc curationem puerilis ætas, & modicum malum recipit.

Sin vir robustus est, majusque id vitium est, extrahi testiculus non debet, sed in sua sede permanere. Id hoc modo fit. Inguen eadem ratione usque ad mediam tunicam scalpello aperitur; eaque tunica eodem modo duobus hamis excipitur sic, ut a ministro testiculus eatenus contineatur, ne per vulnus exeat: tum ea tunica deorsum versus scalpello inciditur; sub eaque index digitus sinistræ manus ad imum testiculum demittitur, eumque ad plagam compellit: deinde dextræ manus duo digiti, pollex atque index, venam & arteriam & nervum tunicamque eorum a superiore tunica diducunt. quod si aliquæ membranulæ prohibent, scalpello resolvuntur, donec ante oculos tota jam tunica sit. Excisis, quæ excidenda sunt, repositoque testiculo, ab ora quoque ejus vulneris, quod in inguine est, demenda habenula paulo latior est, quo major plaga sit, & plus creare carnis possit.

C A P U T XXI.

De omenti in scrotum prolapsi curatione.

AT si omentum descendit, eodem quidem modo, quo supra scriptum est, aperiendum inguen, diducendæque tunicæ sunt. Considerandum autem est, majorne ejus modus, an exiguus sit. Nam quod parvulum est, super inguen in alvum vel digito, vel averso specillo repellendum est: si plus est, sinere

oportet dependere, quantum ex utero prolapsum est; idque adurentibus medicamentis illinere, donec emoriatur & excidat. Quidam hic quoque duo lina acu trajiciunt, binisque singulorum capitibus diversas partes adstringunt, sub quo æque, sed tardius emoriatur. Adjicitur tamen hic quoque celeritati, si omentum super vinculum illinitur medicamentis, quæ sic exedunt, ne erodant. σνπτικὰ Græci vocant. Fuerunt etiam, qui omentum forfice præciderent. Quod in parvulo non est necessarium: si majus est, potest profusionem sanguinis facere; siquidem omentum quoque venis quibusdam, etiam majoribus illigatum est. Neque vero, si discisso ventre id, quod prolapsum est, forfice præciditur, cum & emortuum sit, & aliter tutius avelli non possit, inde huc exemplum transferendum est.

Vulnus autem curari, si relictum omentum est, futura debet: si id amplius fuit, & extra emortuum est, excisis oris, sicut supra propositum est.

2. *De herniæ aquosæ curatione.*

Si vero humor intus est, incidendum est: in pueris quidem, inguen; nisi in his quoque liquoris ejus major modus prohibet: in viris vero, & ubicunque multus humor subest, scrotum. Deinde, si inguen incisum est, eo protractis tunicis humor effundi debet: si scrotum, & sub hoc protinus vitium est, nihil aliud, quam humor est effundendus, abscindendæque membranæ sunt, si quæ eum continuerunt; deinde eluendum id ex aqua, quæ vel salem adjectum, vel nitrum habeat: si sub media, imave tu-

nica, totæ hæ extra scrotum collocandæ, excidendæque sunt.

C A P U T XXII.

Re ramicis curatione.

RAMEX autem, si super ipsum scrotum est, adurendus est tenuibus & acutis ferramentis, quæ ipsis venis infigantur; cum eo, ne amplius, quam has urant; maximeque, ubi inter se implicatæ glomerantur, eo ferrum id admovendum est; tum super farina ex aqua frigida subacta injicienda est; utendumque eo vinculo, quod idoneum esse ani curationibus posui: tertio die lenticula cum melle imponenda est: post, ejectis crustis, ulcera melle purganda, rosa implenda, & ad cicatricem aridis linamentis perducenda sunt. Quibus vero super mediam tunicam venæ tument, incidendum inguen est, atque tunica promovenda, ab eaque venæ digito vel manubriolo scalpelli separandæ. qua parte vero inhærebunt, & ab superiore & ab inferiore parte lino vincindæ; tum sub ipsis vinculis præcidendæ, reponendusque testiculus est. At, ubi supra tertiam tunicam ramex insedit, mediam excidi necesse est. Deinde, si duæ tresve venæ tument, & ita pars aliqua obsidetur, ut majore vitio vacet, idem faciendum, quod supra scriptum est; ut ab inguine, & a testiculo deligatæ venæ præcidantur, isque condatur. Sin totum id ramex obsederit, per plagam demittendûs digitus index erit, subjiciendusque venis sic, ut paulatim protrahat æque adducendo,

donec is testiculus par alteri fiat; tum fibulæ oris sic injiciendæ, ut simul eas quoque venas comprehendant. Id hoc modo fit. Acus ab exteriori parte oram vulneris perforat: tum non per ipsam venam, sed per membranam ejus immittitur, per eamque in alteram oram compellitur. Venæ vulnerari non debent, ne sanguinem fundant. Membrana semper inter has venas est, ac neque periculum affert, & filo comprehensas illas abunde tenet. itaque etiam satis est, duas fibulas esse. Tum venæ, quæcunque protractæ sunt in ipsum inguen, averso specillo compelli debent. Solvendi fibulas tempus, inflammatione finita, & purgato vulnere, est; ut una simul & oras & venas cicatrix devinciat.

Ubi vero inter imam tunicam & ipsum testiculum nervumque ejus ramex ortus est, una curatio est, quæ totum testiculum abscidit. Nam neque ad generationem quidquam is confert, & omnibus indecore, quibusdam etiam cum dolore dependet. Sed tum quoque inguen incidendum, media tunica promenda, atque excidenda est: idem in ima faciendum; nervusque, ex quo testiculus dependet, præcidendus. Post id venæ & arteriæ ad inguen lino deligandæ, & infra vinculum abscidendæ sunt.

CAPUT XXIII.

De carne, quæ inter tunicas testiculorum concrevit, & de nervo indurato.

CARO quoque, si quando inter tunicas concrevit, nihil dubii est, quin eximenda sit: sed id, ipso scroto inciso, fieri commodius est.

At, si nervus induruit, curari res neque manu, neque medicamento potest. Urgent enim febres ardentes; & aut virides, aut nigri vomitus: præter hæc, ingens sitis, & linguæ aspritudo; fereque a die tertio spumans bilis alvo cum rosione redditur. Atque neque assumi facile cibus, neque contineri potest: neque multo post extremæ partes frigescent, tremor oritur, manus sine ratione extenduntur; deinde in fronte frigidus sudor, eumque mors sequitur.

CAPUT XXIV.

De ramice inguinis.

UBI vero in ipso inguine ramex est, si tumor modicus est, semel incidi; si major, duabus lineis debet, ut medium excidatur: deinde, non extracto testiculo, sicut intestinis quoque prolapsis interdum fieri docui, colligendæ venæ, vinciendæque, ubi tunicis inhærebunt, & sub his nodis præcidendæ sunt. Neque quidquam novi curatio vulneris ejus requirit.

CAPUT XXV.

Ad tegendam glandem colis, si nuda est.

AB his ad ea transeundum est, quæ in cole ipso fiunt. In quo si glans nuda est, vultque aliquis eam decoris causa tegere, fieri potest: sed expeditius in puero, quam in viro; in eo, cui id naturale est, quam in eo, qui quarundam gentium more circumcissus est; in eo, cui glans parva juxtaque eam cutis spatiosior, brevis ipse coles est, quam in quo contraria his sunt. Curatio autem eorum, quibus id naturale est, ejusmodi est. Cutis circa glandem apprehenditur & extenditur, donec illam ipsam condat; ibique deligatur: deinde, juxta pubem, in orbem tergo inciditur, donec coles nudetur; magnæque cura cavetur, ne vel urinæ iter, vel venæ, quæ ibi sunt, incidantur. Eo facto, cutis ad vinculum inclinatur, nudaturque circa pubem velut circulus; eoque linamenta dantur, ut caro increascit & id impleat, satisque velamenti supra latitudo plagæ præstet. Sed, donec cicatrix sit, victum esse id debet; in medio tamen relicto exiguo urinæ itinere. At in eo, qui circumcissus est, sub circulo glandis scalpello diducenda cutis ab interiore cole est. Non ita dolet, quia, summo soluto, deduci deorsum usque ad pubem manu potest; neque ideo sanguis profluit. Resoluta autem cutis rursus extenditur ultra glandem: tum multa frigida aqua fovetur; emplastrumque circa datur, quod valenter inflammationem reprimat; proximisque diebus ut prope a fame victus

est, ne forte eam partem satietas excitet. Ubi jam sine inflammatione est, deligari debet a pube usque circulum: super glandem autem, averso emplastro imposito induci. sic enim fit, ut inferior pars glutinetur; superior ita sanescat, ne inhæreat.

2. *Quomodo glans penis contacta aperiri possit.*

Contra, si glans ita contacta est, ut nudari non possit (quod vitium Græci φίμωσις appellant) aperienda est. Quod hoc modo fit. Subter a summa ora cutis inciditur recta linea usque ad frenum; atque ita superius tergus relaxatum, cedere retro potest. Quod si parum sic profectum est, aut propter angustias, aut propter duritiem tergoris, protinus triangula forma cutis ab inferiore parte excidenda est sic, ut vertex ejus ad frenum, basis in tergo extremo sit. Tum superdanda linamenta sunt, aliaque medicamenta, quæ ad sanitatem perducant. Necessarium autem est, donec cicatrix sit, conquiescere: nam ambulatio, atterendo ulcus sordidum reddit.

3. *Infibulandi ratio.*

Infibulare quoque adolescentulos, interdum vocis, interdum valetudinis causa quidam consueverunt: ejusque hæc ratio est. Cutis, quæ super glandem est, extenditur, notaturque utrinque a lateribus atramento, qua perforetur; deinde remittitur. Si super glandem notæ revertuntur, nimis apprehensum est, & ultra notari debet: si glans ab his libera est, is locus idoneus fibulæ est. Tum, qua notæ sunt, cutis acu filum ducente tranfuitur, ejusque fili capita in-

ter se deligantur, quotidieque id movetur, donec circa foramina cicatriculæ fiant. Ubi hæ confirmatæ sunt, exempto filo fibula additur, quæ, quo levior, eo melior est. Sed hoc quidem sæpius inter supervacua, quam inter necessaria est.

C A P U T XXVI.

De urinæ reddendæ difficultate, & curatione.

RES vero interdum cogit emoliri manu urinam; cum illa non redditur; aut quia senectute iter ejus collapsum est, aut quia calculus, vel concretum aliquid ex sanguine intus se opposuit: ac mediocris quoque inflammatio sæpe eam reddi naturaliter prohibet. Idque non in viris tantummodo, sed in feminis quoque interdum necessarium est. Ergo æneæ fistulæ fiunt: quæ ut omni corpori, ampliori mino-rique sufficiant, ad mares, tres; ad feminas, duæ medico habendæ sunt. Ex virilibus maxima decem & quinque est digitorum; media, duodecim; minima, novem: ex muliebribus major, novem; minor, sex. Incurvas vero esse eas paulum, sed magis viriles oportet, lævesque admodum; ac neque nimis plenas, neque nimis tenues.

Homo tum resupinus eo modo, quo in curatione ani figuratur, super subsellium aut lectum collocandus est. Medicus autem a dextro latere, sinistra quidem manu colem masculi continere, dextra vero fistulam demittere in iter urinæ debet: atque ubi ad cervicem vesicæ ventum est, simul cum cole fistu-

lam inclinatam in ipsam vesicam compellere, eamque, urina reddita, recipere. Femina brevius urinæ similiter & rectius iter habet, quod mammulæ simile, inter imas oras super naturale positum, non minus sæpe auxilio eget, aliquanto minus difficultatis exhibet.

Nonnunquam etiam prolapsus in ipsam fistulam calculus, quia subinde ea extenuatur, non longe ab exitu inhærescit. Eum, si fieri potest, oportet velle-re, vel oriculario specillo, vel eo ferramento, quo in sectione calculus protrahitur. Si id fieri non potuit, cutis extrema quamplurimum attrahenda, & condita glande, lino vincienda est: deinde a latere recta plaga coles incidendus, & calculus eximendus est: tum cutis remittenda. sic enim fit, ut incisum colem integra pars cutis contegat, & urina naturaliter profluat.

2. *Calculosis quæ curatio adhibeatur.*

Cum vesicæ vero, calculique facta mentio sit, locus ipse exigere videtur, ut subjiciam, quæ curatio calculosis, cum aliter succurri non potest, adhibeatur. Ad quam festinare, cum præceps sit, nullo modo convenit. Ac neque omni tempore, neque in omni ætate, neque in omni vitio id experiendum est: sed solo vere, in eo corpore, quod jam novem annos, nondum quatuordecim excessit; &, si tantum mali subest, ut neque medicamentis vinci possit, neque etiam trahi posse videatur, quo minus interposito aliquo spatio interimat. non quo non interdum etiam temeraria medicina proficiat; sed

quo sæpius utique in hoc fallat, in quo plura & genera & tempora periculi sunt. quæ simul cum ipsa curatione proponam.

Igitur, ubi ultima experiri statutum est, ante aliquot diebus victu corpus præparandum est; ut modicos, ut salubres cibos, ut minime glutinosos assumat, ut aquam bibat. Ambulandi vero inter hæc exercitatione utatur, quo magis calculus ad vesicæ cervicem descendat. Quod an inciderit, digitis quoque, sicut in curatione docebo, demissis cognoscitur. Ubi ejus rei fides est, pridie is puer in jejunio continendus; & tum loco calido curatio adhibenda, quæ hoc modo ordinatur.

Homo praevalens & peritus in sedili alto confidit, supinumque eum & aversum, super genua sua coxis ejus collocatis, comprehendit; reductisque ejus cruribus, ipsum quoque jubet, manibus ad suos poplites datis, eos, quam maxime possit, attrahere; simulque ipse sic eos continet. Quod si robustius corpus ejus est, qui curatur, duobus sedilibus junctis, duo valentes insidunt: quorum & sedilia & interiora crura inter se deligantur, ne diduci possint. Tum is super duorum genua eodem modo collocatur; atque alter, prout consedit, sinistrum crus ejus, alter dextrum, simulque ipse poplites suos attrahit. Sive autem unus, sive duo continent, super humeros ejus suis pectoribus incumbunt. Ex quibus evenit, ut inter ilia sinus super pubem sine ullis rugis sit extentus, & in angustum compulsa vesica, facilius calculus capi possit. Præter hæc, etiamnum a lateribus duo valen-

tes objiciuntur, qui circumstantes, labare vel unum vel duos, qui puerum continent, non sinunt.

Medicus deinde, diligenter unguibus circumcisis, sinistrae manus duos digitos, indicem & medium, leniter prius unum, deinde alterum in anum ejus demittit; dextræque digitos super imum abdomen leniter imponit; ne, si utrinque digiti circa calculum vehementer concurrerint, vesicam lædant. Neque vero festinanter in hac re, ut in ple-risque, agendum est; sed ita, ut quam maxime id tuto fiat. nam læsa vesica nervorum distentiones cum periculo mortis excitat. Ac primum circa cervicem quæritur calculus. Ibi repertus, minore negotio expellitur. Et ideo dixi, ne curandum quidem, nisi cum hoc indiciis suis cognitum est. Si vero aut ibi non fuit, aut recessit retro, digiti ad ultimam vesicam dantur; paulatimque dextra quoque manus ejus ultra translata subsequitur.

Atque, ubi repertus est calculus (qui necesse est in manus incidat) eo curiosius deducitur, quo minor læviorque est; ne effugiat, id est, ne sæpius agitanda vesica sit. Ergo ultra calculum dextra semper manus ei se opponit; sinistrae digiti deorsum eum compellunt, donec ad cervicem pervenitur. In quam, si oblongus est, sic compellendus est, ut pronus exeat: si planus, sic, ut transversus sit: si quadratus, ut duobus angulis sedeat: si altera parte plenior, sic, ut prius ea, qua tenuior sit, evadat. In rotundo nihil interesse, ex ipsa figura patet; nisi, si lævior altera parte est, ut ea antecedit.

Cum jam eo venit, incidi super vesicæ cervi-

cem juxta anum cutis plaga lunata usque ad cervicem vesicæ debet, cornibus ad coxas spectantibus paulum: deinde ea parte, qua refima plaga est, etiamnum sub cute, altera transversa plaga facienda est, qua cervix aperiatur; donec urinæ iter pateat sic, ut plaga paulo major, quam calculus sit. Nam, qui metu fistulæ (quam illo loco οὐροσπύδα Græci vocant) parum patefaciunt, cum majore periculo eodem revolvuntur: quia calculus iter, cum vi promitur, facit, nisi accipit. idque etiam perniciosius est, si figura quoque calculi, vel aspritudo aliquid eo contulit. Ex quo & sanguinis profusio, & distentio nervorum fieri potest. quæ si quis evasit, multo tamen patientiorem fistulam habiturus est rupta cervice, quam habuisset, incisa.

Cum vero patefacta est, in conspectum calculus venit: in cujus corpore multum discrimen est. Ipse, si exiguus est, digitis ab altera parte propelli, ab altera protrahi potest. Si major, injiciendus a superiore ei parte uncus est, ejus rei causa factus. Is est ad extremum tenuis, in semicirculi speciem retusæ latitudinis; ab exteriori parte lævis, qua corpori jungitur, ab interiori asper, qua calculum attingit. Isque longior potius esse debet: nam brevis extrahendi vim non habet. Ubi injectus est, in utrumque latus inclinandus est, ut appareat calculus, & teneatur; quia, si apprehensus est, ille simul inclinatur. Idque eo nomine opus est, ne, cum adduci uncus cœperit, calculus intus effugiat, hic in oram vulneris incidat, eamque convulneret. In qua re, quod periculum esset, jam supra proposui.

Ubi satis teneri calculum patet, eodem pæne momento triplex motus adhibendus est: in utrumque latus; deinde extra, sic tamen, ut leniter id fiat, paulumque primo calculus attrahatur: quo facto, attollendus uncus extremus est, uti intus magis maneat, faciliusque illum producat. Quod si aliquando a superiore parte calculus parum commode comprehenditur, a latere erit apprehendendus. Hæc est simplicissima curatio.

Sed varietas rerum quasdam etiamnum animadversiones desiderat. Sunt enim quidam non asperitantummodo, sed spinosi quoque calculi, qui per se quidem delapsi in cervicem, sine ullo periculo eximuntur. In vesica vero, non tuto vel hi conquiruntur, vel attrahuntur: quoniam, ubi illam convulnerant, ex distentione nervorum mortem maturan; multoque magis, si spina aliqua vesicæ inhæret, eamque, cum duceretur, duplicavit. Colligitur autem eo, quod difficilius urina redditur, in cervice calculum esse; eo, quod cruenta destillat, illum esse spinosum: maximeque id sub digitis quoque experiendum est, neque adhibenda manus, nisi id constitit. Ac tum quoque leniter intus digiti objiciendi, ne violenter promovendo convulnerent: tum incidendum. Multi hic quoque scalpello usi sunt. Meges (quoniam is infirmior est, potestque in aliqua prominentia incidere, incisoque super illam corpore, qua cavum subest, non secare, sed relinquere, quod iterum incidi necesse sit) feramentum fecit rectum, in summa parte labrosum, in ima semicirculatum acutumque. Id receptum in-

ter duos digitos, indicem ac medium, super pollice imposito sic deprimebat, ut simul cum carne, si quid ex calculo prominebat, incideret. Quo con-
sequebatur, ut semel, quantum satis esset, aperiret. Quocunque autem modo cervix ea patefacta est, leniter extrahi, quod asperum est, debet; nulla, propter festinationem, vi admota.

3. *Signa calculorum, vel arenosorum, vel mollium.*

At calculus arenosus, & ante manifestus est, quoniam & urina, quæ redditur, arenosa est: & in ipsa curatione, quoniam inter subjectos digitos neque æque, sed leniter renititur, & insuper dilabitur. Item molles calculos, & ex pluribus minutisque, sed inter se parum adstrictis, compositos indicat urina, secum trahens quasdam quasi squamulas. Hos omnes, leniter permutatis subinde digitorum vicibus, sic oportet abducere, ne vesicam lædant, neve intus aliquæ dissipatæ reliquæ maneat, quæ postmodum curationi difficultatem faciant. Quidquid autem ex his in conspectum venit, vel digitis, vel unco eximendum est.

At, si plures calculi sunt, singuli protrahi debent; sic tamen, ut, si quis exiguus supererit, potius relinquatur. Siquidem in vesica difficulter invenitur; inventusque celeriter effugit. Ita longa inquisitione vesica læditur, excitatque inflammationes mortiferas, adeo ut quidam secti, cum diu frustra-
que per digitos vesica esset agitata, decesserint. Quibus accedit etiam, quod exiguus calculus, ad plagam urina postea promovente, excidit.

Si quando autem is major non videtur, nisi rupta cervice, extrahi posse, findendus est. cujus repertor Ammonius ob id λιδοτόμος cognominatus est. Id hoc modo fit. Uncus injicitur calculo sic, ut facile eum concussum quoque teneat, ne is retro revolvatur: tum ferramentum adhibetur crassitudinis modicæ, prima parte tenui, sed retusa, quod admotum calculo, & ex altera parte ictum, findat; magna cura habita, ne aut ad ipsam vesicam ferramentum perveniat, aut calculi fractura quid incidat.

4. *De calculis feminarum.*

Hæ vero curationes in feminis quoque similes sunt; de quibus parum, proprie tamen quædam dicenda sunt. Siquidem in his, ubi parvulus calculus est, scalpellus supervacuuus est; quia is urina in cervicem compellitur, quæ & brevior, quam in maribus, & laxior est. Ergo & per se sæpe excidit, & si in primo, quod est angustius, inhæret, eodem tamen unco sine ulla noxa educitur. At in majoribus calculis necessaria eadem curatio est. Sed virgini subjici digiti tanquam masculo, mulieri per naturalia ejus debent. Tum, virgini quidem, sub ima sinisteriore ora; mulieri vero, inter urinæ iter & os pubis, incidendum est sic, ut utroque loco plaga transversa sit. neque terreri convenit, si plus ex muliebri corpore sanguinis profluit.

5. *Quæ curatio calculo evulso habenda sit.*

Calculo evulso, si valens corpus est, neque magnopere vexatum, sinere oportet sanguinem flue-

re, quo minor inflammatio oriatur. Atque, ingredi quoque eum paulum, non alienum est, ut excidat, si quid intus concreti sanguinis mansit. Quod si per se non destitit, rursus, ne vis omnis intereat, supprimi debet. Idque protinus, in imbecillioribus, ab ipsa curatione faciendum est. Siquidem, ut distentione nervorum periclitatur aliquis, dum vesica ejus agitur; sic alter metus excipit, remotis medicaminibus, ne tantum sanguinis profluat, ut occidat. Quod ne incidat, desidere is debet in acre acetum, cui aliquantum salis sit adjectum. sub quo & sanguis fere conquiescit, & adstringitur vesica, ideoque minus inflammatur. Quod si parum proficit, agglutinanda cucurbitula est, & inguinibus, & coxis, & super pubem.

Ubi jam satis vel evocatus est sanguis, vel prohibitus, resupinus collocandus est sic, ut caput humile sit, coxæ paulum excitentur: ac super vulnus imponendum est duplex aut triplex linteolum, aceto madens. Deinde, interpositis duabus horis, in solium is aquae calidæ resupinus demittendus est sic, ut a genibus ad umbilicum aqua teneat, cetera vestimentis circumdata sint; manibus tantummodo pedibusque nudatis, ut & minus digeratur, & ibi diutius maneat. Ex quo sudor multus oriri solet: qui spongia subinde in facie detergendus est. Finisque ejus fomenti est, donec infirmando offendat. Tum multo is oleo perungendus, induendusque hapsus lanæ mollis, tepido oleo repletus, qui pubem, & coxas, & inguina, & plagam ipsam, contactam eodem ante se linteolo, protegat: isque

subinde oleo tepido madefaciendus est, ut neque frigus ad vesicam admittat, & nervos leniter molliat. Quidam cataplasmatibus calefacientibus utuntur. Ea plus pondere nocent, atque vesicam urgendo vulnus irritant, quam calore proficiunt. Ergo ne vinculum quidem ullum necessarium est.

Proximo die, si spiritus difficiliter redditur, si urina non excedit, si locus circa pubem mature intumuit, scire licet, in vesica sanguinem concretum remansisse. Igitur, demissis eodem modo digitis, leniter pertractanda vesica est, & discutienda, si qua coierunt: quo fit, ut per vulnus postea procedant. Non alienum etiam est, oriculario clystere acetum nitro mixtum per plagam in vesicam compellere. nam sic quoque discutiuntur, si qua cruenta coierunt. Eaque facere etiam primo die convenit, si timemus, ne quid intus sit: maximeque, ubi ambulando id elicere imbecillitas prohibuit. Cetera eadem facienda sunt: ut demittatur in solium, ut eodem modo panniculus, eodem lana superinji-ciatur.

Sed neque sæpe, neque tamdiu in aqua calida puer habendus, quam adolescens est; infirmus, quam valens; levi, quam graviore inflammatione affectus; is, cujus corpus digeritur, quam is, cujus adstrictum est. Inter hæc vero, si somnus est, & æqualis spiritus, & madens lingua, & fitis modica, & venter imus sedet, & mediocris est cum febre modica dolor, scire licet, recte procedere curationem.

Atque in his inflammatio fere quinto vel septimo die finitur: qua levata, solium supervacuum

est. supini tantummodo vulnus aqua calida foven-
dum est, ut, si quid urinæ rodit, abluatur. Im-
ponenda autem medicamenta sunt pus moventia ;
& , si purgandum ulcus videbitur, melle linendum.
Id, si rodet, rosa temperabitur. Huic curationi
aptissimum videbitur *έννευφάρμακον* emplastrum. nam
& sebum habet ad pus movendum, & mel ad ul-
cus repurgandum : medullam etiam, maximeque vi-
tulinam : quæ in id, ne fistula relinquatur, præci-
pue proficit. Linamenta vero tum super ulcus non
sunt necessaria ; super medicamentum, ad id conti-
nendum, recte imponuntur. At, ubi ulcus purga-
tum est, puro linamento ad cicatricem perducen-
dum est.

Quibus temporibus tamen, si felix curatio non
fuit, varia circa pericula oriuntur. Quæ præfagire
protinus licet, si continua vigilia est, si spiritus dif-
ficultas, si lingua arida est, si sitis vehemens, si ven-
ter imus tumet, si vulnus hiat, si transfluens urina
id non rodit, si similiter ante tertium diem quæ-
dam livida excidunt, si is aut nihil, aut tarde re-
spondet, si vehementes dolores sunt, si post diem
quintum magnæ febres urgent, & fastidium cibi
permanet, si cubare in ventrem jucundius est. Ni-
hil tamen pejus est distentione nervorum, & ante
nonum diem vomitu bilis. Sed cum inflammationis
sit metus, succurri abstinentia, modicis & tempe-
stivis cibis ; inter hæc, fomentis, & quibus supra
scripsimus, oportet.

CAPUT XXVII.

De cancro, qui incisa vesica nascitur.

PROXIMUS canceri metus est. Is cognoscitur, si, & per vulnus, & per ipsum colem, fluit sanies mali odoris, cumque ea quædam a concreto sanguine non abhorrentia, tenuesque carunculæ lanulis similes. præter hæc, si oræ vulneris aridæ sunt, si dolent inguina, si febris non desinit, eaque in noctem augetur, si inordinati horrores accedunt. Considerandum autem est, in quam partem cancer is tendat. Si ad colem, indurescit is locus, & rubet, & tactu dolorem excitat, testiculique intumescunt: si in ipsam vesicam, ani dolor sequitur, coxæ durescunt, non facile crura extendi possunt: at, si in alterutrum latus, oculis id expositum est, paresque utrinque easdem notas, sed minores, habet.

Primum autem ad rem pertinet corpus recte jacere, ut superior pars semper eadem sit, in quam vitium fertur. Ita, si ad colem it, supinus is collocari debet: si ad vesicam, in ventrem: si in latus, in id, quod integrius est. Deinde, ubi ventum fuerit ad curationem, homo in aquam demittetur, in qua marrubium decoctum sit, aut cupressus, aut myrtus; idemque humor clystere intus adiget: tum superponetur lenticula cum malicorio mixta; quæ utraque ex vino decocta sint; vel rubus, aut oleæ folia, eodem modo decocta; aliaque medicamenta, quæ ad cohibendos purgandosque cancos

proposuimus. ex quibus, si qua erunt arida, per scriptorium calamum inspirabuntur.

Ubi stare coeperit cancer, mulso vulnus eluetur: vitabiturque eo tempore ceratum; quod, ad recipiendum id malum, corpus emollit. potius plumbum elotum cum vino inungetur: super quæ idem linteolo illitum imponetur. Sub quibus perveniri ad sanitatem potest: cum eo tamen, ut non ignoremus, orto cancro sæpe affici stomachum, cui cum vesica quoddam consortium est: exque eo fieri, ut neque retineatur cibus, neque, si quis retentus est, concoquatur, neque corpus alatur: ideoque ne vulnus quidem aut purgari, aut ali possit. quæ necessario mortem maturant.

Sed ut his succurri nullo modo potest; sic a primo tamen die tenenda ratio curationis est. In qua quædam observatio, ad cibum quoque potionemque pertinens, necessaria est. Nam cibus inter principia, non nisi humidus dari debet: ubi ulcus purgatum est, ex media materia. olera & falsamenta semper aliena sunt. Potione opus est, non immodica. Nam, si parum bibitur, accenditur vulnus, & vigilia urget, & vis corporis minuitur: si plus æquo assumitur, subinde vesica impletur, eoque irritatur. Non nisi aquam autem bibendam esse, manifestius est, quam ut subinde dicendum sit.

Solet vero sub ejusmodi victu evenire, ut alvus non reddatur. Hæc aqua ducenda est, in qua vel foenum Græcum, vel malva decocta sit. Idem humor rosa mixtus in ipsum vulnus oriculario clystere agendus est, ubi id rodit urina, neque purgari

patitur. Fere vero primo per vulnus exit hæc : deinde , eo sanefcente , dividitur , & pars per colem descendere incipit , donec ex toto plaga claudatur. Quod interdum tertio mense , interdum non ante sextum , nonnunquam exacto quoque anno fit.

Neque desperari debet solida glutinatio vulneris , nisi ubi aut vehementer rupta cervix est , aut ex cancro multæ magnæque carunculæ , simulque nervosa aliqua exciderunt. Sed , ut vel nulla ibi fistula , vel exigua admodum relinquatur , summa cura providendum est. Ergo , cum jam ad cicatricem vulnus tendit , extentis jacere feminibus & cruribus oportet ; nisi tamen molles arenosive calculi fuerunt : sub his enim tardius vesica purgatur. Ideoque , diutius plagam patere , necessarium est : & tum demum , ubi jam nihil tale extra fertur , ad cicatricem perducitur.

Quod si , antequam vesica purgata est , oræ se glutinarunt , dolorque & inflammatio redierunt , vulnus digitis vel averso specillo diducendum est ; ut torquentibus exitus detur. Hisque effusis , cum diutius pura urina descendit , tum demum , quæ cicatricem inducant , imponenda sunt , extendendique , ut supra docui , pedes , quam maxime vincti.

Quod si fistulæ metus ex his causis , quas proposui , subesse videbitur , quo facilius claudatur ea , vel certe coangustetur , in anum quoque danda plumbea fistula est ; extentisque cruribus femina talique inter se deliganda sunt , donec , qualis futura est , cicatrix sit.

CAPUT XXVIII.

*Si naturalia feminarum non admittunt concubitus;
quomodo curari conveniat.*

ET hoc quidem commune esse maribus & feminis potest. Proprie vero quædam ad feminas pertinent: ut inprimis, quod earum naturalia nonnunquam, inter se glutinatis oris, concubitus non admittunt. Idque interdum evenit protinus in utero matris: interdum exulceratione in his partibus facta, & per malam curationem his oris fanescendo junctis. Si ex utero est, membrana ori vulvæ opposita est: si ex ulcere, caro id replevit.

Oportet autem membranam duabus lineis, inter se transversis, incidere ad similitudinem literæ X; magna cura habita, ne urinæ iter violetur; deinde undique eam membranam excidere. At, si caro increvit, necessarium est recta linea patefacere: tum ab ora vel vulsella, vel hamo apprehensam, tanquam habenulam, excidere: & intus implicitum in longitudinem linamentum (*λημνίσκον* Græci vocant) in aceto tinctum demittere, supraque succidam lanam aceto madentem deligare: tertio die solvere, & vulnus, sicut alia vulnera, curare. Cumque jam ad sanitatem tendet, plumbeam fistulam medicamento cicatricem inducente illinere, eamque intus dare: supraque idem medicamentum injicere, donec ad cicatricem plaga perveniat.

CAPUT XXIX.

Qua ratione partus emortuus ex utero excutiat.

UBI concepit autem aliqua, si jam prope maturus partus intus emortuus est, neque excidere per se potest, adhibenda curatio est. Quæ numerari inter difficillimas potest. nam & summam prudentiam moderationemque desiderat, & maximum periculum affert. Sed ante omnia vulvæ natura mirabilis, cum in multis aliis, tum in hac re quoque facile cognoscitur.

Oportet autem ante omnia resupinam mulierem transverso lecto sic collocare, ut feminibus ejus ipsius ilia comprimantur. quo fit, ut & imus venter in conspectu medici sit, & infans ad os vulvæ compellatur: quæ, emortuo partu, id comprimit; ex intervallo vero paulum dehiscit. Hac occasione usus medicus, unctæ manus indicem digitum primum debet inferere, atque ibi continere, donec iterum id os aperiatur, rursusque alterum digitum demittere debebit, & per easdem occasiones alios, donec tota esse intus manus possit. Ad cujus rei facultatem multum confert & magnitudo vulvæ, & vis nervorum ejus, & corporis totius habitus, & mentis etiam robur; cum præsertim intus nonnunquam etiam duæ manus dari debeant.

Pertinet etiam ad rem, quam calidissimum esse imum ventrem, & extrema corporis; neque dum inflammationem coepisse, sed recenti re protinus adhi-

beri medicinam. Nam, si corpus jam intumuit, neque demitti manus, neque educi infans, nisi ægerime potest; sequiturque sæpe cum vomitu, & cum tremore, mortifera nervorum distentio. Verum intus emortuo corpori manus injecta protinus habitum ejus sentit. nam aut in caput, aut in pedes conversum est, aut in transversum jacet: fere tamen sic, ut vel manus ejus, vel pes in propinquo sit.

Medici vero propositum est, ut infantem manu dirigat vel in caput, vel etiam in pedes, si forte aliter compositus est. Ac, si nihil aliud est, manus vel pes apprehensus, corpus rectius reddit. nam manus in caput, pes in pedes eum convertet. Tum, si caput proximum est, demitti debet uncus, undique lævis, acuminis brevis, qui vel oculo, vel auri, vel ori, interdum etiam fronti recte injicitur: deinde attractus infantem educit. Neque tamen quolibet is tempore extrahi debet. nam, si compressio vulvæ ore id tentatum est, non emittente eo, infans ab-rumpitur, & unci acumen in ipsum os vulvæ delabitur; sequiturque nervorum distentio, & ingens periculum mortis. Igitur, compressa vulva, conquiescere; hiante, leniter trahere oportet; & per has occasiones paulatim eum educere. Trahere autem dextra manus uncum; sinistra, intus posita, infantem ipsum, simulque dirigere eum debet.

Solet etiam evenire, ut is infans humore distendatur; exque eo profluat foedi odoris sanies. Quod si tale est, indice digito corpus illud forandum est, ut, effuso humore, extenuetur: tum id leniter per ipsas manus recipiendum est. nam uncus injectus he-

beti corpusculo facile elabatur. in quo quid periculi sit, supra positum.

Sed in pedes quoque conversus infans non difficulter extrahitur. quibus apprehensis per ipsas manus commode educitur.

Si vero transversus est, neque dirigi potuit, uncus alæ injiciendus, paulatimque attrahendus est. Sub quo fere cervix replicatur, retroque caput ad reliquum corpus spectat. Remedio est, cervix præcisa; ut separatim utraque pars auferatur. Id unco fit, qui, priori similis, in interiore tantum parte per totam aciem exacuitur. Tum id agendum est, ut ante caput, deinde reliqua pars auferatur: quia fere, majore parte extracta, caput in vacuam vulvam prolabitur, extrahique sine summo periculo non potest.

Si tamen id incidit, super ventrem mulieris duplici panniculo injecto, valens homo, non imperitus, a sinistro latere ejus debet assistere, & super imum ventrem ejus duas manus imponere, alteraque alteram premere. quo fit, ut illud caput ad os vulvæ compellatur. Idque tum eadem ratione, quæ supra posita est, unco extrahitur.

At, si pes alter juxta repertus est, alter retro cum corpore est, quidquid protractum est, paulatim abscindendum est. Et, si clunes os vulvæ urgere coeperunt, iterum retro repellendæ sunt, conquistusque pes ejus adducendus. Aliæque etiamnum difficultates faciunt, ut, qui solidus non exit, concisus eximi debeat.

Quoties autem infans protractus est, tradendus

ministro est. Is eum supinis manibus sustinere, medicus deinde sinistra manu leniter trahere umbilicum debet ita, ne abrumpat, dextraque eum sequi usque ad eas, quas Secundas vocant, quod velamentum infantis intus fuit: hisque ultimis apprehensis, venulas membranulasque omnes eadem ratione manu diducere a vulva, totumque illud extrahere, & si quid intus præterea concreti sanguinis remanet. Tum compressis in unum feminibus, illa in conclavi collocanda est, modicum calorem, sine ullo perflatu; habente. Super imum ventrem ejus imponenda lana succida, in aceto & rosa tincta. Reliqua curatio talis esse debet, qualis in inflammationibus, & in his vulneribus, quæ in nervosis locis sunt, adhibetur.

CAPUT XXX.

De ani vitiis.

ANI quoque vitia, ubi medicamentis non vincuntur, manus auxilium desiderant. Ergo, si qua scissa in eo vetustate induruerunt, jamque callum habent, commodissimum est, ducere alvum; tum spongiam calidam admovere, ut relaxentur illa, & foras prodeant: ubi in conspectu sunt, scalpello singula excidere, & ulcera renovare; deinde imponere linamentum molle, & super linteolum illitum melle, locumque eum molli lana implere, & ita vincire: altero die, deincepsque ceteris lenibus medicamentis uti; quæ ad recentia eadem vitia necessaria esse, alias posui: & utique per primos dies for-

bitionibus eum sustinere; paulatim deinde cibis ad-
jicere aliquid, generis tamen ejus, quod eodem lo-
co præceptum est. Si quando autem ex inflamma-
tione pus in his oritur, ubi primum id apparuit,
incidendum est, ne anus ipse suppuret. Neque ta-
men ante properandum est. nam, si crudum incisum
est, inflammationi multum accedit, & puris ali-
quanto amplius concitatur. His quoque vulneribus,
lenibus cibis, iisdemque medicamentis opus est.

2. *De condylomatibus.*

At tubercula, quæ *κονδυλώματα* appellantur, ubi
induruerunt, hac ratione curantur. Alvus ante
omnia ducitur. Tum vulsella tuberculum appre-
hensum, juxta radices exciditur. Quod ubi factum
est, eadem sequuntur, quæ supra post curationem
adhibenda esse proposui: tantummodo, si quid in-
crescit, squama æris coercendum est.

3. *De hæmorrhoidibus.*

Ora etiam venarum, fundentia sanguinem, sic
tolluntur. Ubi sanguini, qui effluit, sanies adjicitur,
alvus acribus ducitur; quo magis ora promovean-
tur. eoque fit, ut omnes venæ, quasi capitula con-
spicua sint. Tum, si capitulum exiguum est, basim-
que tenuem habet, adstringendum lino paulum su-
pra est, quam ubi cum ano committitur: imponen-
da sponsia ex aqua calida est, donec id liveat:
deinde aut ungue, aut scalpello, supra nodum id
exulcerandum est. Quod nisi factum est, magni do-
lores subsequuntur: interdum etiam urinæ difficul-

tas. Si id majus est, & basis latior, hamulo uno aut altero excipiendum est, paulumque supra basim incidendum: neque relinquendum quidquam ex eo capitulo, neque quidquam ex ano demendum est. quod consequitur is, qui neque nimium, neque parum hamos ducit. Qua incisum est, acus debet immitti, infraque eam lino id capitulum alligari. Si duo triave sunt, imum quodque primum curandum est: si plura, non omnia simul, ne tempore eodem undique teneræ cicatrices sint. Si sanguis profluit, excipiendus est spongia: deinde linamentum imponendum, ungenda femina, & inguina, & quidquid juxta ulcus est, ceratumque superdandum, & farina hordeacea calida implendus is locus, & sic deligandus est. Postero die is desidere in aqua calida debet, eodemque cataplasmate foveri. Ac bis die, & ante curationem, & post eam, coxendices ac femina liquido cerato perungenda sunt; tepidoque is loco continendus. Interpositis quinque aut sex diebus, oriculario specillo linamenta educenda, &, si capitula simul non exciderunt, digito promovenda: tum lenibus medicamentis, iisdemque, quæ alibi posui, ulcera ad sanitatem perducenda. Finito vitio, quemadmodum agendum esset, jam alias superius exposui.

CAPUT XXXI.

De varicibus.

AB his ad crura proximus transitus est. In quibus orti varices non difficili ratione tolluntur. Huc

autem & earum venularum, quæ in capite nocent, & eorum varicum, qui in ventre sunt, curationem distuli; quoniam ubique eadem est. Igitur vena omnis, quæ noxia est, aut adusta tabescit, aut manu exciditur. Si recta est; si, quamvis transversa, tamen simplex; si modica est, melius aduritur. Si curva est, & velut in orbes quosdam implicatur, pluresve inter se involvuntur, utilius eximere est.

Adurendi ratio hæc est. Cutis superinciditur: tum, patefacta vena, tenui & retuso ferramento candente modice premitur; vitaturque, ne plagæ ipsius oræ adurantur: quas reducere hamulis facile est. Id interpositis fere quaternis digitis per totum varicem fit: & tum superimponitur medicamentum, quo adusta sanantur.

At exciditur hoc modo. Cute eadem ratione super venam incisa, hamulo oræ excipiuntur; scalpelloque undique a corpore vena diducitur; caveturque, ne inter hæc ipsa lædatur; eique retusus hamulus subjicitur; interpositoque eodem fere spatio, quod supra positum est, in eadem vena idem fit: quæ, quo tendat, facile hamulo extento cognoscitur.

Ubi jam idem, quacunque varices sunt, factum est, uno loco adducta per hamulum vena præciditur: deinde, qua proximus hamus est, attrahitur & evellitur; ibique rursus absciditur. Ac sic undique varicibus crure liberato, tum plagarum oræ committuntur, & super emplastrum glutinans injicitur.

C A P U T XXXII.

De digitis cohærentibus, & curvatis.

AT, si digiti vel in utero protinus, vel propter communem exulcerationem postea cohæserunt, scalpello diducuntur: dein separatim uterque non pingui emplastro circumdatur: atque ita per se uterque sanescit.

Si vero fuit ulcus in digito, posteaque male indurata cicatrix curvum eum reddidit; primum malagma tentandum est: dein, si id nihil prodest (quod & in veteri cicatrice, & ubi nervi læsi sunt, evenire consuevit) videre oportet, nervine id vitium, an cutis sit. Si nervi est, attingi non debet: neque enim sanabile est. Si cutis, tota cicatrix excidenda est, quæ fere callosa efficit, ut extendi digitus non patiatur. Tum rectus sic ad novam cicatricem perducendus est.

C A P U T XXXIII.

De gangræna.

GANGRÆNAM inter ungues alasque, aut inguina nasci; & si quando medicamenta vincuntur, membrum præcidi oportere, alio loco mihi dictum est.

Sed id quoque cum periculo summo fit: nam sæpe in ipso opere, vel profusione sanguinis vel animæ defectione moriuntur. Verum hic quoque nihil interest, an satis tutum præsidium sit, quod unicum

est. Igitur inter sanam vitiatamque partem incidenda scalpello caro usque ad os est sic, ut neque contra ipsum articulum id fiat, & potius ex sana parte aliquid excidatur, quam ex ægra relinquatur. Ubi ad os ventum est, reducenda ab eo sana caro, & circa os subsecanda est, ut ea quoque parte aliquid offis nudetur: dein id ferrula præcidendum est, quam proxime sanæ carni etiam inhærenti: ac tum frons offis, quam ferrula exasperavit, lævanda est, supraque inducenda cutis. quæ sub ejusmodi curatione laxa esse debet, ut quam maxime undique os contegat. Quo cutis inducta non fuerit, id linamentis erit contegendum, & super id spongia ex aceto deliganda. Cetera postea sic facienda, ut in vulneribus, in quibus pus non moveri debet, præceptum est.

A. CORN. CELSI
 M E D I C I N Æ
 LIBER OCTAVUS.

C A P U T I.

De positu & figura ossium totius humani corporis.

SUPEREST ea pars, quæ ad ossa pertinet. Quæ quo facilius accipi possit, prius positus figuraeque eorum indicabo. Igitur calvaria incipit ex interiore parte concava, extrinsecus gibba, utrinque lævis, & qua cerebri membranam contegit, & qua cute, capillum gignente, contegitur. Eaquæ simplex ab occipitio & temporibus; duplex, usque in verticem a fronte, est. Ossaque ejus, ab exterioribus partibus, dura; ab interioribus, quibus inter se connectuntur, molliora sunt. Interque ea venæ discurrent, quas his alimentum subministrare, credibile est.

Raro autem calvaria solida, sine futuris est: locis tamen æstuosis facilius invenitur. & id caput firmissimum, atque a dolore tutissimum est: ex ceteris, quo futuræ pauciores sunt, eo capitis valetudo commodior est. neque enim certus earum numerus est, sicut ne locus quidem. Fere tamen duæ, super aures, tempora a superiore capitis parte discer-

nunt : tertia , ad aures per verticem tendens , occipitium a summo capite diducit : quarta , ab eodem vertice per medium caput ad frontem procedit ; eaque modo sub imo capillo desinit , modo frontem ipsam secans inter supercilia finitur. Ex his ceteræ quidem futuræ in unguem committuntur : eæ vero , quæ super aures transversæ sunt , totis oris paulatim extenuantur ; atque ita inferiora ossa superioribus leniter insidunt. Craffissimum vero in capite os post aurem est , qua capillus , ut verisimile est , ob id ipsum non gignitur. Sub iis quoque musculis , qui tempora connectunt , os medium , in exteriorem partem inclinatum , positum est. At facies futuram habet maximam. quæ , a tempore incipiens , per medios oculos , naresque transversa pervenit ad alterum tempus. A qua breves duæ sub interioribus angulis deorsum spectant. Et malæ quoque in summa parte singulas transversas futuras habent. A mediisque naribus , aut superiorum dentium gingivis , per medium palatum una procedit ; alia , quæ transversa idem palatum secat. Et futuræ quidem in plurimis hæ sunt.

Foramina autem , intra caput , maxima oculorum sunt : deinde narium ; tum quæ in auribus habemus. Ex his , quæ oculorum sunt , recta simpliciaque ad cerebrum tendunt. Narium duo foramina osse medio discernuntur. siquidem hæ primum a superciliis , angulisque oculorum , osse inchoantur ad tertiam fere partem : deinde in cartilaginem versæ , quo propius ori descendunt , eo magis caruncula quoque molliuntur. Sed ea foramina , quæ

a summis ad imas nares simplicia sunt, ibi rursus in bina itinera dividuntur: aliaque ex his, ad fauces pervia, spiritum & reddunt, & accipiunt; alia ad cerebrum tendunt. In ultima parte in multa & tenuia foramina dissipantur, per quæ sensus odoris nobis datur. In aure quoque primo rectum & simplex iter procedendo flexuosum fit. Quod ipsum juxta cerebrum in multa & tenuia foramina diducitur, per quæ facultas audiendi est. Juxtaque ea duo parvuli quasi sinus sunt; superque eos finitur os, quod transversum a genis tendens, ab inferioribus ossibus sustinetur. Jugale appellari potest ab eadem similitudine, a qua id Græci *ζυγῶδες* appellant. Maxilla vero est molle os, eaque una est. Cujus eadem & media, & etiam ima pars, mentum est: a quo utrinque procedit ad tempora; solaque ea movetur. Nam malæ cum toto osse, quod superiores dentes exigit, immobiles sunt. Verum ipsius maxillæ partes extremæ quasi bicornes sunt. Alter processus, infra latior, vertice ipso tenuatur, longiusque procedens sub osse jugali subit, & super id temporum musculis illigatur. Alter brevior & rotundior, & in eo sinu, qui juxta foramina auris est, cardinis modo fit; ibique huc & illuc se inclinans maxillæ facultatem motus præstat.

Duriores osse dentes sunt: quorum pars maxillæ, pars superiori ossi malarum hæret. Ex his quaterni primi, quia secant, *τομικοί* a Græcis nominantur. Hi deinde quatuor caninis dentibus ex omni parte cinguntur. Ultra quos utrinque fere maxillares quini sunt, præterquam in iis, in quibus ultimi,

qui fero gigni solent, non increverunt. Ex his priores singulis radicibus; maxillares utique binis; quidam etiam ternis, quaternisve nituntur. Fereque longior radix breviorē dentem edit; rectique dentis recta etiam radix, curvi flexa est. Exque eadem radice in pueris novus dens subit, qui multo sæpius priorem expellit: interdum tamen supra infrave eum se ostendit.

Caput autem spina excipit. Ea constat ex vertebra quatuor & viginti. Septem in cervice sunt, duodecim ad costas, reliquæ quinque sunt proximæ costis. Hæ teretes brevesque, ab utroque latere, processus duos exigunt: mediæ perforatæ, qua spinæ medulla cerebro commissa descendit: circa quoque per duos processus tenuibus cavis perviæ, per quæ a membrana cerebri similes membranulæ deducuntur. Omnesque vertebrae (exceptis tribus summis) a superiore parte in ipsis processibus parum desidentes sinus habent: ab inferiore alios deorsum versus processus exigunt. Summa igitur protinus caput sustinet, per duos sinus receptis exiguis ejus processibus. Quo fit, ut caput sursum deorsum versum tuberibus exasperetur. Secunda superioris parti inferiori inseritur. Quod ad circuitum pertinet, pars summa angustiore orbe finitur. itaque superior secundæ circumdata in latera quoque caput moveri finit. Tertia eodem modo secundam excipit. Ex quo facilis cervici mobilitas est. Ac, ne sustineri quidem caput posset, nisi utrinque recti valentesque nervi collum continerent, quos *τένοντας* Græci appellant, siquidem horum inter omnes

flexus alter semper intentus ultra prolabi superiora non patitur. Jamque vertebra tertia tubercula, quæ inferiori inferantur, exigit. Ceteræ processibus deorsum spectantibus in inferiores insinuantur, ac per sinus, quos utrinque habent, superiores accipiunt, multisque nervis & multa cartilagine continentur. Ac sic, uno flexu modico in promptum dato, ceteris negotiis homo & rectus insistit, & aliquid ad necessaria opera curvatur.

Infra cervicem vero summa costa contra humerum sita est. Inde septem inferiores usque ad imum pectus perveniunt: hæque, primis partibus rotundæ & leniter quasi capitulatæ, vertebrarum transversis processibus, ibi quoque paulum insinuatæ, inhærent: inde lateſcant, & in exteriorem partem recurvatæ paulatim in cartilaginem degenerant; eaque parte rursus in interiora leniter flexæ committuntur cum osse pectoris. Quod valens ac durum a faucibus incipit, ab utroque latere lunatum, & a præcordiis, jam ipsum quoque cartilagine mollitum, terminatur. Sub costis vero prioribus quinque (quas *κόσται* Græci nominant) breves tenuioresque, atque ipsæ quoque paulatim in cartilaginem versæ, extremis abdominis partibus inhærescunt; imaque ex his, majore jam parte nihil, nisi cartilago est.

Rursus, a cervice duo lata ossa utrinque ad scapulas tendunt: nostri scutula operta; *ὀμοπλάται* Græci nominant. Ea in summis verticibus sinuata, ab his triangula, paulatimque lateſcentia ad spinam tendunt; &, quo latiora quaque parte sunt, hoc hebetiora. Atque ipsa quoque, in imo cartilaginosa,

posteriore parte velut innatant; quoniam, nisi in summo, nulli ossi inhærescunt. Ibi vero validis musculis nervisque constricta sunt.

At a summa costa paulo interius, quam ubi ea media est, os excrescit, ibi quidem tenue, procedens vero, quo propius lato scapularum ossi fit, eo plenius latiusque & paulum in exteriora curvatum. quod protinus altera verticis parte modice intumescens, sustinet jugulum. Id autem ipsum recurvum atque inter durissima ossa numerandum, altero capite in eo, quod posui, altero in exiguo sinu pectoralis ossis insidit, paululumque motu brachii movetur, & cum lato osse scapularum. Infra caput ejus, nervis & cartilagine connectitur.

Hinc humerus incipit, extremis utrinque capitibus tumidus, mollis, sine medulla, cartilaginofus: medius teres, durus, medullosus: leniter gibbus in priorem, posteriorem & interiorem, cavus in exteriorem partem. Prior autem pars est, quæ a pectore est: posterior, quæ ab scapulis: interior, quæ ad latus tendit: exterior, quæ ab eo recedit. quod ad omnes articulos pertinere, in ulterioribus patebit. Superius autem humeri caput rotundius, quam cetera ossa, de quibus adhuc dixi, vertici lati scapularum ossis parvo excessu inseritur, ac majore parte extra situm nervis deligatur. At inferius duos processus habet: inter quos, quod medium est, magis etiam extremis partibus sinuatur.

Quæ res sedem brachio præstat. quod constat ex ossibus duobus. Radius, quem *κερκίδα* Græci appellant, superior breviorque, & primo tenuior, ro-

tundo & leniter cavo capite exiguum humeri tuberculum recipit, atque ibi nervis & cartilagine continetur. Cubitus inferior longiorque, & primo plenior, in summo capite duobus quasi verticibus exstantibus in sinum humeri, quem inter duos processus ejus esse proposui, se inserit. Primo vero duo brachii ossa juncta paulatim dirimuntur, rursusque ad manum coeunt, modo crassitudinis mutato. Si quidem ibi radius plenior, cubitus admodum tenuis est. Dein radius, in caput cartilaginosum confurgens, in vertice ejus sinuatur. Cubitus rotundus in extremo, parte altera paulum procedit. Ac, ne sæpius dicendum sit, illud ignorari non oportet, plurima ossa in cartilaginem desinere, nullum articulum non sic finiri. Neque enim aut moveri posset, nisi lævi inniteretur; aut cum carne nervisque conjungi, nisi ea media quædam materia committeret.

In manu vero prima palmæ pars ex multis minutisque ossibus constat, quorum numerus incertus est. Sed oblonga omnia, & triangula, structura quadam inter se connectuntur, cum invicem superior alterius angulus, alterius planities sit: eoque fit ex his unius ossis paulum in interiora concavi species. Verum ex manu duo exigui processus in sinum radii conjiciuntur. Tum ex altera parte quinque ossa recta, ad digitos tendentia, palmam explent. A quibus ipsi digiti oriuntur: qui ex ossibus ternis constant. omniumque eadem ratio est. Interius os in vertice sinuatur, recipitque exterioris exiguum tuberculum; nervique ea continent. A quibus orti ungues indurescunt. Ideoque non ossi, sed carni magis radici-

bus suis inhærent. Ac superiores quidem partes sic ordinatæ sunt.

Illa vero spina in coxarum osse desidit; quod transversum longeque valentissimum, vulvam, vesicam, rectum intestinum tuetur. Idque ab exteriori parte gibbum; ad spinam, resupinatum; a lateribus, id est, in ipsis coxis, sinus rotundos habet. A quibus oritur os, quod pectinem vocant; idque, super intestina sub pube transversum, ventrem firmat: rectius in viris, recurvatum magis in exteriora in feminis, ne partum prohibeat.

Inde femina oriuntur. Quorum capita rotundiora etiam, quam humerorum sunt; cum illa ex ceteris rotundissima sint. Infra vero duos processus a priorre & a posteriore parte habent. Dein dura, & medullosa, & ab exteriori parte gibba, rursus ab inferioribus quoque capitibus intumescunt: superiora in sinus coxæ, sicut humeri in ea ossa, quæ scapularum sunt, conjiciuntur; tum infra introrsus leniter tendunt, quo æqualius superiora membra sustineant. Atque ideo inferiora quoque capita media sinuantur, quo facilius excipi a cruribus possint. Quæ commissura osse parvo, molli, cartilaginoso tegitur. patellam vocant. Hæc super innatans, neque ulli ossi inhærens, sed carne & nervis deligata, pauloque magis ad femoris os tendens, inter omnes crurum flexus juncturam tuetur.

Ipsam autem crus est ex ossibus duobus. Etenim per omnia femur humero, crus brachio simile est: adeo ut habitus quoque & decor alterius ex altero cognoscatur. quod ab ossibus incipiens, etiam in

carne respondet. Verum alterum os ab exteriori parte suræ positum est: quod ipsum quoque sura recte nominatur. Id brevius, supraque tenuius, ad ipsos talos intumescit. Alterum a priori parte positum, cui tibiæ nomen est, longius & in superiore parte plenius, solum cum femoris inferiore capite committitur; sicut cum humero cubitus. Atque ea quoque ossa, infra supraque conjuncta, media, ut in brachio, dehiscunt.

Excipitur autem crus infra osse transverso talorum; idque ipsum super os calcis situm est. quod quadam parte sinuatur, quadam excessus habet, & procedentia ex talo recipit, & in sinum ejus inferitur. Idque sine medulla durum, magisque in posteriorem partem projectum, teretem ibi figuram repræsentat. Cetera ossa pedis ad eorum, quæ in manu sunt, similitudinem structa sunt. Plantæ palmis, digiti digitis, ungues unguibus respondent.

C A P U T II.

*Ossa vitiosa & corrupta quibus signis cognoscantur,
& qua ratione curentur.*

OMNE autem os, ubi injuria accessit, aut vitiatum, aut finditur, aut frangitur, aut foratur, aut colliditur, aut loco movetur. Id, quod vitiatum est, primo fere pingue fit; deinde vel nigrum, vel cariosum. quæ, supernatis gravibus ulceribus aut fistulis, hisque vel longa vetustate, vel etiam cancro occupatis, eveniunt. Oportet autem ante omnia os nudare, ulcere exciso; &, si latius est ejus vitium,

quam ulcus fuit, carnem subsecare, donec undique os integrum pateat : tum id, quod pingue est, semel iterumve satis est admoto ferramento adurere, ut ex eo testa secedat, aut eradere, donec jam aliquid cruoris ostendatur, quæ integrioris nota est. nam necesse est aridum sit id, quod vitiatum est. Idem in cartilagine quoque læsa faciendum est. siquidem ea quoque scalpello radenda est, donec integrum id sit, quod relinquatur. Deinde, siue os, siue cartilago rafa est, nitro bene trito respergendum est. Neque alia facienda sunt, ubi caries, nigritiesve in summo osse est. siquidem id vel paulo diutius eodem ferramento adurendum, vel radendum est. qui radit hæc, audacter imprimere ferramentum debet, ut & agat aliquid, & maturius desinat. Finis est, cum vel ad album os, vel ad solidum ventum est. Albo finiri ex nigritie vitium, soliditate quadam ex carie, manifestum est. Accedere etiam cruoris aliquid integro, supra dictum est. Si quando autem altius descenderit utrumlibet, dubium est.

In carie quidem expedita cognitio est. Specillum tenue in foramina demittitur; quod magis minusve intrando, vel in summo cariem esse, vel altius descendisse, testatur. Nigrities colligi quidem potest etiam ex dolore, & ex febre, quæ ubi mediocria sunt, illa alte descendisse non potest. Manifestior tamen adacta terebra sit. nam finis vitii est, ubi scobis nigra est desit.

Igitur, si caries alte descendit, per terebram urgenda crebris foraminibus est, quæ altitudine vitium æquent : tum in ea foramina demittenda can-

dentia ferramenta sunt, donec inde ficcum os ex toto fiat. simul enim post hæc & resolvetur ab inferiore osse, quodcunque vitiatum est, & is sinus carne replebitur, & humor aut nullus postea fertur, aut mediocris.

Sin autem nigrities est, aut si caries ad alteram quoque partem ossis transit, oportet excidi. Idem quoque in carie, ad alteram partem ossis penetrante, fieri potest. Sed, quod totum vitiatum, totum eximendum est. Si inferior pars integra est, eatenus, quod corruptum est, excidi debet. Item si ve capitis, si ve pectoris os, si ve costa cariosa est, inutilis usus est, sed excidendi necessitas est. Neque audiendi sunt, qui, osse nudato, diem tertium expectant, ut tum excidant. ante inflammationem enim tutius omnia tractantur. Itaque, quantum fieri potest, eodem momento & cutis incidenda est, & os detegendum, & omni vitio liberandum est. Longeque perniciosissimum est, quod in osse pectoris est: quia vix, etiamsi recte cessit curatio, veram sanitatem reddit.

C A P U T III.

Quomodo os excidatur; & de modiololo, & terebra; ferramentis ad id paratis.

EXCIDITUR vero os duobus modis. Si parvulum est, quod læsum est, modiololo, quem *χοιρίκιον* Græci vocant: si spatiosius, terebris. Utriusque rationem proponam. Modiolus ferramentum concavum, teres, est, imis oris ferratum: per quod medium cla-

vus, ipse quoque interiore orbe cinctus demittitur. Terebrarum autem duo genera sunt: alterum simile ei, quo fabri utuntur: alterum capituli longioris, quod ab acuto mucrone incipit, deinde subito latius fit; atque iterum ab alio principio paulo minus, quam æqualiter sursum procedit.

Si vitium in angusto est, quod comprehendere modiolus possit, ille potius aptatur. Et, si caries subest, medius clavus in foramen demittitur. Si nigrities, angulo scalpri sinus exiguus fit, qui clavum recipiat, ut, eo insistente, circumactus modiolus delabi non possit: deinde is habena, quasi terebra, convertitur. Estque quidam premendi modus, ut & foretur, & circumagatur: quia, si leviter imprimitur, parum proficit; si graviter, non movetur. Neque alienum est, instillare paululum rosæ, vel lactis, quo magis lubrico circumagatur. quod ipsum tamen, si copiosius est, aciem ferramenti hebetat. Ubi jam iter modiolo impressum est, medius clavus educitur, & ille per se agitur. deinde, cum fanitas inferioris partis scobe cognita est, modiolus removetur.

At, si latius vitium est, quam ut illo comprehendatur, terebra res agenda est. Ea foramen fit in ipso sine vitiosi ossis atque integri: deinde alterum non ita longe, tertiumque, donec totus is locus, qui excidendus est, his cavis cinctus fit, atque ibi quoque quatenus terebra agenda sit, scobis significat. Tunc excisoriis scalper ab altero foramine ad alterum malleolo adactus id, quod inter utrumque medium est, excidit; ac sic ambitus similis ei

fit, qui in angustiore orbem modiololo imprimi-
tur. Utro modo vero id circumductum est, idem
excisforius scalper, & in osse corrupto planus, sum-
mam quamque testam levet, donec integrum os re-
linquatur.

Vix unquam nigrities, interdum caries per to-
tum os perrumpit, maximeque ubi vitiata calvaria
est. Id quoque vitii specillo significatur. qui de-
pressus in id foramen, quod infra solidam sedem
habet, & ob id renitens aliquid invenit, & madens
exit. Si pervium invenit, altius descendens inter
os & membranam, nihil oppositum invenit, edu-
citurque ficcus: non quo non subsit aliqua vitiosa
sanies; se quoniam ibi, ut in latiore sede, diffusa sit.

Sive autem nigrities, quam terebra detexit, sive
caries, quam specillum ostendit, os transit, modio-
li quidem usus fere supervacuuus est; quia latius pa-
teat necesse est, quod tam alte processit. Terebra
vero ea, quam secundo loco posui, utendum; ea-
que, ne nimis incalescat, subinde in aquam frigi-
dam demittenda est. Sed tum majore cura agen-
dum est, cum jam aut simplex os dimidium perfo-
ratum est, aut in duplici superius. illud spatium
ipsum; hoc sanguis significat. Ergo tum lentius du-
cenda habena, suspendendaque magis manus fini-
stra est, & sæpius attollenda, & foraminis altitu-
do considerata; ut, quandocunque os perrumpi-
tur, sentiamus, neque periclitemur, ne mucrone
cerebri membrana lædatur: ex quo graves inflam-
mationes, cum periculo mortis oriuntur.

Factis foraminibus, eodem modo media septa,

fed multo circumſpectius, excidenda ſunt, ne forte angulus ſcalpri eandem membranam violet; donec fiat aditus, per quem membranæ cuſtos immittatur. *μηνιγγοφύλακα* Græci vocant. Lamina ænea eſt, firma, paulum reſima, ab exteriori parte lævis. Quæ demiffa ſic, ut exterior pars ejus cerebro propior ſit, ſubinde ei ſubjicitur, quod ſcalpro diſcutiendum eſt: ac, ſi excipit ejus angulum, ultra tranſſere non patitur: eoque & audacius, & tutius, ſcalprum malleolo medicus ſubinde ferit, donec undique exciſum os, eadem lamina levetur, tōllique ſine ulla noxa cerebri poſſit. Ubi totum os ejeſtum eſt, circumradendæ lævandæque oræ ſunt, &, ſi quid ſcobis membranæ inſedit, colligendum. Ubi, ſuperiori parte ſublata, inferior relictæ eſt, non ora tantum, ſed os quoque totum lævandum eſt, ut ſine noxa poſtea cutis increſcat, quæ aſpero offi innāſcens protinus non ſanitatē, ſed novos dolores movet.

Patefacto cerebro, qua ratione agendum ſit, dicam, cum ad fracta oſſa venero. Si baſis aliqua ſervata eſt, ſuperimponenda ſunt medicamenta non pingua, quæ recentibus vulneribus accommodantur; ſupraque imponenda lana ſuccida, oleo atque aceto madens. Ubi tempus proceſſit, ab ipſo oſſe caro increſcit, eaque factum manu ſinum complet. Si quod etiam os aduſtum eſt, a parte ſana recedit; ſubitque inter integram atque emortuam partem caruncula, quæ, quod abſceſſit, expellat. eaque fere, quia teſta tenuis & anguſta eſt, *λεπίς*, id eſt, ſquama, a Græcis nominatur.

Potest etiam evenire, ut ex ictu neque findatur os, neque perfringatur; sed summum tamen collidatur, exaspereturque. Quod ubi incidit, radi & lævari satis est. Hæc quamvis maxime fiunt in capite, tamen ceteris quoque ossibus communia sunt: ut, ubicunque idem incidet, eodem remedio sit utendum. At, cum ea fracta, fissa, forata, collisa sunt, quasdam proprias in singulis generibus, quasdam communes in pluribus curationes requirunt. De quibus protinus dicam, initio ab eadem calvaria accepto.

CAPUT IV.

De calvaria fracta.

IGITUR, ubi ea percussa, protinus requirendum est, num bilem homo is vomuerit; num oculi ejus occæcati sint; num obmutuerit; num per nares aureve sanguis ei effluxerit; num conciderit; num sine sensu quasi dormiens jacuerit. Hæc enim non nisi osse fracto eveniunt. Atque, ubi inciderunt, scire licet, necessariam, sed difficilem curationem esse. Si vero etiam torpor accessit, si mens non constat, si nervorum vel resolutio vel distentio secuta est; verisimile est, etiam cerebri membranam esse violatam: eoque in angusto magis spes est. At, si nihil horum secutum est, & jam potest dubitari, an os fractum sit; & protinus considerandum est, lapide, an ligno, an ferro, an alio telo percussum sit, & hoc ipso lævi an aspero, mediocri an vastiore, vehementer an leniter. quia quo mitior ictus fuit, eo fa-

cilius os ei restitisse credibile est. Sed nihil tamen melius est, quam certiore id nota explorare. Ergo, qua plaga est, demitti specillum oportet, neque nimis tenue, neque acutum, ne, cum in quosdam naturales sinus inciderit, opinionem fracti ossis frustra faciat; neque nimis plenum, ne parvulæ rimulæ fallant. Ubi specillum ad os venit, si nihil nisi læve & lubricum occurrit, integrum id videri potest: si quid asperi est, utique qua futuræ non sint, fractum os esse testatur.

A futuris se deceptum esse, Hippocrates memoriæ prodidit, more scilicet magnorum virorum, & fiduciam magnarum rerum habentium. Nam levia ingenia, quia nihil habent, nihil sibi detrahunt. Magno ingenio, multaue nihilo minus habituro, convenit etiam simplex veri erroris confessio; præcipueque in eo ministerio, quod utilitatis causa posteris traditur; ne qui decipiantur eadem ratione, qua quis ante deceptus est. Sed hæc quidem aliquin memoria magni professoris, ut interponeremus, effecit.

Potest autem futura eo nomine fallere, quia æque aspera est; ut aliquis hanc esse, etiamsi rima est, existimet eo loco, quo subesse hanc verisimile est. Ergo eo nomine decipi non oportet: sed os aperire tutissimum est. Nam neque utique certa sedes, ut supra posui, futurarum est: & potest idem & naturaliter commissum & ictu fissum esse, juxta ve aliquid fissum habere. Quin aliquando etiam, ubi ictus fuit vehementior, quamvis specillo nihil invenitur, tamen aperire commodius est. Ac, si ne tum quidem

rima manifesta est, inducendum super os atramentum scriptorium est, deinde scalpro id detrahendum. nigritiem enim continet, si quid fissum est.

Solet etiam evenire, ut altera parte fuerit ictus, & os altera fiderit. Itaque, si graviter aliquis percussus est, si mala indicia subsecuta sunt, neque ea parte, qua cutis discussa est, rima reperitur; non incommodum est, parte altera considerare, num quis locus mollior sit, & tumeat; eumque aperire: siquidem ibi fissum os reperietur. nec tamen magno negotio cutis fanescit, etiamsi frustra secta est. Os fractum, nisi succursum est, gravibus inflammationibus afficit, difficiliusque postea tractatur.

Raro, sed aliquando tamen, evenit, ut os quidem totum integrum maneat, intus vero ex ictu vena aliqua in cerebri membrana rupta aliquid sanguinis mittat; isque ibi concretus magnos dolores moveat, & oculos quibusdam obcæcet. Sed fere contra id dolor est, &, eo loco cute incisa, pallidum os reperitur. ideoque id quoque os excidendum est. Quacunque autem de causa curatio hæc necessaria est, si nondum satis cutis patefacta est, latius aperienda est, donec, quidquid læsum est, in conspectu sit. In quo ipso videndum est, ne quid ex ipsa membrana, quæ sub cute calvariam cingit, super os relinquatur: siquidem hæc scalpro terebrisve lacerata vehementes febres cum inflammationibus excitat. Itaque eam commodius est ex toto ab osse deduci. Plagam, si ex vulnere est, talem necesse est habeamus, qualem acceperimus. Si manu facienda est, ea

fere commodissima est, quæ duabus transversis lineis literæ X figuram accipit, ut deinde a singulis procedentibus angulis cutis subsecetur.

Inter quæ, si sanguis fertur, spongia subinde in aceto tincta cohibendus est, occupandusque objectis linamentis, & caput altius excitandum. Neque id vitium ullum metum, nisi inter musculos, qui tempora continent, affert: sed ibi quoque nihil tutius fit.

In omni vero fisso fractoque osse, protinus antiquiores medici ad ferramenta veniebant, quibus id exciderent. Sed multo melius est, ante emplastra experiri, quæ calvariæ causa componuntur. eorumque aliquod oportet ex aceto mollitum per se super fissum fractumve os imponere: deinde super id, aliquanto latius, quam vulnus est, eodem medicamento illitum linteolum, & præterea succidam lanam aceto tinctam: tum vulnus deligare, & quotidie resolvere; similiterque curare usque ad diem quintum. A sexto die etiam vapore aquæ calidæ per spongiam fovere: ceteraque eadem facere. Quod si caruncula increfcere cœperit, & febricula aut soluta fuerit, aut levior, & cupiditas cibi reverterit, satisque somni accedat, in eodem medicamento erit perseverandum. Procedente deinde tempore emolliendum id emplastrum, adjecto cerato ex rosa facto, quo facilius carnem producat. nam per se reprimendi vim habet. Hac ratione sæpe rimæ callo quodam implentur; estque ea ossis velut cicatrix. & latius fracta ossa, si qua inter se non cohærebant, eodem callo glutinantur. estque id aliquanto melius

velamentum cerebro, quam caro, quæ exciso osse increfcit. Si vero sub prima curatione febris intenditur, brevesque fomni, & iidem per fomnia tumultuosi funt, ulcus madet, neque alitur, & in cervicibus glandulæ oriuntur, magni dolores funt, cibi-que super hæc fastidium increfcit; tum demum ad manum scalprumque veniendum eft.

Duo vero sub ic̃tu calvariæ pericula funt, ne vel findatur, vel medium defidat. Si fifsum eft, poffunt oræ efle compreffæ: vel quia altera fuper alteram exceffit; vel etiam, quia vehementer fe rurfus cominiferunt. Ex quo evenit, ut humor ad membranam quidem descendat, exitum vero non habeat, ac fic eam irriter, & graves inflammationes moveat. Ubi medium defedit, eandem cerebri membranam os urget: interdum etiam ex fractura quibusdam velut aculeis pungentibus.

His ita fuccurrendum eft, ut tamen quam minimum ex osse dematur. Ergo, fi ora alteri infedit, fatis eft id, quod eminent, plano scalpro excidere. Quo sublato, jam rima hiat, quantum curationi fatis eft.

At, fi oræ inter fe comprimuntur, a latere ejus, interposito digiti fpatio, terebra foramen faciendum eft: ab eoque scalper duabus lineis ad rimam agendus, ad fimilitudinem literæ Λ ; fic, ut vertex ejus a foramine, basis a rima fit. Quod fi rima longius paret, ab altero foramine rurfus fimilis finus fieri debet: & ita nihil latens in eo osse concavum eft, abundeque exitus datur intus lædentibus.

Ne fi fractum quidem os defedit, totum excidi

necesse est : sed, five totum perfractum est, & ab alio ex toto recessit, five circumpositæ calvariæ inhæret; exigua parte ab eo, quod naturaliter se habet, scalp pro dividendum est. Deinde in eo, quod defedit, juxta rimam, quam fecimus, foramina addenda sunt : si in angusto noxa est, duo; si latius patet, tria; septaque eorum excidenda : & tum scalper utrinque ad rimam agendus sic, ut lunatum sinum faciat, imaque pars ejus intus ad fracturam, cornua ad os integrum spectent. Deinde, si qua labant, & ex facili removeri possunt, forfice ad id facta colligenda sunt, maximeque ea, quæ acuta membranam infestant. Si id ex facili fieri non potest, subjicienda lamina est, quam custodem ejus membranæ esse, proposui : & super eam, quidquid spinosum est, & intus eminet, excidendum est. eadem lamina, quidquid deorsum infidet, attollendum. Hoc genus curationis efficit, ut, qua parte fracta ossa tamen inhærent, solidentur : qua parte abrupta sunt, sine ullo tormento sub medicamentis tempore excidant, spatiumque inter hæc satis ibi magnum ad extrahendam saniem relinquatur, plusque in osse propugnaculi cerebrum habeat, quam habiturum fuit, eo exciso.

His factis, ea membrana acri aceto respergenda est, ut, five aliquid sanguinis ex ea profluit, cohibeatur, five intus concretus cruor remanet, discutiatur : tum idem medicamentum eodem modo, quæ supra positus est, mollitum, ipsi membranæ imponendum est : ceteraque eodem modo facienda sunt, quæ ad linteolum illitum, & lanam succidam perti-

ment: collocandusque is loco intepido: & curandum quotidie vulnus; bis etiam, æstate.

Quod si membrana per inflammationem intumuerit, infundenda erit rosa tepida. Si usque eo tumebit, ut super ossa quoque emineat, coercebit eam bene trita lenticula, vel folia vitis contrita, & cum recenti vel butyro, vel adipe anserino mixta: ceruixque molliri debebit liquido cerato, ex irino facto. At, si parum pura membrana videbitur, parmodus ejus emplastri & mellis miscendus erit; idque superinfundendum; ejusque continendi causa unum aut alterum linamentum injiciendum; & super linteolo, cui emplastrum illitum sit, contingendum. Ubi satis pura membrana est, eadem ratione adjiciendum emplastro ceratum, ut carnem producat.

Quod ad abstinentiam vero, & primos ulterioresque cibos potionesque pertinet, eadem, quæ in vulneribus præcepi, servanda sunt: eo magis, quo periculosius hæc pars afficitur. Quin etiam, cum jam non solum sustineri, sed ali cibus quoque oportebit, tamen erunt vitanda, quæcunque mandenda sunt: item fumus, & quidquid excitat sternutamentum. Spem vero certam faciunt, membrana mobilis ac sui coloris, caro increscens rubicunda, facilis motus maxillæ atque cervicis. Mala signa sunt, membrana immobilis, nigra, vel livida, vel aliter coloris corrupti, dementia, acris vomitus, nervorum vel resolutio vel distentio, caro livida, maxillarum rigor, atque cervicis. Cetera, quæ ad somnum, cibi desiderium, febrem, puris colorem attinent, eadem,

quæ in ceteris vulneribus, vel salutaria, vel mortifera sunt.

Ubi bene res cedit, incipit ab ipsa membrana, vel, si os eo loco duplex est, inde quoque caro incrementum; eaque id, quod inter ossa vacuum est, replet: nonnunquam etiam super calvariam excrescit. Quod si incidit, inspergenda squama æris est, ut id reprimat & cohibeat, eaque carni superdanda, quæ ad cicatricem perducant. Omnibusque ea locis commodè inducitur, excepta frontis ea parte, quæ paulum super id est, quod inter supercilia est. Ibi enim vix fieri potest, ut non per omnem ætatem sit exulceratio: quæ linteolo, medicamentum habente, contegenda sit. Illa utique capite fracto servanda sunt, ut, donec jam valida cicatrix erit, vitentur sol, ventus, frequens balneum, major vini modus.

C A P U T V.

De naso fracto.

IN naribus vero, & os, & cartilago frangi solet, & quidem modo adversa, modo a latere. Si adversa fracta sunt, alterumve ex his, nares desidunt, difficulter spiritus trahitur. Si a latere os fractum est, is locus cavus est: si cartilago, in alteram partem nares declinantur.

Quidquid in cartilagine incidit, excitandum leniter est, aut subiecto specillo, aut duobus digitis utrinque compressis: deinde in longitudinem implicata linamenta, & molli pellicula cincta circumfusaque, intus adigenda sunt; aut eodem modo com-

positum aliquid ex arido penicillo; aut grandis pinna, gummi, vel fabrili glutine illita, & molli pellicula circumdata, quæ desidere cartilaginem non sinat. Sed, si adversa ea fracta est, æqualiter utraque naris implenda est. Si a latere, id, quod inferitur, crassius esse debet ab ea parte, in quam nasus jacet, ab altera tenuius. Extrinsecus autem circumdanda habena est mollis, media illita mixtis inter se similia & turis fuligine: eaque ultra aures ducenda, & fronti duobus capitibus agglutinanda est. id enim corpori quasi gluten inhærescit, &, cum induruit, nares commodè continet. Sin, quod intus inditum est, lædit, sicut maxime fit, ubi interior cartilago perfracta est, excitatæ nares eadem tantummodo habena continendæ sunt: deinde, post quatuordecim dies id ipsum demendum est. Resolvitur autem aqua calida; eaque tum is locus quotidie fovendus est.

Sin os fractum est, id quoque digitis in suam sedem reponendum est: atque ubi adversum id ictum est, utraque naris implenda est; ubi a latere, ea, in quam os impulsus est: imponendumque ceratum, & paulo vehementius deligandum est; quia callus eo loco non ad sanitatem tantummodo, sed etiam ad tumorem increscit. a tertio die fovendum id aqua calida est; tantoque magis, quanto propius esse sanitati debet. Quod si plura erunt fragmenta, nihilo minus intrinsecus singula in suas sedes digitis erunt compellenda; imponendaque extrinsecus eadem habena, & super eam ceratum; neque ultra fascia adhibenda est.

At, si quod fragmentum undique resolutum cum

ceteris non glutinabitur, intelligetur quidem ex humore, qui multus ex vulnere feretur; vulsella vero extrahetur; finitisque inflammationibus, imponetur aliquod medicamentum ex his, quæ leniter reprimunt. Pejus est, ubi aut ossi, aut cartilagini fractæ cutis quoque vulnus accessit. id admodum raro fit. Si incidit, illa quidem nihilo minus eadem ratione in suas sedes excitanda sunt: cuti vero superimponendum emplastrum aliquod ex his, quæ recentibus vulneribus accommodata sunt: sed insuper nullo vinculo deligandum est.

C A P U T VI.

De auribus fractis.

IN aure quoque interdum rumpitur cartilago: Quod si incidit, antequam pus oriatur, imponendum glutinans medicamentum est. sæpe enim suppurationem prohibet, & aurem confirmat. Illud & in hac & in naribus ignorari non oportet, non quidem cartilaginem ipsam glutinari, circa tamen carnem increescere, solidarique eum locum. Itaque, si cum cute cartilago rupta est, cutis utrinque sinitur. Nunc autem de ea dico, quæ, cute integra, frangitur. In ea vero si jam pus natum est, aperienda altera parte cutis, & ipsa cartilago contra lunata plaga excidenda est: deinde utendum est medicamento leniter sanguinem supprime, quale lycium est aqua dilutum, donec sanguis fluere desinat: tum imponendum linteolum cum emplastro, sic, ut pingue omne vitetur: & a parte posteriore lana mollis

auri subjienda est, quæ, quod est inter hanc & caput, compleat: tum leniter ea deliganda est; & a tertio die; vapore, ut in naribus posui, fovenda. Atque in his quoque generibus abstinentia primis temporibus necessaria est, donec inflammatio finiatur.

CAPUT VII.

De maxilla fracta, & quibusdam ad omnia ossa pertinentibus.

AB his ad maxillam venturus indicanda quædam puto communiter ad omnia ossa pertinentia, ne sæpius eadem dicenda sint. Omne igitur os, modo rectum, ut lignum in longitudinem finditur; modo frangitur transversum; interdum obliquum: atque id ipsum nonnunquam retusa habet capita, nonnunquam acuta. quod genus pessimum est: quia neque facile committuntur, quæ nulli retuso inniuntur; & carnem vulnerant, interdum quoque nervum aut musculum. Quin etiam aliquando plura fragmenta fiunt. Sed in aliis quidem ossibus ex toto sæpe fragmentum a fragmento recedit. Maxillæ vero semper aliqua parte, etiam vexata ossa inter se cohærent.

Igitur inprimis digitis duobus utrinque prementibus, & ab ore, & a cute, omnia ossa in suam sedem compellenda sunt: deinde, si maxilla transversa fracta est (sub quo casu fere dens super proximum dentem excedit) ubi ea in suam sedem collocata est, duo proximi dentes, aut, si hi labant,

ulteriores inter se feta deligandi sunt. id in alio genere fracturæ supervacuum est. cetera eadem facienda sunt. Nam linteolum duplex, madens vino & oleo, superinjiciendum cum eadem simila & eadem turis fuligine est: deinde aut fascia, aut mollis habena, media in longitudinem incisa, ut utrinque mentum complectatur, & inde capita ejus supra caput adducta ibi deligentur.

Illud quoque ad omnia ossa pertinens dictum erit, famem primum esse necessariam: deinde, a die tertio, humidum cibum; sublata inflammatione, paulo plenior, eumque, qui carnem alat: vinum per omne tempus esse alienum. Deinde tertio die resolvi debere, foverique per spongiam vapore aquæ calidæ, eademque, quæ primo fuerunt, superdari: idem quinto die fieri, & donec inflammatio finiatur; quæ vel octavo die, vel septimo fere solvitur: ea sublata, rursus ossa esse tractanda, ut, si quod fragmentum loco suo non est, reponatur. neque id esse solvendum, nisi duæ partes ejus temporis, intra quod quæque ossa confervent, transierint.

Fere vero inter quartumdecimum & unum & vicesimum diem sanescunt, maxilla, malæ, jugulum, pectus, latum os scapularum, costæ, spina, coxarum os, tali, calx, manus, planta: inter vicesimum & tricesimum diem, crura brachiaque: inter septimum & vicesimum & quadragesimum, humeri & femina.

Sed de maxilla illud quoque adjiciendum est, quod humidus cibus diu assumendus est. Atque

etiam, cum tempus processit, in lagano similibusque aliis perseverandum est, neque quidquam edendum, donec ex toto maxillam callus firmarit. Itemque, primis utique diebus, habendum silentium.

CAPUT VIII.

De jugulo fracto.

JUGULUM vero, si transversum fractum est, nonnunquam per se rursus recte coit, &, nisi movetur, sanari sine vinctura potest: nonnunquam vero, maximeque ubi motum est, elabitur; fereque id, quod a pectore est, sub id, quod ab humero est, in posteriorem partem inclinatur. Cujus ea ratio est, quod per se non movetur, sed cum humeri motu consentit. Itaque, eo subsistente, super id humerus agitur. Raro vero admodum in priorem partem jugulum inclinatur; adeo ut magni professores nunquam se vidisse memoriæ mandarint. Sed locuples tamen ejus rei auctor Hippocrates est.

Verum, ut dissimilis uterque casus est, sic quædam dissimilia requirit. Ubi ad scapulas jugulum tendit, simul dextra manu plana propellendus in posteriorem partem humerus est, & illud in priorem attrahendum. Ubi ad pectus conversum est, ipsum quidem retro dandum, humerus autem in priorem partem adducendus est: ac, si is inferior est, non id, quod a pectore est, deprimendum est, quia immobile est; sed humerus ipse attollendus: si autem superior est, id, quod a pectore est, implendum lana, & humerus ad pectus deligandus est.

Si acuta fragmenta sunt, incidi contra cutis debet; ex ossibus ea, quæ carnem vulnerant, præcidenda sunt; tunc retusa ossa committenda sunt; si quod ab aliqua parte eminet, opponendum ei triplex lin-teolum est in vino & oleo tinctum. Si plura fragmenta sunt, excipienda sunt ex ferula facto canaliculo, eodemque intus incerato. Ne fascia deducatur, quæ jugulo composito circumdanda est, sæpius potius, quam valentius. quod ipsum quoque in omnibus fractis perpetuum est. A dextro vero jugulo, si id fractum est, ad alam sinistram; a sinistro ad dexteram, rursus sub ala sua fasciari debet. Post hæc, si jugulum ad scapulas inclinatum est, brachium ad latus; si in partem priorem, ad cervicem deligandum est: supinusque homo collocandus. ceteraque eadem facienda, quæ supra comprehensa sunt.

2. *De diversis ossium curis.*

Sunt vero plura ossa fere immobilia, vel dura; vel cartilaginosa, quæ vel franguntur, vel forantur, vel colliduntur, vel finduntur, ut malæ, pectus, latum os scapularum, costæ, spina, coxarum os, tali, calx, manus, planta. Horum omnium eadem curatio est. Si supra vulnus est, id suis medicamentis nutriendum est. quo sanescente, rimas quoque ossis, aut, si quod foramen est, callus implet. Si cutis integra est, &, os læsum esse, ex dolore colligimus, nihil aliud, quam quiescendum; imponendumque ceratum est, & leniter deligandum, donec sanitate ossis dolor finiatur.

CAPUT IX.

De costis fractis.

PROPRIE tamen quædam de costa dicenda sunt; quia juxta viscera est, gravioribusque periculis is locus expositus est. Hæc quoque igitur interdum sic finditur, ut ne summum quidem os, sed interior pars ejus, quæ rara est, lædatur: interdum sic, ut eam totam is casus perruperit. Si tota fracta non est, nec sanguis exspuitur, nec febricula sequitur, nec quidquam suppurat, nisi admodum raro, nec dolor magnus est; tactu tamen is locus leviter indolescit. Abunde est eadem, quæ supra scripta sunt, facere; & a media fascia incipere deligare, ne in alterutram partem hæc cutem inclinet. Ab uno vero & vicesimo die, quo utique os esse debet glutinatum, id agendum cibus uberioribus est, ut corpus quam plenissimum fiat, quo melius os vestiatur: quod illo loco tenerum adhuc injuriæ sub tenui cute expositum est. Per omne autem tempus curationis, vitandus clamor, sermo quoque, tumultus, ira, motus vehementior corporis, fumus, pulvis, & quidquid vel tussim, vel sternutamentum movet: ne spiritum quidem magnopere continere expedit.

At, si tota costa perfracta est, casus asperior est. Nam & graves inflammationes, & febris, & suppuratio, & sæpe vitæ periculum sequitur, & sanguis spuitur. Ergo, si vires patiuntur, ab eo brachio, quod super eam costam est, sanguis mittendus est: si non patiuntur, alvus, tamen sine ullo

acri, ducenda est; diutiusque inedia pugnandum. Panis vero ante septimum diem non assumendus, sed una sorbitione vivendum: imponendumque ei loco ceratum ex lycio factum, cui cocta quoque resina adjecta sit, aut Polyarchi malagma; aut panni ex vino & rosa & oleo; superque imponenda lana succida mollis, & duæ fasciæ a mediis orsæ, minimeque adstrictæ. Multo vero magis omnia vitanda, quæ supra posui; adeo, ut ne spiritus quidem sæpius movendus sit. Quod si tussis infestabit, ad id potio sumenda erit, vel ex trixagine, vel ex ruta, vel ex herba stœchade, vel ex cumino & pipere. Gravioribus vero doloribus urgentibus, cataplasma imponi quoque conveniet, vel ex lolio, vel ex hordeo, cui pinguis fici tertia pars sit adjecta. Et id quidem interdiu superjacebit: noctu vero idem aut ceratum, aut malagma, aut panni, quia potest cataplasma decidere. Ergo quotidie quoque resolvetur, donec jam cerato aut malagmate possumus esse contenti. Et decem quidem diebus extenuabitur fame corpus; ab undecimo vero ali incipiet. ideoque etiam laxior, quam primo, fascia circumligabitur. Fereque ea curatio ad quadragesimum diem perveniet.

Sub qua si metus erit suppurationis, plus malagma, quam ceratum, ad digerendum proficiet. Si suppuratio vicerit, neque per quæ supra scripta sunt, discuti potuerit; omnis mora vitanda erit, ne os infra vitietur: sed, qua parte maxime tumebit, demittendum erit candens ferramentum, donec ad pus perveniat; idque effundendum. Si nusquam ca-

put se ostendit, ubi maxime pus subfit, sic intelligemus. creta cimolia totum locum illinemus, & ficcari patiemur: quo loco maxime humor in ea perseverabit, ubi pus proximum erit; eoque uri debet. Si latus aliquid abscedet, duobus aut tribus locis erit perforandum; demittendumque linamentum, aut aliquid ex penicillo. quod summum lino sit devinctum, ut facile educatur. Reliqua eadem, quæ in ceteris adustis, facienda sunt. Ubi purum erit ulcus, ali corpus debet, ne tabes, perniciofa futura, id malum subsequatur. Nonnunquam etiam, levius ipso osse affecto, & inter initia neglecto, non pus, sed humor quidam muccis similis, intus coit; mollescitque contra cutis. In qua simili uestione utendum est.

2. *De spina fracta.*

In spina quoque est, quod proprie notemus. Nam si id, quod ex vertebra excedit, aliquo modo fractum est, locus quidem concavus fit; punctiones autem in eo sentiuntur, quia necesse est ea fragmenta spinosa esse. quo fit, ut homo in anteriorem partem subinde nitatur. Hæc noscenda rei causa sunt. Medicamentis vero iisdem opus est, quæ plurima parte hujus capituli exposita sunt.

CAPUT X.

De humerorum, brachiorum, femorum, crurum, digitorum fracturum, vel evulforum, communibus curationibus.

SIMILES rursus ex magna parte casus curationesque sunt humeris & femoribus. Communia etiam quædam humeris, brachiis, femoribus, cruribus, digitis: siquidem ea minime periculose media franguntur. Quo propior fractura capiti vel superiori vel inferiori est, eo peior est. nam & majores dolores affert, & difficilior curatur. Ea maxime tolerabilis est simplex, transversa: peior, ubi obliqua, atque ubi fragmenta: pessima, ubi eadem acuta sunt. Nonnunquam autem fracta in his ossa in suis sedibus remanent: multo sæpius excidunt, aliudque super aliud effertur. idque ante omnia considerari debet: & sunt notæ certæ. Si suis sedibus sunt, mota resonant, punctioisque sensum repræsentant, tactu inæqualia sunt. Si vero non adversa, sed obliqua junguntur, (quod fit, ubi loco suo non sunt) membrum id altero latere brevius est, & musculi ejus tument.

Ergo, si hoc deprensum est, protinus id membrum oportet extendere. Nam nervi musculique, intenti per ossa, contrahuntur: neque hæc in suum locum veniunt, nisi illos per vim aliquis intendit. Rursus, si primis diebus id omissum est, inflammatio oritur. Sub qua & difficile, & periculose, vis nervis adhibetur. nam distentio nervorum vel can-

cer sequitur; vel certe, ut mitissime agatur, pus- itaque, si ante reposita ossa non sunt, postea re- ponenda sunt. Intendere autem digitum, vel aliud quoque membrum, si adhuc tenerum est, etiam unus homo potest; cum alteram partem dextra, alteram sinistra prendit. Valentius membrum duo- bus eget, qui in diversa contendunt. Si firmiores nervi sunt, ut in viris robustis, maximeque eorum feminibus & cruribus evenit; habenis quoque, vel linteis fasciis utrinque capita articulorum deligan- da, & per plures in diversa ducenda sunt. Ubi paulo longius, quam naturaliter esse debet, mem- brum vis fecit; tum demum ossa manibus in suam sedem compellenda sunt: indiciumque ossis repo- siti est dolor sublatus. Et membrum alteri æqua- tum, involvendum duplicibus triplicibusve pannis in vino & oleo tinctis: quos linteos esse, com- modius est.

Fere vero fasciis sex opus est. Prima brevissima adhibenda: quæ circa fracturam ter voluta sursum versum feratur, & quasi in cochlea serpat; satis- que est, eam ter hoc quoque modo circuire. Altera dimidio longior ea: quæ, si qua parte os eminet, ab ea, si totum æquale est, undelibet super fractu- ram incipere debet, priori adversa, deorsumque tendere; atque iterum ad fracturam reversa, in su- periore parte ultra priorem fasciam desinere. Super has injiciendum latiore linteo ceratum est, quod eas contineat. Ac, si qua parte os eminet, triplex ea pannus objiciendus, eodem vino & oleo ma- dens. Hæc tertia fascia comprehendenda sunt, quar;

taque, sic, ut semper insequens priori adversa sit, & tertia tantum in inferiore parte, tres in superiore finiant: quia satius est sæpius circumire, quam adstringi: siquidem id, quod adstrictum est, alienatur, & cancro opportunum est. Articulum autem quam minime vincire opus est: sed, si juxta hunc os fractum est, necesse est.

Deligatum vero membrum in diem tertium continendum est. Eaque vinctura talis esse debet, ut primo die nihil offenderit, non tamen laxa visa sit; secundo laxior; tertio jam pæne resoluta. Ergo tum rursus id membrum deligandum, adjiciendaque prioribus quinta fascia est, iterumque quinto die resolvendum est, & tum sex fasciis involvendum, sic, ut tertia & quinta infra, ceteræ supra finiantur. Quotiescunque autem solvitur membrum, calida aqua fovendum est. Sed, si juxta articulum fractura est, diu instillandum vinum est, exigua parte olei adjecta, eademque omnia facienda, donec adeo inflammatio solvatur, ut tenuius quoque, quam ex consuetudine, id membrum fiat. quod si septimus dies non dedit, certe nonus exhibet. tum facillime ossa tractantur.

Rursus ergo, si parum commissa sunt, committi debent: si qua fragmenta eminent, in suas sedes reponenda sunt: deinde eodem modo membrum deligandum, ferulæque super accommodandæ sunt, quæ fissæ circumpositæque ossa in sua sede contineant: &, in quam partem fractura inclinat, ab ea latior valentiorque ferula imponenda est. Easque omnes circa articulum esse oportet resimas,

ne hunc lædant, nec ultra adstringi, quam ut ossa contineant: & cum spatio laxentur, tertio quoque die paulum habenis suis coarctari; ac, si nulla prurigo, nullus dolor est, sic manere, donec duæ partes ejus temporis, quo os quodque confervet, compleantur: postea levius aqua calida fovere; quia primo digeri materiam opus est, tum evocari. Ergo cerato quoque liquido id leniter est unguendum, perfricandaque summa cutis est: laxiusque id deligandum est. Tertio quoque die solvendum, sic, ut remota calida aqua, cetera eadem fiant; tantummodo singulæ fasciæ, quoties resolutæ fuerint, subtrahantur.

2. *De humero fracto.*

Hæc communia sunt: illa propria. Siquidem humerus fractus, non sic, ut membrum aliud, intenditur: sed homo collocatur alto sedili, medicus autem humiliore adversus. Una autem fascia, brachium amplexa, ex cervice ipsius, qui læsus est, id sustinet: altera, ab altera parte super caput data, ibi accipit nodum: tertia, vincto imo humero deorsum demittitur, ibi quoque capitibus ejus inter se vinctis. Deinde ab occipitio ipsius, minister sub ea fascia, quam secundo loco posui, porrecto, si dexter humerus ducendus est, dextro, si sinister, sinistro brachio, demissum inter femina ejus, qui curatur, baculum tenet; medicus super eam fasciam, de qua tertio loco dixi, plantam injicit dextram, si sinister, sinistram, si dexter humerus curatur; simulque alteram fasciam minister attollit, alteram premit medi-

cus : quo fit , ut leniter humerus extendatur. Fasciis vero , si medium aut imum os fractum est , brevioribus opus est ; si summum , longioribus : ut ab eo sub altera quoque ala per pectus & scapulas porrigantur. Protinus vero brachium , cum deligatur , sic inclinandum est , ut id , quod afficitur , ante fascias quoque sic figuratum sit , ne postea suspensum aliter , atque cum deligabatur , humerum inclinet. Brachioque suspenso , ipse quoque humerus ad latus leniter deligandus est. per quæ fit , ut minime moveatur : ideoque ossa sic se habent , ut aliquis composuit. Cum ad ferulas ventum est , extrinsecus esse earum longissimæ debent : a lacerto breviores ; sed sub ala brevissimæ. Sæpiusque eæ resolvendæ sunt , ubi in vicinia cubiti humerus fractus est , ne ibi nervi rigescant , & inutile brachium efficiant. Quoties solutæ sunt , fractura manu continenda ; cubitus aqua calida fovendus , & molli cerato perfricandus , ferulæque vel omnino non imponendæ contra eminentia cubiti , vel aliquanto breviores sunt.

3. *De brachio fracto.*

At , si brachium fractum est , in primis considerandum est , alterum os , an utrumque comminutum sit : non quo alia in ejusmodi casu curatio sit admovenda ; sed primum , ut valentius extendatur , si utrumque os fractum est ; quia necesse est minus nervos contrahi altero osse integro , eosque intendente : deinde , ut curiosius omnia in continendis ossibus fiant , si neutrum alteri auxilio est. nam , ubi alterum integrum est , plus opis in eo , quam in

fasciis ferulisque est. Deligari autem brachium debet, paulum pollice ad pectus inclinato; siquidem is maxime brachii naturalis habitus sit: idque involutum mitella commodissime excipitur. quæ latitudine ipsi brachio, perangustis capitibus collo injicitur: atque ita commode brachium ex cervice suspensum est. Idque paulum supra cubiti alterius regionem pendere oportet.

4. *De cubito fracto.*

Quod si ex summo cubito quid fractum sit, glutinare id vinciendo alienum est. fit enim brachium immobile. At, si nihil aliud quam dolori occursum est, idem, qui fuit, ejus usus est.

5. *De cruribus femoribusque fractis.*

In crure æque ad rem pertinet, alterum saltem os integrum manere. commune vero ei femorique est, quod, ubi deligatum est, in canalem conjiciendum est. Is canalis inferiori parte foramina habet, per quæ, si quis humor excesserit, descendat: & a planta moram, quæ simul & sustineat eam, & delabi non patiatur: & a lateribus cava, per quæ loris datis, mora quidem crus femurque, ut collocatum est, detineat. Esse etiam is debet, a planta, si crus fractum est, circa poplitem; si femur, usque ad coxam; si juxta superius caput femoris, sic, ut ipsa quoque ei coxa insit. Neque tamen ignorari oportet, si femur fractum est, fieri brevius; quia nunquam in antiquum statum revertitur: summisque digitis postea cruris ejus insisti. ex quo multa

debilitas est; foedior tamen, ubi fortunæ negligentia quoque accessit.

6. *De digito fracto.*

Digitum satis est ad unum furculum post inflammationem deligari.

7. *Communes curationes ad humeros, brachia, crura, femina, digitosque confractos pertinentes.*

His proprie ad singula membra pertinentibus; rursus illa communia sunt: primis diebus fames: deinde tum, cum jam increscere callum oportet, liberalius alimentum: longa a vino abstinencia: fomentum aquæ calidæ, dum inflammatio est, liberale; cum ea defuit, modicum: tum etiam longior ulterioribus, e liquido cerato, membris, & mollis tamen unctio. Nec protinus exercendum id membrum, sed paulatim ad antiquos usus reducendum est.

Gravius aliquanto est, cum ossis fracturæ carnis quoque vulnus accessit; maximeque, si id musculi femoris aut humeri senserint. nam & inflammationes multo graviores, & promptiores caneros habent: Ac femur quidem, si ossa inter se cesserunt, fere præcidi necesse est. Humerus vero quoque in periculum venit; sed facilius conservatur. Quibus periculis etiam magis id expositum, quod juxta ipsos articulos ictum est. Curiosius igitur agendum est, & musculus quidem per mediam plagam transversus præcidendus: sanguis vero, si parum fluxit, mittendus: corpus inedia in decimum diem extenuan-

dum. Ac reliqua quidem membra lentius intendenda, & lenius in his ossa in suam sedem reponenda sunt: his vero neque intendi nervos, neque ossa tractari, fatis expedit. ipsique homini permittendum est, ut sic ea collocata habeat, quemadmodum minime lædunt. Omnibus autem his vulneribus imponendum primo linamentum est ex vino madens, cui rosæ paulum admodum adjectum sit: cetera eadem. Deliganda fasciis sunt, aliquanto, quam vulnus, latioribus; laxius scilicet, quam si ea plaga non esset; quantoque facilius & alienari & occupari cancro vulnus potest, numero potius fasciarum id agendum est, ut laxæ quoque æque contineant.

Quod in femore humeroque sic fiet, si ossa forte recte concurrerint: sin aliter se habebunt, eatenus circumdari fascia debebit, ut impositum medicamentum contineat. Cetera eadem, quæ supra scripsi, facienda sunt, præterquam quod neque ferulis, neque canalibus, inter quæ vulnus sanescere non potest; sed pluribus tantummodo & latioribus fasciis opus est: ingerendumque subinde in eas est calidum oleum, & vinum, magisque in principio fame utendum; vulnus calida aqua fovendum; frigusque omni ratione vitandum, & transeundum ad medicamenta, quæ puri movendo sunt. Majorque vulneri, quam ossi cura agenda. ergo quotidie solvendum nutriendumque est.

Inter quæ si quod parvulum fragmentum ossis eminet, id, si retusum est, in suam sedem dandum; si acutum, ante acumen ejus, si longius est, præ-

cidendum; si brevius, limandum, & utrumque scalpro lævandum: tum ipsum recondendum est. ac si id manus facere non potest, vulsella, (quali fabri utuntur, injicienda recte se habenti capiti, ab ea parte, qua sima est; ut ea parte, qua gibba est, emiens os in suam sedem compellat. Si id majus est, membranulisque cingitur, finire oportet eas sub medicamentis resolvi, idque os, ubi jam nudatum est, abscidere; quod maturius scilicet faciendum est. potestque ea ratione & os coire, & vulnus sanescere: illud suo tempore; hoc, prout se habet.

Nonnunquam etiam in magno vulnere evenit, ut fragmenta quædam velut emoriantur, neque cum ceteris coeant: quod hic quoque ex modo fluentis humoris colligitur. Quo magis necessarium est, sæpius ulcus resolvere atque nutrire. Sequitur vero, ut id os per se post aliquot dies excidat. Cum tam misera antea conditio vulneris sit, tamen id interdum majus diutiusque facies.

Sæpe etiam integra cute os abrumpitur, protinusque prurigo & dolor oritur. Quæ solvere, si accidit, maturius oportet, & fovere aqua, per æstatem, frigida; per hiemem, egelida: deinde ceratum myrteum imponere. Interdum fractura quibusdam velut aculeis carnem vexat. Quo a prurigine & punctiõibus cognito, aperire id medicus, eosque aculeos præcidere necesse habet. Reliqua vero curatio in utroque hoc casu eadem est, quæ, ubi plagam ictus protinus intulit. Puro jam ulcere, cibis hic quoque utendum est carnem producentibus. Si brevius adhuc membrum est, & ossa loco suo non

sunt, paxillus tenuis & quam lævissimi generis inter ea demitti debet, sic, ut capite paulum supra ulcus emineat; isque quotidie plenior adigendus est, donec par id membrum alteri fiat. Tum paxillus removendus, vulnus sanandum est. Cicatrix inducenda frigida aqua est, in qua myrtus, hederæ, aliæve similes verbenæ decoctæ sint: illinendumque medicamentum, quod siccet. & magis etiam hic quiescendum, donec id membrum confirmetur.

Si quando vero ossa non conferbuerunt, quia sæpe soluta, sæpe mota sunt, in aperto deinde curatio est; possunt enim coire. Si vetustas occupavit, membrum extendendum est, ut aliquid lædatur: ossa inter se manu dividenda, ut concurrente exasperentur, & si quid pingue est, eradatur, totumque id quasi recens fiat: magna tamen cura habita, ne nervi musculive lædantur. Tum vino fovendum est, in quo malicorium decoctum sit; imponendumque id ipsum ovi albo mixtum: tertio die resolvendum, fovendumque aqua, in qua verbenæ, de quibus supra dixi, decoctæ sint: quinto die idem faciendum, ferulæque circumdandæ: cetera, & ante, & post, eadem facienda, quæ supra scripsi. Solent tamen interdum diversa inter se ossa confervere: eoque & brevius membrum, & indecorum fit; & si capita acutiora sunt, assiduæ punctiones sentiuntur. Ob quam causam frangi rursus ossa & dirigi debent. Id hoc modo fit. Calida aqua multa membrum id fovetur, & ex cerato liquido perfricatur, intenditurque: inter hæc, medicus pertractans ossa, ut adhuc tenero callo, manibus ea di-

ducit, compellitque id, quod eminet, in suam sedem : & , si parum valuit , ab ea parte , in quam os se inclinat , involutam lana regulam objicit ; atque ita deligando , assuescere iterum vetustæ sedi cogit.

Nonnunquam autem recte quidem ossa coeperunt , superincrevit vero nimius callus ; ideoque locus intumuit. Quod ubi incidit , diu leniterque id membrum perfricandum est ex oleo , & sale , & nitro ; multumque aqua calida salsa fovendum ; & imponendum malagma , quod digerat ; adstrictiusque alligandum : oleribusque , & præterea vomitu utendum , per quæ cum carne callus quoque extenuatur : confertque aliquid de sinapi cum ficu in alterum par membrum impositum , donec id paulum erodat , eoque evocet materiam. Ubi his tumor extenuatus est , rursus ad ordinem vitæ revertendum est.

C A P U T XI.

De ossibus luxatis.

AC de fractis quidem ossibus hætenus dictum sit. Moventur autem ea sedibus suis duobus modis. Nam modo , quæ juncta sunt , inter se dehiscunt : ut cum latum os scapularum ab humero recedit ; & in brachio , radius a cubito ; & in crure , tibia a fura ; interdum saltu , calcis os a talo ; quod raro tamen fit : modo articuli suis sedibus excidunt. Ante de prioribus dicam.

Quorum ubi aliquid incidit , protinus is locus cavus est , depressusque digitus sinum invenit. dein-

de gravis inflammatio oritur ; atque in talis præcipue : siquidem febres quoque , & caneros , & nervorum vel distentiones , vel rigores , qui caput scapulis annectunt , movere consuevit. Quorum vitandorum causa , facienda eadem sunt , quæ in ossibus mobilibus læsis. Ubi aliquid incidit , protinus his locis proposita sunt , ut dolor tumorque per ea tollantur. Nam diducta ossa nunquam rursus inter se junguntur : & , ut aliquid decoris eo loco , sic nihil usus admittitur.

Maxilla vero & vertebræ , omnesque articuli , cum validis nervis comprehendantur , excidunt aut vi expulsi , aut aliquo casu nervis vel ruptis , vel infirmatis ; faciliusque in pueris & adolescentulis , quam in robustioribus. Hique elabuntur in priorem & in posteriorem , in anteriorem & in posteriorem partem : quidam omnibus modis , quidam certis. Suntque quædam communia omnium signa , quædam propria cuiusque. siquidem semper ea parte tumor est , in qua os prorumpit ; ea sinus , a qua recessit. Et hæc quidem in omnibus deprehenduntur , alia vero in singulis. quæ , simulatque de quoque dicam , proponenda erunt.

Sed ut excidere omnes articuli possunt , sic non omnes reponuntur. Caput enim nunquam compellitur , neque in spina vertebra , neque ea maxilla , quæ , utraque parte prolapsa , antequam reponeretur , inflammationem movit. Rursum , qui nervorum vitio prolapsi sunt , compulsi quoque in suas sedes iterum excidunt. Ac , quibus in pueritia exciderunt , neque repositi sunt , minus , quam ceteri ,

crescunt : omniumque , quæ loco suo non sunt ; caro emacrescit , magisque in proximo membro , quam in ulteriore. utputa , si humerus loco suo non est , major in eo ipso fit macies , quam in brachio ; major in hoc , quam in manu. Tum pro sedibus , & pro casibus , qui inciderunt , aut major , aut minor usus ejus membri relinquitur : quoque in eo plus usus superest , eo minus id extenuatur.

Quidquid autem loco suo motum est , ante inflammationem reponendum est. Si illa occupavit , dum conquiescat , laceffendum non est : ubi finita est , tentandum est in his membris , quæ id patiuntur. Multum autem eo confert & corporis & nervorum habitus. Nam , si corpus tenue , si humidum est , si nervi infirmi , expeditius os reponitur ; sed & primo facilius excidit , & postea minus fideliter continetur. Quæ contraria his sunt , melius continent : sed id , quod expulsum est , difficulter admittunt. Oportet autem ipsam inflammationem levare , super succida lana ex aceto imposita : a cibo , si valentioris articuli casus est , triduo ; interdum etiam quinque diebus abstinere : bibere aquam calidam , dum sitim finiat : curiosiusque hæc facere , his ossibus motis , quæ validis plenisque musculis continentur : si vero etiam febris accessit , multo magis : deinde ex die quinto fovere aqua calida ; remotaque lana , ceratum imponere ex cyprino factum ; nitro quoque adjecto , donec omnis inflammatio finiatur. Tunc infriktionem ei membro adhibere : cibis uti bonis ; uti vino modice : jamque

ad usus quoque suos id membrum promovere ; quia motus , ut in dolore pestifer , sic alias saluberrimus corpori est. Hæc communia sunt : nunc de singulis dicam.

CAPUT XII.

De maxilla luxata.

MAXILLA in priorem partem propellitur , sed modo altera parte , modo utraque. Si altera , in contrariam partem ipsa mentumque inclinatur : dentes paribus non respondent ; sed sub his , qui secant , canini sunt. At , si utraque , totum mentum in exteriorem partem promovetur ; inferioresque dentes longius , quam superiores , excedunt ; intumescuntque super muscoli apparent. Primo quoque tempore homo in sedili collocandus est , sic , ut minister a posteriore parte caput ejus contineat , vel sic , ut juxta parietem is sedeat , subjecto inter parietem & caput ejus scorteo pulvino duro , eoque caput per ministrum urgeatur , quo sit immobilius. tum medici digiti pollices , linteolis vel fasciis , ne dilabantur , involuti in os ejus conjiciendi , ceteri extrinsecus admovendi sunt. ubi vehementer maxilla apprehensa est , si una parte procidit , concutiendum mentum , & ad guttur adducendum est : tunc simul & caput apprehendendum , & , excitato mento , maxilla in suam sedem compellenda , & os ejus comprimendum est , sic , ut omnia pæne uno momento fiant. Sin utraque parte prolapsa est , eadem omnia facienda ; sed æqualiter retro maxilla

agenda est. Reposito osse, si cum dolore oculorum & cervicis iste casus incidit, ex brachio sanguis mittendus est. Cum omnibus vero, quorum ossa mota sunt, primo liquidior cibus conveniat, tum his præcipue: adeo ut sermo quoque, frequenti motu oris, per nervos lædat.

C A P U T XIII.

De capite luxato.

CAPUT duobus processibus in duos sinus summæ vertebræ demissis super cervicem contineri, in prima parte proposui. Hi processus interdum in posteriorem partem excidunt: quo fit, ut nervus sub occipitio extendatur: mentum pectori agglutinetur, neque bibere is, neque loqui possit, interdum sine voluntate semen emittat. quibus celerime mors supervenit. Ponendum autem hoc esse credidi, non quo curatio ejus rei ulla sit; sed ut res indiciiis cognosceretur, & non putarent sibi medicum defuisse, si qui sic aliquem perdidissent.

C A P U T XIV.

De spina luxata.

IDEM casus manet eos, quorum in spina vertebræ exciderunt. Id enim non potest fieri, nisi & medulla, quæ per medium; & duabus membranulis, quæ per duos a lateribus processus feruntur; & nervis, qui continent, ruptis. Excidunt autem & in posteriorem partem, & in priorem: & supra

septum transversum, & infra. In utramvis partem exciderit, a posteriore parte vel tumor, vel sinus oritur. Si super septum id incidit, manus resolvuntur, vomitus, aut distentio nervorum insequitur, spiritus difficulter movetur; dolor urget, & aures obtusæ sunt. Si sub septo, femina resolvuntur, urina supprimitur, interdum etiam sine voluntate prorumpit. Ex ejusmodi casibus, ut tardius, quam ex capitis, sic tamen intra triduum homo moritur. Nam, quod Hippocrates dixit, vetrebra in exteriorem partem prolapsa, pronum hominem collocandum esse, & extendendum, tum calce aliquem super ipsum debere consistere, & intus impellere: in his accipiendum est, quæ paulum excefferunt; non in his, quæ toto loco motæ sunt. Nonnunquam enim nervorum imbecillitas efficit, ut, quamvis non exciderit vertebra, paulum tamen in priorem partem promineat. id non jugulat. Sed ab interiore parte non contingit quidem posse; ab exteriori si propulsum est, plerumque iterum redit: nisi, quod admodum rarum est, vis nervis restituta est.

CAPUT XV.

De humero luxato.

HUMERUS autem modo in alam excidit, modo in partem priorem. Si in alam delapsus est, ei junctus cubitus recedit ab latere, rursus juxta ejusdem partis aurem cum humero porrigi non potest, longiusque altero id brachium est. Si in priorem partem, summum quidem brachium extenditur, mi-

nus tamen, quam naturaliter; difficiliusque in priorem partem, quam in posteriorem cubitus porrigitur.

Igitur, si in alam humerus excidit, vel puerile adhuc est corpus, vel molle certe & imbecilibus nervis intentum est, fatis est collocare id in sedili; & ex duobus ministris alteri imperare, ut caput lati scapularum ossis leniter reducat; alteri, ut brachium extendat: ipsum posteriore parte residentem, humerum genu sub ala ejus cogere, simulque & latum os, & altera manu brachium ejus ad latus impellere.

At, si vastius corpus, nervive robustiores sunt, necessaria est spathula lignea, quæ & crassitudinem duorum digitorum habet, & longitudine ab ala ad digitos pervenit. in qua summa capitulum est rotundum, & leniter cavum, ut recipere particulam aliquam ex capite humeri possit. In ea bina foramina tribus locis sunt, inter se spatio distantibus; in quæ lora mollia conjiciuntur. Eaque spatha, fascia involuta, quo minus tactu lædat, ad alam a brachio dirigitur, sic, ut caput ejus summæ alæ subjiciatur: deinde, loris suis ad brachium deligatur; uno loco, paulum infra humeri caput; altero, paulum supra cubitum; tertio, supra manum. cui rei protinus intervalla tunc quoque foraminum aptata sunt. Sic brachium deligatum super scallæ gallinariæ gradum trajicitur, ita altæ, ut consistere homo ipse non possit; simulque in alteram partem corpus demittitur, in alteram brachium intenditur: eoque fit, ut capite ligni caput humeri

impulsum in suam sedem, modo cum sono, modo sine hoc compellatur. Multas esse alias rationes, scire facile est uno Hippocrate lecto; sed non alia magis usu comprobata est.

At, si in partem priorem humerus excidit, supinus homo collocandus; fasciaque, aut habena, media ala circumdanda est, capitaque ejus post caput hominis ministro tradenda; brachium alteri; præcipiendumque, ut ille habenam, hic brachium extendat: deinde medicus, caput quidem hominis sinistra debet repellere; dextra vero cubitum cum humero attollere, & os in suam sedem compellere. faciliusque id in hoc casu, quam in priore, revertitur. Reposito humero, lana alæ subjicienda est; si in interiore parte os fuit, ut ei opponatur; si in priore, ut tamen commodius deligetur. Tum fascia, primum sub ala obvoluta, caput ejus debet comprehendere, deinde per pectus ad alteram alam, ab eaque ad scapulas, rursusque ad ejusdem humeri caput tendere, sæpiusque ad eandem rationem circumagi, donec bene id teneat. Vinculus hac ratione humerus commodius continetur, si adductus ad latus sit, & ad id quoque fascia deligetur.

CAPUT XVI.

De cubito luxato.

IN cubito autem tria coire ossa, humeri, & radii, & cubiti ipsius, ex his, quæ prima parte hujus voluminis posita sunt, intelligi potuit. Si cubitus, qui annexus humero est, ab hoc excidit, radius,

qui adjunctus est, interdum distrahitur, interdum subsistit. In omnes vero quatuor partes excidere cubitus potest: sed, si in priorem prolapsus est, extensum brachium est, neque recurvatur: si in posteriorem, brachium curvum est, neque extenditur, breviusque altero est; interdum febrem, vomitumque bilis movet: si in anteriorem, interioremve, brachium porrectum est, sed paulum in eam partem, a qua os recessit, recurvatum.

Quidquid incidit, reponendi ratio una est (neque in cubito tantum, sed in omnibus quoque membris longis, quæ per articulum longa testa junguntur) utrumque membrum in diversas partes extendere, donec spatium inter ossa liberum sit; tum id os, quod excidit, ab ea parte, in quam prolapsum est, in contrariam impellere. Extendendi tamen alia atque alia genera sunt, prout nervi valent, aut ossa huc illucve se dederunt. Ac modo manibus solis utendum est, modo quædam alia adhibenda.

Ergo, si in priorem partem cubitus prolapsus est, extendi per duos manibus, interdum etiam habenis injectis, satis est: deinde rotundum aliquid, a lateris parte ponendum est, & super id repente cubitus ad humerum impellendus est. At in aliis casibus commodissimum est eadem ratione brachium extendere, quæ, fracto cubito, supra posita est, & tum ossa reponere.

Reliqua curatio eadem est, quæ in omnibus. Celerius tantum sæpiusque id resolvendum est; multoque magis aqua calida fovendum, diutius ex oleo & nitro ac sale perfricandum. In cubito enim celerius,

quam in ullo alio articulo, five extra remansit, five intus revertit, callus circumdatur, isque, si per quietem increvit, flexus illius postea prohibet.

C A P U T XVII.

De manu luxata.

MANUS quoque in omnes quatuor partes prolabitur. Si in posteriorem partem excidit, porrigi digiti non possunt: si in priorem, non inclinantur: si in alterutrum latus, manus in contrarium, id est, aut ad pollicem, aut ad minimum digitum convertitur. Reponi non difficillime potest. Super durum locum & renitentem ex altera parte intendi manus, ex altera brachium debet, sic, ut prona sit, si in posteriorem partem os excidit; supina, si in priorem; si in interiorem exterioremve, in latus. Ubi satis nervi diducti sunt, si in alterutrum latus procidit, manibus in contrarium repellendum est. At his, quæ in priorem posterioremve partem prolapsa sunt, superimponendum durum aliquid, idque supra prominens os manu urgendum est, per quod os vis adjecta facilius in suam sedem compellit.

C A P U T XVIII.

De palma luxata.

IN palma quoque ossa interdum suis sedibus promoventur, modo in priorem partem, modo in posteriorem. In latus enim moveri, paribus ossibus oppositis, non possunt. Signum id solum est, quod

omnium commune est. tumor ab ea parte, in quam os venit; sinus ab ea, a qua recessit. Sed sine intentione, digito tantummodo bene pressum os in suam sedem revertitur.

C A P U T XIX.

De digitis luxatis.

AT in digitis totidem fere casus, eademque signa sunt, quæ in manibus. Sed in his extendendis non æque vi opus est; cum & articuli breviores, & nervi minus validi sunt. Super mensam tantummodo intendi debent, qui vel in priorem vel in posteriorem partem exciderunt: tum jam palma compelli; at id, quod in latus elapsum est, digitis restitui.

C A P U T XX.

De femore luxato.

CUM de his dixerim; de iis quoque, quæ in crucibus sunt, videri possum dixisse: siquidem etiam in hoc casu quædam similitudo est femori & humero, tibiæ & cubito, pedi & manui. quædam tamen separatim quoque de his dicenda sunt.

Femur in omnes quatuor partes promovetur: sæpiissime in interiorem; deinde in exteriorem; raro admodum in priorem, aut posteriorem. Si in interiorem partem prolapsum est, crus longius altero & valgius est: extra enim pes ultimus spectat. Si in exteriorem, brevius, varumque fit, & pes intus inclinatur; calx ingressu terram non contingit, sed

planta ima; meliusque id crus superius corpus, quam in priore casu, fert, minusque baculo eget. Si in priorem, crus extensum est, implicarique non potest; alteri cruri ad calcem par est; sed ima planta minus in priorem partem inclinatur: dolorque in hoc casu præcipuus est; & maxime urina supprimitur. Ubi cum dolore inflammatio quievit, commode ingrediuntur, rectusque eorum pes est. Si in posteriorem, extendi non potest crus, breviusque est; ubi consistit, calx quoque terram non contingit.

Magnum autem femori periculum est, ne vel difficulter reponatur, vel repositum rursus excidat. Quidam semper iterum excidere contendunt: sed Hippocrates, & Diocles, & Philotimus, & Nileus, & Heraclides Tarentinus, clari admodum auctores, ex toto se restituisse memoriæ prodiderunt. Neque tot genera machinamentorum quoque, ad extendendum in hoc casu femur, Hippocrates, Andreas, Nileus, Nymphodorus, Protarchus, Heraclides, faber quoque quidam reperissent, si id frustra esset. Sed ut hæc falsa opinio est; sic illud verum est: cum ibi valentissimi nervi musculique sint, si suum robur habent, vix admittere; si non habent, postea non continere.

Tentandum igitur est, & si tenerius membrum est, fatis est habenam alteram ab inguine, alteram a genu intendi: si validius, melius adducent, qui easdem habenas ad valida bacula deligarint; tumque eorum fustium imas partes oppositæ moræ obicerint, superioresque ad se utraque manu traxerint. Etiamnum valentius intenditur membrum super scæ

mnium, cui ab utraque parte axes sunt, ad quos habentur illæ deligantur: qui, ut in torcularibus, conversi, rumpere quoque, si quis perseveraverit, non solum extendere nervos & musculos possunt. Collocandus autem homo super id scamnum est, aut pronus, aut supinus, aut in latus, sic, ut semper ea pars superior sit, in quam os prolapsum est; ea etiam inferior, a qua recessit. Nervis extentis, si in priorem partem os venit, rotundum aliquid super inguen ponendum; subitoque super id genu adducendum est eodem modo, eademque de causa, qua idem in brachio fit; protinusque, si complicari femur potest, intus est.

In ceteris vero casibus, ubi ossa per vim paulum inter se recesserunt, medicus debet id, quod eminet, retro cogere; minister contra inde coxam propellere. Reposito osse, nihil novi aliud curatio requirit, quam ut diutius is in lecto detineatur; ne, si motum femur fuerit adhuc laxioribus nervis, rursus erumpat.

C A P U T XXI.

De genu luxato.

GENU vero & in anteriorem, & in posteriorem, & in posteriorem partem excidere, notissimum est. In anteriorem non prolabi, plerique scripserunt. potestque id vero proximum esse; cum inde opposita patella, ipsa quoque caput tibiæ contineat. Meges tamen eum, cui in anteriorem partem excidisset, a se curatum esse, memoriæ prodidit.

In his casibus intendi nervi rationibus iisdem, quas in femore retuli, possunt. Et id quidem, quod in posteriorem partem excidit, eodem modo rotundo aliquo super poplitem imposito, adductoque eo cruce, reconditur; cetera vero manibus simul, dum ossa in diversas partes compelluntur.

C A P U T XXII.

De talo luxato.

TALUS in omnes partes prolabitur. Ubi in anteriorem partem excidit, ima pars pedis in anteriorem partem convertitur. Ubi huic contrarius casus, contrarium etiam signum est. At, si in priorem partem erumpit, a posteriore latus nervus durus & intentus est; simulque is pes est. Si in posteriorem, calx pæne conditur, planta major fit. Reponitur autem is quoque per manus; prius in diversa pede & crure diductis. Et in hoc quoque casu diutius in lectulo perseverandum est, ne is talus, qui totum corpus sustinet, parum confirmatis nervis, ferendo oneri cedat, rursusque prorumpat. Calceamentis quoque humilioribus primo tempore utendum, ne vinctura talum ipsum lædat.

C A P U T XXIII.

De planta luxata.

PLANTÆ vero ossa iisdem modis, quibus in manu, prodeunt; iisdemque conduntur. Fascia tantummodo calcem quoque debet comprehendere,

ne, cum mediam plantam, imumque ejus vinciri necesse est, liber talus in medio relictus, materiam pleniorē recipiat, ideoque suppuret.

C A P U T XXIV.

De digitis luxatis.

IN digitis nihil ultra fieri debet, quam quod in his, qui sunt in manu, positum est. Potest tamen conditus articulus medius aut summus canaliculo aliquo contineri.

C A P U T XXV.

De his, quæ cum vulnere loco moventur.

HÆC facienda sunt in his casibus, ubi sine vulnere ossa exciderunt: sæpe tamen cum vulnere loco moventur. Hic vero & ingens periculum est, & eo gravius, quo majus membrum est, quove validioribus nervis aut musculis continetur. Ideoque ab humeris, femoribusque, metus mortis est: ac, si reposita ossa sunt, spes nulla est; non repositis tamen, nonnullum periculum est. Eoque major in utroque timor est, quo propius vulnus articulo est. Hippocrates nihil tuto reponi posse, præter digitos, & plantas, & manus, dixit: atque in his quoque diligenter esse agendum, ne præcipitentur ægri. Quidam brachia quoque & crura reposuerunt: & ne cancri, distentionesque nervorum orirentur (sub quibus in ejusmodi casu fieret mors matura) sanguinem ex brachio miserunt. Verum ne digitus qui-

dem (in quo minimum, ut malum, sic etiam periculum est) reponi debet aut nisi ante inflammationem, aut postea, cum jam vetus res est. Si quoque, reposito osse, nervi distenduntur, rursus id protinus expellendum est.

Omne autem membrum, quod cum vulnere locomotum, neque repositum est, sic jacere convenit, ut maxime cubantem juvat: tantum ne moveatur, neve dependeat. In omnique tali morbo magnum ex longa fame præsidium est: deinde ex curatione eadem, quæ proposita est, ubi ossibus fractis vulnus accessit. Si nudum os eminet, impedimento semper futurum est. ideo, quod excedit, abscindendum est; imponendaque super arida linamenta sunt, & medicamenta non pingua; donec, quæ sola esse in ejusmodi re sanitas potest, veniat. nam & debilitas sequitur, & tenuis cicatrix inducitur: quæ necesse est facile noxæ postea pateat.

I N D E X

R E R U M E T V E R B O R U M.

A.

- A**BDOMINIS membra-
na interior rupta, ejusque
cheirurgia p. 455.
Abortit mulier, si gravidæ
fuerit alvus sine modo fu-
sa 70.
Abstinentia optima 122. ejus
duo genera 99. tempesti-
va juvat laborantem, *ibid.*
nimia inutilis 32.
Abscessuum curatio 331 *sq.*
eorum cheirurgia 411. abs-
cessus sub lingua curatio
447.
Accessionem graviolem feb.
nox levior sequitur 132.
Acia 298.
Acopa 282.
Ἀκροχορδὼν 338 *sq.*
Ἀκροῦμιον, *ibid.*
Actio naturalis. 15.
Acutus morbus quis 119. qui
cognoscatur 121.
Adolescentia acutis morbis
patet 53. adolescentium
morbi 56.
Adstringentia 40. 45. 114.
Aduſtionis remedia 320.
Αἰγίλωπος sanatio 428.
Æger, de quo securus erat
medicus, sæpe moritur 66.
ægri natura noscenda est
23. 36.
Æsculapius quare in Deo-
rum numerum receptus 11.
Æstas juvenibus inimica 55.
periculosa est 52. æstas sic-
ca si aquilones habuit, &
autumno imbres austrique
sunt, qui morbi subeunt
55. æstate quo cibo uten-
dum 42.
Ætas media tutissima 53.
Affectus mutant corpora 20.
Alarum abscessus raro secan-
di 411.
Alba lenia emplastra 271.
Alexandrinum emplastrum
269.
Alimentum maximum in pa-
ne 104. 106.
Ἀλίπαντα emplastra 264.
Ἀλωπεκία 349.
Ἄλφος 345.
Alumen Melium 406.
Alvus mala 62. peltifera quæ
65. fusa mulieri gravidæ
abortum causat 70. nigra
periculosa 84. juvenibus
cita plerumque in senectu-
te contrahitur 41. fulior in
juvene melior, *ibid.* alvum
quæ adstringunt 40. 45 *sq.*
114. alvum moventia 41.

INDEX RERUM ET VERBORUM.

- Ambrosia, antidotum 281.
 Ambulatio quibus convenit, quibus non 304.
 Ammonius Alexandrinus 409.
 Ammonius λιδοτόμος 480.
 Ἀναστομοῦν 246.
 Ἀναστόμωσις 206.
 Ἀναστομωτικά malagnata 261.
 Anatomie necessaria 28.
 Ἀγκύλαι 262.
 Ἀγκυβλεφάρου curatio 427.
 Andreas 144. 256. 258. 549.
 Andron 274. 397.
 Andronium medicamentum 392.
 Angina, ejusque curatio 200 *sq.* angina subito finita, ad pulmones malum transit 72.
 Ani vitia 402. eorum cheirurgia 491. ani fissis pastillus 274. ani fistula 416.
 Ἀνώδυνα 283.
 Ἀνθηραὶ compositiones 388. 390. 391. 393. 397.
 Ἀντιάδες 446.
 Antidotorum apparatus 280.
 Ἀφθαι 389.
 Apollonius Mys 244.
 Apollonii duo 409.
 Apollophanes 256.
 Apoplexia 182.
 Ἀπύρον sulphur 258.
 Aquæ consideratio 107. aqua inter cutem ex acuto morbo orta, raro ad sanitatem perducitur 80. aqua inter cutem sequitur suppressionem. hæmorrhoid. 71. minime terribilis 76.
 Aquilo quos facit morbos 54.
 Arabs medicus 259.
 Ἀραχνοειδὴς oculi tunica 434.
 Aranei ictus curatio 316.
 Archagathus 272.
 Arcarum duo genera 349. curatio, *ib.* & 350.
 Aridæ medicamentorum mixturæ 277.
 Aristogenes 261.
 Ariston 263.
 Ars non statim culpanda 66.
 Ἀρσενικὸν auripigm. 247.
 Arteriace 287.
 Arteriæ asperæ situs 187 *sq.* arteria incisa non coit 89.
 Artes excitant artificis ingenium 22.
 Articulorum dolores 240. vulneratorum curatio 303. ad articulos malagma 262 *sq.*
 Asclepiades 150. 155. 156. 158. 169. 180. 198. 204. 208. 233. 244. invenit frictionem & gestationem 95. nihil præcepit, quod ab Hippocrate non est comprehensum, *ib.*
 Aspidum morsus 315.
 Ἀσθμα 202.
 Athenion 286.
 Ἀδερώματα 422.
 Ἀτροφία 172. curatio 173. atrophia testiculorum 401.
 Attalum emplastrum 267.
 Auditorii meatus compressionis curatio 379. auditus gravis curatio, *ib.*
 Aurium foramina & sinus 498 *sq.* auribus fractis mendendi modus 520. aurium doloris curatio 374, *sq.* au-

I N D E X

rium mali odoris curatio 376. aurium ulceris fordini curatio 378. aurium vermes, *ib.* aurium sonitus curatio 380. aurium morbi manum exigentes 439. Auster quos morbos inducat 54. austri a prima hieme ad ultimum ver si continuarent, quos generent 55. *Αὐτόπυρον* 104. Auctoribus antiquis sua reddenda 95. Autumnus periculosissimus est 52. siccus aquilonibus perflatus quos morbos inducat 55. Auxilium quid agat 84 *sq.* anceps melius, quam nullum 87. vehemens succurrit vehementi malo 91. auxilium etiam morbis decrefcentibus necessarium est 96.

B.

Balneum quando conveniat 100 *sq.* balneum ingressurus imbecillus homo quid vitare debeat 101. balneum vulneri parum puro res infestissima 304. obest gangraenae 309. Barbarum emplastrum 264. *Βασιλικόν* emplastrum 265. Boethus 276. Brachii ossa 502. brachii perfracti medicina 528. 532. *Βρογχεκλήνη* ejusque cheirurgia 448. *Βουβωνοκλήνη* 460. curatio 470.

C.

Καχεξία 172. curatio 174. *Κακόνδεσ* 323. Calceamenta humiliora talo luxato 551. Calcis os 505. Calculosi qui dignoscuntur 70. Calculorum diagnostica signa 479. calculi ex vesica sectio 474. ex urethra 473. calculi majoris in vesica fissio 480. calculorum in feminis curatio, *ib.* calculo expellendo pastillus 275. calculo evulso quæ facienda 480 *sq.* Calefacientia 112. 117. Calli curatio 538. ad calum in articulis malagma 264. Calor adjuvat, quæ frigus infestat 48. calor quid efficiat 48. 49. 54. Calvariae ossa & suturae 497. calvariae fractæ medela 511. Cancer qui oriatur 306. ejus signa, *ib.* canceri oris curatio 393. in cole curatio 399. canceri exsecto e vesica calculo supervenientis signa & curatio 484. Canini dentes 499. Cantharidarum assumtarum curatio 319. Capillorum profluvium 347. Caput luxatum immedicabile 542. capitis subitus dolor 80. capitis dolores

- ex vento qui finiantur 78.
 capitis doloris curatio 192
sq. capitis dolor ex febre
 levatur 145. capitis dolo-
 res frictio levat 97. capi-
 tis tubercula 422. capiti
 fracto emplastrum 266 *sq.*
 capiti prodest aqua frigi-
 da 43 *sqq.* capite infirmo
 laboranti quid agendum
 43 *sq.*
 Carbunculi curatio 321 *sq.*
 ejusdem in cole nati cu-
 ratio 400.
 Καρκινώδη tubera 259.
 Carcinoma ubi proveniat 322.
 curatio 323. carcinoma-
 tis leniendis malagma 260.
 Cardiacus morbus 161 *sq.*
 ejus curatio 162 *sq.*
 Cariei ossium curatio 506.
 Caro corrupta in pus verti-
 tur 330. carni putri con-
 tinendæ 277. carni coer-
 cendæ emplastrum 270.
 carnem alentia 251. carni
 supercrescenti exedendæ
 277. 279.
 Cartilagines in ossium om-
 nium extremis 503. car-
 tilaginis narium fractæ
 curatio 518 *sq.* aurium
 520.
 Cassius 226. 287. qui febrem
 fanarit 27.
 Cataplasmata calefacientia,
 iis, quibus calculi e vesi-
 ca exsecti, noxia 482.
 Catapotiorum recensio 283
sqq.
 Causa veri quæ dicitur 23.
 causæ abditæ quæ, eviden-
 tes quæ 14.
 Κεφαλαία 191. ejus causa &
 curatio 192.
 Κεφαλικὰ 266.
 Cerastris ictus curatio 317.
 Κερατοειδὴς oculi tunica 433.
 Κερκίς 502.
 Cerebri ejusve membranæ
 percussæ signa 293.
 Cervix inversa mortem indi-
 cat 64. cervicis morbi 198.
 Cerussæ epotæ curatio 319.
 Χαλαζίων curatio 424 *sq.*
 Χάλακτον 245.
 Χιασμός 487. 514.
 Chiragra quibus indicatur 68.
 chiragra quæ solvitur 77.
 Chironium ulcus quale 327.
 Cheirurgia vetustissima me-
 dicinæ pars 12. ejus præ-
 stantia & origo 408 *sq.*
 Cheirurgi officia 409.
 Chersydri ictus curatio 317.
 Choacōn emplastrum 264.
 Χοινίκιον, modiolus 507.
 Cholera 221. curatio, *ib.*
 Χόρδαφος 224.
 Χοριοειδὴς oculis tunica 434.
 Chrylippus 12. 262.
 Cibi concoctio qui fiat 15.
 cibi varii non non faci-
 lius concoquuntur 138. ci-
 bus unde debeat incipe-
 re 32. humidus fatigatis
 convenit 34. cibus ægro
 quando dandus 122. fe-
 bricitanti 126—135. 138.
 humidus aptissimus 137.
 ex tenuissima materia, *ib.*
 ciborum variæ proprietates
 107.

I N D E X

- Cicatrix quomodo inducatur
vulneri 305. 311.
- Cicutam si quis bibit, quo-
modo curari debeat 319.
- Κίρσοκήλη 459.
- Clavi oculorum 433. clavus
in pedibus nascitur 339.
curatio, *ib.*
- Cleophrantus 150.
- Clysteres quando conveniunt
& quibus 92 *sq.*
- Κεϊλιακὸς morbus 223. cu-
ratio, *ib.*
- Cælum pellimum quod æ-
grum fecit 52.
- Cogitatio infirmo capite la-
boranti tata non est 44.
- Κολικὸς morbus 224. colicus
dolor quibus sedatur 46.
- Κολικὸν Cassii 226. 227. 287.
- Colis inflammati tumor 396.
ulcera, *ibid.* cancer 399.
phagedæna 400. carbun-
culus, *ibid.*
- Collisum corpus qui tractetur
299.
- Collyrium acharistum 356.
in ani fistulis 418. An-
dreæ 363. Asclepias 366.
Βασιλικὸν 369. Cæsaria-
num 367. Canopite 366.
Cleonis 356. Cythium, *ib.*
Διὰ κέρατος 363. διὰ κρό-
κευ 370. διὰ λιβάτου 361.
Euelpidis 357. 364. 366.
369. Hermonis 365. Hie-
racis 368. μεμιγμένον 364.
Nilei 359. Philetis 361.
Philonis 355. Phynon 364.
Pyxinum 366. Rhinion
369. Smilion 364. Sphæ-
rion 365. Tephrrion 356.
- Theodoti, *ibid.* Trygodes
357.
- Colubra tuto estur 314.
- Comitialis morbus 176. ejus
medela 177 *sq.* quando
solvitur 77.
- Communia attendi voluit
Themison eaque tria 24
sq. communia & propria
observanda 26 *sq.*
- Concoctio qui fiat, non sciunt
eruditi, sed conjectura
prosequuntur 22. tarda qui
adjuvetur 47. concoctio
omnibus vitiis occurrit
48.
- Concubitus rarus corpus ex-
citatur, frequens solvit 30.
quis utilis, *ibid.* quando
convenit, *ib.*
- Condita inutilia 32.
- Condylomatis ani curatio
402. 492.
- Consuetudini quod contra-
riatur, noxium est 35.
- Contentio post cibum inu-
tilis 45.
- Cor musculosum est 188. cor-
dis percussi signa 291.
- Corporis natura noscenda
36. corpus quænam ca-
lesciant 40. quænam re-
frigerent, *ib.* quænam hu-
mident, aut siccant, *ibid.*
corpus exedentia 248. ad-
urentia 249. corpus quid
impleat 36. quid extenuet
37. corpus quæ commo-
de exerceant 31. corpus
integrum quo denotetur,
ibid. quadratum optimum
53. gracile infirmum, *ib.*

RERUM ET VERBORUM.

obesum hebes, *ibid.* corporis semper aliqua imbecilla pars est 36. corpora affectibus mutantur 20.
 Corvus, ferramentum scroto incidendo 462.
 Costarum enumeratio 501. fistulæ 415. costis fractis opitulandi ratio 525.
 Coxarum os 504. dolor 238. prognosis 83. curatio 238.
 Crato 397. ejus compositio ad aurium malum odorem 377.
 Κρεμαστῆρες nervi 456.
 Creta figularis 40.
 Crimen professoris non est artis 66.
 Κριθῆς curatio 424.
 Cruris ossa 504. crurum fractorum sanatio 528. 533.
 Κρυσταλλοειδῆς oculi humor 434.
 Cruditatem quænam indicent 67.
 Ctesiphon 262.
 Cubiti ossa 503. cubiti fracti curatio 533. luxati cheirurgia 545.
 Cucurbitulæ æneæ & corneæ 90. earum usus præcipuus 91. in morbis longis & acutis, *ib.*
 Curtorum in auribus, labiis ac naribus cheirurgia 441.
 Cutem purgantia 252.
 Κυνικὸς σπασμὸς 194. ejus curatio, *ib.*
 Κορύζα 195.

D.

Δάρτος 456.

Dejectio quando conveniat 39. quæ bona 77 *sq.* periculosa phthificis 79. quæ aliis 81. in omnibus morbis molita 91. quibus medicamentis 92. infirmat hominem, *ib.* lippienti prod-est 78. supprimitur vomitu, *ibid.* dejectionem subitam quid indicet 68.
 Denarii pondus 252.
 Dentium ordo 499. dentium doloris varia remedia 384 *sq.* vitiatorum. cheirurgia 444 *sq.* denti exeso remedium 385.
 Desidia & luxuria adversæ valetudinis causæ 12.
 Desperatus non curandus 289.
 Destillatio 195. ejus curatio 196 *sq.* destillationes qui vitentur 44.
 Dexius 264.
 Διάβρωσις 206.
 Διὰ δαφνίδων emplastrum 268.
 Diæta hiemalis, verna, æstiva, & autumnalis 41 *sq.*
 Διάφραγμα 188.
 Dies critici 128. dies fereni saluberrimi 52.
 Digerentia malagmata 257 *sq.*
 Digitorum ossa 503. ulcera 406. digitorum coherentium & curvatorum curatio 495. fractorum curatio 528. 534. luxatorum cheirurgia 548. 552.
 Diocles Carystius 12. 179. 224. 420. 549.
 Diogenes 270.
 Dionysius 404.

I N D E X

Dipsadis ictus curatio 317.

Discutientia 250.

Distentio nervorum quando timenda 71. 73.

Diuretica conveniunt morsis a serpentibus 315.

Dolor deorsum tendens sanabilior 78. dolorem qui non sentiunt, iis mens laborat 71. ad dolorem omnem malagma 262 *sq.* dolores quinam mortem indicent 64. doloribus leniendis catapotia 283 *sq.*

Durities testiculorum 401.

Δύσπνοια 202.

Δυσεντερία 227. curatio, *ib.*

E.

Ebrius, qui obmutuit, qui intereat & servetur 65.

Ἐκτροπίου curatio 432.

Ἐλαιῶδες pus 295 *sq.*

Ἐλαιῶδες acorum 282.

Ἐλεφαντίασις 181.

Elephantinum emplastrum 271.

Ἐλυτροειδὴς tunica 456.

Emollientia 118.

Empirici quinam 13. quid statuunt 17.

Emplastrorum differentia 253. formulæ 264. emplastra, quæ calvariæ causa componuntur 514.

Ἐμπροσδόπονός 198. curatio, *ibid.*

Ἐναιμα emplastrum 264.

Ἐγκανθίδος medicatio 427.

Ἐγχρίστα 283.

Ἐννεαφάρμακον emplastrum 266. 483.

Ἐντεροκήλη 457. curatio 464.

Ἐφηλīs 350. curatio, *ib.*

Ephesium emplastrum 270.

Ἐπινυκτīs 341.

Epilepsia 176.

Ἐπιπλοκήλη 457. curatio 466.

Epirotes Philippus 167.

Ἐπισπαστικὸν malagma 254.

Ἐπισπαστικὰ emplastra 268.

Erasistratus 208. 222. 225. 242. 244. 397.

Ἐρπης 324.

Eruditi imbecilles 30.

Erysipelas periculum affert, si circa cervicem aut caput constitit 307. quomodo curandum, *ibid.*

Euelpistus Ph^l his F. 409.

Evocantia & educantia 250.

Euthycleus 262.

Ἐξανθήματα 340.

Excitare caput, pro attollere 514.

Exercitatio cibum antecedere debet 32. ejus finis sudor aut lassitudo, *ibid.*

Experientia plurimum ad medelam confert 22.

Experimenta sunt necessaria 14. initia medicinæ 18. experiri quomodo oporteat 121.

ad Extrahendam materiam malagma 254.

Exulceratio stomachi 209.

Exusto in sole quid agendum 35.

F.

Faber quidam machinamentorum ad extendendum fe-

RERUM ET VERBORUM.

mur luxatum repertor 549.
 Faciei contusæ malagma 260.
 Fames 33. famem qui ferant facilius, qui difficulter 28.
 Fascia quæ & qualis requiratur 300. æstate, hieme, *ib.* fasciæ sex ad ossa fracta 529.
 Fatigatio animi inutilis post cibum 45.
 Fatigatis quid agendum 34 *sq.* inutilis frigida potio 35. ex ambulatione quid agendum, *ib.*
 Faucium morbi 200. exulceratio 203.
 ad Favum malagma 259.
 Febris quid ~~secundum~~ ^{secundum} Erasistratum 25. febrium genera 123. quartanæ simpliciores sunt, *ibid.* tertianarum duo genera, *ib.* quotidianarum varia genera 124. febris præsentis signa pulsus & calori 136. alia 137. febriculam instantem quid indicet 68. febris nulla inordinata 125. a cubito in posteriora delapso mota 546. ardens horrore sanatur 78. subito finita revertitur 69. acuta periculosa 61. febres malæ, *ibid.* febris, quæ mala vulnere 301. febris pestilentis curatio 140 *sq.* ardentis 141. febris sæpe prodest 78. febres longas abscessus & articulorum dolores indicant 72.
 Feminarum naturalia clau-
Corn. Celsus.

fa qui aperiantur 487. feminarum calculi 480.
 Femoris luxati cheirurgia 548 *sq.* femorum fractorum curatio 528. 533.
 Feminum ossa 504.
 Fibulas adolescentibus applicandi ratio 472.
 Firmus pro sano 30.
 Fistularum genera plura 333. quomodo dignoscuntur 334 *sq.* simplicium curatio 335. callosarum, *ib.* duplicium seu multiplicium 336. fistularum cheirurgia 414 *sq.*
 Flatus excitantia 112.
 Fœtus imbecillitas qui cognoscatur 70. sanitas, *ibid.* mortuieductio 488.
 Fomenta calida quæ sint 102.
 Fortuna præstat arte in morbo 120. fortunæ in sanandis morbis potestas 408.
 Frictio convenit partibus longe a vulneribus dissitis 304. frictionis utilitas 199. frictionem aliis auxiliis prætulit Asclepiades 95. ea corpus durat, mollit, minuit, implet, *ibid.* longa obest 96. quando adhibenda *ib.* & *sq.* ejus numerus præscribi non potest 97.
 Frigus quid in febre 124. quibus inimicum 48. quid efficiat *ib.* & *sq.* frigoris in febribus curatio 146.
 Frontis fractura cicatricem difficulter recipiens 518.
 Fungi in ano vel vulva curatio 405.
 N n

I N D E X

Fungos inutiles si quis assum-
ferit 319.

Furunculus 329. ejus cura-
tio, *ibid.*

Furoris signa 72.

G.

Græca litera Ψ ferramenti
ad diducendam carnem
comparati modulus 419.

Gallinaceus pullus divisus im-
ponitur morsui serpentium
315.

Γάγγλια, eorumque chei-
rurgia 422.

Γάγγραινα 306. in quibus
partibus fit, & difficile sa-
natur, *ibid.* ejus curatio
308. corrupti corporis est
309. gangrænæ sectio 495.

Gargarizationes 280.

Genu luxati cheirurgia 550
sq. genuum dolor 239. ge-
nua contracta mortem in-
dicant 64.

Gestatio in lethargo prodest
165. eam invenit Asclepia-
des 95. ea quibus conve-
nit morbis 98 *sq.* genera
ejus varia, *ib.*

Gingivarum marcescentium
curatio 444. gingivarum
tubercula 390. ulcera, *ib.*

Glandis nudæ contactio 471.
contactæ apertio 472.

Glandium plumbearum ex-
tractio 421.

Glandulæ in cervicibus 515.

Gorgias 409, 449.

Græcorum in nominandis abf-
que circuitu partibus ob-

scœnis impudentia 395.

Γραφίσκον Διοκλέους 420.

Gravedo 195. ejus curatio
196 *sq.* gravedines qui vi-
tentur 44 *sq.*

H.

Hæmorrhoidis ictus curatio
317.

Αἰμορροΐδες earumque curatio
404. earum suppressionem
quæ sequantur 71. earun-
dem cheirurgia 492 *sq.*

Hami retusi 438.

Hapsus lanæ mollis 481. la-
næ sulphuratæ 213.

Hecatæus 269.

Hederæ bacca dentem findit
386.

Hepatis morbi 216. vulne-
rati signa 292.

Ἡπατικὸς morbus 216. cu-
ratio 217.

Heraclides Tarentinus 152.
286. 428. 549.

Hernia 457. curatio 460.

Heron 449. Herones duo 409.

Herophilus 13. 244. 434.

Hiems sicca si septentrio-
nales ventos habeat, ver
pluvias exhibeat, qui mor-
bi subeant 54 *sq.* hiems
salubris est 52. fenibus ini-
mica 55. hieme quid &
quomodo esse conveniat
41.

Hieras 278.

Hippocrates 230. 409. 543.
545. 549. 552. omnia præ-
sagivit 51. a futuris decep-
tus 512.

RERUM ET VERBORUM.

Hirondinis pullus anginae remedium 201.

Ὠμοπλάται 501.

Horror quid 124. horror a biliosis 148. horrois in febre curatio 147 *sq.*

Humeri ossa 502. humerorum dolores qui tollantur 78. humeri luxati cheirurgia 543 *sq.* fracti curatio 528. 531.

Υαλοειδές 434.

Υδροκέφαλον 192. 194.

Υδροκήλη 458. curatio 467.

Hydrophobiae curatio 313.

Hydrops 166. ejus species & curatio, *ib.* & *sq.* quartanae supervenit, *ibid.*

Hydropicis quomodo aqua emittatur 451.

Hyoscyami poti curatio 319.

Υπόχυσις 371.

Hymen imperforatum 487.

I.

Ιχθὺρ saniei species 294. malus 295.

Icterus 179.

Ictericis jecur durum fieri malum 82.

Jecur 188. ad jecur dolens malagma 255 ad jecur sanandum catapotia 285. jecinoris vomica 75.

ad Ignem sacrum 279. 283.

Γίλεος 224.

Imbecillis quæ observanda 30 *sq.*

Imbres quos morbos causent 54.

Impetiginis quatuor species 343.

Inediam qui facile ferant 41.

Infanti mortuo ejiciendo pessus 276. catapotium 287.

Infirmetas omnis morbis obnoxia 40.

Inflammationis notæ 146. inflammatio stomachi 209. testiculorum 401. uvæ 392. ad inflammationes vulvæ pessus 276.

Inflatio stomachi 209.

Inguinum abscessus raro secandi 411.

Infania quando exspectanda 71 *sq.*

Intemperantia quæ tutior 32.

Intestinum jejunum 189. cæcum, *ibid.* tenue, *ib.* intestinorum morbi 221. intestini plenioris morbus 226. tenuioris morbus 224. tenuioris morbi mala signa 82. intestinorum lævitas 229. eorum lævitas quæ facile depellatur 77. quæ periculosa 82. intestinorum vulneratorum notæ 293. e ventre vulnerato prolabentium cheirurgia 453.

Jollas 279.

Irenæus 345.

Jugale os 499.

Judæus medicus 267. 278.

Juguli fracti sanatio 523.

Juvenes hieme optime valent 55.

L.

A rimæ in cranio faciendæ modulus 515.

I N D E X

- Labor** firmat corpus 29. vi-
 tandus si inedia futura est
 33. laborem qui facile fe-
 rant, *ib.* laboris mutatio
 levat lassitudinem 35.
Labrorum curatorum cheirur-
 gia 441. fissorum curatio
 447 *sq.*
Lac convenit phthisicis 175.
 veneno est in capitis do-
 loribus, & acutis feбри-
 bus, *ib.* lac in mammis,
 quibus menses deficiunt
 84. e mammis profluens
 foetum imbecillum notat
 70.
Lavantia 251.
Laganum iis, quibus maxil-
 la perfracta est, comedend-
 um 523.
Λαγωφθάλμου sanatio 431
sq.
Lapillus, pulex & s. quomo-
 do ex aure extrahantur
 381.
Lassitudinem levat laboris
 mutatio 35.
Lateralum dolores 212. late-
 ris dolor quando exspe-
 ctandus 71. finitur 75. la-
 teris doloribus catapotium
 286. ad laterum dolorem
 malagma, 256.
Latinorum a foedioribus ver-
 bis abstinentia 395.
Lavatio calida pueris & seni-
 bus apta est 41.
Lectio clara nocet capite la-
 boranti 44. promovet con-
 coctionem 46.
Λημνίσκος 487.
Lenia quænam 109. lenia
 emplastra 271.
Lenticularum species 350.
Λεπίς 510.
Lethargus 164. curatio 165.
Λευκά emplastra 271.
Λεύκη 345.
Leucophlegmatiae curatio
 169.
Lien 188. lienes magni quos
 causent morbos 71. lienos-
 sis mala tormina 82. ad
 lienem malagma 255. lie-
 nis morb. 218. curatio, *ib.*
 lienis icti signa 292.
Linguae ulcera 390. resolutio
 195. linguae cum subjecta
 parte junctae cheirurgia
 447.
Λιπαρά emplastra 271.
Lippitudo arida 368. lippi-
 tudo quibus indicetur 69.
 lippitudinis levioris notæ
 351.
Lippientis diæta 353.
Λιδοτόμος 480.
Livori faciei malagma 260.
Longus morbus quis 119.
 acuto par 120. qui cogno-
 scatur 121.
Lucubratio quando convenit
 31.
Lumbrici lati, teretes 230.
 curatio, *ib.*
Lunata plaga 520.
Lycium 520. 526.
Lyfias 255.

M.

Machaon Æsculapii filius 11.
 vulneribus auxilium attu-
 lit, *ibid.*

RERUM ET VERBORUM.

Macor infuetus malum denotat 57.

Malæ immobiles 499.

Malagmatum differentia 253. variæ formulæ 254.

Manuum ossa 503. cum pedibus similitudo 505. dolores 240. manus luxatæ cheirurgia 547.

Materiæ imbecillissimæ quænam 104. mediæ 105. valentissimæ 106 *sq.*

Maxillæ partes 499. fractæ cheirurgia 521. luxatæ cheirurgia 541.

Maxillares dentes 499.

Medicina sanitatem promittit 11. ubique est, *ibid.* apud Græcos magis exulta, *ib.* medicinæ scientia sapientiæ pars 12. quando in III partes diuisa 13. medicinam mutavit Asclepiades, *ib.* ea ab experimentis deducta 18. debet esse rationalis 28. ejus genera differunt pro natura loci 18. medicina perpetua præcepta vix habet 25. ea prior inventa, dein ratio quæsitæ 19. medicina nihil proficit repugnante natura 120. est ars conjecturalis 22. 66. ei quæ fides est, *ib.*

Medici primi philosophi 12. medicus expertus optimus 20. rationalis 26. empiricus, *ibid.* medici officium juxta Asclepiadem 125. medicus non dies sed febris accessiones numerare debet 129. qui pulsum

explorabit 136. quo loco fedebit 137. amicus utilior extraneo 28. medico parum proficienti quando ignoscendum 120.

Medicamenta a Diis petita 12. ea non omnibus profunt 66. 120. medicamentorum usus ab Asclepiade sublatus 244.

Medullæ in spina discussæ signa 293.

Medus 257.

Meges 409. 411. 428. 449. 478. 550.

Μέλας 345.

Μελίχροι saniei species 294. mala 295.

Μελικηρίς ulcus 337. ejus duæ species, *ib.* curatio 338.

Μελικρίδες 259. curatio 422 *sq.*

Membrana calvariam cingens scalpro non laceranda 513.

Membranæ cerebrum succin- gentis inflammatio quomodo tractanda 517.

Membrum ictum certa ratione collocari debet 303.

Membris resoluti prognosis 83.

Menemachus 385.

Μηνιγγόφύλαξ 510.

Menophili compositio ad aurium malum odorem 376.

Menstrua suppressa capitis dolores acerbos indicant 68.

Mentum, maxillæ ima pars 499.

Metrodorus 167.

Micon 258. 261.

Miscendi ratio 252.

I N D E X

Mithridates 281.
 Modioli descriptio 507.
 Mollientia 251. mollientia
 malagmata 257.
 Morbi ad Deorum iram re-
 lati 12. novi incidunt 15.
 22. remediis curantur 19.
 morborum IV genera 119.
 eorum cognitio necessaria
 14. morbi incrementis si-
 gna 121. morbi verna-
 les 53. æstivi, *ib.* autumnales,
ib. hiemales 54. morborum
 initia famem sitimque de-
 siderant 99. morbus qui
 acutus, qui longus 119.
 quomodo dignoscitur 121.
 morborum acutorum no-
 tæ fallaces sunt 67. mor-
 bus comitialis post annum
 XXV ortus difficile cura-
 tur 81. morbus intestini
 tenuioris, nisi resolutus
 est intra septimum diem,
 occidit 82.
 Mortis instantis signa 63 *sq.*
 mortis certa signa nega-
 vit Democritus 66.
 Morsus fere omnis habet vi-
 rus quoddam 312. ad mor-
 sus emplastra 270. mor-
 sus canis rabidi curatio
 313. morsus serpentium
 quomodo curentur 314.
 morsus aspidis curatio 315.
 Moschus 257.
 Motus in dolore pestifer 541.
 Mulier gravida abortit, si
 mammæ emacuere 84. acu-
 to morbo facile consumi-
 tur 65. ex partu vehemen-
 tibus doloribus pressa in

periculo mortis est 82.
 Musculus læsus præcidendus
 297.
 Mutatio subitanea noxia 33.
 Μυδρίασις 371. ejus curatio
 372.
 Μυρμήκιον 339.
 Μυροβάλανον 219. 255.

N.

Narium ossa & foramina 498.
 nares acutæ mortem indi-
 cant 63. narium hæmor-
 rhagia quid indicet 71.
 nares intus exulceratæ aqua
 calida fovendæ 382. na-
 rium curtarum cheirurgia
 441.
 Naso fracto medendi ratio 518.
 Natura ægri noscenda 23.
 naturæ contemplatio non
 facit medicum 22.
 Nauseanti ex navigatione
 quid agendum 36.
 Nervi τέροντες 500. nervos
 præcisos debilitas partis
 sequitur 303. nervorum
 distentio quibus indicetur
 68. nervorum dolor 184.
 ejus curatio, *ibid.* tremor
 185. ejus curatio, *ibid.*
 ad nervos malagma 261.
 nervis utilia acopa 282.
 nervorum resolutioni ætas
 tenera prodest 77.
 Nigritiei ossium curatio 507.
 Nigrum Diogenis emplastrum
 270.
 Nileus 257. 549.
 Νόσος costæ 501.
 Notæ in acutis morbis falla-
 ces sunt 67.

RERUM ET VERBORUM.

Notitiæ subtrahere 362.
Noxarum corporis genera
288.
Nuces Græcæ 204. 205. 220.
382.
Numenius 263. 276.
Nymphodorus 549.

O.

Obesi quo morbo intereunt
57.
Ὄβολος 253.
Obscœnarum partium vitia
395.
Oculi natura 433. oculorum
foramina 498. oculi variis
casibus patent 351. oculorum
vitia 423. oculi
sponte interdum sanescen-
tes 408. oculorum caligi-
nis curatio 370 *sq.* oculorum
imminutio 361. scab-
rorum curatio 369. oculorum
suffusionis curatio
371. resolutionis curatio,
ib. imbecillitatis curatio
372. ictorum curatio 373.
oculi tumoris notæ 351.
oculi quibus curantur 352.
oculorum varia collyria
355 *sq.* ulcerum curatio
365. inflammatio 367. pi-
tuitæ fluxus cohibendus
357 *sq.* carbunculi 360. pu-
stulæ 361. pituitæ cheirur-
gia 436.

Oleum bibendum qui vene-
num hausit 318.

Omentum 190. omenti a vul-
nere corrupti excisio 453 *sq.*

Ὄφιασις 349.

Ὄπισθότομος 198. curatio
ib.

Ὄρδοπνοια 202.

Oricularius clyster 482. 485.

Oricularium specillum 493.

Os aqua frigida fovendum
31. quibus 45. oris reso-
lutio alvo cita finitur 77.
oris vitia quæ cheirurgum
postulant 444. cancer 393.
ulcerum curatio 388.

Os pectoris 501. osium po-
situs & figura 497. vitia-
torum signa & curatio 505.
522. 524. fractorum dif-
ferentiæ 521. luxatorum
cheirurgia 538. ossibus re-
solvendis emplastrum 270.
ad ossa & nervos malag-
ma 261.

Ὄσχρον, scrotum 456.

Otium 33.

Ozænæ curatio 382. chei-
rurgia 443.

P.

Palma luxatæ cheirurgia 547.
sq.

Palmulae 32.

Palpebrarum pili oculum ir-
ritantes 429.

Panthemus 258.

ad Panum malagma 259.

Papularum duo genera 344.
curatio, *ib.*

Παρακολλητικὸν emplastrum
265.

Παράλυσις 182.

Παρασυνάγχη 200.

Παρωτίδες 259. 394. ad pa-
rotidas malagma 259. 262.

I N D E X

- Partes aliter homine mortuo
 apparent, aliter vivo 20.
 parti laboranti primum
 succurrendum 36. partium
 extremarum frigus quan-
 do mortem indicat 64. 97.
 ex Partu laborantibus cata-
 potium 287.
 Παρουλίδες 390.
 Pastillorum differentia 253.
 formulæ 273.
 Patella, os 504.
 Pecten, os 504.
 Pedes cum digitis & ungui-
 bus in gravi morbo ni-
 grescunt 74. pedum cum
 manibus similitudo 505.
 pedum dolores 239. eis
 malagma 263.
 Pediculi palpebrarum 362.
 Πεπλυμένον ceratum 254.
 in Precipiti periculo multa
 recte fiunt, alias omitten-
 da 156.
 Περιπνευμονικός morbus 215.
 curatio, *ibid.*
 Περίτόναιος 191.
 Πέσσοι 275.
 Pestilentia occupato quid ob-
 servandum 49 *sq.*
 Petron 144.
 Φαγέδαινα in cole orta 400.
 Phalangii ictus curatio 317.
 Philocrates 268.
 Philotas 266.
 Philotimus 549.
 Φήμωσις ejusque cheirurgia
 472.
 Philoxenus 409.
 Φλύκταιναι ἐλκώδεις 340.
 Φλυζάκιον 340.
 Phrenitis 154. ejus plura ge-
 nera 155. curatio 156 *sqq.*
 Phrenetici in tenebris habitū
 155.
 Φθειρίασις 362.
 Φθίσις 172. curatio 174.
 phthisis in adolescentibus
 80.
 Phthificis alvus cita vitanda
 176. vomitus frequens per-
 niciosus, *ibid.*
 Φύγεθλος, panus oriens 259.
 330.
 Φύματα 79. 259. 330. 399.
 ad phymata malagma 259.
 260. 262 *sq.*
 Pituitam crassiolem quæ fa-
 ciunt 110. pituitæ oculo-
 rum cheirurgia 436.
 Plaga levis aqua frigida cu-
 ratur 299.
 Plantæ luxatæ cheirurgia 551.
 Πλευριτικός morbus 213. cu-
 ratio, *ib.*
 Podagra quibus indicatur 68.
 podagra quæ solvitur 77.
 ad podagras calidas ma-
 lagma 254.
 Podalirius, Æsculapii filius
 11. vulneribus auxilium
 attulit, *ib.*
 Polyarchus 257. 526.
 Polybus 273.
 Polypus narium strangulat ho-
 minem 383. curatio, *ib.* &
 443.
 ex Pomis medicamenta 233.
sq.
 Ponderum ratio 252 *sq.*
 Porrigo 347. ejus curatio
 348.
 Posca frigida 212.
 Potio fatigatis inutilis 34.

RERUM ET VERBORUM.

frigida sudanti perniciosissima, *ibid.* febricitantibus quando danda 135.

Procidentia ani vel vulvæ curatio 405.

Proprium est aliquod loci, temporis 27.

Proprietates rerum quare noscendæ 103.

Πρόπτωσις 359.

Protarchus 256. 549.

Prurigo 83.

Pforicum quid sit 369.

Psylli audaces potius quam periti 514.

Πτερύγιον 406. ejus medicatio 425.

Ptolemæus rex 281.

Ptolemæus cheirurgus 376.

Pueri vere optime valent 55. eorum morbi, *ib.* & *sq.* pueri non curantur ut viri 141.

Pulmo 188. pulmonis morbi 215 ejus morbi bonum signum 75. pulmonis icti signa 291.

Pulsus venarum res fallacissima 136. quibus concitatur, *ib.* non statim explorandus, *ib.*

Purgantia stomachum lædunt 92.

Purgationes expulit Asclepiades 37. 126. quæ perniciosæ 37. 39.

Puris natura 294. signa 295. puris sputum suppressum malum est 80. pus concoquentia & moventia 246. puri movendo emplastrum 266. 268.

Pustularum varia genera 340.

Πυλωρὸς 189.

Πυρίτης lapis 259.

Q.

Quartana æstiva brevis, autumnalis longa 84. quartanæ curatio 151. ea neminem jugulat 153. mutatur in quotidianam, *ib.* quartanæ duplicis curatio, *ib.* quartana vetus raro nisi vere solvitur, *ib.* facile revertitur 154.

Quæstus ex populo major 128.

Quies optima 122.

Quiescere post cibum oportet 46.

Quotidianæ curatio 149.

R.

Rabiosi canis morsus 313.

Ramicis cheirurgia 468. 470.

Refectio convalescentium a morbo 243.

Refrigerantia 112.

Regius morbus 179.

Remedia explorata adhibenda 18. remediis contrariis sæpe ægri curantur 144.

Renes 189. renum vitia quibus indicantur 69 *sq.* morbi 220. curatio, *ib.* renum percussorum signa 292.

Reprimentia 116 *sq.*

Resolventia malagnata 257.

Ραγάδια eorumque curatio 402.

Ρηγμοχασμὸς 206.

Rigor quando timendus 71.

Ριζαῦρα forceps 446.

Ρυὰς 426.

I N D E X

Πυπῶδες emplastrum 268.
402.

Rhus Syriacus 389.

Rubrum emplastrum 270.

Rufum emplastrum 265.

S.

Sacer ignis 325. ejus duæ
species, *ib.* curatio 326 *sq.*

Sagittarum eductio 419.

Sanguis bonus & malus qui
295. unde calefcit & re-
frigescit 198. sanguinis co-
lor attendendus 89. san-
guis crudo non mittendus
87. quando mittendus, *ib.*
& *sq.* quando sistendus 89.
sanguinem vomere pestife-
rum est 65. sanguinis spu-
tum 206. sanguis spumans
excretus pulmonis vitium
denotat 70. sanguini evo-
cando pessus 275. sangui-
nis in vesica, evulso cal-
culo, concreti signa & cu-
ratio 482. sanguis ex vul-
neribus exiens 294. san-
guinis in ventrem conflu-
xus in pus vertitur 71.
profluvium quoddam ma-
lum 84. quid indicet 67.
sanguinem supprimentia
245. ei supprimendo ma-
lagma 260. sanguinis pro-
fusio qui curetur 296. san-
guis evulso calculo quo-
modo sistendus 481. ejus
ex membrana cerebri pro-
fluvia coercenda 279. san-
guis jugulati gladiatoris
epilepsiæ medetur 179.

Sanguisuga si epota sit quid
agendum 319.

Saniei natura 294. sanies ma-
la 195.

Sanitas quando suspecta 57.

Sanus homo quid agere de-
beat 27.

Σαρκοκήλη 459. curatio 470.

Σαρκόφαγοι lapis 242.

Satietas nimia nunquam uti-
lis 32. ex multa fame ni-
mia 33.

Scabies 342. ejus curatio, *ib.*

Scala gallinaria 514.

Scalper excisorius 398.

Scapularum ossa 501.

Σχιστὸν alumen 246.

Σκωρία μολύβδου 251. 272.

Scroti incisio 462.

Scutula operta 501.

Sectio corporum necessaria
16.

Secunda mensa 32.

Secundæ, velamentum in-
fantis 491. secundis ex-
pellendis catapotium 287.

Securus est aliquis in his,
quæ sæpe sine periculo
evasit 58.

Seminis profusio 237.

Senes ætate optime valent
55. senum morbi 56 *sq.*
senes cancro, theriomate
facile corripuntur 324.
sacro igne 326.

Senectus longis morbis pa-
ter 53.

Septi transversi percussi no-
tæ 294. fistulæ 415.

Σηπτικὰ emplastra 269. me-
dicamenta 467.

Serpentium jejunorum ictus

RERUM ET VERBORUM.

- jejuno maxime nocent 318. serpentium morsus quomodo curantur 314. Italorum ictus curatio 318. Siccitas quos morbos generat 54. Signa ægrotantium bona 58. mala 60. longæ valetudinis 62. Singultus sternutamento finitur 78. frequens hepar inflammatum denotat 70. Smaragdinum emplastrum 265. Somnus qui malus 40. utilis phreneticis 158. somno arcessendo catapotia 283 599. Somnifera 116. Sonitus ventris bonum signum 60. Sofagoras 262. Solstratus 409. 416. 449. Spathula lignea humero reponendo 544. Specillum oricularium 493. specilli in explorandis calvariæ vitiis usus 509. 512. Spes interdum frustratur 66. Σφραγὶς pastillus 273. Spinæ descriptio 500. spina luxata insanabilis 543. fracta 527. Spirandi difficultas 202. curatio, *ib.* Sputum quodnam malum 79. quodnam mortem indicat 65. sputum sanguinis 206. curatio 207. Statura longa decora 53. Σταφυλώματος curatio 433. Στεατώματα 422. Sternutamentum bonum 59. singultum finit 78. difficile parturienti prodest, *ib.* bonum lethargicis 164. ad sternutamenta excitanda 279. Stomachus 187. 189. stomachi cum vesica consortium 485. stomachum infirmum quæ indicent 47. stomachi morbi 209. curatio, *ibid.* stomacho quæ idonea 110. quæ aliena 111. stomacho laborantibus quæ agenda 46 59. ejus percussi signa 293. Strumæ quæ 328. fatigant medicos, *ibid.* plerumque resurgunt, *ib.* nascuntur in cervice, alis &c. 329. earum curatio, *ib.* ad strumas malagmata 258. 259. 262. Succi boni quænam 108. mali quænam 109. Sudor duobus modis elicitur 100. febricitanti qui detergendus 137. frigidus quid indicet 61. 62. 65. 291. Sudatio nervorum vitia curat 100. quando conducit, *ibid.* Suffusionis oculorum curatio 435. Suppurationis signa 413. indicia 71. suppuratio variis modis excitatur 73 59. suppurationes tolerabiles 75. pessimæ quæ intus tendunt 79. suppurationum

I N D E X

internarum curatio 185.
 Sura, os 505.
 Surculus qui tollatur 310.
 Surditati biliosa alvus prod-
 est 78.
 Suturarum capitis numerus
 & locus incertus 497. fu-
 turæ Hippocratem deci-
 pientes 512.
 Σύκωσις 348.
 Συνάγχη 200. ὡς συνάγχη,
ibid.

T.

Tabes 172. curatio 174. ta-
 bem quæ significant 68.
 ea sequitur suppressionem
 hæmorrhoidum 71. nimias
 destillationes 73. tabis spu-
 tum quomodo esse debeat,
 febris, alvus 76.
 Talorum ossa 505. tali luxati
 cheirurgia 551.
 Telorum ejectio 418.
 Temeritas homines sæpe re-
 stituit 144.
 Tempestatum optimæ æqua-
 les 52.
 Tempus matutinum ægris re-
 missius est 132. natura le-
 vissimum, *ib.* tempus me-
 ridianum ægris gravius,
ib. vespertinum pessimum,
ib. temporis in curationi-
 bus morborum habenda
 ratio 426.
 Τενεσμός 231. curatio, *ib.*
 Τένοντες nervi 500.
 Terebrarum descriptio 508.
 Terra Eretria 349.
 Tertianæ curatio 150.
 Testiculorum anatome 456.
 inflammatio, durities, tu-
 mor 401.
 Τέτανος 198. curatio, *ib.*
 Τετραπτευμένα 267.
 Τετραφάρμακον emplastrum
 231. 266. 398. 402.
 Tharrias 164. 170.
 Themison 13. 228.
 Theoxenus 263.
 Θερίωμα 324. ejus curatio,
ib. & *sq.*
 Thoracis doloribus catapo-
 tium 286.
 Tibiæ os 505.
 Timæus 279.
 Τιθύμαλλος, lactuca marina
 248.
 Τομικοὶ dentes 499.
 Tonsillarum tumentium cu-
 ratio 386. exulceratarum
 387. induratarum cheirur-
 gia 446.
 Tormina minus periculosa
 77. intestinorum 227. pro-
 sunt lienosis 78. ab atra
 bile mortifera 82.
 Torpor quando perniciosus
 83.
 Transitus ex loco salubri in
 gravem tutus non est 33.
 Τροχίσκοι, pastilli 253.
 Tryphon pater 409.
 Tubercula capitis 422. gin-
 givarum 390. ex callo or-
 ta difficile sanantur arti-
 culosis 81.
 Tumorum per se ortorum
 medicatio 410 *sq.* tumo-
 ris testiculorum curatio
 401.

RERUM ET VERBORUM.

Tunicæ oculorum 434.
 Tunica abscessus involvens
 411.
 Tussis 204. curatio 205. hy-
 dropicis malum signum
 80. tussis in costarum fra-
 ctura infestantis medicina
 526. ad tussim catapotium
 286.
 Tympanitidis curatio 169.

V.

Valentissimum quid 103.
 Valetudinem adversam futu-
 ram quæ denotent 57. va-
 letudinem longam 62.
 Vari quomodo tollantur 350.
 Varices ventris 456. varicum
 curatio 494.
 Venarum in temporibus adu-
 stio pituitæ oculorum fa-
 nandæ 438. vena qui inci-
 denda 89. venæ sectio quæ,
 & quibus conveniat 85.
 quando, quæ & quibus
 conveniat 86 *sq.* ubi 88 *sq.*
 quo die 87 *sq.* in febre ve-
 hementi jugulare est 88.
 imperitis difficilis 89. fe-
 bris quando eam requirit
 86. convenit phreneticis
 156. cachecticis 174. epi-
 lepticis 177. elephantia
 laborantibus 181. attoni-
 tis 182 *sq.*
 Venenum exsugendum 314.
 venenorum maxima pars
 frigore interimit 315.
 Venti qui optimi 52.
 Venter sani qualia reddit
 59. ventris fluxus 232. cu-

ratio, *ib.* varices 456. ven-
 tris vulnera tractandi ra-
 tio 453. fistulæ 416.
 Ventriculus 189. ventriculi
 vulnerati notæ 293.
 Venus hieme non perniciofa
 42. vere tutissima, *ib.* æ-
 state & autumnno inutilis
 43. nervorum dolore la-
 borantibus inimica 48.
 noxia phthificis 176. epi-
 lepticis 177.
 Ver saluberrimum est 52. ve-
 re qui cibus conveniat 42.
 qui morbi oriantur 53.
 Vertebræ spinæ 500.
 Vesica 190. ejus cum stoma-
 cho consortium 485. vesi-
 cæ vitium quibus indice-
 tur 70. vulneratæ signa
 294.
 Vesicarum in palpebris medi-
 catio 424.
 Vexatorum curatio 410.
 Vincula iis, quibus calculi
 evulsi e vesica, non neces-
 saria 482.
 Vinum quod pueris & seni-
 bus convenit 41. lene pro-
 dest capite infirmo labo-
 ranti 44. alvo citæ quod-
 nam 45 *sq.* vulneri inimi-
 cissimum 301. 305. no-
 xium dentium dolori 384.
 Virginum calculi 480.
 Viride emplastrum 266. 269.
 Viscerum morbi 215. viscera
 vulnerata propriam exi-
 gunt curationem 300.
 Vita otiosa inutilis 33.
 Vitiliginis species variae 345.
 Ulcus vetus quomodo curan-

I N D E X

dum 307. ulceris vetusti oræ livent 305. ulcus aridum mortis indicium 64. ulcus implentia 251. ulceribus crustas inducentia 249. easdem resolventia, *ib.* ulceribus purgandis & implendis *ἐγχρίστα* 283. sordidis pastillus 274. ad ulcera mala, malagma 259. ulcera gingivarum 391. ulcerum oris medicatio 388. ulcus circa fauces quibus indicatur 69. ulceribus faucium purgandis catapotium 286. ulcera linguæ 390. digitorum 406. ulcerum e frigore in pedibus & manibus ortorum curatio 328. ulcera hydropticorum non facile sanescunt 166.

Umbilici vitii cheirurgia 449 *sq.* umbilici & secundarum extractio 491. umbilicorum prominentium curatio 395.

Unciæ pondus 252.

Unctio confert corpori 96.

Uncus infanti mortuo educendo 489.

Unguium ortus 503. scabrorum curatio 407. ungues pallidi mortem indicant 64.

Unguis oculorum 425.

Voci adjuvandæ catapotium 287.

Vomica hepatis 218.

Vomitum rejectum ab Asclepiade 37. quando utilis 38. quibus inutilis, *ib.* vomitu-

tum quid exigit, *ib.* vomitus luxuriæ causa fieri non debet, *ib.* non sit quotidianus, *ib.* vomitus remedia, *ib.* vomitus supprimit dejectiones 78. prodæ est biliosis 94. epilepticis, *ib.* nocet sanis 95. infirmo capite laborantibus alienus est 44. biliosus noxius vulnerato 302. post vomitum quid agendum 39.

Ureteres 190.

Urina sani qualis 59. mala 61. bona quænam vesicæ morbo 75. quæ valetudinem longam indicet 63. quæ mortem 65. crassa & alba articularum & viscerum dolores indicat 69. viridis, viscerum dolorem & tumorem indicat, *ib.* purulenta & sanguinolenta ulcus renum & vesicæ indicat, *ib.* crassa, carunculas, pilos, bullas, malum odorem, arenam habens renum vitia denotat, *ib.* & *sq.* liquida suppurationem 71. alba, dein rufas quid indicet 31. urinam moventia 115. urinæ difficultati sanandæ catapotium 287. urinæ nimia profusio 237.

Ὠρραυδς vesica 477.

Uvæ inflammatio 392. inflammatæ pastillus 274. inflammatæ excisio 446.

Vulnerato quid agendum 301.

Vulnera insanabilia 289. dif-

RERUM ET VERBORUM.

ficilia, *ib.* tutiora 290. quibus ossa loco moventur, periculosa 552. vulneris notæ 301 *sq.* curatio 302. derafi curatio 310. ligatio 300. glutinatio 297 *sq.* vulnus glutinantia 246. vulneribus glutinandis pastilli 273. vulnus quomodo purgandum 304. implendum *ib.* & *sq.* vulnus aperientia 246. purgantia 247. rodentia *ib.* & *sq.* vulnorum inflammationis curatio 297. 302. collisi vulneris curatio 310.

Vulpinum jecur ac pulmones asthmati sanando 203.

Vulva 190. ejus natura mira-

bilis 488. morbus 235. curatio, *ib.* vulvæ doleati catapotium 285. vulvæ concubitus non admittentis curatio 487. procidentia 405. ei molliendæ pectus 275. percussæ signa 292.

X.

Ξένιον 350.

Ξηροφθαλμία 368.

Z.

Zeno 244.

Zopyrus 281.

Ζυγώδες os 499.

W. H. M. 2
LIBRARY

